

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

३

ठाणं- तईअं अंगसुत्तं

मुनि दीपरत्नसागर

Date : / / 2012

Jain Aagam Online Series-3

कमंको	अज्झयणं	उद्देसका	सुत्तं	गाहा	अणुक्कमो	पिड्डंको
१	पढमं ठाणं	-	१-५६	-	१-५६	००२
२	बीअं ठाणं	१-४	५७-११८	१-७	५७-१२६	००५
३	तइयं ठाणं	१-४	११९-२३४	८-१३	१२७-२४८	०२१
४	चउत्थं ठाणं	१-४	२३५-३८८	१४-३४	२४९-४२२	०४०
५	पंचमं ठाणं	१-३	३८९-४७४	३५-३९	४२३-५२७	०७४
६	छट्ठं ठाणं	-	४७५-५४०	४०-४४	५२८-५९१	०८८
७	सत्तमं ठाणं	-	५४१-५९३	४५-८६	५९२-६९८	०९५
८	अट्ठमं ठाणं	-	५९४-६६०	८७-१०८	६९९-७९९	१०६
९	नवमं ठाणं	-	६६१-७०३	१०९-१४१	८००-८८७	११५
१०	दसमं ठाणं	-	७०४-७८३	१४२-१६९	८८८-१०१०	१२४

३ ठाणं-तइयं अंगसुत्तं

॥ पढमं ठाणं ॥

- [१] सुयं मे आउसं तेणं भगवता एवमक्खायं ।
- [२] एगे आया ।
- [३] एगे दंडे ।
- [४] एगा किरिया ।
- [५] एगे लोए ।
- [६] एगे अलोए ।
- [७] एगे धम्मे ।
- [८] एगे अहम्मे ।
- [९] एगे बंधे ।
- [१०] एगे मोक्खे ।
- [११] एगे पुण्णे ।
- [१२] एगे पावे ।
- [१३] एगे आसवे ।
- [१४] एगे संवरे ।
- [१५] एगा वेयणा ।
- [१६] एगा निज्जरा ।
- [१७] एगे जीवे पाडिक्कएणं सरीरएणं ।
- [१८] एगा जीवाणं अपरिआइत्ता विगुव्वणा ।
- [१९] एगे मणे ।
- [२०] एगा वर्ई ।
- [२१] एगे काय-वायामे ।
- [२२] एगा उप्पा ।
- [२३] एगा वियती ।
- [२४] एगा वियच्चा ।
- [२५] एगा गती ।
- [२६] एगा आगती ।
- [२७] एगे चयणे ।
- [२८] एगे उववाए ।

- [२९] एगा तक्का ।
 [३०] एगा सण्णा ।
 [३१] एगा मन्ना ।
 [३२] एगा विन्नू ।
 [३३] एगा वेयणा ।
 [३४] एगे छेयणे ।
 [३५] एगे भेयणे ।
 [३६] एगे मरणे अंतिमसारीरियाणं ।
 [३७] एगे संसुद्धे अहाभूए पत्ते ।
 [३८] एगे दुक्खे जीवाणं एगभूए ।
 [३९] एगा अहम्मपडिमा जं से आया परिकिलेसति ।
 [४०] एगा धम्मपडिमा जं से आया पज्जवजाए ।
 [४१] एगे मणे देवासुरमणुयाणं तंसि तंसि समयंसि, एगा वई देवासुरमणुयाणं तंसि तंसि समयंसि, एगे काय-वायामे देवासुरमणुयाणं तंसि तंसि समयंसि ।
 [४२] एगे उट्ठाण-कम्म-बल-वीरिय-पुरिसकार-परक्कमे देवासुरमणुयाणं तंसि तंसि समयंसि ।

- [४३] एगे नाणे एगे दंसणे एगे चरित्ते ।
 [४४] एगे समए ।
 [४५] एगे पएसे, एगे परमाणू ।
 [४६] एगा सिद्धि, एगे सिद्धे, एगे परिनिव्वाणे, एगे परिनिव्वुए ।
 [४७] एगे सद्धे, एगे रूवे, एगे गंधे, एगे रसे, एगे फासे, एगे सुब्भिसद्धे, एगे दुब्भिसद्धे, एगे सुरूवे, एगे दुरूवे, एगे दीहे, एगे हस्से, एगे वट्टे, एगे तंसे, एगे चउरंसे, एगे पिहुले, एगे परिमंडले, एगे किण्हे, एगे नीले, एगे लोहिए, एगे हालिद्धे, एगे सुक्किल्ले, एगे सुब्भिगंधे, एगे दुब्भिगंधे, एगे तित्ते, एगे कडुए, एगे कसाए, एगे अंबिले, एगे महुरे, एगे कक्खडे, जाव एगे लुक्खे ।

- [४८] एगे पाणातिवाए, [एगे मुसावाए एगे अदिण्णादाणे एगे मेहुणे एगे] परिग्गहे, एगे कोहे, [एगे माने एगा माया एगे] लोभे, एगे पेज्जे, एगे दोसे, एगे कलहे, एगे अब्भक्खाणे, एगे पेसुन्ने, एगे परपरिवाए, एगा अरतिरती, एगे मायामोसे, एगे मिच्छादंसणसल्ले ।

- [४९] एगे पाणाइवाय-वेरमणे, [एगे मुसावाय-वेरमणे एगे अदिन्नादाण-वेरमणे एगे मेहुण-वेरमणे एगे] परिग्गह-वेरमणे, एगे कोह-विवेगे, [एगे मान-विवेगे एगे माया-विवेगे एगे लोभ-विवेगे एगे पेज्ज-विवेगे एगे दोस-विवेगे एगे कलह-विवेगे एगे अब्भक्खाण-विवेगे एगे पेसुन्न-विवेगे एगे परपरिवाय-विवेगे एगे अरतिरति-विवेगे एगे मायामोस-विवेगे एगे] मिच्छादंसणसल्ल-विवेगे ।

- [५०] एगा ओसप्पिणी, एगा सुसम-सुसमा, [एगा सुसमा एगा सुसम-दूसमा एगा दूसम-सुसमा एगा दूसमा] एगा दूसम-दूसमा, एगा उस्सप्पिणी, एगा दुस्सम-दुस्समा, [एगा दुस्समा एगा दुस्सम-सुसमा एगा सुसम-दुस्समा एगा सुसमा एगा], सुसम-सुसमा ।

[५१] एगा नेरइयाणं वग्गणा, एगा असुरकुमाराणं वग्गणा, [एगा नागकुमाराणं वग्गणा एगा सुवण्णकुमाराणं वग्गणा एगा विज्जुकुमाराणं वग्गणा एगा अग्गिकुमाराणं वग्गणा एगा दीवकुमाराणं वग्गणा एगा उदहिकुमाराणं वग्गणा एगा दिसाकुमाराणं वग्गणा एगा वायुकुमाराणं वग्गणा एगा थणियकुमाराणं वग्गणा ।

एगा पुढविकाइयाणं वग्गणा एगा आउकाइयाणं वग्गणा एगा तेउकाइयाणं वग्गणा एगा वाउकाइयाणं वग्गणा एगा वणस्स-इकाइयाणं वग्गणा एगा बेइंदियाणं वग्गणा एगा तेइंदियाणं वग्गणा एगा चउरिंदियाणं वग्गणा एगा पंचिदियतिरिक्खजोणियाणं वग्गणा एगा मणुस्साणं वग्गणा एगा वाणमंतराणं वग्गणा एगा जोइसियाणं वग्गणा एगा] वेमाणियाणं वग्गणा,

एगा भवसिद्धियाणं वग्गणा, एगा अभवसिद्धियाणं वग्गणा, एगा भविसिद्धियाणं नेरइयाणं वग्गणा, एगा अभवसिद्धियाणं नेरइयाणं वग्गणा, एवं जाव एगा भवसिद्धियाणं वेमाणियाणं वग्गणा एगा अभवसिद्धियाणं वेमाणियाणं वग्गणा ।

एगा सम्मद्धिद्वियाणं वग्गणा, एगा मिच्छद्धिद्वियाणं वग्गणा एगा सम्ममिच्छद्धिद्वियाणं वग्गणा । एगा सम्मद्धिद्वियाणं नेरइयाणं वग्गणा, एगा मिच्छद्धिद्वियाणं नेरइयाणं वग्गणा, एगा सम्ममिच्छद्धिद्वियाणं नेरइयाणं वग्गणा, एवं जाव थणियकुमाराणं वग्गणा । एगा मिच्छद्धिद्वियाणं पुढविकाइयाणं वग्गणा एवं जाव वणस्सइकाइयाणं । एगा सम्मद्धिद्वियाणं बेइंदियाणं वग्गणा एगा मिच्छद्धिद्वियाणं बेइंदियाणं वग्गणा, एवं तेइंदियाणं वि, चउरिंदियाणं वि । सेसा जहा नेरइया जाव एगा सम्ममिच्छद्धिद्वियाणं वेमाणियाणं वग्गणा ।

एगा कण्हपक्खियाणं वग्गणा एगा, सुक्कपक्खियाणं वग्गणा एगा कण्हपक्खियाणं नेरइयाणं वग्गणा, एगा सुक्कपक्खियाणं नेरइयाणं वग्गणा, एवं- चउवीसदंडओ भाणियव्वो ।

एगा कण्हलेस्साणं वग्गणा, एगा नीललेसाणं वग्गणा, एवं जाव सुक्कलेसाणं वग्गणा, एगा कण्हलेसाणं नेरइयाणं वग्गणा, जाव एगा काउलेसाणं नेरइयाणं वग्गणा एवं-जस्स जइ लेसाओ, भवणवइ-वाणमंतर-पुढवि-आउ-वणस्सइकाइयाणं च चत्तारि लेसाओ तेउ-वाउ-बेइंदिय-तेइंदिय-चउरिंदियाणं तिन्नि लेसाओ, पंचिदियतिरिक्खजोणियाणं मणुस्साणं छल्लेस्साओ जोतिसियाणं एगा तेउलेसा वेमाणियाणं तिण्णि उवरिमलेसाओ, एगा कण्हलेसाणं भवसिद्धियाणं वग्गणा, एवंछसुवि लेसासु दो दो पयाणिभाणियव्वाणि । एगा कण्हलेसाणं भवसिद्धियाणं नेरइयाणं वग्गणा एगा कण्हलेसाणं अभवसिद्धियाणं नेरइयाणं वग्गणा एवं-जस्स जति लेसाओ तस्स ततियाओ भाणियव्वाओ जाव वेमाणियाणं ।

एगा कण्हलेसाणं सम्मद्धिद्वियाणं वग्गणा, एगा कण्हलेसाणं मिच्छद्धिद्वियाणं वग्गणा, एगा कण्हलेसाणं सम्ममिच्छद्धिद्वियाणं वग्गणा, एवं-छसुवि लेसासु जाव वेमाणियाणं जेसिं जइ दिद्विओ । एगा कण्हलेसाणं-कण्हपक्खियाणं वग्गणा, एगा कण्हलेसाणं सुक्क पक्खियाणं वग्गणा जाव वेमाणियाणं जस्स जति लेसाओ ए ए अट्ट चउवीसदंडया ।

एगा तित्थसिद्धाणं वग्गणा, एगा अतित्थसिद्धाणं वग्गणा, [एगा तित्थगरसिद्धाणं वग्गणा एगा सयंबुद्धसिद्धाणं वग्गणा एगा पत्तेयबुद्धसिद्धाणं वग्गणा एगा बुद्धबोहियसिद्धाणं वग्गणा एगा इत्थीलिंगसिद्धाणं वग्गणा एगा पुरिसलिंगसिद्धाणं वग्गणा एगा नपुंसकलिंगसिद्धाणं वग्गणा एगा अन्न-लिंगसिद्धाणं वग्गणा एगा गिहिलिंगसिद्धाणं वग्गणा, एगा] एक्क सिद्धाणं वग्गणा, एगा अणिककसिद्धाणं

वग्गणा, एगा अपढमसमयसिद्धाणं वग्गणा एवं जाव अणंत-समयसिद्धाणं वग्गणा ।

एगा परमाणुपोग्गलाणं वग्गणा एवं जाव एगा अणंतपएसियाणं खंधाणं वग्गणा । एगा एगपएसोगाढाणं पोग्गलाणं वग्गणा जाव एगा असंखेज्जपएसोगाढाणं पोग्गलाणं वग्गणा । एगा एगसमयठितियाणं पोग्गलाणं वग्गणा जाव एगा असंखेज्जसमयठितियाणं पोग्गलाणं वग्गणा । एगा एगगुणकालगाणं पोग्गलाणं वग्गणा जाव एगा असंखेज्ज-गुणकालगाणं पोग्गलाणं वग्गणा, एगा अनंतगुणकालगाणं पोग्गलाणं वग्गणा । एवं-वण्णा गंधा रसा फासा भाणियच्चा जाव एगा अनंतगुणलुक्खाणं पोग्गलाणं वग्गणा,

एगा जहण्णपएसियाणं खंधाणं वग्गणा, एगा उक्कस्सपएसियाणं खंधाणं वग्गणा, एगा अजहण्णुक्कस्सपएसियाणं खंधाणं वग्गणा, एवं जहण्णोगाहणगाणं, उक्कोसोगाहणगाणं, अजहण्णुक्को-सोगाहणगाणं, जहण्णठितियाणं, उक्कस्सठितियाणं, अजहण्णुक्कोसठितियाणं, जहण्णुगुणकालगाणं, उक्क-स्सगुणकालगाणं, अजहण्णुक्कस्सगुणकालगाणं खंधाणं वग्गणा, एवं-वण्ण-गंध-रस-फासाणं वग्गणा भाणियच्चा, जाव एगा अजहण्णुक्कस्सगुणलुक्खाणं पोग्गलाणं खंधाणं वग्गणा ।

[५२] एगे जंबुद्धीवे दीवे सच्चदीवसमुद्धानं सच्चभंतराए [सच्चखुड्डाए वट्टे तेल्लापूय संठाणसंठिए वट्टे रहचक्कवालसंठाणसंठिए वट्टे पुक्खरकणियासंठाणसंठिए वट्टे पडिपुण्णचंदसं-ठाणसंठिए एगं जोयणसयसहस्सं आयामविक्खभेणं तिण्णि जोयणसयसहस्साइं सोलस सहस्साइं दोण्णि य सत्तावीसे जोयणसए तिण्णि य कोसे अट्ठावीसं च धणुसयं तेरस अंगुलाइं] अट्ठंगुलं च किंचिविसेसाहिए परिकखेवेणं ।

[५३] एगे समणे भगवं महावीरे इमीसे ओसप्पिणीए चउव्वीसाए तित्थगराणं चरमतित्थये सिद्धे बुद्धे मुत्ते अंतगडे परिनिव्वुडे सच्चदुक्खप्पहीणे ।

[५४] अनुत्तरोववाइया णं देवा एगं रयणि उड्ढं उच्चत्तेणं पण्णत्ता ।

[५५] अट्ठानक्खत्ते एगतारे पण्णत्ते, चित्तानक्खत्ते एगतारे पण्णत्ते, सातिनक्खत्ते एगतारे पण्णत्ते ।

[५६] एगपदेसोगाढा पोग्गला अनंता पण्णत्ता, एगसमयठितिया पोग्गला अनंता पण्णत्ता, एगगुणकालगा पोग्गला अनंता पण्णत्ता जाव एगगुणलुक्खा पोग्गला अनंता पण्णत्ता ।

◦ पढमं ठाणं समत्तं ◦

◦ मुनि दीपरत्नसागरेण संशोधितः सम्पादितश्च पढमं ठाणं समत्तं ◦

() बीअं-ठाणं ()

० पढमो-उद्देशो ०

[५७] जदत्थि णं लोगे तं सच्चं दुपओआरं तं जहा- जीवच्चेव अजीवच्चेव । तसच्चेव थावरच्चेव, सजोणियच्चेव अजोणियच्चेव, साउयच्चेव अणाउयच्चेव, सइंदियच्चेव अण्णिंदियच्चेव, सवेयगा चेव अवेयगा चेव, सरूवी चेव अरूवी चेव, सपोग्गला चेव अपोग्गला चेव, संसारसमावण्णगा चेव असंसारसमावण्णगा, चेव सासया चेव असासया चेव ।

[५८] आगासे चेव नोआगासे चेव, धम्मं चेव अधम्मं चेव ।

[५९] बंधे चैव मोक्खे चैव, पुण्णे चैव पावे चैव, आसवे चैव संवरे चैव, वेयणा चैव निज्जरा चैव ।

[६०] दो किरियाओ पण्णत्ताओ तं जहा- जीवकिरिया चैव अजीवकिरिया चैव, जीवकिरिया दुविहा पण्णत्ता तं जहा- सम्मत्तकिरिया चैव मिच्छत्तकिरिया चैव, अजीवकिरिया दुविहा पण्णत्ता तं जहा-इरियावहिया चैव संपराइगा चैव ।

दो किरियाओ पण्णत्ताओ तं जहा- काइया चैव आहिगरणिया चैव, काइया किरिया दुविहा पण्णत्ता तं जहा- अणुवरयकायकिरिया चैव दुपउत्तकायकिरिया चैव, आहिगरणिया किरिया दुविहा पण्णत्ता तं जहा- संजोयणाधिकरणिया चैव निव्वत्तणाधिकरणिया चैव ।

दो किरियाओ पण्णत्ताओ तं जहा- पाओसिया चैव पारियावणिया चैव, पाओसिया किरिया दुविहा पण्णत्ता तं जहा- जीवपाओसिया चैव अजीवपाओसिया चैव, पारियावणिया किरिया दुविहा पण्णत्ता तं जहा- सहत्थपारियावणिया चैव परहत्थपारियावणिया चैव ।

दो किरियाओ पण्णत्ताओ तं जहा- पाणातिवायकिरिया चैव अपच्चक्खाणकिरिया चैव, पाणातिवायकिरिया दुविहा पण्णत्ता तं जहा- सहत्थपाणातिवायकिरिया चैव परहत्थपाणातिवायकिरिया चैव, अपच्चक्खाणकिरिया दुविहा पण्णत्ता तं जहा- जीवअपच्चक्खाणकिरिया चैव अजीवअपच्चक्खाणकिरिया चैव ।

दो किरियाओ पण्णत्ताओ तं जहा- आरंभिया चैव पारिग्गहिया चैव, आरंभिया किरिया दुविहा पण्णत्ता तं जहा- जीवआरंभिया चैव अजीव आरंभिया चैव, पारिग्गहिया किरिया दुविहा पण्णत्ता तं जहा- जीवपारिग्गहिया चैव अजीवपारिग्गहिया चैव ।

दो किरियाओ पण्णत्ताओ तं जहा- मायावत्तिया चैव मिच्छादंसणवत्तिया चैव, मायावत्तिया किरिया दुविहा पण्णत्ता तं जहा- आयभाववंकणता चैव परभाव-वंकणता चैव, मिच्छादंसणवत्तिया किरिया दुविहा पण्णत्ता तं जहा- ऊणाइरियामिच्छादंसणवत्तिया चैव तव्वइरित्तमिच्छादंसणवत्तिया चैव ।

दो किरियाओ पण्णत्ताओ तं जहा- दिट्ठिया चैव पुट्ठिया चैव, दिट्ठिया किरिया दुविहा पण्णत्ता तं जहा- जीवदिट्ठिया चैव अजीवदिट्ठिया चैव, पुट्ठिया किरिया दुविहा पण्णत्ता तं जहा- जीवपुट्ठिया चैव अजीवपुट्ठिया चैव ।

दो किरियाओ पण्णत्ताओ तं जहा- पाडुच्चिया चैव सामंतोवणियाइया चैव, पाडुच्चिया किरिया दुविहा पण्णत्ता, तं जहा- जीव पाडुच्चिया चैव अजीव पाडुच्चिया चैव, एवं सामंतोवणियाइया वि ।

दो किरियाओ पण्णत्ताओ तं जहा- साहत्थिया चैव नेसत्थिया चैव, साहत्थिया किरिया दुविहा पण्णत्ता तं जहा- जीवसाहत्थिया चैव अजीवसाहत्थिया चैव, एवं नेसत्थिया वि,

दो किरियाओ पण्णत्ताओ तं जहा- आणवणिया चैव वेयारणिया चैव, आणवणिया किरिया दुविहा पण्णत्ता तं जहा- जीवआणवणिया चैव अजीवआणवणिया चैव, एवं वेयारणिया वि ।

दो किरियाओ पण्णत्ताओ तं जहा- अनाभोगवत्तिया चैव अणवकंखवत्तिया चैव, अनाभोग-वत्तिया किरिया दुविहा पण्णत्ता तं जहा- अनाउत्तआइयणता चैव अनाउत्तपमज्जणता चैव,

अणवकंखवत्तिया किरिया दुविहा पण्णत्ता तं जहा- आयसरीरअणवकंखवत्तिया चेव परसरीरअणवकंखवत्तिया चेव ।

दो किरियाओ पण्णत्ताओ तं जहा- पेज्जवत्तिया चेव दोसवत्तिया चेव, पेज्जवत्तिया किरिया

ठाणं-२, उद्देशो-१

दुविहा पण्णत्ता तं जहा- मायावत्तिया चेव लोभवत्तिया चेव, दोसवत्तिया किरिया दुविहा पण्णत्ता तं जहा- कोहे चेव माणे चेव ।

[६१] दुविहा गरिहा पण्णत्ता तं जहा- मणसा वेगे गरहति वयसा वेगे गरहति, अहवा गरहा दुविहा पण्णत्ता तं जहा- दीहं वेगे अद्धं गरहति रहस्सं वेगे अद्धं गरहति ।

[६२] दुविहे पच्चक्खाणे प० तं०- मणसा वेगे पच्चक्खाति वयसा वेगे पच्चक्खाति, अहवा पच्चक्खाणे दुविहे प० तं०- दीहं वेगे अद्धं पच्चक्खाति रहस्सं वेगे अद्धं पच्चक्खाति ।

[६३] दोहिं ठाणेहिं संपन्ने अणगारे अणादीयं अणवयग्गं दीहमद्धं चाउरंतं संसारकंतारं वीतिवएज्जा तं जहा- विज्जाए चेव चरणेण चेव ।

[६४] दो ठाणाइं अपरियाणेतता आया नो केवलिपण्णत्तं धम्मं लभेज्ज सवणयाए, तं जहा-आरंभे चेव परिग्गहे चेव, दो ठाणाइं अपरियाणेतता आया नो केवलं बोधिं बुज्झोज्जा तं जहा-आरंभे चेव परिग्गहे चेव, दो ठाणाइं अपरियाणेतता आया नो केवलं मुंडे भवित्ता अगाराओ अणगारियं पव्वइज्जा तं जहा-आरंभे चेव परिग्गहे चेव, एवं नो केवलं बंभेचरेवासमावसेज्जा, नो केवलं संजमेणं संजमेज्जा, नो केवलेणं संवरेणं संवरेज्जा, नो केवलं आभिणिबोहियनाणं उप्पाडेज्जा ।

एवं सुयनाणं, ओहिनाणं, मनपज्जवनाणं, केवलनाणं।

[६५] दो ठाणाइं परियाणेतता आया केवलिपण्णत्तं धम्मं लभेज्ज सवणयाए तं जहा-आरंभे चेव परिग्गहे चेव जाव उप्पाडेज्जा तं जहा- आरंभे चेव परिग्गहे चेव ।

[६६] दोहिं ठाणेहिं आया केवलिपण्णत्तं धम्मं लभेज्ज सवणयाए तं जहा सोच्च-च्चेव अभिसमेच्च-च्चेव जाव दोहिं ठाणेहिं आया केवलं केवलनाणं उप्पाडेज्जा तं जहा-सोच्चच्चेव अभिसमेच्चच्चेव ।

[६७] दो समाओ प० तं०- ओसप्पिणी समा चेव उस्सप्पिणी समा चेव ।

[६८] दुविहे उम्माए पण्णत्ते तं जहा- जक्खाएसे चेव मोहणिज्जस्स चेव कम्मस्स उदएणं तत्थ णं जे से जक्खाएसे से णं सुहवेयतराए चेव सुहविमोयतराए चेव, तत्थ णं जे से मोहणिज्जस्स कम्मस्स उदएणं से णं दुहवेयतराए चेव दुहविमोयतराए चेव ।

[६९] दो दंडा पण्णत्ता तं जहा-अट्ठादंडे चेव अणट्ठादंडे चेव, नेरइयाणं दो दंडा पण्णत्ता तं जहा- अट्ठादंडे य अणट्ठादंडे य, एवं- चउवीसादंडओ जाव वेमाणियाणं ।

[७०] दुविहे दंसणे पण्णत्ते तं जहा-सम्मदंसणे चेव मिच्छादंसणे चेव ।

सम्मदंसणे दुविहे पण्णत्ते तं जहा-निसग्गसम्मदंसणे चेव अभिगमसम्मदंसणे चेव, निसग्गसम्मदंसणे दुविह पण्णत्ते तं जहा-पडिवाइ चेव अपडिवाइ चेव, अभिगमसम्मदंसणे दुविहे पण्णत्ते तं जहा-पडिवाइ चेव अपडिवाइ चेव,

मिच्छादंसणे दुविहे पण्णत्ते तं जहा-अभिग्गहियमिच्छादंसणे चेव अणभिग्गहियमिच्छा-
दंसंसणे चेव, अभिग्गहियमिच्छादंसणे दुविहे पण्णत्ते तं जहा-सपज्जवसिते चेव अपज्जवसिते चेव, एवं
अणभिग्गहिय-मिच्छादंसणेऽवि ।

[७१] दुविहे नाणे पण्णत्ते तं जहा-पच्चक्खे चेव परोक्खे चेव ।

पच्चक्खे नाणे दुविहे पण्णत्ते तं जहा-केवलनाणे चेव नोकेवलनाणे चेव, केवलनाणे दुविहे
ठाणं-१, उद्देशो-

पण्णत्ते तं जहा-भवत्थकेवलनाणे चेव सिद्धकेवलनाणे चेव ।

भवत्थकेवलनाणे दुविहे पण्णत्ते तं जहा-सजोगिभवत्थ केवलनाणे चेव अजोगिभवत्थ-
केवलनाणे चेव सजोगिभवत्थकेवलनाणे दुविहे पण्णत्ते तं जहा- पढमसमयसजोगिभवत्थकेवलनाणे चेव
अपढमसमयसजोगिभवत्थ-केवलनाणे चेव अहवा- चरिमसमयसजोगिभवत्थकेवलनाणे चेव अचरिमसमय-
समजोगिभवत्थकेवल-नाणे चेव, एवं अजोगिभवत्थकेवलनाणे वि ।

सिद्धकेवलनाणे दुविहे पण्णत्ते तं जहा-अणंतरसिद्धकेवलनाणे चेव परंपरसिद्धकेवलनाणे चेव,
अणंतरसिद्ध-केवलनाणे दुविहे पण्णत्ते तं जहा- एककाणंतरसिद्धकेवलनाणे चेव अणेक्काणंतरसिद्धकेवलनाणे
चेव, परंपर-सिद्धकेवलनाणे दुविहे पण्णत्ते तं जहा-एक्कपरंपरसिद्धकेवलनाणे चेव अणेक्कपरंपरसिद्ध-
केवलनाणे चेव नोकेवलनाणे दुविहे पण्णत्ते तं जहा-ओहिनाणे चेव मणपज्जवनाणे चेव ।

ओहिनाणे दुविहे पण्णत्ते तं जहा-भवपच्चइए चेव खओवसमिए चेव, दोण्हं भवपच्चइए
पण्णत्ते तं जहा-देवाणं चेव नेरइयाणं चेव, दोण्हं खओवसमिए पण्णत्ते तं जहा-मणुस्साणं चेव
पंचिदियतिरिक्खजोणियाणं चेव,

मणपज्जवनाणे दुविहे पण्णत्ते तं जहा- उज्जुमति चेव विउलमति चेव

परोक्खे नाणे दुविहे पण्णत्ते तं जहा-आभिणिबोहियनाणे चेव सुयनाणे चेव,
आभिणिबोहिय- नाणे दुविहे पण्णत्ते तं जहा-सुयणिस्सिए चेव असुयणिस्सिए चेव, सुयणिस्सिए दुविहे
पण्णत्ते तं जहा-अत्थोग्गहे चेव वंजणोग्गहे चेव, असुयणिस्सिएऽवि एमेव ।

सुयनाणे दुविहे पं० तं० जहा-अंगपविट्ठे चेव अंगबाहिरे चेव, अंगबाहिरे दुविहे पण्णत्ते तं
जहा- आवस्सए चेव आवस्सयवतिरित्ते चेव, आवस्सयवतिरित्ते दुविहे पण्णत्ते तं जहा- कालिए चेव
उक्कालिए चेव ।

[७२] दुविहे धम्मं पण्णत्ते तं जहा-सुयधम्मं चेव चरित्तधम्मं चेव, सुयधम्मं दुविहे
पण्णत्ते तं जहा- अगारचरित्तधम्मं चेव अणगारचरित्त धम्मं चेव,

दुविहे संजमे पण्णत्ते तं जहा- सरागसंजमे चेव वीतरागसंजमे चेव, सरागसंजमे दुविहे
पण्णत्ते तं जहा- सुहुमसंपरायसरागसंजमे चेव बादर-संपरायसरागसंजमे चेव, सुहुमसंपरायसरागसंजमे
दुविहे पण्णत्ते तं जहा- पढमसमय सुहुमसंपरायसराग-संजमे चेव अपढमसमय सुहुमसंपरायसरागसंजमे
चेव, अहवा-सुहुमसंपरायसरागसंजमे दुविहे पण्णत्ते तं जहा- संकिलेसमाणे चेव विसुज्झमाणे चेव,

बादरसंपरायसरागसंजमे दुविए पण्णत्ते तं जहा- पढमसमय बादरसंपरायसरागसंजमे चेव
अपढमसमय बादरसंपरायसरागसंजमे चेव, अहवा-चरिमसमयबादरसंपरायसरागसंजमे चेव अचरिमसमय-
बादरसंपरायसरागसंजमे चेव, अहवा-बादरसंपरायसरागजमे दुविहे पण्णत्ते तं जहा- पडिवातिए चेव अपडि-
वातिए चेव, वीयरगसंजमे दुविहे पण्णत्ते तं जहा- उवसंतकसायवीयरगसंजमे चेव खीणकसायवीयरग-

संजमे चेव उवसंतकसायवीयरागसंजमे दुविहे पण्णत्ते तं जहा- पढमसमयउवसंतकसायवीयरागसंजमे चेव अपढमसमय-उवसंतकसायवीयरागसंजमे चेव अहवा-चरिमसमयउवसंतकसायवीयरागसंजमे चेव अचरिम-समयउवसंतकसायवीयरागसंजमे चेव,

खीणकसायवीयरागसंजे दुविहे पण्णत्ते तं जहा- छउमत्थखीणकसाय-वीयरागसंजमे चेव केवलिखीणकसायवीयरागसंजमे चेव,

ठाणं-२, उद्देसो-१

छउमत्थखीणकसायवीयरागसंजमे दुविहे पण्णत्ते तं जहा- सयंबुद्धछउमत्थ खीणकसायवीत-रागसंजमे चेव बुद्धबोहियछउमत्थ खीणकसायवीतरागसंजमे चेव, सयंबुद्धछउमत्थ खीणकसायवीयरागसंजमे दुविहे पण्णत्ते तं जहा- पढमसमयसयंबुद्धछउमत्थ खीणकसाय-वीतरागसंजमे चेव अपढमसमयसयं-बुद्धछउमत्थ खीणकसायवीतरागसंजमे चेव, अहवा-चरिमसमयसयंबुद्ध छ-उमत्थखीण कसायवीतरागसंजे चेव अचरिमसमयसयंबुद्धछउमत्थ खीणकसायवीतरागसंजमे चेव ।

बुद्धबोहिय छउमत्थ खीणकसायवीतरागसंजमे दुविहे पण्णत्ते तं जहा- पढमसमयबुद्धबोहिय छउमत्थखीणकसाय-वीतरागसंजमे चेव अपढमसमयबुद्धबोहिय छउमत्थखीणकसायवीतरागसंजमे चेव, अहवा-चरिमसमयबुद्ध-बोहिय छउमत्थखीणकसायवीयरागसंजमे चेव अचरिमसमयबुद्धबोहियछउमत्थ खीण-कसायवीयरागसंजमे चेव, केवलिखीणकसायवीयरागसंजमे दुविहे पण्णत्ते तं जहा- सजोगिकेवलि खीणक-सायवीयरागसंजमे चेव अजोगिकेवलि खीणकसायवीयरागसंजमे चेव, सजोगिकेवलि खीणकसायवीय-रागसंजमे दुविहे पण्णत्ते तं जहा- पढमसमयसजोगिकेवलिखीणकसायवीयरागसंजमे चेव अपढमसमय-सजोगिकेवलिखीणकसायवीयराग-संजमे चेव अहवा-चरिमसमयसजोगि०, अचरिमसमयसजोगि केवलिखीण-कसाय-वीयरागसंजमे चेव, अजोगिकेवलिखीणकसायवीयरागसंजमे दुविहे पण्णत्ते तं जहा- पढमसमय-अजोगि०, अपढमसमयअजोगि केवलिखीणकसायवीयरागसंजमे चेव, अहवा चरिमसमय-अजोगि०, अचरिम-समयअजोगि केवलिखीणकसाय-वीयरागसंजमे चेव ।

[७३] दुविहा पुढविकाइया पण्णत्ता तं जहा- सुहुमा चेव बायरा चेव, एवं जाव दुविहा वणस्सइकाइया पण्णत्ता तं जहा- सुहुमा चेव बायरा चेव,

दुविहा पुढविकाइया पण्णत्ता तं जहा- पज्जत्तगा चेव अपज्जत्तगा चेव, एवं जाव वणस्सइ- काइया पण्णत्ता तं जहा- पज्जत्तगा चेव अपज्जत्तगा चेव ।

दुविहा पुढविकाइया पण्णत्ता तं जहा- परिणया चेव अपरिणया चेव एवं जाव वणस्सइकाइया,

दुविहा दव्वा पण्णत्ता तं जहा- परिणया चेव अपरिणया चेव ।

दुविहा पुढविकाइया पण्णत्ता तं जहा- गतिसमावण्णगा चेव अगतिसमावण्णगा चेव एवं जाव वणस्सइकाइया,

दुविहा दव्वा पण्णत्ता तं जहा- गतिसमावण्णगा चेव अगतिसमावण्णगा चेव ।

दुविहा पुढविकाइया पण्णत्ता तं जहा- अणंतरोगाढा चेव परंपरोगाढा चेव जाव दुविहा दव्वा पण्णत्ता तं जहा- अणंतरोगाढा चेव परंपरोगाढा चेव ।

[७४] दुविहे काले पण्णत्ते तं जहा- ओसप्पिणीकाले चेव उस्सप्पिणीकाले चेव, दुविहे आगासे पण्णत्ते तं जहा- लोगागासे चेव अलोगागासे चेव ।

[७५] नेरइयाणं दो सरीरगा पण्णत्ता तं जहा- अब्भंतरगे चेव बाहिरगे चेव, अब्भंतरगे कम्मए बाहिरगे वेउच्चिए, एवं देवाणं भाणियच्चं पुढविकाइयाणं दो सरीरगा पण्णत्ता तं जहा- अब्भंतरगे चेव बाहिरगे चेव अब्भंतरगे कम्मए बाहिरगे ओरालिए जाव वणस्सइकाइयाणं,

बेइंदियाणं दो सरीरा पण्णत्ता तं जहा- अब्भंतरगे चेव बाहिरगे चेव अब्भंतरगे कम्मए, अट्ठिमंससोणितबद्धे बाहिरगे ओरालिए, एवं जाव चउरिंदियाणं०

ठाणं-२, उद्देसो-१

पंचिदियतिरिक्खजोणियाणं दो सरीरगा पण्णत्ता तं जहा- अब्भंतरगे चेव बाहिरगे चेव, अब्भंतरगे कम्मए अट्ठिमंससोणियणहारुछिराबद्धे बाहिरगे ओरालिए, मणुस्साणं वि एवं चेव ।

विग्गहगइसमावण्णगाणं नेरइयाण दो सरीरगा पण्णत्ता तं जहा- तेयए चेव कम्मए चेव, निरंतरं जाव वेमाणियाणं ।

नेरइयाणं दोहिं ठाणेहिं सरीरुप्पत्ती सिया, तं जहा- रागेण चेव दोसेण चेव, जाव वेमाणियाणं । नेरइयाणं दुट्ठाणणिव्वत्तिए सरीरगे पण्णत्ते तं जहा- रागणिव्वत्तिए चेव दोसणिव्वत्तिए चेव जाव वेमाणियाणं,

दो काया पण्णत्ता तं० जहा- तसकाए चेव थावरकाए चेव, तसकाए दुविहे पण्णत्ते तं जहा- भवसिद्धिए चेव अभवसिद्धिए चेव, एवं थावरकाएऽवि।

[७६] दो दिसाओ अभिगिज्झ कप्पति निग्गंथाण वा निग्गंथीण वा पच्चावित्तए- पाइणं चेव उदीणं चेव । एवं- मुंडावित्तए सिक्खावित्तए उवट्ठावित्तए संभुंजित्तए संवसित्तए सज्झायमुद्धिसित्तए सज्झायं समुद्धिसित्तए सज्झायमणुजाणित्तए आलोइत्तए पडिक्कमित्तए निंदित्तए गरहित्तए विउट्ठित्तए विसोहित्तए अकरणयाए अब्भुट्ठित्तए अहारिहे पायच्छित्तं तवोकम्मं पडिवज्जित्तए पाईणं चेव उदीणं चेव ।

दो दिसाओ अभिगिज्झ कप्पति निग्गंथाण वा निग्गंथीण वा अपच्छिम मारणंतिय- संलेहणा-जूसणा-जूसियाणं भत्तपाणपडियाइक्खिताणं पाओवगताणं कालं अणवकंखमाणं विहरित्तए तं जहा- पाईणं चेव उदीणं चेव ।

• बीए ठाणे पढमो उद्देसो समत्तो •

० बीओ - उद्देसो ०

[७७] जे देवा उड्ढोववण्णगा कप्पोववण्णगा विमाणोववण्णगा चारोववण्णगा चारट्ठितिया गतिरतिया गतिसमावण्णगा, तेसिणं देवाणं सता समितं जे पावे कम्मए कज्जति तत्थगतावि एगतिया वेदणं वेदेंति अण्णत्थगतावि एगतिया वेदणं वेदेंति, नेरइयाणं सता समियं जे पावे कम्मए कज्जति तत्थगतावि एगतिया वेदणं वेदेंति अण्णत्थगतावि एगतिया वेदणं वेदेंति, जाव पंचेदियातिरिक्खजोणियाणं मणुस्साणं सता समित्तं जे पावे कम्मए कज्जति इरगतावि एगतिया वेदणं वेदेंति अण्णत्थगतावि एगतिया वेदणं वेदेंति मणुस्सवज्जा सेसा एक्कगमा ।

[७८] नेरतिता नेरइया दुगतिया दुयागतिया प० तं०- नेरइए नेरइएसु उववज्जमाणे मणुस्सेहिंतो वा पंचिदियतिरिक्खजोणिएहिंतो वा उववज्जेज्जा, स चेव णं से नेरइए नेरइयत्तं विप्पजहमाणे मणुस्सत्ताए वा पंचिदियतिरिक्ख-जोणियत्ताए वा गच्छेज्जा, एवं असुरकुमारावि, नवरं- से

चेव णं से असुरकुमारे असुर-कुमारत्तं विप्पजहमाणे मणुस्सत्ताए वा तिरिक्खजोणियत्ताए वा गच्छेज्जा, एवं- सव्वदेवा पुढविकाइया दुगतिया दयागतिया प० तं०-पुढविकाइए पुढविकाइएसु उववज्जमाणे पुढविकाइएहिंतो वा नो पुढविकाइएहिंतो वा उववज्जेज्जा, से चेव णं से पुढविकाइए पुढविकाइयत्तं विप्पजहमाणे पुढविकाइयत्ताए वा नो एवं जाव मणुस्सा ।

[७९] दुविहा नेरइया पण्णत्ता तं जहा- भवसिद्धिया चेव अभवसिद्धिया चेव जाव वेमाणिया।
दुविहा नेरइया पण्णत्ता तं जहा-अणंतरोववण्णगा चेव परंपरोववण्णगा चेव जाव वेमाणिया । दुविहा
नेरइया

ठाणं-२, उद्देशो-२

पण्णत्ता तं जहा- गतिसमावण्णगा चेव अगतिसमावण्णगा चेव जाव वेमाणिया ।

दुविहा नेरइया पण्णत्ता तं जहा- पढमसमओववण्णगा चेव अपढमसमओववण्णगा चेव जाव वेमाणिया । दुविहा नेरइया पण्णत्ता तं जहा- उस्सासगा चेव नोउस्सासगा चेव जाव वेमाणिया ।
दुविहा नेरइया पण्णत्ता तं जहा- सइंदिया चेव अणिंदिया चेव जावं वेमाणिया ।

दुविहा नेरइया पण्णत्ता तं जहा- पज्जत्तगा चेव अपज्जत्तगा चेव जाव वेमाणिया ।
दुविहा नेरइया पण्णत्ता तं जहा-सण्णी चेव असण्णी चेव एवं पंचेंदिया सव्वे विगलिनंदियवज्जा, जाव वाणमंतरा ।

दुविहा नेरइया पण्णत्ता तं जहा-भासगा चेव अभासगा चेव एवमेगिंदियवज्जासव्वे दुविहा नेरइया पण्णत्ता तं जहा-सम्मद्धिद्विया चेव मिच्छाद्धिद्विया चेव एगिंदियवज्जा सव्वे ।

दुविहा नेरइया पण्णत्ता तं जहा-परित्तसंसारिता चेव अनंतसंसारिता चेव जाव वेमाणिया
दुविहा नेरइया पण्णत्ता तं जहा- संखेज्जकालसमयद्वितिया चेव असंखेज्जकालसमयद्वितिया चेव, एवं- पंचेंदिया एगिंदियाविंगलिनंदियावज्जा जाव वाणमंतरा ।

दुविहा नेरइया पण्णत्ता तं जहा- सुलभबोधिया चेव दुलभबोधिया चेव जाव वेमाणिया ।
दुविहा नेरइया पण्णत्ता तं जहा- कण्हपक्खिया चेव सुक्कपक्खिया चेव जाव वेमाणिया दुविहा नेरइया पण्णत्ता तं जहा- चरिमा चेव अचरिमा चेव जाव वेमाणिया ।

[८०] दोहिं ठाणेहिं आया अहेलोगं जाणइ-पासइ तं जहा- समोहतेणं चेव अप्पाणेणं आया अहेलोगं जाणइ-पासइ असमोहतेणं चेव अप्पाणेणं आया अहेलोगं जाणइ-पासइ, आहोहिं समोहतासमोहतेणं चेव अप्पाणेणं आया अहेलोगं जाणइ-पासइ । एवं तिरियलोगं, उड्ढलोगं, केवलकप्पं लोणं जाणइ-पासइ।

दोहिं ठाणेहिं आया अहेलोगं जाणइ-पासइ तं जहा- विउव्वितेणं चेव अप्पाणेणं आता अहेलोगं जाणइ-पासइ अविउव्वितेणं चेव अप्पाणेणं आता अहेलोगं जाणइ-पा० आहोहिं विउव्विया विउव्वितेणं चेव अप्पाणेणं आया अहेलोगं जाणइ-पासइ एवं तिरियलोगं, उड्ढलोगं केवल-कप्पलोगं जाणइ-पासइ ।

दोहिं ठाणेहिं आया सद्दाइं सुणेति तं जहा- देसेण वि आया सद्दाइं सुणेति सव्वेणवि आया सद्दाइं सुणेति एवं रूवाइं पासइ, गंधाइं अग्घाति, रसाइं आसादेति, फासाइं पडिसंवेदेति ।

दोहिं ठाणेहिं आया ओभासति तं जहा- देसेण वि आया ओभासति सव्वेण वि आया ओभासति, एवं पभासति विकुव्वति परियारेति भासं भासति आहारेतिं परिणामेति वेदेति निज्जरेति ।

दोहिं ठाणेहिं देवे सद्दाइं सुणेति तं जहा- देसेणवि देवे सद्दाइं सुणेति सव्वेणवि देवे सद्दाइं सुणेति जाव निज्जरेति ।

मरुया देवा दुविहा पण्णत्ता तं जहा- एगसरीरी चेव दुसरीरी चेव, एवं किन्नरा किंपुरिसा गंधच्वा नागकुमारा सुवण्णकुमारा अग्गिकुमारा वायुकुमारा देवा दुविहा पण्णत्ता तं जहा- एगसरीरी चेव दुसरीरी चेव ।

◦ बीए ठाणे बीओ उद्देसो समत्तो ◦

० तइओ-उद्देसो ०

[८१] दुविहे सद्दे पण्णत्ते तं जहा- भासासद्दे चेव नोभासासद्दे चेव, भासासद्दे दुविहे पण्णत्ते तं जहा- अक्खरसंबद्धे चेव नोअक्खरसंबद्धे चेव, नोभासासद्दे दुविहे पण्णत्ते तं जहा- आउज्जसद्दे चेव ठाणं-२, उद्देसो-२

नोआउज्जसद्दे चेव, आउज्जसद्दे दुविहे पण्णत्ते तं जहा- तते चेव वितते चेव ।

तते दुविहे पण्णत्ते तं जहा- घणे चेव सुसिरे चेव, एवं वितते वि नोआउज्जसद्दे दुविहे पण्णत्ते तं जहा- भूसणसद्दे चेव नोभूसणसद्दे चेव, नोभूसणसद्दे दुविहे पण्णत्तं तं जहा- तालसद्दे चेव लत्तियासद्दे चेव,

दोहिं ठाणेहिं सद्दुप्पाते सिया तं जहा- साहण्णंताणं चेव पोग्गलाणं सद्दुप्पाए सिया भिज्जंताणं चेव पोग्गलाणं सद्दुप्पाए सिया ।

[८२] दोहिं ठाणेहिं पोग्गला साहण्णंति तं जहा- सइं वा पोग्गला साहण्णंति परेणं वा पोग्गला साहण्णंति । दोहिं ठाणेहिं पोग्गला भिज्जंति तं जहा- सइं वा पोग्गला भिज्जंति परेण वा पोग्गला भिज्जंति । दोहिं ठाणेहिं पोग्गला परिसडंति तं जहा- सइं वा पोग्गला परिसडंति परेणं वा पोग्गला परिसडंति । एवं परिवडंति, विद्धंसंति ।

दुविहा पोग्गला पण्णत्ता तं जहा- भिण्णा चेव अभिण्णा चेव । दुविहा पोग्गला पण्णत्ता तं जहा- मेउरधम्मा चेव नोभेउरधम्मा चेव । दुविहा पोग्गला पण्णत्ता तं जहा- परमाणुपोग्गला चेव नोपरमाणुपोग्गला चेव । दुविहा पोग्गला पण्णत्ता तं जहा- सुहुमा चेव बायरा चेव ।

दुविहा पोग्गला पण्णत्ता तं जहा- बद्धपासपुट्ठा चेव नोबद्धपासपुट्ठा चेव । दुविहा पोग्गला पण्णत्ता तं जहा- परियादितच्चेव अपरियादितच्चेव । दुविहा पोग्गला पण्णत्ता तं जहा- अत्ता चेव अणत्ता चेव । दुविहा पोग्गला पं. तं जहा- इट्ठा चेव अणिट्ठा चेव, कंता चेव अकंता चेव, पिया चेव अपिया चेव, मणुण्णा चेव अमणुण्णा चेव, मणामा चेव अमणामा चेव ।

[८३] दुविहा सद्दा पण्णत्ता तं जहा- अत्ता चेव अणत्ता चेव, इट्ठा चेव अणिट्ठा चेव जाव मणामा चेव अमणामा चेव ।

दुविहा रूवा पण्णत्ता तं जहा- अत्ता चेव अणत्ता चेव जाव मणामा चेव अमणामा चेव, एवं गंधा रसा फासा, एवं इक्किक्के छ आलावगा भाणियच्वा ।

[८४] दुविहे आयारे पण्णत्ते तं जहा- नाणायारे चेव नोनाणायारे चेव । नोनाणायारे दुविहे पण्णत्ते तं जहा- दंसणायारे चेव नोदंसणायारे चेव । नोदंसणायारे दुविहे पण्णत्ते तं जहा- चरित्तायारे चेव नोचरित्तायारे चेव । नोचरित्तायारे दुविहे पण्णत्ते तं जहा- तवायारे चेव वीरियायारे चेव ।

दो पडिमाओ पण्णत्ताओ तं जहा- समाहिपडिमा चेव उवहाणपडिमा चेव । दो पडिमाओ पण्णत्ताओ तं जहा- विवेगपडिमा चेव विउसग्गपडिमा चेव । दो पडिमाओ पण्णत्ताओ तं जहा- भद्दा चेव

सुभद्धा चेव । दो पडिमाओ पण्णत्ताओ तं जहा- महाभद्धा चेव सव्वतोभद्धा चेव । दो पडिमाओ पण्णत्ताओ तं जहा- खुड्डिया चेव मोयपडिमा महल्लिया चेव मोयपडिमा । दो पडिमाओ पण्णत्ताओ तं जहा- जवमज्झा चेव चंदपडिमा वड्ढमज्झा चेव चंदपडिमा ।

दुविहे सामाइए पं० तं० जहा- अगारसामाइए चेव अणागारसामाइए चेव ।

[८५] दोण्हं उववाए पण्णत्ते तं जहा- देवाणं चेव नेरइयाणं चेव । दोण्हं उव्वट्ठणा पण्णत्ता तं जहा- नेरइयाणं चेव भवणवासीणं चेव । दोण्हं चयणे पण्णत्ते तं जहा- जोइसियाणं चेव वेमाणियाणं चेव । दोण्हं गब्भवक्कंती पण्णत्ता तं जहा- मणुस्साणं चेव पंचेदियतिरिक्ख जोणियाणं चेव ।

दोण्हं गब्भत्थाणं आहारे पण्णत्ते तं जहा- मणुस्साणं चेव पंचेदियतिरिक्खजोणियाणं चेव ।
ठाणं-२, उद्देसो-३

दोण्हं गब्भत्थाणं वुड्ढी पण्णत्ता तं जहा- मणुस्साणं चेव पंचेदियतिरिक्खजोणियाणं चेव, एवं निवुड्ढी, विगुव्वणा, गतिपरियाए समुग्घाते, कालसंजोगे, आयाती, मरणे ।

दोण्हं छवि पव्वा पण्णत्ता तं जहा- मणुस्साणं चेव पंचिदियतिरिक्खजोणियाणं चेव । दो सुक्कसोणितसंभवा पण्णत्ता तं जहा- मणुस्साणं चेव पंचिदियतिरिक्खजोणिया चेव । दुविहा ठिती पण्णत्ता तं जहा- कायद्विती चेव भवद्विती चेव । दोण्हं कायद्विती पण्णत्ता तं जहा- मणुस्साणं चेव पंचिदियतिरिक्खजोणियाणं चेव । दोण्हं भवद्विती पण्णत्ता तं जहा- देवाणं चेव नेरइयाणं चेव ।

दुविहे आउए पण्णत्ते तं जहा- अद्धाउए चेव भवाउए चेव । दोण्हं अद्धाउए पण्णत्ते तं जहा- मणुस्साणं चेव पंचिदियतिरिक्खजोणियाणं चेव दोण्हं भवाउए पण्णत्ते तं जहा- देवाणं चेव नेरइयाणं चेव । दुविहे कम्मं पण्णत्ते तं जहा- पदेसकम्मं चेव अणुभावकम्मं चेव । दो अहाउयं पालेंति तं जहा- देवच्चेव नेरइयच्चेव । दोण्हं आउय-संवट्ठए पण्णत्ते तं जहा- मणुस्साणं चेव पंचेदियतिरिक्खजोणियाणं चेव ।

[८६] जंबुद्धीवे दीवे मंदरस्स पव्वयस्स उत्तर-दाहिणे णं दो वासा पण्णत्ता- बहुसमतुल्ला अविसेसमणाणत्ता अण्णमण्णं नातिवट्ठंति आयाम-विक्खंभ-संठाण-परिणाहेणं तं जहा- भरहे चेव एरवए चेव, एवमेणमभिलावेणं- हेमवते चेव हेरण्णवए चेव, हरिवासे चेव रम्मयवासे चेव,

जंबुद्धीवे दीवे मंदरस्स पव्वयस्स पुरत्थिम-पच्चत्थिमे णं दो खेत्ता पण्णत्ता बहुसमतुल्ला अविसेस जाव पुव्वविदेहे चेव अवरविदेहे चेव,

जंबुद्धीवे दीवे मंदरस्स पव्वयस्स उत्तर-दाहिणे णं दो कुराओ पण्णत्ताओ बहुसमतुल्लाओ जाव देवकुरा चेव उत्तरकुरा चेव, तत्थ णं दो महतिमहालया गहादुमा पण्णत्ता- बहुसमतुल्ला अविसेमणाणत्ता अण्णमण्णं नाइवट्ठंति आयाम-विक्खंभुच्चत्तोव्वेह-संठाण-परिणाहेणं तं जहा- कूडसामली चेव जंबू चेव सुंदसणा ।

तत्थ णं दो देवा महिड्डिया जाव महासोक्खा पलिओवमद्वितीया परिवसंति तं जहा- गरुले चेव वेणुदेवे अणादिते चेव जंबुद्धीवाहिवती ।

[८७] जंबुद्धीवे दीवे मंदरस्स पव्वयस्स य उत्तर-दाहिणे णं दो वासहरपव्वया पण्णत्ता बहुसमतुल्ला अविसेसमणाणत्ता अण्णमण्णं नातिवट्ठंति आयाम-विक्खंभुच्चत्तोव्वेह-संठाण-परिणाहेणं तं जहा- चुल्लहिमवंते चेव सिहरिच्चेव, एवं महाहिमवंते चेव रूप्पिच्चेव, एवं-निसडे चेव नीलवंते चेव,

जंबुद्वीवे दीवे मंदरस्स पव्वयस्स उत्तर-दाहिणेणं हेमवत-हेरण्णवतेसु वासेसु दो वट्टवेयड्ढपव्वता पण्णत्ता-बहुसमतुल्ला अविसेसमणाणत्ता जाव सद्दावती चेव वियडावाती चेव, तत्थ णं दो देवा महिड्ढिया जाव पलिओवमट्ठितीया परिवसंति तं जहा साती चेव पभासे चेव ।

जंबुद्वीवेदीवे मंदरस्स पव्वयस्स उत्तर-दाहिणेणं हरिवास-रम्मएसु वासेसु दो वट्टवेयड्ढ-पव्वया पण्णत्ता- बहुसमतुल्ला जाव तं जहा- गंधावाती चेव मालवंतपरियाए चेव, तत्थ णं दो देवा महिड्ढिया जाव पलिओवमट्ठितीया परिवसंति तं जहा अरुणे चेव पउमे चेव ।

जंबुद्वीवे दीवे मंदरस्स पव्वयस्स दाहिणे णं देवकुराए कुराए पुव्वावरे पासे एत्थ णं आसक्खंधगसरिसा अद्धचंद-संठाण-संठिया दो वक्खारपव्वया पण्णत्ता बहुसमतुल्ला जाव तं जहा- सोमणसे चेव विज्जुप्पभे चेव ।

जंबुद्वीवे दीवे मंदरस्स पव्वयस्स उत्तरे णं उत्तरकुराए कुराए पुव्वावरे पासे एत्थ णं आस-
ठाणं-२, उद्देसो-३

क्खंध-गसरिसा अद्धचंद-संठाण-संठिया दो वक्खारपव्वया पण्णत्ता-बहुसमतुल्ला जाव तं जहा- गंधमायणे चेव मालवंते चेव ।

जंबुद्वीवे दीवे मंदरस्स पव्वयस्स उत्तर-दाहिणे णं दो दीहवेयड्ढपव्वया पण्णत्ता-बहुसमतुल्ला जाव तं जहा- भारहे चेव दीहवेयड्ढे एरवते चेव दीहवेयड्ढे,

भारहे णं दीहवेयड्ढे दो गुहाओ पण्णत्ताओ-बहुसमतुल्लाओ अविसेसमणाणत्ताओ अण्णमण्णं णातिवट्ठंति आयाम-विक्खंभुच्चत्त-संठाण-परिणाहेणं तं जहा- तिमिसगुहा चेव खंडगप्पवायगुहा चेव, तत्थ णं दो देवा महिड्ढिया जाव पलिओवमट्ठितीया परिवसंति तं जहा-कयमालए चेव नट्टमालए चेव, एरवए णं दीहवेयड्ढे दो गुहाओ पण्णत्ताओ जाव तं जहा- कयमालए चेव नट्टमालए चेव ।

जंबुद्वीवे दीवे मंदरस्स पव्वयस्स दाहिणेणं चुल्लहिमवंते वासहरपव्वए दो कूडा पण्णत्ता-बहुसमतुल्ला जाव विक्खंभुच्चत्त-संठाणपरिणाहेणं, तं जहा- चुल्लहिमवंतकूडे चेव वेसमणकूडे चेव ।

जंबुद्वीवे दीवे मंदरस्स पव्वयस्स दाहिणे णं महाहिमवंते वासहरपव्वए दो कूडा पण्णत्ता-बहुसमतुल्ला जाव तं जहा- महाहिमवंतकूडे चेव वेरुलियकूडे चेव, एवं- निसडे वासहरपव्वए दो कूडा पण्णत्ता-बहुसमतुल्ला जाव तं जहा- निसडकूडे चेव रुयगप्पभे चेव ।

जंबुद्वीवे दीवे मंदरस्स पव्वयस्स उत्तरे णं नीलवंते वासहरपव्वए दो कूडा पण्णत्ता-बहुसमतुल्ला जाव तं जहा- नीलवंतकूडे चेव उवदंसणकूडे चेव, एवं- रुपिमि वासहरपव्वए दो कूडा पण्णत्ता-बहुसमतुल्ला जाव तं जहा- रुपिकूडे चेव मणिकंचणकूडे चेव, एवं-सिहरिमि वासहरपव्वते दो कूडा पण्णत्ता-बहुसमतुल्ला जाव तं जहा- सिहरिकूडे चेव तिगिंछकूडे चेव ।

[८८] जंबुद्वीवे दीवे मंदरस्स पव्वयस्स उत्तर-दाहिणे णं चुल्लहिमवंत-सिहरीसु वासहर पव्वएसु दो महद्दहा पण्णत्ता- बहुसमतुल्ला अविसेसमणाणत्ता अण्णमण्णं णातिवट्ठंति आयाम-विक्खंभ-उव्वेह-संठाण-परिणाहेणं तं जहा- पउमद्दहे चेव पौंडरीयद्दहे चेव, तत्थ णं दो देवयाओ महिड्ढियाओ जाव पलिओवमट्ठितीयाओ परिवसंति तं जहा- सिरी चेव लच्छी चेव, एवं-महाहिमवंत-रुप्पीसु वासहरपव्वएसु दो महद्दहा पण्णत्ता-बहुसमतुल्ला जाव तं जहा- महापउमद्दहे चेव महापौंडरीयद्दहे चेव, तत्थ णं दो देवयाओ हिरिच्चेव बुद्धिच्चेव, एवं-निसड-नीलवंतेसु तिगिंछद्दहे चेव केसरिद्दहे चेव, तत्थ णं दो देवताओ धिती चेव किक्खी चेव ।

जंबुद्दीवे दीवे मंदरस्स पव्वयस्स दाहिणे णं महाहिमवंताओ वासहरपव्वयाओ महापउ-
मद्दहाओ दहाओ दो महानईओ पवहंति तं जहा- रोहियच्चेव हरिकंतच्चेव एवं-निसढाओ वासहरपव्वयाओ
तिगिंछिद्धहाओ दहाओ दो महानईओ पवहंति तं जहा- हरिच्चेव सीतोदच्चेव,

जंबुद्दीवे दीवे मंदरस्स पव्वयस्स उत्तरेणं नीलवंताओ वासहरपव्वताओ केसरिद्धहाओ दहाओ
दो महानईओ पवहंति तं जहा- सीता चेव नारिकंता चेव, एवं- रूपीओ वासहरप्पताओ महापोंडरीयद्धहाओ
दहाओ दो महानईओ पवहंति तं जहा- नरकंता चेव रूपकूला चेव,

जंबुद्दीवे दीवे मंदरस्स पव्वयस्स दाहिणे णं भरहे वासे दो पवायद्धहा पण्णत्ता-बहुसमतुल्ला
तं जहा- गंगप्पवायद्धहे चेव सिंधुप्पवायद्धहे चेव एवं-हेमवए वासे दो पवायद्धहा पण्णत्ता-बहुसमतुल्ला तं
जहा- रोहियप्पवायद्धहे चेव रोहियंसप्पवायद्धहे चेव,

जंबुद्दीवे दीवे मंदरस्स पव्वयस्स दाहिणेणं हरिवासे वासे दो पवायद्धहा पण्णत्ता
बहुसमतुल्ला
ठाणं-२, उद्देसो-३

तं जहा- हरिपवायद्धहे चेव हरिकंतप्पवायद्धहे चेव,

जंबुद्दीवे दीवे मंदरस्स पव्वयस्स उत्तर-दाहिणेणं महाविदेहे वासे दो पवायद्धहा पण्णत्ता-
बहुसमतुल्ला जाव तं जहा- सीतप्पवायद्धहे चेव सीतोदप्पवायद्धहे चेव,

जंबुद्दीवे दीवे मंदरस्स पव्वयस्स उत्तरे णं रम्मए वासे दो पवायद्धहा पण्णत्ता-बहुसमतुल्ला
जाव तं जहा- नरकंतप्पवायद्धहे चेव नारिकंतप्पवायद्धहे चेव, एवं-हेरणवते वासे दो पवायद्धहा पण्णत्ता-
बहुसमतुल्ला जाव तं जहा- सुवण्णकूलप्पवायद्धहे चेव रूपकूलप्पवायद्धहे चेव,

जंबुद्दीवे दीवे मंदरस्स पव्वयस्स उत्तरे णं एरवए वासे दो पवायद्धहा पण्णत्ता बहुसमतुल्ला
जाव तं जहा- रत्तप्पवायद्धहे चेव रत्तावईपवायद्धहे चेव,

जंबुद्दीवे दीवे मंदरस्स पव्वयस्स दाहिणे णं भरहे वासे दो महानईओ पण्णत्ताओ-
बहुसमतुल्लाओ जाव तं जहा- गंगा चेव सिंधू चेव, एवं-जहा पवातद्धहा एवं नईओ भाणियव्वाओ, जाव
एरवए वासे दो महानईओ पण्णत्ताओ-बहुसमतुल्लाओ जाव तं जहा- रत्ता चेव रत्तवती चेव ।

[८९] जंबुद्दीवे दीवे भरहेरवएसु वासेसु तीताए उस्सप्पिणीए सुसमदूसमाए समाए दो
सागरोवमकोडीओ काले होत्था । एवं इमीसे ओसप्पिणीए जाव पन्नत्ते, एवं आगमिस्साए उस्सप्पिणीए
जाव भविस्सति ।

जंबुद्दीवे दीवे भरहेरवएसु वासेसु तीताए उस्सप्पिणीए सुसमाए समाए मणुया दो गाउयाइं
उड्ढं उच्चत्तेणं होत्था, दोण्णि य पलिओवमाइं परमाउं पालइत्था, एवमिमीसे ओसप्पिणीए जाव
पालइत्था, एवमागमेस्साए उस्सप्पिणीए जाव पालयिस्संति ।

जंबुद्दीवे दीवे भरहेरवएसु वासेसु एगसमये एगजुगे दो अरहंतवंसा उप्पज्जिंसु वा उप्पज्जंति
वा उप्पज्जिस्संति वा एवं दो चक्कवट्ठिंसा, एवं दो दसारवंसा उप्पज्जिंसु वा उप्पज्जंति वा
उप्पज्जिस्संति वा ।

जंबुद्दीवे दीवे भरहेरवएसु वासेसु एगसमये एगजुगे दो अरहंता उप्पज्जिंसु वा उप्पज्जंति वा
उप्पज्जिस्संति वा एवं चक्कवट्ठिणो एवं बलदेवा एवं वासुदेवा [दसारवंसा] जाव उप्पज्जिंसु वा उप्पज्जंति
वा उप्पज्जिस्संति वा ।

जंबुद्वीवे दीवे दोसु कुरासु मणुया सया सुसमसुसममुत्तमं इडिं पत्ता पच्चणुभवमाणा विहरंति तं जहा देवकुराए चेव उत्तरकुराए चेव ।

जंबुद्वीवे दीवे दोसु वासेसु मणुया सया सुसमुत्तमं इडिं पत्ता पच्चणुभवमाणा विहरंति तं जहा- हरिवासे चेव रम्मगवासे चेव ।

जंबुद्वीवे दीवे दोसु वासेसु मणुया सया सुसमदूसममुत्तममिडिं पत्ता पच्चणुभवमाणा विहरंति तं जहा- हेमवए चेव हेरण्णवए चेव ।

जंबुद्वीवे दीवे दोसु खेत्तेसु मणुया सया दूसमसुसममुत्तममिडिं पत्ता पच्चणुभवमाणा विहरंति तं जहा- पुव्वविदेहे चेव अवरविदेहे चेव ।

जंबुद्वीवे दीवे दोसु वासेसु मणुया छव्विहंपि कालं पच्चणुभवमाणा विहरंति तं जहा- भरहे चेव एरवते चेव ।

[९०] जंबुद्वीवे दीवे-दो चंदा पभासिंसु वा पभासंति वा पभासिस्संति वा, दो सूरिआ तविसुं ठाणं-२, उद्देशो-३

वा तवंति वा तविस्संति वा, दो कत्तियाओ, दो रोहिणीओ, दो मग्गसिराओ, दो अद्दाओ, एवं गाहाणुसारेण नेयव्वं जाव दो भरणीओ ।

[९१] कत्तिया रोहिणि मगसिर अद्दा य पुणव्वसू अ पूसो य ।

तत्तेऽवि अस्सलेसा महा य दो फग्गुणीओ य ॥

[९२] हत्थो चित्ता साई विसाहा तह य होति अणुराहा ।

जेट्ठा मूलो पुव्वाय आसाढा तह उत्तरा चेव ॥

[९३] अभिई सवणे घणिट्ठा सयभिसया दो य होंति भद्दवया ।

रेवति अस्सिणि भरणी नेयव्वा आणुपुव्वीए ॥

[९४] दो अग्गी दो पयावती दो सोमा दो रुद्धा दो अदिती दो बहस्सती दो सप्पा दो पिती दो भगा दो अज्जमा दो सविता दो तद्वा दो वाऊ दो इंदग्गी दो मित्ता दो इंदा दो णिरती दो आऊ दो विस्सा दो बम्हा दो विण्हू दो वसू दो वरुणा दो अया दो विविद्धी दो पुस्सा दो अस्सा दो यमा ।

दो इंगालगा दो वियालगा दो लोहितक्खा दो सणिच्चरा दो आहुणिया दो पाहुणिया दो कणा दो कणगा दो कणकणगा दो कणगविताणगा दो कणगसंताणगा दो सोमा दो सहिया दो आसासणा दो कज्जोवगा दो कब्बडगा दो अयकरगा दो दुंदुभगा दो संखा दो संखवण्णा दो संखवण्णाभा दो कंसा दो कंसवण्णा दो कंसवण्णाभा दो रूपी दो रूप्पाभासा दो नीला दो नीलोभासा दो भासा दो भासरासी दो तिला दो तिलपुप्फवण्णा दो दगा दो दगपंचवण्णा दो काका दो क्ककंधा ।

दो इंदग्गी दो धूमकेऊ दो हरी दो पिंगला दो बुद्धा दो सुक्का दो बहस्सती दो राहू दो अगत्थी दो माणवगा दो कासा दो फासा दो धुरा दो पमुहा दो विगडा दो विसंधी दो णियल्ला दो पडल्ला दो जडियाइलगा दो अरुणा दो अग्गिल्ला दो काला दो महाकालगा दो सोत्थिया दो सोवत्थिया दो वद्धमाणगा दो पूससमाणगा दो अंकुसा दो पलंबा दो णिच्चालोगा दो णिच्चुज्जेता दो सयंपभा दो ओभासा दो सेयंकरा दो खेमंकरा दो आभंकरा दो पभंकरा दो अपराजिता दो अरया दो असोगा दो विगतसोगा दो विमला दो वितता दो वितत्था दो विसाला दो साला दो सुव्वता दो अणियट्ठी दो एगजडी दो दुजडी दो करकरिगा दो रायग्गला दो पुप्फुकेतू दो भावकेऊ ।

[९५] जंबुदीवस्स णं दीवस्स वेइया दो गाउयाइं उड्ढं उच्चत्तेणं पण्णत्ता ।
लवणे णं समुद्धे दो जोयणसयसहस्साइं चक्कवालविकखंभेणं पण्णत्ते ।
लवणस्स णं समुद्धस्स वेइया दो गाउयाइं उड्ढं उच्चत्तेणं पण्णत्ता ।

[९६] घायइसंडे दीवे पुरत्थिमद्धे णं मंदरस्स पव्वयस्स उत्तर-दाहिणे णं दो वासा पण्णत्ता-बहुसमतुल्ला जाव तं जहा-भरहे चेव एरवए चेव, एवं-जहा जंबुदीवे तहा एत्थवि भाणियव्वं जाव दोसु वासेसु मणुया छव्विहंपि कालं पच्चणुभवमाणा विहरंति तं जहा- भरहे चेव एरवए चेव, नवरं-कूडसाली चेव घायईरुक्खे चेव, देवा-गरुले चेव वेणुदेवे सुदंसणे चेव,

घायइसंडे दीवे पच्चत्थिमद्धे णं मंदरस्स पव्वयस्स उत्तर-दाहिणे णं दो वासा पण्णत्ता-बहुसमतुल्ला जाव तं जहा- भरहे चेव एरवए चेव एवं-जहा जंबुदीवे तहा एत्थवि भाणियव्वं जाव छव्विहंपि कालं पच्चणुभवमाणा विहरंति तं जहा- भरहे चेव एरवए चेव, नवरं-कूडसामली चेव महाधायईरुक्खे चेव, देवा-गरुले चेव वेणुदेवे पियदंसणे चेव ।

ठाणं-२. उद्देशो-३

घायइसंडे णं दीवे दो भरहाइं दो एरवयाइं दो हेमवयाइं दो हेरन्नववाइं दो हरिवासाइं दो रम्मगवासाइं दो पुव्वविदेहाइं दो अवरविदेहाइं दो देवकुराओ दो देवकुरुमहद्दुमा दो देवकुरुमहद्दुमवासी देवा दो उत्तरकुराओ दो उत्तरकुरुमहद्दुमा दो उत्तरकुरुमहद्दुमवासी देवा दो चूल्लहिमवंता दो महाहिमवंता दो निसद्धा दो नीलवंता दो रूपी दो सिहरी दो सद्धावाती दो सद्धावातिवासी साती देवा दो वियडावाती दो विय-डावातिवासी पभासा देवा दो गंधावाती दो गंधावातासी अरुणा देवा दो मालवंतपरियागा दो मालवंतपरिया-गवासी पउमा देवा दो मालवंता दो चित्तकूडा दो पम्हकूडा दो नलिणकूडा दो एगसेला दो तिकूडा दो वेसम-णकूडा दो अंजणा दो मातंजणा दो सोमणसा दो विज्जुप्पभा दो अंकावती दो पम्हावती दो आसीविसा दो सुहावहा दो चंदपव्वता दो सूरपव्वता दो नापगव्वता दो देवपव्वता दो गंधमायणा दो उसुगारपव्वया दो चुल्लहिमवंतकूडा दो वेसमणकूडा दो महाहिमवंतकूडा दो वेरुलियकूडा दो निसद्धकूडा दो रुयगकूडा दो नीलवंतकूडा दो उवदंसणकूडा दो रुप्पिकूडा दो मणिकंचणकूडा दो सिंहरिकूडा दो तिगिंछिकूडा ।

दो पउमद्दहा दो पउमद्दहवासिणीओ सिरीओ देवीओ दो महापउमद्दहा दो महापउमद्दह-वासिणीओ हिरीओ देवीओ एवं जाव दो पुंडरीयद्दहा दो पोंडरीयद्दहवासिणीओ लच्छीओ देवीओ दो गंगप्पवायद्दहा जाव दो रत्तावतीपवातद्दहा दो रोहियाओ जाव दो रुप्पकूलाओ दो गाहवतीओ दो दहवतीओ दो पंकवतीओ दो तत्तजलाओ दो मत्तजलाओ दो उम्मत्तजलाओ दो खीरोयाओ दो सीहसोताओ दो अंतोवाहिणीओ दो उम्मिमालिणीओ दो फेणमालिणीओ दो गंभीरमालिणीओ दो कच्छा दो सुकच्छा दो महाकच्छा दो कच्छावती दो आवत्ता दो मंगलवत्ता दो पुक्खला दो पुक्खलावई दो वच्छा दो सुवच्छा दो महावच्छा दो वच्छगावती दो रम्मा दो रम्मगा दो रमणिज्जा दो मंगलावती दो पम्हा दो सुपम्हा दो महपम्हा दो पम्हागावती दो संखा दो नलिणा दो कुमुया दो सलिलावती दो वप्पा दो सुवप्पा दो महावप्पा दो वप्पगावती दो वग्गू दो सुवग्गू दो गंधिला दो गंधिलावती ।

दो खेमाओ दो खेमपुरीओ दो रिद्धाओ दो रिद्धपुरीओ दो खग्गीओ दो मंजूसाओ दो ओसधीओ दो पोंडरिगिणीओ दो सुसीमाओ दो कुंडलाओ दो अपराजियाओ दो पभंकराओ दो अंकावईओ दो पम्हावईओ दो सुभाओ दो रयणसंचयाओ दो आसपुराओ दो सीहपुराओ दो महापुराओ दो विजयपुराओ दो

अवराजिताओ दो अवराओ दो असोयाओ दो विगयसोगाओ दो वियजाओ दो वेजयंतीओ दो जयंतीओ दो अपराजियाओ दो चक्कपुराओ दो खग्गपुराओ दो अवज्झावओ दो अउज्झाओ दो भद्दसालवणा दो नंदणवणा दो सोमणसवणा दो पंडगवणाइं दे पंडुकंबलसिलाओ दो अतिपंडुकंबलसिलाओ दो रत्तकंबलसिलाओ दो अइरत्तकंबलसिलाओ दो मंदरा दो मंदरचूलीआओ, घायइसंडस्स णं दीवस्स वेदिया दो गाउयाइं उड्ढमुच्चत्तेणं पणत्ता ।

[९७] कालोदस्स णं समुदस्स वेइया दो गाउयाइं उड्ढं उच्चत्तेणं पणत्ता । पुक्खरवरदीवड्ढ पुरत्थिमद्धे णं मंदरस्स पव्वयस्स उत्तर-दाहिणे णं दो वासा पणत्ता-बहुसमतुल्ला जाव तं जहा- भरहे चेव एरवए चेव तहेव जाव दो कुराओ पणत्ताओ-देवकुरा चेव उत्तरकुरा चेव, तत्थ णं दो महतिमहालया महद्दुमा पणत्ता तं जहा- कूडसामली चेव पउमरुक्खे चेव, देवा-गरुले चेव वेणुदेवे पउमे चेव, जाव छव्विहंपि कालं पच्चणुभवमाणा विहरंति ।

पुक्खरवरदीवड्ढपच्चत्थिमद्धे णं मंदरस्स पव्वयस्स उत्तर-दाहिणेणं दो वासा पणत्ता-तहेव णाणत्तं कूडसामली चेव महापउमरुक्खे चेव, देवा-गरुले चेव वेणुदेवे पुंडरीओ चेव, ठाणं-२. उद्देसो-३

पुक्खरवरदीवड्ढे णं दीवे दो भरहाइं दो एरवयाइं जाव दो मंदरा दो मंदरचूलियाओ, पुक्खर-वरस्स णं दीवस्स वेइया दो गाउयाइं उड्ढमुच्चत्तेणं पणत्ता, सव्वेसिंपि णं दीवसमुद्धानं वेदियाओ दो गाउयाइं उड्ढमुच्चत्तेणं पणत्ताओ ।

[९८] दो असुरकुमारिंदा पणत्ता तं जहा- चमरे चेव बली चेव, दो नागकुमारिंदा पणत्ता तं जहा- धरणे चेव भूयाणंदे चेव, दो सुवण्णकुमारिंदा पणत्ता तं जहा- वेणुदेवे चेव वेणुदाली चेव, दो विज्जुकुमारिंदा पणत्ता तं जहा- हरिच्चेव हरिस्सहे चेव, दो अग्गिकुमारिंदा पणत्ता तं जहा- अग्गिसिहे चेव अग्गिमाणवे चेव, दो दीवकुमारिंदा पणत्ता तं जहा- पुण्णे चेव विसिद्धे चेव, दो उदहिकुमारिंदा पणत्ता तं जहा- जलकंते चेव जलप्पभे चेव, दो दिसाकुमारिंदा पणत्ता तं जहा- अमियगती चेव अमितवाहणे चेव, दो वायुकुमारिंदा पणत्ता तं जहा- वेलंबे चेव पभंजणे चेव, दो थणियकुमारिंदा पणत्ता तं जहा- घोसे चेव महाघोसे चेव,

दो पिसाइंदा पणत्ता तं जहा- काले चेव महाकाले चेव, दो भूइंदा पणत्ता तं जहा- सुरूवे चेव पडिरूवे चेव, दो जक्खिंदा पणत्ता तं जहा- पुण्णभद्दे चेव माणिभद्दे, चेव दो रक्खसिंदा पणत्ता तं जहा- भीम चेव महाभीमे चेव, दो किन्नरिंदा पणत्ता तं जहा- किन्नरे चेव किंपुरिसे चेव, दो किंपुरिसिंदा पणत्ता तं जहा- सप्पुरिसे चेव महापुरिसे चेव, दो महोरगिंदा पणत्ता तं जहा- अतिकाए चेव महाकाए चेव, दो गंधव्विंदा पणत्ता तं जहा- गीतरती चेव गीयजसे चेव, दो अणपण्णिंदा पणत्ता तं जहा- सण्णि-हिए चेव सामण्णे चेव, दो पणपण्णिंदा पणत्ता तं जहा- धाए चेव विहाए चेव, दो इसिवाइंदा पणत्ता तं जहा- इसिच्चेव इसिवालए चेव, दो भूतवाइंदा पणत्ता तं जहा- इस्सरे चेव महिस्सरे चेव, दो कंदिदा पणत्ता तं जहा- सुवच्छे चेव विसाले चेव, दो महाकंदिदा पणत्ता तं जहा हस्से चेव हस्सरती चेव, दो कुंभंडिंदा पणत्ता तं जहा- सेए चेव महासेए चेव, दो पतइंदा पणत्ता तं जहा- पत्तए तेव पतयवई चेव,

जोइसियाणं देवाणं दो इंदा पणत्ता तं जहा- चंदे चेव सूरे चेव ।

सोहम्मीसाणेसु णं कप्पेसु दो इंदा पण्णत्ता तं जहा- सक्के चेव ईसाणे चेव, सणंकुमार-
माहिंदेसु कप्पेसु दो इंदा पण्णत्ता तं जहा- सणंकुमारे चेव माहिंदे चेव, बंभलोग-लंतएसु णं कप्पेसु दो
इंदा पण्णत्ता तं जहा- बंभे चेव लंतए चेव, महासुक्क-सहस्सारेसु णं कप्पेसु दो इंदा पण्णत्ता तं जहा-
महासुक्के चेव सहस्सारे चेव, आणत-पाणत-आरण-अच्चुतेसु णं कप्पेसु दो इंदा पण्णत्ता तं जहा- पाणते
चेव अच्चुते चेव,

महासुक्कसहस्सारेसु णं कप्पेसु विमाणा दुवण्णा पण्णत्ता तं जहा- हालिद्धा चेव सुक्किल्ला
चेव गेविज्जगा णं देवा दो रयणीओ उड्ढमुच्चत्तेणं पण्णत्ता ।

◦ बीए ठाणे तइओ उद्देसो समत्तो ◦

० चउत्थो-उद्देसो ०

[९९] समयाति वा आवलियाति वा जीवाति या अजीवाति या पवुच्चति, आणापाणूति वा
थोवेति वा जीवाति या अजीवाति या पवुच्चति, खणाति वा लवाति वा जीवाति या आजीवाति या
पवुच्चति, एवं-मुहुत्ताति वा अहोरत्ताति वा, पक्खाति वा मासाति वा, उडूति वा अयणाति वा,
संवच्छराति वा जुगाति वा, वाससयाति वा वाससहस्साइ वा, वाससतसहस्साइ वा वासकोडीइ वा,
पुव्वंगाति वा
ठाणं-२, उद्देसो-४

पुव्वाति वा, तुडियंगाति वा तुडियाति वा, अडडंगाति वा अडडाति वा, अववंगाति वा अववाति वा,
हूहूंगाति वा हूहूयाति वा, उप्पलंगाति वा उप्पलाति वा, पउमंगाति वा पउमाति वा, नलिणंगाति वा
नलिणाति वा, अत्थणिकुरंगाति वा अत्थणिकुराति वा, अउअंगाति वा, अउआति वा णउअंगाति वा
णउआति वा, पउतंगाति वा पउताति वा, चूलियंगाति वा चूलियाति वा, सीसपहेलियंगाति वा
सीसपहेलियाति वा, पलिओवमाति वा सागरोवमाति वा, ओसप्पिणीति वा उस्सप्पिणीति वा जीवाति या
अजीवाति या पवुच्चति ।

गामाति वा नगराति वा निगमाति वा रायहाणीति वा खेडाति वा कब्बडाति वा मडंबाति वा
दोणमुहाति वा पट्टणाति वा आगराति वा आसमाति वा संबाहाति वा सण्णिवेसाइ वा घोसाइ वा आरामाइ
वा उज्जाणाति वा वणाति वा वणसंडाति वा वावीति वा पुक्खरणीति वा सराति वा सरपंतीति वा अगडाति
वा तलागाति वा दहाति वा नदीति वा पुढवीति वा उदहीति वा वातखंधाति वा उवासंतराति वा वलयाति
वा विग्गहाति वा दीवाति वा समुद्धाति वा वेलाति वा वेइयाति वा दाराति वा तोरणाति वा नेरइयाति वा
नेरइयावासाति वा जाव वेमाणियाति वा वेमाणियावासाति वा कप्पाति वा कप्पविमाणावासाति वा वासाति
वा वासधरपव्वताति वा कूडाति वा कूडगाराति वा विजयाति वा रायहाणीति वा जीवाति या अजीवाति या
पवुच्चति ।

छायाति वा आतवाति वा दोसिणाति वा अंधकाराति वा ओमाणाति वा उम्माणाति वा
अतिया-णगिहाति वा उज्जाणगिहाति वा अवलिंबाति वा सणिप्पवाताति वा जीवाति या अजीवाति या
पवुच्चति ।

दो रासी पण्णत्ता तं जहा- जीवरासी चेव अजीवरासी चेव ।

[१००] दुविहे बंधे पण्णत्ते तं जहा- पेज्जबंधे चेव दोसबंधे चेव ।

जीवा णं दोहिं ठाणेहिं पावं कम्मं बंधंति तं जहा- रागेण चेव दोसेण चेव, जीवा णं दोहिं ठाणेहिं पावं कम्मं उदीरंति तं जहा- अब्भोवगामियाए चेव वेयणाए उवक्कमियाए चेव वेयणाए, एवं वेदंति, एवं निज्जरंति जहा- अब्भोवगभियाए चेव वेयणाए, उवक्कमियाए चेव वेयणाए ।

[१०१] दोहिं ठाणेहिं आता सरीरं फुसित्ता णं णिज्जाति, तं जहा- देसेणवि आता सरीरं फुसित्ता णं णिज्जाति सव्वेणवि आता सरीरं फुसित्ता णं णिज्जाति, एवं फुरित्ता णं, एवं फुडित्ता णं एवं संवट्टित्ता एवं निवट्टित्ता ।

[१०२] दोहिं ठाणेहिं आता केवलिपण्णत्तं धम्मं लभेज्जा सवणयाए तं जहा- खएण चेव उवसमेण चेव एवं जाव मणपज्जवनाणं उप्पाडेज्जा तं जहा- खएण चेव उवसमेण चेव ।

[१०३] दुविहे अद्धोवमिए पण्णत्ते तं जहा- पलिओवमे चेव सागरोवमे चेव, से किं तं पलिओवमे? ।

[१०४] जं जोयणविच्छिण्णं पल्लं एगाहियप्परूढाणं ।

होज्ज निरंतरणिचितं भरितं वालग्गकोडीणं ॥

[१०५] वाससए वाससए एक्केक्के अवहडंमि जो कालो ।

सो कालो बोद्धव्वो उवमा एगस्स पल्लस्स ॥

[१०६] एएसिं पल्लाणं कोडाकोडी हवेज्ज दस गुणिता ।

ठाणं-२, उद्देसो-४

तं सागरोवमस्स उ एगस्स भवे परीमाणं ॥

[१०७] दुविहे कोहे पण्णत्ते तं जहा- आयपइड्डिए चेव परपइड्डिए चेव एवं नेरइयाणं जाव वेमाणियाणं एवं जाव मिच्छादंसणसल्ले ।

[१०८] दुविहा संसारसमावण्णगा जीवा पण्णत्ता तं जहा- तसा चेव थावरा चेव, दुविहा सव्वजीवा पण्णत्ता तं जहा- सिद्धा चेव असिद्धा चेव,

दुविहा सव्वजीवा पण्णत्ता तं जहा- सइंदिया चेव अणिंदिया चेव [सकायच्चेव अकायच्चेव सजोगी चेव अजोगी चेव सवेया चेव अया चेव सकसाया चेव अणिंदिया चेव, एवं एसा गाहा फासेतव्वा जाव ससरीरी चेव असरीरी चेव ।

[१०९] सिद्ध सइंदियकाए जोगे वेए कसाय लेसा य ।

नाणुवओगाहारे भासग चरिमे य ससरीरी ॥

[११०] दो मरणाइं समणेणं भगवता महावीरेणं समणाणं निग्गंथाणं नो णिच्चं वण्णियाइं नो णिच्चं कित्तियाइं नो णिच्चं बुइयाइं नो मिच्चं पसत्थाइं नो णिच्चं अब्भणुण्णायाइं भवंति तं जहा- वलयमरणे चेव वसट्ठमरणे चेव, एवं- नियाणमरणे चेव तब्भवमरणे चेव, गिरिपडणे चेव तरुपडणे चेव, जलप्पवेसे चेव जलणपवेसे चेव, विसभक्खणे चेव सत्थोवाडणे चेव, दो मरणाइं जाव नो णिच्चं अब्भणुण्णायाइं भवंति, कारणेण पुण अप्पडिकुट्ठाइं तं जहा- वेहाणसे चेव गिद्धपट्ठे चेव ।

दो मरणाइं समणेणं भगवया महावीरेणं समणाणं निग्गंथाणं णिच्चं वण्णियाइं जाव अब्भणुण्णायाइं भवंति, तं जहा- पाओवगमणे चेव भत्तपच्चक्खाणे चेव, पाओवगमणे दुविहे पण्णत्ते तं जहा- नीहारिमे चेव अनीहारिमे चेव नियमं अपडिकम्मं, भत्तपच्चपक्खाणे दुविहे पण्णत्ते तं जहा- नीहारिमे चेव अनीहारिमे चेव नियमं सपडिकम्मं ।

[१११] के अयं लोगे?, जीवच्चेव अजीवच्चेव, के अनंता लोगे?, जीवच्चेव अजीवच्चेव के सासया लोगे?, जीवच्चेव अजीवच्चेव ।

[११२] दुविहा बोधी पणत्ता तं जहा- नाणबोधी चेव दंसणबोधी चेव, दुविहा बुद्धा पणत्ता तं जहा- नाणबुद्धा चेव दंसणबुद्धा चेव, दुविहे मोहे पणत्ते तं जहा- नाणमोहे चेव दंसणमोहे चेव, दुविहा मूढा पणत्ता तं जहा- नाणमूढा चेव दंसणमूढा चेव ।

[११३] नाणावरणिज्जे कम्मे दुविहे प० तं०- देसणाणावरणिज्जे चेव सव्वनाणावरणिज्जे चेव, दरिसणावरणिज्जे कम्मे एवं चेव, वेयणिज्जे कम्मे दुविहे पणत्ते तं जहा- सातावेयणिज्जे चेव असातावेयणिज्जे चेव, मोहणिज्जे कम्मे दुविहे पणत्ते तं जहा- दंसणमोहणिज्जे चेव चरित्तमोहणिज्जे चेव, आउए कम्मे दुविहे पणत्ते तं जहा- अद्धाउए चेव भवाउए चेव, नामे कम्मे दुविहे प० तं० जहा- सुभनामे चेव असुभनामे चेव, गोत्ते कम्मे दुविहे पणत्ते तं जहा- उच्चागोते चेव नीयागोते चेव, अंतराए कम्मे दुविहे प० तं० जहा- पडुप्पणविणासिए चेव पिहति य आगामिपहं चेव ।

[११४] दुविहा मुच्छा पणत्ता तं जहा- पेज्जवत्तिया चेव दोसवत्तिया चेव, पेज्जवत्तिया मुच्छा दुविहा प० तं०- माया चेव लोभे चेव दोसवत्तिया मुच्छा दुविहा पणत्ता तं जहा- कोहे चेव माणे चेव ।

[११५] दुविहा आराहणा प० तं०- धम्मियाराहणा चेव केवलिआराहणा चेव, धम्मियाराहणा दुविहा पणत्ता तं जहा- सुयधम्माराहणा चेव चरित्तधम्माराहणा चेव, केवलिआराहणा दुविहा पणत्ता तं ठाणं-२, उद्देसो-४

जहा- अंतकिरिया चेव कप्पविमाणोववत्तिया चेव ।

[११६] दो तित्थगरा नीलुप्पलसमा वण्णेणं पणत्ता तं जहा- मुणिसुव्वए चेव अरिद्धनेमी चेव, दो तित्थगरा पियंगुसामा वण्णेणं पणत्ता तं जहा- मल्ली चेव पासे चेव, दो तित्थगरा पउमगोरा वण्णेणं पणत्ता तं जहा- पउमप्पहे चेव वासुपुज्जे चेव, दो तित्थगरा चंदगोरा वण्णेणं पणत्ता तं जहा- चंदप्पभे चेव पुप्फदंते चेव ।

[११७] सच्चप्पवायपुव्वस्स णं दुवे वत्थू पणत्ता ।

[११८] पुव्वाभद्दवया नक्खत्ते दुतारे पणत्ते, उत्तराभद्दवया नक्खत्ते दुतारे पणत्ते, पुव्वफग्गुणी नक्खत्ते दुतारे पणत्ते, उत्तराफग्गुणी नक्खत्ते दुतारे पणत्ते ।

[११९] अंतो णं मणुस्सखेत्तस्स दो समुद्धा प० तं जहा- लवणे चेव कालोदे चेव ।

[१२०] दो चक्कवट्ठी अपरिचत्तकामभोगा कालमासे कालं किच्चा अहेसत्तमाए पुढवीए अपइट्ठाणे नरए नेरइयत्ताए उववण्णा तं जहा- सुभूमे चेव बंभदत्ते चेव ।

[१२१] असुरिंदवज्जियणं भवणवसीणं देवाणं उक्कोसेणं देसूणाइं दो पलिओवमाइं ठिती पणत्ता, सोहम्मे कप्पे देवाणं उक्कोसेणं दो सागरोवमाइं ठिती पणत्ता, ईसाणे कप्पे देवाणं उक्कोसेणं सातिरेगाइं दो सागरोवमाइं ठिती प०, सणकुमारे कप्पे देवाणं जहण्णेणं दो सागरोवमाइं ठिती प०, माहिंदे कप्पे देवाणं जहण्णेणं साइरेगाइं दो सागरोवमाइं ठिती पणत्ता ।

[१२२] दोसु कप्पेसु कप्पित्थियाओ प० तं जहा- सोहम्मे चेव ईसाणे चेव ।

[१२३] दोसु कप्पेसु देवा तेउलेस्सा प० तं जहा- सोहम्मे चेव ईसाणे चेव ।

[१२४] दोसु कप्पेसु देवा कायपरियारगा पण्णत्ता तं जहा- सोहम्मं चेव ईसाणे चेव, दोसु कप्पेसु देवा फासपरियारगा पण्णत्ता तं जहा- सणकुमारे चेव माहिंदे चेव, दोसु कप्पेसु देवा रूवपरियारगा पण्णत्ता तं जहा- बंभलोगे चेव लंतगे चेव, दोसु कप्पेसु देवा सद्दपरियारगा पण्णत्ता तं जहा- महासुक्के चेव सहस्सारे चेव, दो इंदा मणपरियारगा पण्णत्ता तं जहा- पाणए चेव अच्चुए चेव ।

[१२५] जीवा णं दुद्वाणणिव्वत्तिए पोग्गले पावकम्मत्ताए चिणिंसु वा चिणंति वा चिणिस्संति वा तं जहा- तसकायणिव्वत्तिए चेव थावरकायणिव्वत्तिए चेव, एवं उवचिणिंसु वा उवचिणंति वा उवचि-णिस्संति वा, बंधिसु वा बंधेति वा बंधिस्संति वा, उदीरिंसु वा उदीरेंति वा उदीरिस्संति वा, वेदेंसु वा वेदेंति वा वेदिस्संति वा, निज्जरिंसु वा निज्जरेंति वा निज्जरिस्संति वा ।

[१२६] दुपएसिया खंधा अनंता पण्णत्ता, दुपदेसोगाढा पोग्गला अनंता पण्णत्ता, एवं जाव दुगुणलुक्खा पोग्गला अनंता पण्णत्ता ।

◦ बीए ठाणे चउत्थो उद्देसो समत्तो ◦

० बीअं ठाणं समत्तं ०

◦ मुनि दीपरत्नसागरेण संशोधितः सम्पादित्तश्च बीअं ठाणं समत्तं ◦

॥ तइयं-ठाणं ॥

० पढमो-उद्देसो ०

[१२७] तओ इंदा पण्णत्ता तं जहा- नामिंदे ठवणिंदे दव्विंदे, तओ इंदा पण्णत्ता तं जहा- ठाणं-३, उद्देसो-१

नाणिंदे दंसणिंदे चरित्तिंदे, तओ इंदा पण्णत्ता तं जहा- देविंदे असुरिंदे मणुस्सिंदे ।

[१२८] तिविहा विकुव्वणा पण्णत्ता तं जहा- बाहिरए पोग्गले परियादित्ता एगा विकुव्वणा बाहिरए पोग्गले अपरियादित्ता एगा विकुव्वणा बाहिरए पोग्गले परियादित्तावि अपरियादित्तावि एगा विकुव्वणा,

तिविहा विकुव्वणा पण्णत्ता तं जहा- अब्भंतरए पोग्गले परियादित्ता एगा विकुव्वणा अब्भंतरए पोग्गले अपरियादित्ता विएगा विकुव्वणा अब्भंतरए पोग्गले परियादित्तावि अपरियादित्तावि एगा विकुव्वणा,

तिविहा विकुव्वणा प० तं० जहा-बाहिरब्भंतरए पोग्गले परियादित्ता एगा विकुव्वणा बाहिरब्भंतरए पोग्गले अपरियादित्ता एगा विकुव्वणा बाहिरब्भंतरए पोग्गले परियादित्तावि अपरियादित्तावि एगा विकुव्वणा ।

[१२९] तिविहा नेरइया पण्णत्ता तं जहा- कतिसंचित्ता अकतिसंचिता अवत्तव्वगसंचिता, एवमेगिंदियवज्जा जाव वेमाणिया ।

[१३०] तिविहा परियारणा पण्णत्ता तं जहा- एगे देवे अण्णे देवे अण्णेसिं देवाणं देवीओ य अभिजुंजिय-अभिजुंजिय परियारेति अप्पणिज्जिताओ देवीओ अभिजुंजिय अभिजुंजिय परियारेति अप्पाणमेव अप्पणा विउव्विय-विउव्विय परियारेति, एगे देवे नो अण्णे देवे नो अण्णेसिं देवाणं देवीओ अभिजुंजिय-अभिजुंजिय परियारेति अत्तणिज्जिताओ देवीओ अभिजुंजिय-अभिजुंजिय परियारेति अप्पाणमेव अप्पणा विउव्विय-विउव्विय परियारेति, एगे देवे नो अण्णे देवे नो अण्णेसिं देवाणं देवीओ

अभिजुंजिय-अभिजुंजिय परियारेति नो अप्पणिज्जिताओ देवीओ अभिजुंजिय-अभिजुंजिय परियारेति अप्पाणमेव अप्पाणं विउव्विय-विउव्विय परियारेति ।

[१३१] तिविहे मेहुणे पण्णत्ते तं जहा- दिव्वे माणुस्सए तिरिक्खजोणिए, तओ मेहुणं गच्छंति तं जहा- देवा मणुस्सा तिरिक्खजोणिया, तओ मेहुणं सेवंति तं जहा- इत्थी पुरिसा नपुंसगा ।

[१३२] तिविहे जोगे पण्णत्ते तं जहा- मणजोगे वड़जोगे कायजोगे एवं नेरइयाणं विगल्लिंदिय वज्जाणं जाव वेमाणियाणं,

तिविहे पओगे पण्णत्ते तं जहा- मणपओगे वड़पओगे कायपओगे, जहा जोगो विगल्लिंदियवज्जाणं जाव तहा पओगोवि,

तिविहे करणे पण्णत्ते तं जहा- मणकरणे वड़करणे कायकरणे एवं- विगल्लिंदियवज्जं जाव वेमाणियाणं, तिविहे करणे पण्णत्ते तं जहा- आरंभकरणे संरंभकरणे समारंभकरणे निरंतरं जाव वेमा-
णियाणं ।

[१३३] तिहिं ठाणेहिं जीवा अप्पाउयत्ताए कम्मं पगरेंति तं जहा- पाणे अतिवातित्ता भवति मुसं वड़त्ता भवति तहारूवं समणं वा माहणं वा अफासुएणं अणेसणिज्जेणं असणपाणखाइमसाइमेणं पडिलाभेत्ता भवति, इच्छेतेहिं तिहिं ठाणेहिं जाव अप्पाउयत्ताए कम्मं पगरेंति ।

तिहिं ठाणेहिं जीवा दीहाउयत्ताए कम्मं पगरेंति तं जहा- नो पाणे अतिवातित्ता भवइ नो मुसं वड़त्ता भवइ तहारूवं समणं वा माहणं वा फासुएणं एसणिज्जेणं असणपाणखाइमसाइमेणं पडिलाभेत्ता भवइ, इच्छेतेहिं तिहिं ठाणेहिं जीवा दीहाउयत्ताए कम्मं पगरेंति ।

ठाणं-३, उद्देशो-१

तिहिं ठाणेहिं जीवा असुभदीहाउयत्ताए कम्मं पगरेंति, तं जहा पाणे अतिवातित्ता भवइ मुसं वड़त्ता भवइ तहारूवं समणं वा माहणं वा हीलेत्ता निंदित्ता खिंसेत्ता गरहित्ता अवमाणित्ता अन्नयरेणं अमणुन्नेणं अपीतिकारतेणं असणं पडिलाभित्ता भवइ, इच्छेतेहिं तिहिं ठाणेहिं जीवा असुभ दीहाउयत्ताए कम्मं पगरेंति

तिहिं ठाणेहिं जीवा सुभदीहाउयत्ताए कम्मं पगरेंति तं जहा- नो पाणे अतिवातित्ता भवइ नो मुसं वदित्ता भवइ तहारूवं समणे वा माहणं वा वंदित्ता णमंसित्ता सक्कारित्ता सम्माणित्ता कल्लाणं मंगलं देवतं चेतितं पज्जुवासेत्ता मणुण्णेणं पीतिकारणं असणपाणखाइमसाइमेणं पडिलाभेत्ता भवइ-
इच्छेतेहिं तिहिं ठाणेहिं जीवा सुहदीहाउयत्ताए कम्मं पगरेंति ।

[१३४] तओ गुत्तीओ पण्णत्ताओ तं जहा- मणगुत्ती वड़गुत्ती कायगुत्ती, संजयमणुस्साणं तओ गुत्तीओ पण्णत्ताओ तं जहा- मणगुत्ती वड़गुत्ती कायगुत्ती ।

तओ अगुत्तीओ पण्णत्ताओ तं जहा- मणअगुत्ती वड़अगुत्ती कायअगुत्ती, एवं- नेरइयाणं जाव थणियकुमाराणं, पचिदियतिरिक्खजोणियाणं असंजत मणुस्साणं वाणमंतराणं जोइसियाणं वेमाणियाणं ।

तओ दंडा पण्णत्ता तं जहा- मणदंडे वड़दंडे कायदंडे, नेरइयाणं तओ दंडा पण्णत्ता तं जहा- मणदंडे वड़दंडे कायदंडे, विगल्लिंदियवज्जं जाव वेमाणियाणं ।

[१३५] तिविहा गरहा पण्णत्ता तं जहा- मणसा वेगे गरहति वयसा वेगे गरहति कायसा वेगे गरहति-पावाणं कम्ममाणं अकरणयाए, अहवा- गरहा तिविहा पण्णत्ता तं जहा- दीहंपेगे अद्धं गरहति रहस्संपेगे अद्धं गरहति कायपेगे पडिसाहरति-पावाणं कम्ममाणं अकरणयाए ।

तिविहे पच्चक्खाणे पण्णत्ते तं० मणसा वेगे पच्चक्खाति वयसा वेगे पच्चक्खाति कायसा वेगे पच्चक्खाति-पावाणं कम्ममाणं अकरणयाए, एवं जहा गरहा तहा पच्चक्खाणेवि दो आलावगा भा०।

[१३६] तओ रुक्खा पण्णत्ता तं जहा- पत्तोवगे पुप्फोवगे फलोवगे, एवामेव तओ पुरिसजाता पण्णत्ता तं जहा- पत्तोवारुक्खसमाणे पुप्फोवारुक्खसमाणे फलोवारुक्खसमाणे ।

तओ पुरिसज्जाया पण्णत्ता तं जहा- नामपुरिसे ठवणपुरिसे दव्वपुरिसे, तओ पुरिसज्जाया पण्णत्ता तं जहानाणपुरिसे दंसणपुरिसे चरित्तपुरिसे,

तओ पुरिसज्जाया पण्णत्ता तं जहा- वेदपुरिसे चिंधपुरिसे अभिलावपुरिसे ।

तिविहा पुरिसा पण्णत्ता तं जहा- उत्तमपुरिसा मज्झिमपुरिसा जहण्णपुरिसा, उत्तमपुरिसा तिविहा पण्णत्ता तं जहा- धम्मपुरिसा भोगपुरिसा कम्मपुरिसा, धम्मपुरिसा अरहंता भोगपुरिसा चक्कवट्ठी कम्मपुरिसा वासुदेवा । मज्झिमपुरिसा तिविहा पण्णत्ता तं जहा- उग्गा भोगा राइण्णा, जहण्णपुरिसा तिविहा पं० तं जहा- दासा भयगा भाइल्लागा ।

[१३७] तिविहा मच्छा पण्णत्ता तं जहा- अंडया पोयया संमुच्छिमा, अंडया मच्छा तिविहा पण्णत्ता तं०- इत्थी पुरिसा नपुंसगा, पोतया मच्छा तिविहा पण्णत्ता तं जहा- इत्थी पुरिसा नपुंसगा ।

तिविहा पक्खी पण्णत्ता तं जहा- अंडया पोयया संमुच्छिमा, अंडया पक्खी तिविहा पण्णत्ता तं जहा- इत्थी पुरिसा नपुंसगा, पोयया पक्खी तिविहा पण्णत्ता तं जहा- इत्थी पुरिसा नपुंसगा एवमेतेणं अभिलावेणं उरपरिसप्पा वि भाणियव्वा, भुजपरिसप्पा वि भाणियव्वा ।

[१३८] एवं चेव तिविहाओ इत्थीओ पण्णत्ताओ तं०- तिरिक्खजोणित्थीओ मणुस्सित्थीओ ठाणं-३, उद्देसो-१

देवित्थीओ । तिरिक्खजोणीओ इत्थीओ तिविहाओ पण्णत्ताओ तं जहा- जलचरीओ थलचरीओ खहचरीओ मणुस्सित्थीओ तिविहाओ पण्णत्ताओ तं जहा- कम्मभूमियाओ अकम्मभूमियाओ अंतरदीविगाओ ।

तिविहा पुरिसा पण्णत्ता तं जहा- तिरिक्खजोणियपुरिसा मणुस्सपुरिसा देवपुरिसा । तिरिक्खजोणियपुरिसा तिविहा पण्णत्ता तं जहा- जलचरा थलचरा खहचरा । मणुस्सपुरिसा तिविहा पण्णत्ता तं जहा- कम्मभूमिया अकम्मभूमिया अंतरदीवगा । तिविहा नपुंसगा पण्णत्ता तं जहा- नेरइयनपुंसगा तिरिक्खजोणियनपुंसगा मणुस्सनपुंसगा । तिरिक्खजोणियनपुंसगा तिविहा पण्णत्ता तं जहा- जलयरा थलयरा खहयरा, मणुस्स-नपुंसगा तिविहा पण्णत्ता तं जहा- कम्मभूमिगा अकम्मभूमिगा अंतरदीवगा ।

[१३९] तिविहा तिरिक्खजोणिया पण्णत्ता तं जहा- इत्थी पुरिसा नपुंसगा ।

[१४०] नेरइयाणं तओ लेसाओ पण्णत्ताओ तं०- कण्हलेसा नीललेसा काउलेसा ।

असुरकुमाराणं तओ लेसाओ संकिलिद्धाओ पण्णत्ताओ तं जहा- कण्हलेसा नीललेसा काउलेसा, एवं जाव थणियकुमाराणं, एवं- पुढविकाइयाणं आउ-वणस्सतिकाइयाणवि, तेउकाइयाणं वाउकाइयाणं बैदियाणं तैदियाणं चउरिंदियाणंवि तओ लेस्सा जहा नेरइयाणं ।

पंचिदियतिरिक्खजोणियाणं तओ लेसाओ संकिलिद्धाओ पण्णत्ताओ तं जहा- कण्हलेसा नीललेसा काउलेसा, पंचिदियतिरिक्खजोणियाणं तओ लेसाओ असंकिलिद्धाओ पण्णत्ताओ तं जहा तेउलेसा पम्हलेसा सुक्कलेसा, एवं मणुस्साणं वि । जहा- कण्हलेसा नीललेसा काउलेसा [मणुस्साणं तओ लेसाओ असंकिलि-द्धाओ पण्णत्ताओ तं० जहा- वाणमंतराणं जहा असुरकुमाराणं ।

वेमाणियाणं तओ लेस्साओ पण्णत्ताओ तं०- तेउलेसा पम्हलेसा सुक्कलेसा ।

[१४१] तिहिं ठाणेहिं तारारूवे चलेज्जा तं जहा- विकुव्वमाणे वा परियारेमाणे वा ठाणाओ वा ठाणं संकममाणे तारारूवे चलेज्जा,

तिहिं ठाणेहिं देवे विज्जुयारं करेज्जा तं जहा- विकुव्वमाणे वा परियारेमाणे वा तहारूवस्स समणस्स वा माहणस्स वा इड्ढिं जुतिं जसं बलं वीरियं पुरिसक्कार-परक्कमं उवदंसेमाणे-देवे विज्जुयार करेज्जा ।

तिहिं ठाणेहिं देवे थणिय-सद्धं करेज्जा तं जहा- विकुव्वमाणे वा, एवं जहा विज्जुतारे तहेव थणियसद्धंपि ।

[१४२] तिहिं ठाणेहिं लोगंधयारे सिया तं जहा- अरहंतेहिं वोच्छिज्जमाणेहिं अरहंतपण्णत्ते धम्मं वोच्छिज्जमाणे पुव्वगते वोच्छिज्जमाणे, तिहिं ठाणेहिं लोगुज्जोते सिया तं जहा- अरहंतेहिं जायमाणेहिं अरहंतेहिं पव्वयमाणेहिं अरहंताणं नाणुप्पायमहिमासु ।

तिहिं ठाणेहिं देवंधकारे सिया तं जहा- अरहंतेहिं वोच्छिज्जमाणेहिं अरहंतपण्णत्ते धम्मं वोच्छिज्जमाणे पुव्वगते वोच्छिज्जमाणे, तिहिं ठाणेहिं देवुज्जोते सिया तं जहा- अरहंतेहिं जायमाणेहिं अरहंतेहिं पव्वयमाणेहिं अरहंताणं नाणुप्पायमहिमासु ।

तिहिं ठाणेहिं देवसण्णिवाए सिया तं जहा- अरहंतेहिं जायमाणेहिं अरहंतेहिं पव्वयमाणेहिं अरहंताणं नाणुप्पायमहिमासु एवं देवुक्कलिया, देवकहकहए ।

तिहिं ठाणेहिं देविंदा माणुसं लोगं हव्वमागच्छंति तं जहा- अरहंतेहिं जायमाणेहिं अरहंतेहिं पव्वयमाणेहिं अरहंताणं नाणुप्पायमहिमासु, एवं- सामाणिया, तायत्तीसगा, लोगपाला देवा अग्गमहिंसीओ ठाणं-३, उद्देसो-१

देवीओ, परिसोववण्णगा देवा, अणियाहिंवई देवा, आयरक्खा देवा, माणुसं लोगं हव्वमगच्छंति ।

तिहिं ठाणेहिं देव अब्भुट्ठिज्जा तं जहा- अरहंतेहिं जायमाणेहिं जाव तं चे व । एवं आसणाइं चलेज्जा, सीहणायं करेज्जा, चेलुक्खेवं करेज्जा,

तिहिं ठाणेहिं देवाणं चेइयरुक्खा चलेज्जा तं जहा- अरहंतेहिं जायमाणेहिं [अरहंतेहिं पव्वयमाणेहिं अरहंताणं नाणुप्पायमहिमासु] ।

तिहिं ठाणेहिं लोगंतिया देवा माणुसं लोगं हव्वमागच्छेज्जा तं जहा- अरहंतेहिं जायमाणेहिं अरहंतेहिं पव्वयमाणेहिं अरहंताणं नाणुप्पायमहिमासु ।

[१४३] तिण्हं दुप्पडियारं समणाउसो! तं जहा- अम्मपिउणो भट्ठिस्स धम्मायरियस्स, संपातोऽवि य णं केइ पुरिसे अम्मापियरं सयपागसहस्सपागेहिं तेल्लेहिं अब्भंगेत्ता सुरभिणा गंधट्टएणं उव्वट्ठित्ता तिहिं उदगेहिं मज्जावेत्ता सव्वालंकारविभूसियं करेत्ता मणुण्णं थालीपागसुद्धं अट्टारसवंजणाउलं भोयणं भोयावेत्ता जावज्जीवं पिट्ठिवडैंसियाए परिवहेज्जा, तेणावि तस्स अम्मपिउस्स दुप्पडियारं भवइ,

अहे णं से तं अम्मापियरं केवलिपण्णत्ते धम्मं आघवइत्ता पण्णवइत्ता परूवइत्ता ठाविता भवति, तेणामेव तस्स अम्मापिउस्स सुप्पडियारं भवति समणाउसो,

केइ महच्चे दरिद्वं समुक्कसेज्जा, तए णं से दरिद्वे समुक्किद्वे समाणे पच्छा पुरं च णं विउलभोगसमितिसमण्णागते यावि विहरेज्जा, तए णं से महच्चे अण्णया कयाइ दरिद्वीहूए समाणे तस्स दरिद्वस्स अंतिए हव्वमागच्छेज्जा, तए णं से दरिद्वे तस्स भट्टिस्स सव्वस्समवि दलयमाणे तेणावि तस्स दुप्पडियारं भवति, अहे णं से तं भट्टिं केवलिपण्णत्ते धम्मं आघवइत्ता पण्णवइत्ता परूवइत्ता ठावइता भवति, तेणामेव तस्स भट्टिस्स सुप्पडियारं भवति समणाउसो ।

केति कहारूवस्स समणस्स वा माहणस्स वा अंतिए एगमवि आरियं धम्मियं सुवयणं सोच्या निसम्म कालमासे कालं किच्चा अण्णयरेसु देवलोएसु देवत्ताए उववण्णे, तए णं से देवे तं धम्मायरियं दुब्भिकखाओ वा देसाओ सुभिकखं देसं साहरेज्जा, कंताराओ वा णिककंतरं करेज्जा, दीहकालिएणं वा रोगांतकेणं अभिभूतं समाणं विमोएज्जा तेणाविं तस्स धम्मायरियस्स दुप्पडियारं भवति, अहे णं से तं धम्मायरियं केवलिपण्णत्ताओ धम्माओ भट्टं समाणं भुज्जोवि केवलिपण्णत्ते धम्मं आघवइत्ता पण्णवइत्ता परूवइत्ता ठावइता भवति, तेणामेव तस्स धम्मायरियस्स सुप्पडियारं भवति समणाउसो ।

[१४४] तिहिं ठाणेहिं संपण्णे अणगारे अणादीयं अणवदग्गं दीहमद्धं चाउरंतं संसारकंतरं वीईवएज्जा, तं जहा- अनिदाणयाए दिट्ठिसंपन्नयाए जोगवाहियाए ।

[१४५] तिविहा ओसप्पिणी पण्णत्ता तं जहा- उक्कोसा मज्झिमा जहण्णा, एवं छप्पि समाओ भाणियव्वाओ जाव दूसम-दूसमा ।

तिविहा उस्सप्पिणी पण्णत्ता तं जहा- उक्कोसा मज्झिमा जहण्णा एवं छप्पि समाओ भाणि० जाव सुसम-सुसमा ।

[१४६] तिहिं ठाणेहिं अच्छिण्णे पोग्गले चलेज्जा तं जहा- आहारिज्जमाणे वा पोग्गले चलेज्जा विकुव्वमाणे वा पोग्गले चलेज्जा ठाणाओ वा ठाणं संकामिज्जमाणे पोग्गले चलेज्जा ।

तिविहे उवधी पण्णत्ते तं जहा- कम्मोवही सरीरोवही बाहिरभंडमत्तोवही, एवं असुरकुमाराणं भाणियव्वं, एवं-एगिंदियनेरइयवज्जं जाव वेमाणियाणं । अहवा-तिविहे उवधी पण्णत्ते तं जहा- सचित्ते, ठाणं-३, उद्देशो-१

अचित्ते मीसए, एवं नेरइयाणं निरंतरं जाव वेमाणियाणं ।

तिविहे परिग्गहे पण्णत्ते तं जहा- कम्मपरिग्गहे सरीरपरिग्गहे बाहिरभंडमत्त परिग्गहे, एवं- असुरकुमाराणं एवं- एगिंदियनेरइयवज्जं जाव वेमाणियाणं । अहवा-तिविहे परिग्गहे पण्णत्ते तं जहा- सचित्ते अचित्ते मीसए एवं नेरइयाणं निरंतरं जाव वेमाणियाणं ।

[१४७] तिविहे पणिहाणे पण्णत्ते जं जहा- मणपणिहाणे वयपणिहाणे कायपणिहाणे एवं- पंचिदियाणं जाव वेमाणियाणं, तिविहे सुप्पणिहाणे पण्णत्ते तं जहा- मणसुप्पणिहाणे वयसुप्पणिहाणे कायसुप्पणिहाणे,

संजयमणुस्साणं तिविहे सुप्पणिहाणे पण्णत्ते तं जहा- मणसुप्पणिहाणे वयसुप्पणिहाणे कायसुप्पणिहाणे, तिविहे दुप्पणिहाणे पण्णत्ते तं जहा- मणदुप्पणिहाणे वयदुप्पणिहाणे कायदुप्पणिहाणे एवं-पंचिदियाणं जाव वेमाणियाणं ।

[१४८] तिविहा जोणी प० तं०- सीता उसिणा सीओसिणा एवं एगिंदियाणं विगलिंदियाणं तेउकाइयवज्जाणं संमुच्छिमपंचिदियतिरिक्खजोणियाणं संमुच्छिममणुस्साणं य ।

तिविहा जोणी पण्णत्ता तं जहा- सचित्ता अचित्ता मीसिया एवं- एगिंदियाणं विगलिंदियाणं संमुच्छिमपंचिदियतिरिक्ख जोणियाणं संमुच्छिममणुस्साणं य ।

तिविहा जोणी पण्णत्ता तं जहा- संवुडा वियडा संवुडवियडा ।

तिविहा जोणी पन्नता तं जहा- कुम्मुण्णया संखावत्ता वंसीवत्तिया, कुम्मुण्णया णं जोणी उत्तमपुरिसामाऊणं, कुम्मुण्णयाते णं जोणिए तिविहा उत्तमपुरिसा गब्भं वक्कमंति तं जहा- अरहंता चक्कवट्ठी बलदेववासुदेवा, संखावत्ता णं जोणी इत्थीरयणस्स, संखावत्ताए णं जोणीए बहवे जीवा य पोग्गला य वक्कमंति विउक्कमंति चयंति उववज्जंति नो चेव णं निप्फज्जंति वंसीवत्तिता णं जोणी पिहज्जणस्स, वंसीवत्तिताए णं जोणिए बहवे पिहज्जणा गब्भं वक्कमंति ।

[१४९] तिविहा तणवणस्सइकाइया पण्णत्ता तं जहा- संखेज्जजीविका असंखेज्जजीविका अनंतजीविका ।

[१५०] जंबुद्धीवे दीवे भारहे वासे तओ तित्था पण्णत्ता तं जहा- मागहे वरदामे पभासे, एवं- एरवएवि, जंबुद्धीवे दीवे महाविदेहे वासे एगमेगे चक्कवट्ठिविजये तओ तित्था पण्णत्ता तं जहा- मागहे वरदामे पभासे, एवं- घायइसंडे दीवे पुरत्थिमद्धेवि पच्चत्थिमद्धेवि पुक्खरवरदीवद्धे-पुरत्थिमद्धेवि पच्चत्थिमद्धेवि ।

[१५१] जंबुद्धीवे दीवे भरहेरवएसु वासेसु तीताए उस्सप्पिणीए सुसमाए समाए तिण्णि सागरो वमकोडाकोडीओ काले होत्था एवं ओसप्पिणीए नवरं पन्नत्ते, आगमिस्साते उस्सीप्पणीए भविस्सति, एवं- घायइसंडे पुरत्थिमद्धे पच्चत्थिमद्धे वि, एवं-पुक्खरवरदीवद्धे पुरत्थिमद्धे पच्चत्थिमद्धेवि कालो भाणियव्वो ।

जंबुद्धीवे दीवे भरहेरवएसु वासेसु तीताए उस्सप्पिणीए सुसमसुसमाए समाए मणुया तिण्णि गाउयाइं उड्ढं उच्चत्तेणं होत्था, तिण्णि पलिओवमाइं परमाउं पालइत्था, एवं-इमीसे ओसप्पिणीए आगमिस्साए उस्सप्पिणीए,

जंबुद्धीवे दीवे देवकुरुउत्तरकुरासु मणुया तिण्णि गाउआइं उड्ढं उच्चत्तेणं पण्णत्ता, तिण्णि पलिओवमाइं परमाउं पालयंति, एवं जाव पुक्खरवरदीवद्धपच्चत्थिमद्धे ।

ठाणं-३, उद्देशो-१

जंबुद्धीवे दीवे भरहेरवएसु वासेसु एगमेगाए ओसप्पिणि-उस्सप्पिणीए तओ वंसाओ उप्पज्जिंसु वा उप्पज्जंति वा उप्पज्जिस्संति वा तं जहा- अरहंतवंसे चक्कवट्ठिवंसे दसारवंसे, एवं जाव पुक्खरवरदीवद्धपच्चत्थिमद्धे ।

जंबुद्धीवे दीवे भरहेरवएसु वासेसु एगमेगाए ओसप्पिणी-उस्सप्पिणीए तओ उत्तमपुरिसा उप्पज्जिंसु वा उप्पज्जंति वा उप्पज्जिस्संति वा तं जहा- अरहंता चक्कवट्ठी बलदेव-वासुदेवा, एवं जाव पुक्खरवरदीवद्धपच्चत्थिमद्धे, तओ आहाउयं पालयंति तं जहा- अरहंता चक्कवट्ठी बलदेववासुदेवा, तओ मज्झिममाउयं पालयंति तं जहा- अरहंता चक्कवट्ठी बलदेववासुदेवा ।

[१५२] बायरतेउकाइयाणं उक्कोसेणं तिण्णि राइंदियाइं ठिती पण्णत्ता । बायरवाउकाइयाणं उक्कोसेणं तिण्णि वाससहस्साइं ठिती पण्णत्ता ।

[१५३] अह भंते सालीणं वीहीणं गोधूमाणं जवाणं जवजवाणं- एतेसि णं धण्णाणं कोट्टाउत्ताणं पल्लाउत्ताणं मंचाउत्ताणं मालाउत्ताणं ओलित्ताणं लित्ताणं लंछियाणं मुद्धियाणं पिहिताणं केवइयं कालं जोणी संचिद्धति? जहण्णेणं अंतोमुहुत्तं उक्कोसेणं तिण्णि संवच्छराइं, तेण परं जोणी पमिलायति, तेण पुरं जोणी पविद्धंसति, तेण परं जोणी विद्धंसति, तेण परं बीए अबीए भवति, तेण परं जोणीवोच्छेदे पण्णत्ते ।

[१५४] दोच्चाए णं सक्करप्पभाए पुढवीए नेरइयाणं उक्कोसेणं तिण्णि सागरोवमाइं ठिती पण्णत्ता, तच्चाए णं वालुयप्पमाए पुढवीए जहण्णेणं नेरइयाणं तिण्णि सागरोवमाइं ठिती पण्णत्ता ।

[१५५] पंचमाए णं धूमप्पभाए पुढवीए तिण्णि निरयावाससयसहस्सा पण्णत्ता, तिसु णं पुढवीसु नेरइयाणं उसिणवेयणा पण्णत्ता तं जहा- पढमाए दोच्चाए तच्चाए तिसु णं पुढवीसु नेरइया उसिणवेयणं पच्चणुभवमाणा विहरंति तं जहा- पढमाए दोच्चाए तच्चाए ।

[१५६] तओ लोगे समा सपक्खिं सपडिदिसिं पण्णत्ता तं जहा- अप्पइट्ठाणे नरए जंबुद्वीवे दीवे सव्वट्ठिसिद्धे महा विमाणे, तओ लोगे समा सपक्खिं सपडिदिसिं पण्णत्ता तं जहा- सीमंतए णं नरए समयक्खेत्ते ईसीपब्भारा पुढवी ।

[१५७] तओ समुद्धा पगईए उदगरसेणं पण्णत्ता तं जहा- कालोदे पुक्खरोदे सयंभुरमणे, तओ समुद्धा बहुमच्छकच्छभाइण्णा पण्णत्ता तं जहा- लवणे कालोदे सयंभुरमणे ।

[१५८] तओ लोगे निस्सीला निव्वता निग्गुणा निम्मेरा निप्पच्चक्खाणपोसहोववासा कालमासे कालं किच्चा अहेसत्तमाए पुढवीए अप्पतिट्ठाणे नरए नेरइयत्ताए उवव्वज्जंति, तं जहा- रायाणो मंडलीया जे य महारंभा कोडुबी, तओ लोए सुसीला सुव्वया सग्गुणा समेरा सपच्चक्खाणपोसहोववासा कालमासे कालं किच्चा सव्वट्ठिसिद्धे विमाणे देवत्ताए उववत्तारो भवंति तं जहा- रायाणो परिचत्तकामभोगा सेणावती पसत्थारो ।

[१५९] बंभलोग-लंतएसु णं कप्पेसु विमाणा तिवण्णा पण्णत्ता तं जहा- किण्हा नीला लोहिया, आणयपाणयारणच्युतेसु णं कप्पेसु देवाणं भवधारणिज्जसरीरगा उक्कोसेणं तिण्णि रयणीओ उड्डं उच्चतेणं पण्णत्ता ।

[१६०] तओ पन्नत्तीओ कालेणं अहिज्जंति तं जहा- चंदपन्नत्ती सूरपन्नत्ती दीवसागरपन्नत्ती।

◦ तइए ठाणे पढमो उद्देसो समत्तो ◦

ठाणं-३, उद्देसो-२

० बीओ-उद्देसो ०

[१६१] तिविहे लोगे पण्णत्ते तं जहा- नामलोगे ठवणलोगे दव्वलोगे, तिविहे लोगे पण्णत्ते तं जहा- नाणलोगे दंसणलोग चरित्तलोगे, तिविहे लोगे पण्णत्ते तं जहा- उड्डलोगे अहोलोगे तिरियलोगे ।

[१६२] चमरस्स णं असुरिंदस्स असुरकुमाररण्णो तओ परिसाओ पण्णत्ताओ तं जहा- समिता चंडा जाया, अब्भितरिता समिता मज्झिमिता चंडा बाहिरिता जाया, चमरस्स णं असुरिंदस्स असुरकुमाररण्णो सामाणिताणं देवाणं तओ परिसाओ पण्णत्ताओ तं जहा- समिता जहेव चमरस्स, एवं-

तावत्तीसगाणवि लोगपालाणं- तुंबा तुडिया पव्वा, एवं- अग्गमहिंसीणवि, बलिस्सवि एवं चेव, जाव अग्गमहिंसीणं ।

धरणस्स य सामाणिय-तायत्तीसगाणं च समिता चंडा जाता, लोगपालाणं अग्गमहिंसीणं- ईसा तुडिया दढरहा जहा धरणस्स तहा सेसाणं भवणवासीणं,

कालस्स णं पिसाइंदस्स पिसायरण्णो तओ परिसाओ पण्णत्ताओ तं जहा- ईसा तुडिया दढरहा एवं- सामाणिया-अग्गमहिंसीणं, एवं जाव गीयरतिगीयजसाणं,

चंदस्स णं जोतिसिंदस्स जोतिसरण्णो तओ परिसाओ पण्णत्ताओ तं जहा- तुंबा तुडिया पव्वा एवं- सामाणिय अग्गमहिंसीणं, एवं- सूरस्सवि ।

सक्कस्स णं देविंदस्स देवरण्णो तओ परिसाओ पण्णत्ताओ तं जहा- समिता चंडा जाया, एवं जहा चमरस्स जाव अग्गमहिंसीणं, एवं जाव अच्युतस्स लोगपालाणं ।

[१६३] तओ जामा पण्णत्ता तं जहा- पढमे जामे मज्झिमे जामे पच्छिमे जामे, तिहिं जामेहिं आया केवलिपण्णत्तं धम्मं लभेज्ज सवणयाए तं जहा- पढमे जामे मज्झिमे जामे पच्छिमे जामे । एवं जाव केवलनाणं उप्पाडेज्जा तं जहा- पढमे जामे मज्झिमे जामे पच्छिमे जामे ।

तओ वया पण्णत्ता तं जहा- पढमे वए मज्झिमे वए पच्छिमे वए, तिहिं वएहिं आया केवलिपण्णत्तं धम्मं लभेज्ज सवणयाए तं जहा- पढमे वए मज्झिमे वए पच्छिमे वए, एसो चेव गमो नेयव्वो, जाव केवलनाणंति ।

[१६४] तिविहा बोधी पण्णत्ता तं जहा- नाणबोधी दंसणबोधी चरित्तबोधी,

तिविहा बुद्धा पण्णत्ता तं जहा- नाणबुद्धा दंसणबुद्धा चरित्तबुद्धा, एवं मोहे, एवं मूढा ।

[१६५] तिविहा पव्वज्जा पण्णत्ता तं- इहलोगपडिबद्धा परलोगपडिबद्धा दुहतो पडिबद्धा, तिविहा पव्वज्जा पण्णत्ता तं जहा- पुरतोपडिबद्धा मग्गतोपडिबद्धा दुहओ पडिबद्धा, तिविहा पव्वज्जा पण्णत्ता तं जहा- तुयावइत्ता पुयावइत्ता बुआवइत्ता, तिविहा पव्वज्जा पण्णत्ता तं जहा- ओवातपव्वज्जा अक्खातपव्वज्जा संगारपव्वज्जा ।

[१६६] तओ नियंठा नोसण्णोवउत्ता प० तं० जहा- पुलाए नियंठे सिणाए, तओ नियंठा सण्ण-नोसण्णोवउत्ता पण्णत्ता तं जहा बउसे पडिसेवणा कुसीले कसायकुसीले ।

[१६७] तओ सेहभूमीओ पण्णत्ताओ तं जहा- उक्कोसा मज्झिमा जहण्णा, उक्कोसा छम्मासा मज्झिमा चउमासा जहण्णा सत्तराइंदिया ।

तओ थेरभूमीओ पण्णत्ताओ तं जहा- जातिथेरे सुयथेरे परियायथेरे, सट्ठिवासजाए समणे ठाणं-३, उद्देसो-२

निग्गंथे जातिथेरे, ठाणसमवायधरे णं समणे निग्गंथे सुयथेरे, वीसवासपरियाए णं समणे निग्गंथे परियायथेरे ।

[१६८] तओ पुरिसजाया पण्णत्ता तं जहा- सुमणे दुम्मणे नोसुमणे-नोदुम्मणे, तओ पुरिसजाया पण्णत्ता तं जहा- गंता नामेगे सुमणे भवति, गंता नामेगे दुम्मणे भवति, गंता नामेगे नोसमणे-नोदुम्मणे भवति,

तओ पुरिसजाया पन्नत्ता तं जहा- जामीतेगे सुमणे भवति, जामीतेगे दुम्मणे भवति
जामीतेगे नोसुमणे-नोदुम्मणे भवति, तओ पुरिसजाया पन्नत्ता तं जहा- जाइस्सामीतेगे सुमणे भवति,
जाइस्सामीतेगे दुम्मणे भवति, जाइस्सामीतेगे नोसुमणे-नोदुम्मणे भवति ।

तओ पुरिसजाया पणत्ता तं जहा- अगंता णामेगे सुमणे भवति, अगंता णामेगे दुम्मणे
भवति, अगंता णामेगे नोसुमणे-नोदुम्मणे भवति ।

तओ पुरिसजाया पन्नत्ता तं जहा- न जामि एगे सुमणे भवति, न जामि एगे दुम्मणे
भवति, न जामि एगे नोसुमणे नोदुम्मणे भवति । तओ पुरिसजाया पन्नत्ता तं जहा- न जाइस्सामि एगे
सुमणे भवति न जाइस्सामि एगे दुम्मणे भवति न जाइस्सामि एगे नोसुमणे-नोदुम्मणे भवति ।

एवं आगंता नामेगे सुमणे भवति, एमितेगे सुमणे-३, एस्सामीति एगे सुमणे भवति-३, एवं
एएणं अभिलावेणं-

[१६९] गंता य अगंता य आगंता खलु तहा अणागता ।

चिद्धित्तमचिद्धित्ता निसितित्ता चेव नो चेव ॥

[१७०] हंता य अहंता य छिंदित्ता खलु तहा अछिंदित्ता ।

बूतित्ता अबूतित्ता भासित्ता चेव नो चेव ॥

[१७१] दच्चा य अदच्चा य भुंजित्ता खलु तहा अभुंजित्ता ।

लंभित्ता अलंभित्ता पिइत्ता चेव नो चेव ॥

[१७२] सुतित्ता असुतित्ता जुज्झित्ता खलु तहा अजुज्झित्ता ।

जतित्ता अजयिता य पराजिणित्ता चेव नो चेव ॥

[१७३] सद्दा रूवा गंधा रसा य फासा तहेव ठाणा य ।

निस्सीलस्स गरहिता पसत्था पुण सीलवंतस्स ॥

एवमिक्केक्के तिन्नि उ तिन्नि उ आलावगा भाणियच्चा, सद्धं सुणेत्ता नामेगे सुमणे
भवति-३, एवं सुणेमीति-३, सुणिस्सामीति-३, एवं असुणेत्ता नामेगे सुमणे भवति-३, न सुणेमीति-३, न
सुणिस्सामीति-३, एवं रूवाइं गंधाइं रसाइं फासाइं, एक्केक्के छ छ आलावगा भाणियच्चा- १२७- आलावगा
भवन्ति ।

[१७४] तओ ठाणा निसीलस्स निव्वयस्स निग्गुणस्स निम्मेरस्स निप्पच्चक्खाणपोसहोव-
वासस्स गरहिता भवन्ति तं जहा- अस्सिं लोगे गरहिते भवति उववाते गरहिते भवति आयाति गरहिता
भवति तओ ठाणा सुसीलस्स सुव्वयस्स सग्गुणस्स सुमेरस्स सपच्चक्खाणपोसहोववासस्स पसत्था भवंतं तं
जहा- अस्सिं लोगे पसत्थे भवति उववाए पसत्थे भवति आजाती पसत्था भवति ।

[१७५] तिविधा संसारसमावण्णगा जीवा पन्नत्ता तं जहा- इत्थी पुरिसा नपुंसगा, तिविहा
ठाणं-३, उद्देसो-२

सव्वजीवा पन्नत्ता तं जहा- सम्मद्धिद्वी मिच्छाद्धिद्वी सम्मामिच्छद्धिद्वी, अहवा- तिविहा सव्वजीवा पन्नत्ता
तं जहा- पज्जत्तगा अपज्जत्तगा नोपज्जत्तगा-नोऽपज्जत्तगा । एवं- सम्मद्धिद्वि-पज्जतग-परित्ता-सुहुम-
सन्नि-भविया य ।

[१७६] तिविधा लोगठिती पन्नत्ता तं जहा- आगासपइडिए वाते वातपइडिए उदही उइदहीपइडिया पुढवी, तओ दिसाओ पन्नत्ताओ तं जहा- उइडा अहा तिरिया, तिहिं दिसाहिं जीवाणं गती पवत्तति- उइडाए अहाए तिरियाए,

तिहिं दिसाहिं जीवाण-आगती वक्कती आहारे वुइढी निवुइढी गतिपरियाए समुग्धाते कालसंजोगे दंसणाभिगमे जीवाभिगमे पण्णत्ते तं जहा- उइडाए अहाए तिरियाए तिहिं दिसाहिं जीवाणं अजीवाभिगसे पण्णत्ते तं जहा- उइडाए अहे तिरियाए एवं-पंचिंदियतिरिक्खजोणियाणं एवं-मणुस्साणवि ।

[१७७] तिविहा तसा पन्नत्ता तं जहा- तेउकाइया वाउकाइया उरालातसा पाणा, तिविहा थावरा पन्नत्ता तं जहा- पुढविकाइया आउकाइया वणस्सइकाइया ।

[१७८] तओ अच्छेज्जा पन्नत्ता तं जहा- समए पदेसे परमाणू, एवं अभेज्जा, अडज्जा, अगिज्जा, अणइडा, अमज्जा, अपएसा, तओ अविभाइमा पन्नत्ता तं जहा- समए पदेसे परमाणू ।

[१७९] अज्जोति समणे भगवं महावीरे गोतमादी समणे निग्गंथे आमंतेत्ता एवं वयासी- किंभया-पाणा? समणाउसो!, गोतमादी समणा निग्गंथा समणं भगवं महावीरं उवसंकमंति उवसंकमित्ता वंदंति नमंसंति वंदित्ता नमंसित्ता एवं वयासी- नो खलु वयं देवाणुप्पिया! एयमद्वं जाणामो वा पासामो वा, तं जदि णं देवाणुप्पिया एयमद्वं नो गिलायंति परिकहित्तए तमिच्छामो णं देवाणुप्पियाणं अंतिए एयमद्वं जाणित्तए, अज्जोति समणे भगवं महावीरे गोतमादी समणे निग्गंथे आमंतेत्ता एवं वयासी-

दुक्खभया पाणा समणाउसो! से णं भंते! दुक्खे केण कडे? जीवेणं कडे, पमादेणं! से णं भंते! दुक्खे कहं वेइज्जति? अप्पमाएणं।

[१८०] अन्नउत्थिया णं भंते! एवं आइक्खंति एवं भासंति एवं पण्णवेंति एवं परूवेंति कहणं समणाणं निग्गंथाणं किरिया कज्जति? तत्थ जा सा कडा कज्जइ नो तं पुच्छंति, तत्थ जा सा कडा नो कज्जति, नो तं पुच्छंति, तत्थ जा सा अकडा नो कज्जति नो तं पुच्छंति, तत्थ जा सा अकडा कज्जति नो तं पुच्छंति, से एवं वत्तव्वं सिया? अकिच्चं दुक्खं अफुसं दुक्खं अकज्जमाणकडं दुक्खं अकट्ठु-अकट्ठु पाणा भूया जीवा सत्ता वेयणं वेदंतित्ति वत्तव्वं, जे ते एवमाहंसु मिच्छा ते एवमाहंसु, अहं पुण एवमाइक्खामि एवं भासामि एवं पण्णवेमि एवं परूवेमि- किच्चं दुक्खं फुसं दुक्खं कज्जमाणकडं दुक्खं कट्ठु-कट्ठु पाणा भूया जीवा सत्ता वेयणं वेयंतित्ति वत्तव्वयं सिया ।

• तइए ठाणे बीओ उद्देसो समत्तो •

० तइओ उद्देसो ०

[१८१] तिहिं ठाणेहिं मायी मायं कट्ठु नो आलोएज्जा नो पडिक्कमेज्जा नो निंदेज्जा नो गरिहेज्जा नो विउद्देज्जा नो विसोहेज्जा नो अकरणयाए अब्भुद्देज्जा नो अहारिहं पायच्छित्तं तवोकम्मं पडिवज्जेजा, तं जहा- अकरिसुं वासहं करेमि वासहं करिस्सामि वासहं ।

तिहिं ठाणेहिं मायी मायं कट्ठु नो आलोएज्जा नो पडिक्कमेज्जा जाव नो पडिवज्जेज्जा तं ठाणं-३, उद्देसो-३

जहा- अकित्ती वा मे सिया अवण्णे वा मे सिया अविनए वा मे सिया ।

तिहिं ठाणेहिं मायी मायं कट्ठु नो आलोएज्जा जाव नो पडिवज्जेज्जा, तं जहा- कित्ती वा मे परिहाइस्साति जसे वा मे परिहाइस्साति पूयासक्कारे वा मे परिहाइस्सति ।

तिहिं ठाणेहिं मायी मायं कट्टु आलोएज्जा पडिक्कमेज्जा जाव पडिवज्जेज्जा, तं जहा-
मायि णं अस्सिं लोगे गरहिए भवति उववाए गरहिए भवति आयाती गरहिया भवति ।

तिहिं ठाणेहिं मायी मायं कट्टु आलोएज्जा जाव पडिवज्जेज्जा तं जहा- अमाइस्स णं अस्सिं
लोगे पसत्थे भवति उववाते पसत्थे भवति आयाती पसत्था भवति ।

तिहिं ठाणेहिं मायी मायं कट्टु आलोएज्जा जाव पडिवज्जेज्जा तं जहा- नाणइयाए
दंसणइयाए चरित्तइयाए ।

[१८२] तओ पुरिसजाया पन्नत्ता तं जहा- सुत्तधरे अत्थधरे तदुभयधरे ।

[१८३] कप्पति निग्गंथाण वा निग्गंथीण वा तओ वत्थाइं धारित्तए वा परिहरित्तए वा तं
जहा- जंगिए भंगिए खोमिए, कप्पति निग्गंथाण वा निग्गंथीण वा तओ पायाइं धारित्तए वा परिहरित्तए
वा तं जहा- लाउयपादे वा दारुपादे वा मट्टियापादे वा ।

[१८४] तिहिं ठाणेहिं वत्थं धरेज्जा तं जहा- हिरिपत्तियं दुगुंछापत्तियं परीसहवत्तियं ।

[१८५] तओ आयरक्खा पन्नत्ता तं जहा- धम्मयाए पडिचोयणाए पडिचोएत्ता भवति
तुसिणीए वा सिया उट्ठित्ता वा आताए एगंतमंतमवक्कमेज्जा निग्गंथस्स नं गिलायमाणस्स कप्पति तओ
वियडदतीओ पडिग्गाहित्तते तं जहा- उक्कोसा मज्झिमा जहण्णा ।

[१८६] तिहिं ठाणेहिं समणे निग्गंथे साहम्मियं संभोगियं विसंभोगियं करेमाणे नातिक्कमति
तं जहा- सयं वा दट्ठं, सड्ढयस्स वा निस्सम, तच्चं मोसं आउट्ठति, चउत्थं नो आउट्ठति ।

[१८७] तिविधा अणुण्णा पन्नत्ता तं जहा- आयरियत्ताए उवज्झायत्ताए गणित्ताए,
तिविधा समणुण्णा पन्नत्ता तं जहा- आयरियत्ताए उवज्झायत्ताए गणित्ताए, एवं उवसंपया, एवं
विजहणा ।

[१८८] तिविहे वयणे पण्णत्ते तं जहा- तव्वयणे तदण्णवयणे नोअवयणे, तिविहे अवयणे
प० तं० जहा- नोतव्वयणे नोतदण्णवयणे अवयणे ।

तिविहे मणे पण्णत्ते तं जहा- तम्मणे तयण्णमणे नोअमणे, तिविहे अमणे पण्णते तं
जहा- नोतम्मणे नोतयण्णमणे अमणे ।

[१८९] तिहिं ठाणेहिं अप्पवुट्ठीकाए सिया तं जहा- तस्सिं च णं देसंसि वा पदेसंसि वा नो
बहवे उदगजोणिया जीवा य पोग्गला य उदगत्ताते वक्कमंति विउक्कमंति चयंति उववज्जंति, देवा नागा
जक्खा भूता नो सम्ममाराहित्ता भवंति, तत्थ समुट्ठियं उदगपोग्गलं परिणतं वासितुकामं अण्णं देसं
साहरंति अब्भवद्दलं च णं समुट्ठितं परिणतं वासितुकामं वाउकाए विधुणति इच्चेतेहिं तिहिं ठाणेहिं
अप्पवुट्ठिगए सिया ।

तिहिं ठाणेहिं महावुट्ठीकाए सिया तं जहा- तंसि च णं देसंसि वा पदेसंसि वा बहवे
उदगजोणिया जीवा य पोग्गला य उदगत्ताए वक्कमंति विउक्कमंति चयंति उववज्जंति देवा नागा जक्खा
भूता सम्ममाराहिता भवंति, अन्नत्थ समुट्ठितं उदगपोग्गलं परिणय वासितुकामं तं देसं साहरंति
अब्भवद्दलं च नं समुट्ठितं परिणयं वासितुकामं नो वाउआए विधुणति, इच्चेतेहिं तिहिं ठाणेहिं महा-वु-
ठाणं-३, उट्ठेसो-३

ट्टिकाए सिया ।

[१९०] तिहिं ठाणेहिं अहुणोववण्णे देवे देवलोगेसु इच्छेज्ज माणुसं लोगं हव्वमागच्छित्तए, नो चेव णं संचाएति हव्वमागच्छित्तए तं जहा- अहुणोववण्णे देवे देवलोगेसु दिव्वेसु कामभोगेसु मुच्छित्ते गिद्धे गढिते अज्झोववण्णे से न माणुस्सए कामभोगे नो आढाति नो परियाणाति नो अट्ठं बंधति नो नियाणं पगरेति नो ठिइपकप्पं पगरेति,

अहुणोववण्णे देवे देवलोगेसु दिव्वेसु कामभोगेसु मुच्छित्ते गिद्धे गढिते अज्झोववण्णे तस्स णं माणुस्सए पेम्मं वोच्छिण्णे दिव्वे संकंते भवति ।

अहुणोववण्णे देवे देवलोगेसु दिव्वेसु कामभोगेसु मुच्छित्ते गिद्धे गढिते अज्झोववण्णे तस्स णं एवं भवति-इण्हं गच्छं मुहुत्तं गच्छं, तेणं कालेणमप्पाउया मणुस्सा कालधम्मणा संजुत्ता भवन्ति, इच्छेतेहिं तिहिं ठाणेहिं अहुणोववण्णे देवे देवलोगेसु इच्छेज्ज माणुसं लोगं हव्वमागच्छित्तए नो चेव णं संचाएति हव्वमागच्छित्तए ।

तिहिं ठाणेहिं अहुणोववण्णे देवे देवलोगेसु इच्छेज्ज माणुसं लोगं हव्वमागच्छित्तए संचाएइ हव्वमागच्छित्तए-अहुणोववण्णे देवे देवलोगेसु दिव्वेसु कामभोगेसु अमुच्छित्ते अगिद्धे अगढिते अणज्झोववण्णे तस्स णमेव भवति-अत्थि णं मम माणुस्सए भवे आयरिएति वा उवज्झाएति वा पवत्तीति वा थेरेति वा गणीति वा गणधरेति वा गणावच्छेदेति वा जेसिं पभावेणं मए इमा एतारूवा दिव्वा देविइढी दिव्वा देवजुती दिवे देवाणुभावे लद्धे पत्ते अभिसमण्णागते तं गच्छामि णं तं भगवंते वंदामि नमंसामि सक्कारेमि सम्माणेमि कल्लाणं मंगलं देवयं चेइयं पज्जुवासामि ।

अहुणोववण्णे देवे देवलोगेसु दिव्वेसु कामभोगेसु अमुच्छिए अगिद्धे अगढिते अणज्झोववण्णे तस्स णं एवं भवति- एस णं माणुस्सए भवे नाणीति वा तवस्सीति वा अतिदुक्कर-दुक्करकारगे तं गच्छामि णं ते भगवंते वंदामि नमंसामि जाव पज्जुवासामि,

अहुणोववण्णे देवे देवलोगेसु दिव्वेसु कामभोगेसु अमुच्छिए अगिद्धे अगढिते अणज्झोववण्णे तस्स णमेवं भवति-अत्थि णं मम माणुस्सए भवे माताति वा जाव सुण्हाति वा तं गच्छामि णं तेसिमंतियं पाउब्भवामि पासंतु ता मे इमं एतारूवं दिव्वं देविइढिं दिव्वं देवजुतिं दिव्वं देवाणुभावं लद्धं पत्तं अभिसमण्णागयं इच्छेतेहिं तिहिं ठाणेहिं अहुणोववण्णे देवे देवलोगेसु इच्छेज्ज माणुसं लोगं हव्वमागच्छित्तए संचाएति हव्वमागच्छित्तए ।

[१९१] तओ ठाणाइं देवे पीहेज्जा तं जहा- माणुस्सगं भवं, आरिए खेत्ते जम्मं, सुकुल पच्चायाति ।

तिहिं ठाणेहिं देवे परितप्पेज्जा तं जहा- अहो णं मए संते बले संते वीरिए संते पुरिसक्कार-परक्कमे खेमंसि सुभिकखंसि आयरिय-उवज्झाएहिं विज्जमाणेहिं कल्लसरीरेणं नो बहुए सुते अहीते, अहो णं मए इहलोगपडिबद्धेणं परलोगपरंमुहेणं विसयतिसितेणं नो दीहे सामण्णपरिया अणुपालिते, अहो णं मए इइदि-रस-साय-गरुणं भोगासंसगिद्धेणं नो विसुद्धे चरिते फासिते, इच्छेतेहिं तिहिं ठाणेहिं देवे परितप्पेज्जा ।

[१९२] तिहिं ठाणेहिं देवे चइस्सामित्ति जाणइ तं जहा- विमाणाभरणाइं निप्पभाइं पासित्ता, कप्परुक्खगं मिलायमाणं पासित्ता, अप्पणो तेयलेस्सं परिहायमाणं जाणित्ता, इच्छेएहिं तिहिं ठाणेहिं देवे ठाणं-३, उद्देसो-३

चइस्सामित्ति जाणइ ।

तिहिं ठाणेहिं देवे उव्वेगमागच्छेज्जा तं जहा- अहो णं मए इमाओ एतारूवाओ दिव्वाओ देविइदीओ दिव्वाओ देवजुतीओ दिव्वाओ देवाणुभावाओ लद्धाओ पत्ताओ अभिसमण्णागताओ चइयव्वं भविस्सति, अहो णं मए माउओयं पिउसुक्कं तं तदुभयसंसद्वं तप्पढमयाए आहारो आयारेयव्वो भविस्सति, अहो णं मए कलमल-जंबालाए असुइए उव्वेयणियाए भीमाए गब्भवसहीए वसियव्वं भविस्सइ इच्चेएहिं तिहिं ठाणेहिं देवे उव्वेगमागच्छेज्जा ।

[१९३] तिसंठिया विमाणा पन्नत्तां तं जहा- वट्ठा तंसा चउरंसा, तत्थ णं जे ते वट्ठा विमाणा ते णं पुक्खरकणियासंठाणसंठिया सव्वओ समंता पागार-परिक्खित्ता एगदुवारा पन्नत्ता, तत्थ णं जे ते तंसा विमाणा ते णं सिंघाडगसंठाणसंठिया दुहतो पागारपरिक्खित्ता एगतो वेइया-परिक्खित्ता तिदुवारा पन्नत्ता, तत्थ णं जे ते चउरंसा विमाणा ते णं अक्खाडगसंठाणसंठिया सव्वतो समंता वेइया-परिक्खित्ता चउदुवारा पन्नत्ता ।

तिपतिट्ठिया विमाणा पन्नत्ता तं जहा- घणोदधिपतिट्ठिता घणवातपइट्ठिता ओवासंतपइट्ठिता, तिविधा विमाणा पन्नत्ता तं जहा- अवट्ठिता वेउव्विता पारिजाणिया ।

[१९४] तिविधा नेरइया पन्नत्ता तं जहा- सम्मादिट्ठी मिच्छादिट्ठी सम्मामिच्छा-दिट्ठी, एवं-विगल्लिंदियवज्जं जाव वेमाणियाणं ।

तओ दुग्गतीओ पन्नत्ताओ तं० नेरइयदुग्गतो तिरिक्खजोणियदुग्गती मणुयदुग्गती । तओ सुगतीओ पन्नत्ताओ तं जहा- सिद्धसोगती देवसोगती मणुस्ससोगती ।

तओ दुग्गता पन्नत्ता तं जहा- नेरइयदुग्गता तिरिक्खजोणियदुग्गता मणुस्सदुग्गता, तओ सुगता पन्नत्ता तं जहा- सिद्धसोगता देवसुग्गता मणुस्ससुग्गता ।

[१९५] चउत्थभत्तियस्स णं भिक्खुस्सं कप्पंति तओ पाणगाइं पडिगाहित्तए तं जहा- उस्सेइमे संसेइमे चाउलधोवणे, छट्ठभत्तियस्स णं भिक्खुस्स कप्पंति तओ पाणगाइं पडिगाहित्तए तं जहा- तिलोदए तुसोदए जोवदए, अट्ठमभत्तियस्स णं भिक्खुस्स कप्पंति तओ पाणगाइं पडिगाहित्तए तं जहा- आयामए सोवीरए सुद्धवियडे ।

तिविहे उवहडे पण्णत्ते तं जहा- फलिओवहडे सुद्धोवहडे संसट्ठोवहडे, तिविहे ओग्गहिते पण्णत्ते तं जहा- जं च ओगण्हति जं च साहरति जं च आसगंसि पक्खिवति,

तिविधा ओमोयरिया पन्नत्ता तं जहा- उवगरणोमोयरिया भत्तपाणोमोदरिया भावोमोदरिया । उवगरणोमोदरिया तिविहा पन्नत्ता तं जहा- एगे वत्थे एगे पाते चियत्तोवहि-साइज्जणया,

तओ ठाणा निग्गंथाण वा णिग्गंथीण वा अहियाए असुभाए अखमाए अणिस्सेसाए अणाणुगामियत्ताए भवंति तं जहा- कूअणता कक्करणता अवज्झाणता, तओ ठाणा निग्गंथाण वा निग्गंथीण वा हिताए सुहाए खमाए णिस्सेसाए आणुगामिअत्ताए भवंति तं जहा- अकूअणता अक्करणता अणवज्झाणता ।

तओ सल्ला पन्नत्ता तं जहा- मायासल्ले नियाणसल्ले मिच्छादंसणसल्ले, तिहिं ठाणेहिं समणे निग्गंथे संखित्त-विउलतेउलेस्से भवति तं जहा- आयावणताए खंतिखमाए अपाणगेणं तवोकम्मणे,

तिमासियं णं भिक्खुपडिमं पडिवण्णस्स अणगारस्स कप्पंति तओ दत्तीओए भोअणस्स ठाणं-३, उट्ठेसो-३

पडिगाहेत्तए तओ पाणगस्स, एगरातियं भिक्खुपडिमं सम्मं अणुपालेमाणस्स अणगारस्स इमे तओ ठाणा अहिताए असुभाए अखमाए अणिससेयसाए अणाणुगमियत्ताए भवंति तं जहा- उम्मायं वा लभिज्जा दीहकालियं वा रोगातंकं पाउणेज्जा केवलिपन्नत्ताओ वा धम्माओ भंसेज्जा, एगरातियं भिक्खुपडिमं सम्मं अणुपालेमाणस्स अणगारस्स तओ ठाणा हिताए सुभाए खमाए णिससेसाए आणुगामियत्ताए भवंति तं जहा- ओहिनाणे वा से समुप्पज्जेज्जा मणपज्जवनाणे वा से समुप्पज्जेज्जा केवलनाणे वा से समुप्पज्जेज्जा ।

[१९६] जंबुदीवे दीवे तओ कम्मभूमीओ पन्नत्ताओ तं जहा- भरहे एरवए महाविदेहे, एवं- घायइसंडे दीवे पुरत्थिमद्धे जाव पुक्खरवरदीवड्ढपच्चत्थिमद्धे ।

[१९७] तिविहे दंसणे पणत्ते तं जहा- सम्मदंसणे मिच्छदंसणे सम्मामिच्छदंसणे, तिविहा रुई पन्नत्ता तं जहा- सम्मरुई मिच्छरुई सम्मामिच्छरुई, तिविधे पओगे पणत्ते तं जहा- सम्मपओगे मिच्छपओगे सम्मामिच्छपओगे ।

[१९८] तिविहे ववसाए पणत्ते तं जहा- धम्मिए ववसाए अधम्मिए ववसाए धम्मियाधम्मिए ववसाए, अहवा-तिविधे ववसाए पणत्ते तं जहा- पच्चक्खे पच्चइए आणुगामिए, अहवा- तिविधे ववसाए पणत्ते तं जहा- इहलोइए परलोइए इहलोइयपरलोइए, इहलोइए ववसाए तिविहे पणत्ते तं जहा- लोइए वेइए सामइए, लोइए ववसाए तिविधे पणत्ते तं जहा- अत्थे धम्मे कामे, वेइए ववसाए तिविधे पणत्ते तं जहा- रिउव्वेदे जउव्वेदे सामवेदे, सामइए ववसाए तिविधे पणत्ते तं जहा- नाणे दंसणे चरित्ते,

तिविधा अत्थजोणी पन्नत्ता तं जहा- सामे दंडे भेदे ।

[१९९] तिविहा पोग्गला पन्नत्ता तं जहा- पओगपरिणता मीसापरिणता वीससापरिणता, तिपतिट्ठिया नरगा पन्नत्ता तं जहा- पुढविपतिट्ठिया आगासपतिट्ठिया आयपइट्ठिया, नेगम-संगह-ववहाराणं पुढविपतिट्ठिया उज्जुसुतस्स आगासपतिट्ठिया तिण्हं सद्दणयाणं आयपतिट्ठिया ।

[२००] तिविधे मिच्छत्ते पणत्ते तं जहा- अकिरिया अविणए अन्नाणे, अकिरिया तिविधा पन्नत्ता तं जहा- पओगकिरिया समुदाणकिरिया अन्नाणकिरिया, पओगकिरिया तिविधा पन्नत्ता तं जहा- मणपओगकिरिया वइपओगकिरिया कायपओगोकिरिया, समुदाणकिरिया तिविधा पन्नत्ता तं जहा- अणंतर-समुदाणकिरिया परंपरसमुदाणकिरिया तदुभयसमुदाणकिरिया, अन्नाणकिरिया तिविधा पन्नत्ता तं जहा- मतिअन्नाणकिरिया सुतअन्नाणकिरिया विभंगअन्नाणकिरिया, अविणए तिविहे पणत्ते तं जहा- देसच्चाई निरालंबणता नानापेज्जदोसे, अन्नाणे तिविधे पणत्ते तं जहा- देसन्नाणे सव्वन्नाणे भावन्नाणे ।

[२०१] तिविहे धम्मे पणत्ते तं जहा- सुयधम्मे चरित्तधम्मे अत्थिकायधम्मे, तिविधे उवक्कमे पणत्ते तं जहा- धम्मिए उवक्कमे अधम्मिए उवक्कमे धम्मियाधम्मिए उवक्कमे, अहवा- तिविधे उवक्कमे पणत्ते तं जहा- आओवक्कमे परोवक्कमे तदुभयोवक्कमे, एवं वेयावच्चे, अणुग्गहे, अणुसद्धी, उवालंभे, एवमेक्केक्के तिन्नि तिन्न आलावगा जहेव उवक्कमे ।

[२०२] तिविहा कहा पन्नत्ता तं जहा- अत्थकहा धम्मकहा कामकहा, तिविहे विणिच्छए पणत्ते तं जहा- अत्थविणिच्छए धम्मविणिच्छए कामविणिच्छए ।

[२०३] तहारूवं णं भंते समणं वा माहणं वा पज्जुवासमाणस्स किंफला पज्जुवासण्या? सवणफला, से णं भंते सवणे किंफले? नाणफले, से णं भंते नाणे किंफले? विन्नाणफले । एवमेतेणं अभिलावेणं इमा गाथा अणुगंतत्वा ।

ठाणं-३, उद्देशो-३

[२०४] सवणे नाणे य विन्नाणे पच्चखाणे य संजमे ।

अणण्हणे तवे चेव वोदाणे अकिरिय निव्वाणे ॥

जाव से णं भंते! अकिरिया किंफला? निव्वाणफला, से णं भंते निव्वाणे किंफले? सिद्धिगइ-गमण-पज्जवसाण-फले पण्णत्ते समणाउसो ।

◦ तइए ठाणे तइओ उद्देशो समत्तो ◦

० चउत्थो-उद्देशो ०

[२०५] पडिमापडिवण्णस्स णं अणगारस्स कप्पंति तओ उवस्सया पडिलेहित्ताए तं जहा- अहे आगमणगिहंसि वा अहे वियडगिहंसि वा अहे रुक्खमूलगिहंसि वा एवं अणुण्णवेत्तए, एवं उवाइणित्तए,

पडिमापडिवण्णस्स णं अणगारस्स कप्पंति तओ संथारगा पडिलेहित्तए तं जहा- पुढविसिला कट्टसिला अहासंथडमेव, एवं अणुण्णवेत्तए, एवं उवाइणित्तए ।

[२०६] तिविहे काले पण्णत्ते तं जहा- तीए पडुप्पण्ण अणागए, तिविहे समए पण्णत्ते तं जहा- तीए पडुप्पणे अणागए एवं- आवलिया आणापाणू थोवे लवे मुहुत्ते अहोरत्ते जाव वाससतसहस्से पुव्वंगे पुव्वे जाव ओसप्पिणी तिविधे पोग्गलपरियट्टे पण्णत्ते तं जहा- तीते पडुप्पणे अणागए ।

[२०७] तिविहे वयणे पण्णत्ते तं जहा- एगवयणे दुवयणे बहुवयणे, अहवा- तिविहे वयणे पण्णत्ते तं जहा- इत्थिवयणे पुंवयणे नपुंसगवयणे, अहवा- तिविहे वयणे पण्णत्ते तं जहा- तीतवयणे पडुप्पण्णवयणे अणागयवयणे ।

[२०८] तिविहा पन्नवणा पन्नत्ता तं जहा- नाणपन्नवणा दंसणपन्नवणा चरित्तपन्नवणा तिविधे सम्मे पण्णत्ते तं जहा- नाणसम्मे दंसणसम्मे चरित्तसम्मे । तिविधे उवधाते पण्णत्ते तं जहा- उग्गमोवधाते उप्पायणोवधाते एसणोवधाते । तिविधा विसोही पन्नत्ता तं जहा- उग्गमविसोही उप्पायणविसोही एसणाविसोही ।

[२०९] तिविहा आराहणा पन्नत्ता तं जहा- नाणाराहणा दंसणाराहणा चरित्ताराहणा । नाणाराहणा तिविहा पन्नत्ता तं जहा- उक्कोसा मज्झिमा जहण्णा, एवं दंसणाराहणा वि चरित्ताराहणा वि ।

तिविधे संकिलेसे पण्णत्ते तं जहा- नाणसंकिलेसे दंसणसंकिलेसे चरित्तसंकिलेसे । एवं असंकिलेसे वि, एवं अइकम्मे वि, वइक्कमे वि, अइयारे वि अणायारे वि।

तिण्हमतिक्कमाणं आलोएज्जा पडिक्कमेज्जा निंदेज्जा गरहेज्जा जाव पडिवज्जेज्जा, तं जहा- नाणातिक्कमस्स दंसणातिक्कमस्स चरित्तातिक्कमस्स, एवं वइक्कमाणं, तिण्हमतिचाराणं, तिण्हमणायाराणं वि।

[२१०] तिविधे पायाच्छित्ते पण्णत्ते तं जहा- आलोयणारिहे पडिक्कमणारिहे तदुभयारिहे ।

[२११] जंबुद्वीवे दीवे मंदरस्स पव्वयस्स दाहिणे णं तओ अकम्मभूमीओ पन्नत्ताओ तं जहा- हेमवते हरिवासे देवकुरा, जंबुद्वीवे दीवे मंदरस्स पव्वयस्स उत्तरे णं तओ अकम्मभूमीओ पन्नत्ताओ तं जहा- उत्तरकुरा रम्मगवासे हेरण्णवए ।

जंबुद्वीवे दीवे मंदरस्स पव्वयस्स दाहिणे णं तओ वासा पन्नत्ता तं जहा- भरहे हेमवए हरिवासे, जंबुद्वीवे दीवे मंदरस्स पव्वयस्स उत्तरे णं तओ वासा पन्नत्ता तं जहा रम्मगवासे हेरण्णवते एरवए ।

ठाणं-३, उद्देशो-४

जंबुद्वीवे दीवे मंदरस्स पव्वयस्स दाहिणे णं तओ वासहरपव्वता पन्नत्ता तं जहा- चूल्लहिमवंते महाहिमवंते निसडे, जंबुद्वीवे दीवे मंदरस्स पव्वयस्स उत्तरे णं तओ वासहरपव्वता पन्नत्ता तं जहा- नीलवंते रूपी सिहरी

जंबुद्वीवे दीवे मंदरस्स पव्वयस्स दाहिणे णं तओ महादहा पन्नत्ता तं जहा- पउमदहे महापउ-मदहे तिगिंछदहे, तत्थ णं तओ देवताओ महिड्ढियाओ जाव पलिओवमड्ढितीयाओ परिवसंति तं जहा- सिरी हिरी धिती, एवं- उत्तरेणवि नवरं- केसरिदहे महापोंडरीयदहे पोंडरीयदहे, देवताओ-कित्ती बुद्धी लच्छी ।

जंबुद्वीवे दीवे मंदरस्स पव्वयस्स दाहिणे णं चुल्लहिमवंताओ वासधरपव्वताओ पउमदहाओ महादहाओ तओ महानदीओ पवहंति तं जहा- गंगा सिंधू रोहितंसा, जंबुद्वीवे दीवे मंदरस्स पव्वयस्स उत्तरे णं सिहरीओ वासहरपव्वताओ पोंडरीयदहाओ महादहाओ तओ महानदीओ पवहंति तं जहा- सुवण्णकूला रत्ता रत्तवती ।

जंबुद्वीवे दीवे मंदरस्स पव्वयस्स पुरत्थिमे णं सीताए महानदीए उत्तरे णं तओ अंतरनदीओ पन्नत्ताओ तं जहा- गाहावती दहवती पंकवती, जंबुद्वीवे दीवे मंदरस्स पव्वयस्स पुरत्थिमे णं सीताए महानदीए दाहिणेणं तओ अंतरनदीओ पन्नत्ताओ तं जहा- तत्तजला मत्तजला उम्मत्तजला जंबुद्वीवे दीवे मंदरस्स पव्वयस्स पच्चत्थिमे णं-सीतोदाए महानदीए दाहिणे णं तओ अंतरनदीओ पन्नत्ताओ तं जहा- खीरोदा सीहसोता अंतोवाहिणी, जंबुद्वीवे दीवे मंदरस्स पव्वयस्स पच्चत्थिमे नं सीतोदाए महानदीए उत्तरे णं तओ अंतरनदीओ पन्नत्ताओ तं जहा- उम्मिमालिणी फेणमालिणी गंभीरमालिणी ।

एवं- घायइसंडे दीवे पुरत्थिमद्धेवि अकम्मभूमीओ आढवेत्ता जाव अंतरनदीओत्ति निरवसेसं भाणियव्वं जाव पुक्खरवरदीवड्ढपच्चत्थिमद्धे तहेव णिरवसेसं भाणियव्वं ।

[२१२] तिहिं ठाणेहिं देसे पुढवीए चलेज्जा तं जहा- अहे णं इमीसे रयणप्पभाए पुढवीए उराला पोग्गला णिवतेज्जा, तते णं उराला पोग्गला णिवतमाणा देसं पुढवीए चालेज्जा, महोरगे वा महिड्ढीए जाव महेसक्खे इमीसे रयणप्पभाए पुढवीए अहे उम्मज्ज-णिमज्जियं करेमाणे देसं पुढवीए चलेज्जा, नागसुवण्णाण वा संगामंसि वट्टमाणंसि देसं देसे पुढवीए चलेज्जा, इच्चेतेहिं तिहिं ठाणेहिं देसे पुढवीए चलेज्जा ।

तिहिं ठाणेहिं केवलकप्पा पुढवी चलेज्जा तं जहा- अधे णं इमीसे रयणप्पभाए पुढवीए घणवाते गुप्पेज्जा तए णं से घणवाते गुविते समाणे घणोदहिमेज्जा, तए णं से घणोदही एइए समाणे केवलकप्पं पुढविं चालेज्जा, देवे वा महिड्ढीए जाव महेसक्खे तहारूवस्स समणस्स माहणस्स वा इड्ढिं

जुतिं जसं बलं वीरियं पुरिसक्कारपरक्कमं उवदंसेमाणे केवलकप्पं पुढविं चालेज्जा, देवासुरसंगामंसि वा वट्टमाणंसि केवलकप्पा पुढवी चलेज्जा इच्चेतेहिं तिहिं ठाणेहिं केवलकप्पा पुढवी चलेज्जा ।

[२१३] तिविधा देवकिब्बिसिया पन्नत्ता तं जहा- तिपलिओवमट्ठितीया तिसागरोवमट्ठितीया तेरससागरोवमट्ठितीया ।

कहि णं भंते! तिपलिओवमट्ठितीया देवकिब्बिसिया परिवसंति?, उप्पिं जोइसियाणं हिट्ठिं सोहम्मसाणेसु कप्पेसु एत्थ णं तिपलिओवमट्ठितीया देवकिब्बिसिया परिवसंति ।

कहि णं भंते! तिसागरोवमट्ठितीया देवकिब्बिसिया परिवसंति?, उप्पिं सोहम्मसाणाणं ठाणं-३, उद्देसो-४

कप्पाणं हेट्ठिं सणकुमार-माहिंदेसु कप्पेसु एत्थ णं तिसागरोवमट्ठितीया देवकिब्बिसिया परिवसंति ।

कहि णं भंते! तेरसागरोवमट्ठितीया देवकिब्बिसिया परिवसंति उप्पिं बंभलोगस्स कप्पस्स हेट्ठिं लंतगे कप्पे एत्थ णं तेरसागरोवमट्ठितीया देवकिब्बिसिया परिवसंति ।

[२१४] सक्कस्स णं देविंदस्स देवरण्णो बाहिरपरिसाए देवाणं तिण्णि पलिओवमाइं ठिई पन्नत्ता, सक्कस्स णं देविंदस्स देवरण्णो अब्भित्तरपरिसाए देवीणं तिण्णि पलिओवमाइं ठिती पन्नत्ता, ईसाणस्स णं देविंदस्स देवरण्णो बाहिरपरिसाए देवीणं तिण्णि पलिओवमाइं ठिती पन्नत्ता ।

[२१५] तिविहे पायच्छित्ते पण्णत्ते तं जहा- नाणपायच्छित्ते दंसणपाच्छित्ते चरित्तपायच्छित्ते,

तओ अणुग्घातिमा पन्नत्ता तं जहा- हत्थकम्मं करेमाणे मेहुणं सेवेमाणे राईभोयणं भुंजमाणे तओ पारंचिता पन्नत्ता तं जहा- दुट्ठे पारंचिते पमत्ते पारंचिते अण्णमण्णं करेमाणे पारंचिते, तओ अणवट्ठप्पा पन्नत्ता तं जहा- साहम्मियाणं तेणियं करेमाणे अण्णधम्मियाणं तेणियं करेमाणे हत्थातालं दलयमाणे ।

[२१६] तओ नो कप्पंति पव्वावेत्तए तं जहा- पंडए वातिए कीवे, तओ णो कप्पंति- मुंडावित्तए सिक्खावित्तए, उवट्ठावेत्तए, संभुजित्तए, संवासित्तए तं जहा- पंडए वातिए कीवे ।

[२१७] तओ अवायणिज्जा पन्नत्ता तं जहा- अविणीए विगतीपडिबद्धे अविओसवितपाहुडे, तओ कप्पंति वाइत्तए तं जहा- विणीए अविगतीपडिबद्धे विओसियपाहुडे ।

तओ दुसण्णप्पा पन्नत्ता तं जहा- दुट्ठे मूढे वुग्गाहिते, तओ सुसण्णप्पा पन्नत्ता तं जहा- अदुट्ठे अमूढे अवुग्गाहिते ।

[२१८] तओ मंडलिया पव्वता पं० तं जहा- माणुसुत्तरे कुंडलवरे रुयगवरे ।

[२१९] तओ महतिमहालया पन्नत्ता तं जहा- जंबुद्वीवे मंदरे मंदरेसु सयंभूरमणे समुद्धे समुद्धेसु बंभलोए कप्पे कप्पेसु ।

[२२०] तिविधा कप्पठिती पन्नत्ता तं जहा- सामाइयकप्पठिती छेदोवट्ठावणियकप्पठिती णिव्विसमाणकप्पठिती, अहवा- तिविहा कप्पट्ठिती प० तं जहा- निव्विट्ठकप्पट्ठिती जिणकप्पट्ठिती थेरकप्पट्ठिती ।

[२२१] नेरइयाणं तओ सरीरगा पन्नत्ता तं जहा- वेउव्विए तेयए कम्मए, असुरकुमाराणं तओ सरीरगा प०-वेउव्विए तेयए कम्मए, एवं- सव्वेसिं देवाणं, पुढविकाइयाणं तओ सरीरगा प०-ओरालिए तेयए कम्मए, एवं- वाउकाइयवज्जाणं जाव चरउरिंदियाणं ।

[२२२] गुरु पडुच्च तओ पडिणीया प० तं० - आयरियपडिणीए उवज्झायपडिणीए थेरपडिणीए, गति पडुच्च तओ पडिणीया पन्नत्ता तं जहा- इहलोगपडिणीए परलोग-पडिणीए दुहओलोगपडिणीए, समूहं पडुच्च तओ पडिणीया पन्नत्ता तं जहा- कुलपडिणीए मणपडिणीए संघपडिणीए, अणुकंपं पडुच्च तओ पडिणीया पन्नत्ता तं जहा- तवस्सिपडिणीए गिलाणपडिणीए सेहपडिणीए, भावं पडुच्च तओ पडिणीया पन्नत्ता तं जहा- णाणपडिणीए दंसणपडिणीए चरित्तपडिणीए, सुयं पडुच्च तओ पडिणीया पन्नत्ता तं जहा- सुत्तपडिणीए अत्थपडिणीए तदुभयपडिणीए ।

[२२३] तओ पितियंगा पन्नत्ता तं जहा- अट्ठी अट्ठिभिंजा केसमंसुरोमणे । तओ माउयंगा पन्नत्ता तं जहा- मंसे सोणिते मत्थुलिंगे ।

ठाणं-३, उद्देशो-४

[२२४] तिहिं ठाणेहिं समणे निग्गंथे महानिज्जरे महापज्जवसाणे भवति, तं जहा कया णं अहं अप्पं वा बहुयं वा सुयं अहिज्जिस्सामि, कया णं अहं एकल्लविहारपडिमं उवसंपज्जित्ताणं विहरिस्सामि, कया णं अहं अपच्छिम-मारणंतिय-संलेहणा-झूसणा-झूसिते भत्तपाण-पडियाइक्खिते पाओवगते कालं अणवकंखमाणे विहरिस्सामि, एवं स मणसा स वयसा स कायसा पागडेमाणे समणे निग्गंथे महानिज्जरे महापज्जवसाणे भवति ।

तिहिं ठाणेहिं समणोवासए महानिज्जरे महापज्जवसाणे भवति तं जहा कया णं अहं अप्पं वा बहुयं वा परिग्गहं परिचइस्सामि, कया णं अहं मुंडे भवित्ता अगाराओ अणगारितं पव्वइस्सामि, कया णं अहं अपच्छिममारणंतियसंलेहणा-झूसणा-झूसिते भत्तपामपडियाइक्खिते पाओवगते कालं अणवकंखमाणे विहरिस्सामि, एवं स मणसा स वयसा स कायसा पागडेमाणे समणोवासए महानिज्जरे महापज्जवसाणे भवति ।

[२२५] तिविहे पोग्गलपडिघाते पण्णत्ते तं जहा- परमाणुपोग्गले परमाणुपोग्गलं पप्प पडिह-ण्णिज्जा लुक्खत्ताए वा पडिहण्णिज्जा लोगंते वा पडिहन्निज्जा ।

[२२६] तिविहे चक्खू पण्णत्ते तं जहा- एगचक्खू बिचक्खू तिचक्खू छउमत्थे णं मणुस्से एगचक्खू देवे बिचक्खू तहारूवे समणे वा माहणे वा उप्पण्णनाणदंसणधरे तिचक्खुत्ति वत्तव्वं सिया ।

[२२७] तिविधे अभिसमागमे पण्णत्ते तं जहा- उड्ढं अहं तिरियं, जया णं तहारूवस्स समणस्स वा माहणस्स वा अतिसेसे नाणदंसणे समुप्पज्जति से णं तप्पढमताए उड्ढभिसमेति ततो तिरियं ततो पच्छा अहे, अहोलोगे णं दुरभिगमे पण्णत्ते समणाउसो ।

[२२८] तिविधा इड्ढी पन्नत्ता तं जहा- देविड्ढी राइड्ढी गणिड्ढी, देविड्ढी तिविहा पन्नत्ता तं जहा- विमाणिड्ढी विगुव्वणिड्ढी परियारणिड्ढी, अहवा-देविड्ढी तिविहा पन्नत्ता तं जहा- सचित्ता अचित्ता मीसिता,

राइड्ढी तिविधा पन्नत्ता तं जहा- रण्णो अतियाणिड्ढी रण्णो निज्जाणिड्ढी रण्णो बल-वाहण-कोस कोट्ठागारिड्ढी, अहवा-राइड्ढी तिविहा प० तं० जहा- सचित्ता अचित्ता मीसिता ।

गणिड्ढी तिविहा पन्नत्ता तं जहा- नाणिड्ढी दंसणिड्ढी चरितिड्ढी अहवा-गणिड्ढी तिविहा पन्नत्ता तं जहा- सचित्ता अचित्ता मीसिता ।

[२२९] तओ गारवा पन्नत्ता तं जहा- इड्ढीगारवे रसगारवे सातागारवे ।

[२३०] तिविहे करणे प० तं०- धम्मिए करणे अधम्मिए करणे धम्मियाधम्मिए करणे ।

[२३१] तिविहे भगवता धम्मं पणत्ते तं जहा- सुअधिज्झते सुज्झाइते सुतवस्सिते, जया सुअधिज्झतं भवति तदा सुज्झाइतं भवति जया सुज्झाइतं भवति तदा सुतवस्सितं भवति से सुअधिज्झते सुज्झाइते सुतवस्सिते सुयक्खाते णं भगवता धम्मं पणत्ते ।

[२३२] तिविधा वावत्ती पन्नत्ता तं जहा- जाणू अजाणू वितिगिच्छा, एवं अज्झोववज्जणा, परियावज्जणा वि।

[२३३] तिविधे अंते पणत्ते तं जहा- लोगंते वेयंते समयंते ।

[२३४] तओ जिणा पन्नत्ता तं जहा- ओहिनाणजिणे मणपज्जवनाणजिणे केवलनाणजिणे, तओ केवली पन्नत्ता तं जहा- ओहिनाणकेवली मणपज्जवनाणकेवली केवलनाणकेवली, तओ अरहा प० तं०

ठाणं-३, उद्देशो-४

जहा- ओहिनाणअरहा मणपज्जवनाणअरहा केवलनाणअरहा ।

[२३५] तओ लेसाओ दुब्धिगंधाओ पन्नत्ताओ तं जहा- कण्हलेसा नीललेसा काउलेसा, तओ लेसाओ सुब्धिगंधाओ पन्नत्ताओ तं जहा- तेउलेसा पम्हलेसा सुक्कलेसा एवं- दोग्गतिगामिणीओ सोगतिगामिणीओ संकिलिद्धाओ, असंकिलिद्धाओ अमणुण्णाओ, मणुण्णाओ विसुद्धाओ अपसत्थाओ पसत्थाओ] सीतलुक्खामो निदुण्हाओ ।

[२३६] तिविहे मरणे पन्नत्ते तं जहा- बालमरणे पंडियमरणे बालपंडियमरणे, बालमरणे तिविहे पणत्ते तं जहा- ठितलेस्से संकिलिद्धलेस्से पज्जवजातलेस्से,

पंडियमरणे तिविहे प० तं०- ठितलेसे, असंकिलिद्धलेसे, पज्जवजातलेसे,

बालपंडियमरणे तिविहे पणत्ते तं जहा- ठितलेस्से असंकिलिद्धलेस्से अपज्जवजातलेस्से ।

[२३७] तओ ठाणा अक्खवसितस्स अहिताए असुभाए अखमाए अणिस्सेसाए अणाणुगा- मियत्ताए भवंति तं जहा- से णं मुंडे भवित्ता अगाराओ अणगारियं पव्वइए निग्गंथे पावयणे संकिते कंखिते वितिगिच्छेते भेदसमावण्णे कलुससमावण्णे निग्गंथं पावयणं णो सद्वहति नो पत्तियति नो रोएति तं परिस्सहा अभिजुंजिय-अभिजुंजिय अभिभवन्ति, नो से परिस्सहे अभिजुंजिय-अभिजुंजिय अभिभवइ,

से णं मुंडे भवित्ता अगाराओ अणगारितं पव्वइए पंचहिं महव्वएहिं संकिते जाव कलुससमावण्णे पंच महव्वताइं नो सद्वहति जाव नो से परिस्सहे अभिजुंजिय-अभिजुंजिय अभिभवन्ति,

से णं मुंडे भवित्ता अगाराओ अणगारियं पव्वइए छहिं जीवणिकाएहिं जाव अभिभवति ।

तओ ठाणा ववसियस्स हिताए जाव आणुगामियत्ताए भवंति तं जहा- से णं मुंडे भवित्ता अगाराओ अणगारियं पव्वइए निग्गंथे पावयणे निस्संकिते निक्कंखिते जाव नो कलुससमावण्णे निग्गंथं पावयणं सद्वहति पत्तियति रोएति से परिस्सहे अभिजुंजिय-अभिजुंजिय अभिभवति, नो तं परिस्सहा अभिजुंजिय-अभिजुंजिय अभिभवन्ति ।

से णं मुंडे भवित्ता अगाराओ अणगारियं पव्वइए समाणे पंचहिं महव्वएहिं निस्संकिं निक्कंखिए परिस्सहे अभिजुंजिय-अभिजुंजिय अभिभवइ, नो तं परिस्सहा अभिजुंजिय-अभिजुंजिय अभिभवन्ति ।

से णं मुंडे भवित्ता अगाराओ अणगारियं पव्वइए छहिं जीवणिकाएहिं निस्संकिते परिस्सहे अभिजुंजिय-अभिजुंजिय अभिभवति, नो तं परिस्सहा अभिजुंजिय-अभिजुंजिय अभिभवन्ति ।

[२३८] एगमेगा णं पुढवी तिहिं वलएहिं सव्वओ समंता संपरिक्खित्ता, तं जहा घणोदधिवलएणं घणवातवलएणं तणुवायवलएणं ।

[२३९] नेरइया णं उक्कोसेणं तिसमइएणं विग्गहेणं उवज्जंति, एगिंदियवज्जं जाव वेमाणियाणं ।

[२४०] खीणमोहस्स णं अरहाओ तओ कम्मंसा जुगवं खिज्जंति, तं जहा- नाणावरणिज्जं दंसणावरणिज्जं अंतराइयं ।

[२४१] अभिईनकखत्ते तितारे पण्णत्ते, एवं- सवणे, अस्सिणी, भरणी, मगसिरे, पूसे, जेढा ।

[२४२] धम्माओ णं अरहाओ संती अरहा तिहिं सागरोवमेहिं तिचउब्भागपलिओवमऊणएहिं वीतिककंतेहिं समुप्पण्णे ।

ठाणं-३, उद्देसो-४

[२४३] समणस्स णं भगवओ महावीरस्स जाव तच्चाओ पुरिसजुगाओ जुगंतकरभूमी, मल्ली णं अरहा तिहिं पुरिससएहिं सद्धिं मुंडे भवित्ता अगाराओ अणगारियं पव्वइए, एवं पासे वि ।

[२४४] समणस्स णं भगवतो महावीरस्स तिणिण सया चउद्धसपुव्वीणं अजिणाणं जिणसं-कासाणं सव्वक्खरसण्णिवातीणं जिण इव अवितहवागरमाणाणं उक्कोसिया चउद्धसपुव्विसंपया हुत्था ।

[२४५] तओ तित्थयरा चक्कवट्ठी होत्था तं जहा- संती कूथु अरो ।

[२४६] तओ गेविज्ज-विमाण-पत्थडा पन्नत्ता तं जहा- हेट्ठिम-गेविज्ज-विमाणं-पत्थडे, मज्झिम-गेविज्ज-विमाण-पत्थडे उवरिम-गेविज्ज-विमाण-पत्थडे;

हिट्ठिम-गेविज्ज-विमाण-पत्थडे तिविहे पण्णत्ते तं जहा- हेट्ठिम-हेट्ठिम-गेविज्ज-विमाण-पत्थडे, हेट्ठिम-मज्झिम-गेविज्ज-विमाण-पत्थडे हेट्ठि-उवरिम-गेविज्ज-विमाण-पत्थडे;

मज्झिम-गेविज्ज-विमाण-पत्थडे तिविहे पण्णत्ते तं जहा- मज्झिम-हेट्ठिम-गेविज्ज-विमाण-पत्थडे, मज्झिम-मज्झिम-गेविज्ज-विमाण-पत्थडे, मज्झिम-उवरिम-गेविज्ज-विमाण-पत्थडे; उवरिम-गेविज्ज-विमाण-पत्थडे तिविहे पण्णत्ते तं जहा- उवरिम-हेट्ठिम-गेविज्ज-विमाण-पत्थडे, उवरिम-मज्झिम-गेविज्ज-विमाण-पत्थडे, उवरिम-उवरिम-गेविज्ज-विमाण-पत्थडे ।

[२४७] जीवाणं तिट्ठाणणिव्वत्तिते पोग्गले पावकम्मत्ताए चिणिंसु वा चिणंति वा चिणिस्संति वा तं जहा- इत्थिणिव्वत्तिते पुरिसणिव्वत्तिते नपुंसगणिव्वत्तिते एवं-चिण-उवचिण-बंध-उदीर-वेद तह निज्जरा चेव ।

[२४८] तिपदेसिया खंधा अनंता प० एवं जाव तिगुणलुक्खा पोग्गला अनंता प० ।

◦ तइए ठाणे चउत्थो उद्देसो समत्तो ◦

० तइअं ठाणं समत्तं ०

◦ मुनि दीपरत्नसागरेण संशोधितः सम्पादितश्च तइअं ठाणं समत्तं ◦

[] चउत्थं-ठाणं []

० पढमो-उद्देसो ०

[२४९] चत्तारि अंतकिरियाओ पन्नत्ताओ तं जहा- तत्थ खलु इमा पढमा अंतकिरिया- अप्पकम्मपच्चायाते यावि भवति, से णं मुंडे भवित्ता अगाराओ अणगारियं पव्वइए संजमबहुले संवरबहुले समाहिबहुले लूहे तीरड्डी उवहाणवं दुक्खक्खवे तवस्सी तस्स णं नो तहप्पगारे तवे भवति नो तहप्पगारा वेयणा भवति तहप्पगारे पुरिसज्जाते दीहेणं परियाएणं सिज्झति बुज्झति मुच्चति परिणिव्वाति सव्वदुक्खाणमंतं करेइ, जहा- से भरहे राया चाउरंतचक्कवट्ठी, पढमा अंतकिरिया ।

अहावरा दोच्चा अंतकिरिया, महाकम्मपच्चायाते यावि भवति, से णं मुंडे भवित्ता अगाराओ अणगारियं पव्वइए, संजमबहुले संवरबहुले जाव उवहाणवं दुक्खक्खवे तवस्सी, तस्स णं तहप्पगारे तवे भवति तहप्पगारा वेयणा भवति, तहप्पगारे पुरिसजाते निरुद्धेणं परियाएणं सिज्झति जाव अंतं करेति जहा से गयसूमाले अणगारे, दोच्चा अंतकिरिया ।

अहावरा तच्चा अंतकिरिया, महाकम्मपच्चायाते यावि भवति, से णं मुंडे भवित्ता अगाराओ अणगारियं पव्वइए, जहा दोच्चा, नवरं दीहेणं परियाएणं सिज्झति जाव सव्वदुक्खाणमंतं करेति, जहा- से ठाणं-४, उद्देसो-१

सणंकुमारे राया चाउरंत-चक्कवट्ठी, तच्चा अंतकिरिया ।

अहावरा चउत्था अंतकिरिया- अप्पकम्मपच्चायाते यावि भवति, से णं मुंडे भवित्ता पव्वइए संजमबहुले जाव तस्स णं नो तहप्पगारे तवे भवति नो तहप्पगारा वेयणा भवति, तहप्पगारे पुरिसजाते निरुद्धेणं परियाएणं सिज्झति जाव सव्वदुक्खाणमंतं करेति, जहा- सा मरुदेवा भगवती, चउत्था अंतकिरिया ।

[२५०] चत्तारि रुक्खा पन्नत्ता तं जहा- उन्नते नाममेगे उन्नते उन्नते नाममेगे पणते, पणते नाममेगे उन्नते, पणते नाममेगे पणते; एवामेव चत्तारि पुरिसजाता पन्नत्ता तं जहा- उन्नते नाममेगे उन्नते तहेव जाव पणते नाममेगे पणते ।

चत्तारि रुक्खा पन्नत्ता तं जहा- उन्नते नाममेगे उण्णतपरिणते, उन्नते नाममेगे पणतपरिणते, पणते नाममेगे उण्णतपरिणते, पणते नाममेगे पणतपरिणते; एवामेव चत्तारि पुरिसजाता पन्नत्ता तं जहा- उन्नते नाममेगे उण्णतपरिणते चउभंगो ।

चत्तारि रुक्खा पन्नत्ता तं जहा- उन्नते नाममेगे उण्णतरूवे तहेव चउभंगो । एवामेव चत्तारि पुरिसजाया पन्नत्ता तं जहा- उन्नते नाममेगे उण्णतरूवे, चउभंगो० ।

चत्तारि पुरिसजाया पन्नत्ता तं जहा- उन्नते नाममेगे उण्णतमणे, चउभंगो० एवं संकप्पे, पन्ने, दिट्ठी, सीलायारे, ववहारे, परक्कमे, एगे पुरिसजाए पडिवक्खो नत्थि ।

चत्तारि रुक्खा प० तं० उज्जू नाममेगे उज्जू, उज्जू नाममेगे वंके, चउभंगो-४, एवामेव चत्तारि पुरिसजाता प० तं०- उज्जूनाममेगे-४, एवं जहा उन्नतपणतेहिं गमो तहा उज्जुवंकेहि वि भाणियव्वो, जाव परक्कमे ।

[२५१] पडिमापडिवण्णस्स णं अणगारस्स कप्पंति चत्तारि भासाओ भासित्तए, तं जहा- जायणी पुच्छणी अणुणवणी पुट्ठस्स वागरणी ।

[२५२] चत्तारि भासाजाता पन्नत्ता तं जहा- सच्चमेगं भासज्जायं, बीयं मोसं, तइयं सच्चमोसं, चउत्थं असच्चमोसं ।

[२५३] चत्तारि वत्था पन्नत्ता तं जहा- सुद्धे नामं एगे सुद्धे, सुद्धे नामं एगे असुद्धे, असुद्धे नामं एगे सुद्धे, असुद्धे नामं एगे असुद्धे; एवामेव चत्तारि पुरिसजाया पन्नत्ता तं जहा- सुद्धे नामं एगे सुद्धे चउभंगो-४, एवं परिणत रूवे वत्था सपडिवक्खा, चत्तारि पुरिसजाता प० तं०- सुद्धे नामं एगे सुद्धमणे चउभंगो-४, एवं संकप्पे जाव परक्कमे ।

[२५४] चत्तारि सुत्ता प० तं० जहा- अतिजाते अणुजाते अवजाते कुलिंगाले ।

[२५५] चत्तारि पुरिसजाया पन्नत्ता तं जहा- सच्चे नामं एगे सच्चे, सच्चे नामं एगे असच्चे असच्चे नामं एगे सच्चे, असच्चे नामं एगे असच्चे, एवं परिणते जाव परक्कमे ।

चत्तारि वत्था पन्नत्ता तं जहा- सुई नामं एगे सुई सुई नामं एगे असुई, चउभंगो, एवामेव चत्तारि पुरिसजाया पन्नत्ता, तं जहा- सुई नामं एगे सुई, चउभंगो, एवं जहेव सुद्धेणं वत्थेणं भणितं, तहेव सुतिणावि, जाव परक्कमे ।

[२५६] चत्तारि कोरवा पन्नत्ता तं जहा- अंबपलंबकोरवे, तालपलंबकोरवे, वल्लिपलंबकोरवे, मेंढविसाणकोरवे; एवामेव चत्तारि पुरिसजाया पन्नत्ता तं जहा- अंबपलंबकोरवसमाणे, तालपलंबकोरवसमाणे, ठाणं-४, उद्देसो-१

वल्लिपलंबकोरवसमाणे, मेंढविसाणकोरवसमाणे ।

[२५७] चत्तारि धुणा पन्नत्ता तं जहा- तयक्खाए छल्लिक्खाए कट्ठक्खाए सारक्खाए एवामेव चत्तारि भिक्खागा पन्नत्ता तं जहा- तयक्खायसमाणे जाव सारक्खायसमाणे, तयक्खायसमाणस्स णं भिक्खागस्स सारक्खायसमाणे तवे पण्णत्ते, सारक्खायसमाणस्स णं भिक्खागस्स तयक्खायसमाणे तवे पण्णत्ते, छल्लिक्खायसमाणस्स णं भिक्खागस्स कट्ठक्खायसमाणे तवे पण्णत्ते, कट्ठक्खायसमाणस्स णं भिक्खागस्स छल्लिक्खायसमाणे तवे पण्णत्ते ।

[२५८] चउव्विहा तणवणस्सतिकाइया पन्नत्ता तं जहा- अग्गबीया मूलबीया पोर्बीया खंधवीया ।

[२५९] चउहिं ठाणेहिं अहुणोववण्णे नेरइए निरयलोगंसि इच्छेज्जा माणुसं लोगं हव्वमागच्छित्तए नो चेव णं संचाएति हव्वमागच्छित्तए, अहुणोववण्णे नेरइए निरयलोगंसि समुब्भूयं वेयणं वेयमाणे इच्छेज्जा माणुसं लोगं हव्वमागच्छित्तए नो चेव णं संचाएति हव्वमागच्छित्तए ।

अहुणोववण्णे नेरइए निरयलोगंसि निरयपालेहिं भुज्जो-भुज्जो अहिद्विज्जमाणे इच्छेज्जा माणुसं लोगं हव्वमागच्छित्तए नो चेव णं संचाएति हव्वमागच्छित्तए ।

अहुणोववण्णे नेरइए निरयवेयणिज्जंसि कम्मंसि अक्खीणंसि अवेइयंसि अनिज्जिण्णंसि इच्छेज्जा माणुसं लोगं हव्वमागच्छित्तए नो चेव णं संचाएति हव्वमागच्छित्तए

अहुणोववण्णे नेरइए निरयाउंसि कम्मंसि अक्खीणंसि अवेइयंसि अणिज्जिण्णंसि इच्छेज्जा माणुसं लोगं हव्वमागच्छित्तए णो चेव णं संचाएति हव्वमागच्छित्तए ।

इच्चेतेहिं चउहिं ठाणेहिं अहुणोववण्णे नेरइए निरयलोगंसि इच्छेज्जा माणुसं लोगं हव्वमागच्छित्तए नो चेव णं संचाएति हव्वमागच्छित्तए ।

[२६०] कप्पंति निग्गंथीणं चत्तारि संघाडीओ धारित्तए वा परिहरित्तए वा तं जहा एगं दुहत्थवित्थारं, दो तिहत्थवित्थारा एगं चउत्थवित्थारं ।

[२६१] चत्तारि झाणा पन्नत्ता तं जहा- अट्टे झाणे रोद्धे झाणे धम्मं झाणे सुक्के झाणे,

[१] अट्टे झाणे चउव्विहे पण्णत्ते तं जहा- अमणुण्ण-संपओग-संपउत्ते तस्स विप्पओग-सति-समण्णागते यावि भवति, मणुण्ण-संपओग-संपउत्ते तस्स अविप्पओग-सति-समण्णागते यावि भवति, आतंक-संपओग-संपउत्ते तस्स विप्पओग-सति-समण्णगते यावि भवति, परिजुसित-काम-भोग-संपओग-संपउत्ते तस्स अविप्पओग-सति-समण्णागते यावि भवति, अट्टस्स णं झाणस्स चत्तारि लक्खणा पन्नत्ता तं जहा- कंदणता सोयणता तिप्पणता परिदेवणता,

[२] रोद्धे झाणे चउव्विहे पण्णत्ते तं जहा- हिंसाणुबंधि मोसाणुबंधि तेणाणुबंधि सारक्खणाणुबंधि । रुद्धस्स णं झाणस्स चत्तारि लक्खणा पन्नत्ता तं जहा- ओसण्णदोसे बहुदोसे अन्नाणदोसे आमरणंतदोसे ।

[३] धम्मं झाणे चउव्विहे चउप्पडोयारे पण्णत्त तं जहा- आणाविजए अवायविजए विवागविजए संठाणविजए । धम्मस्स णं झाणस्स चत्तारि लक्खणा पन्नत्ता तं जहा- आणारुई निसग्गरुई सुतरुई ओगाढरुई । धम्मस्स णं झाणस्स चत्तारि आलंबणा पन्नत्ता तं जहा- वायणा पडिपुच्छणा परियट्ठणा अणुप्पेहा । धम्मस्स णं झाणस्स चत्तारि अणुप्पेहाओ पन्नत्ताओ तं जहा- एगाणुप्पेहा अणि-
ठाणं-४, उट्ठेसो-१

च्चाणुप्पेहा असरणाणुप्पेहा संसाराणुप्पेहा,

[४] सुक्के झाणे चउव्विहे चउप्पडोआरे पण्णत्ते तं जहा- पुहत्तवितक्के सवियारी एगत्तवितक्के अवियारी, सुहुमकिरिए अणयट्ठी, समुच्छिण्णकिरिए अप्पडिवाती सुक्कस्स णं झाणस्स चत्तारि लक्खणा पन्नत्ता तं जहा- अव्वहे असम्मोहे विविगे विउस्सग्गे सुक्कस्स णं झाणस्स चत्तारि आलंबणा पन्नत्ता तं जहा- खंती मुत्ती अज्जवे मद्धवे । सुक्कस्स णं झाणस्स चत्तारि अणुप्पेहाओ पन्नत्ताओ तं जहा- अणंतवत्तियाणुप्पेहा विप्परिणामाणुप्पेहा असुभाणुप्पेहा अवायाणुप्पेहा ।

[२६२] चउव्विहा देवाण ठिती पन्नत्ता तं जहा- देवे नाममेगे, देवसिणाते नाममेगे, देवपुरोहिते नाममेगे, देवपज्जलणे नाममेगे ।

चउव्विहे संवासे पण्णत्ते तं जहा- देवे नाममेगे देवीए सद्धिं संवासं गच्छेज्जा, देवे नाममेगे छवीए सद्धिं संवासं गच्छेज्जा, छवी नाममेगे देवीए सद्धिं संवासं गच्छेज्जा, छवी नाममेगे छवीए सद्धिं संवासं गच्छेज्जा ।

[२६३] चत्तारि कसाया पन्नत्ता तं जहा- कोहकसाए माणकसाए मायाकसाए लोभकसाए एवं-नेरइयाणं जाव वेमाणियाणं ।

चउपतिट्ठिते कोहे पण्णत्ते तं जहा- आतपतिट्ठिते परपतिट्ठिते तदुभयपतिट्ठिते अपतिट्ठिते एवं नेरइयाणं जाव वेमाणियाणं, एवं जाव लोभे, जाव वेमाणियाणं ।

चउहिं ठाणेहिं कोधुप्पत्ती सिता, तं जहा- खेत्तं पडुच्चा वत्थुं पडुच्चा सरीरं पडुच्चा उवहिं पडुच्चा, एवं-नेरइयाणं जाव वेमाणियाणं, एवं जाव लोभे० जाव वेमाणियाणं ।

चउव्विधे कोहे पण्णत्ते तं जहा- अनंताणुबंधीकोहे अपच्चक्खाणकोहे, पच्चक्खाणावरणे कोहे, संजलणे कोहे, एवं-नेरइयाणं जाव वेमाणियाणं, एवं जाव लोभे० जाव वेमाणियाणं ।

चउच्चिहे कोहे पन्नत्ते तं जहा- आभोगणिव्वत्तिते अणाभोगणिव्वत्तिते उवसंते अणुवसंते एवं-नेरइयाणं जाव वेमाणियाणं

चउच्चिहे माने पन्नत्ते तं जहा-आभोगणिव्वत्तिते अणाभोगणिव्वत्तिते उवसंते अणुवसंते एवं- नेरइयाणं जाव वेमाणियाणं । एवं जाव लोभे जाव वेमाणियाणं ।

[२६४] जीवा णं चउहिं ठाणेहिं अडुक्कम्मपडीओ चिणिंसु, तं जहा- कोहेणं माणेणं मायाए लोभेणं, एवं जाव वेमाणियाणं; एवं चिणंति एस दंडओ, चिणिस्संति एस दंडओ, एवं-उवचिणिंसु उवचिणंति उवचिणिस्संति बंधिसु-३, उदीरिंसु-३, वेदेंसु-३, निज्जरेसु-३, जाव वेमाणियाणं ।

[२६५] चत्तारि पडिमाओ पन्नत्ताओ तं जहा- समाहिपडिमा उवहाणपडिमा विवेगपडिमा विउस्सग्गपडिमा, चत्तारि पडिमाओ पन्नत्ताओ तं जहा- भद्दा सुभद्दा महाभद्दा सव्वतोभद्दा, चत्तारि पडिमाओ पन्नत्ताओ तं जहा- खुड्डिया मोयपडिमा, महल्लिया मोयपडिमा, जवमज्झा, वइरमज्झा ।

[२६६] चत्तारि अत्थिकाया अजीवकाया पन्नत्ता तं जहा- धम्मत्थिकाए अधम्मत्थिकाए आगासत्थिकाए पोग्गलत्थिकाए । चत्तारि अत्थिकाया अरुविकाया पन्नत्ता तं जहा- धम्मत्थिकाए अधम्मत्थिकाए आगासत्थिकाए जीवत्थिकाए ।

[२६७] चत्तारि फला पण्णत्ता तं जहा- आमे नाममेगे आममहुरे, आमे नाममेगे पक्कमहुरे, पक्के नाममेगे आममहुरे, पक्के नाममेगे पक्कमहुरे; एवामेव चत्तारि पुरिसजाया पन्नत्ता तं जहा- आमे ठाणं-४, उद्देसो-१

नाममेगे आममहुरफलसमाणे-४ ।

[२६८] चउच्चिहे सच्चे पण्णत्ते० काउज्जुयया भासुज्जुयया भावुज्जुयया अविस्वायणाजोगे, चउच्चिहे मोसे पण्णत्ते तं जहा- कायअणुज्जुयया भासअणुज्जुयया भावअणुज्जुयया विसंवादणाजोगे ।

चउच्चिहे पणिधाणे पण्णत्ते तं जहा- मणपणिधाणे वइपणिधाणे कायपणिधाणे उवकरण-पणिधाणे एवं- नेरइयाणं पंचिंदियाणं जाव वेमाणियाणं ।

चउच्चिहे सुप्पणिहाणे पण्णत्ते तं जहा- मणसुप्पणिहाणे वइसुप्पणिहाणे कायसुप्पणिहाणे उवगरणसुप्पणिहाणे, एवं-संजयमणुस्साणवि; चउच्चिहे दुप्पणिहाणे प० तं०- मणदुप्पणिहाणे वइदुप्पणिहाणे कायदुप्पणिहाणे उवकरणदुप्पणिहाणे एवं-पंचिंदियाणं जाव वेमाणियाणं ।

[२६९] चत्तारि पुरिसजाया पन्नत्ता तं जहा- आवतभद्दए नाममेगे नो संवासभद्दए, संवासभद्दए नाममेगे नो आवातभद्दए, एगे आवातभद्दएवि संवासभद्दएवि, एगे नो आवातभद्दए नो संवासभद्दए;

चत्तारि पुरिसजाया पन्नत्ता तं जहा- अप्पणो नाममेगे वज्जं पासति नो परस्स, परस्स नाममेगे वज्जं पासति नो अप्पणो-४,

चत्तारि पुरिसजाया पन्नत्ता तं जहा- अप्पणो नाममेगे वज्जं उदीरेइ नो परस्स-४,

चत्तारि पुरिसजाया पन्नत्ता तं जहा- अप्पणो नाममेगे वज्जं उवसामेति नो परस्स-४,

चत्तारि पुरिसजाया पन्नत्ता तं जहा- अब्भुट्ठेति नाममेगे नो अब्भुट्ठावेति-४,

चत्तारि पुरिसजाया पन्नत्ता तं जहा- वंदति नो वंदावेति-४ एवं सक्कारेइ, सम्माणेति, पूएइ, वाएइ, पडिपुच्छति, पुच्छइ, वागरेति, सुत्तधरे नाममेगे नो अत्थधरे अत्थधरे नाममेगे नो सुत्तधरे- ४ ।

[२७०] चमरस्स णं असुरिंदस्स असुरकुमाररण्णो चत्तारि लोगपाला पन्नत्ता तं जहा- सोमे जमे वरुणे वेसमाणे, एवं- बलिस्सवि-सोमे जमे वेसमाणे वरुणे, धरणस्स- कालपाले कोलपाले सेलपाले संखपाले, भूयाणंदस्स- कालपाले कोलपाले संखपाले सेलपाले, वेणुदेवस्स- चित्ते विचित्ते चित्तपक्खे विचित्तपक्खे, वेणुदालिस्स- चित्ते विचित्ते विचित्तपक्खे चित्तपक्खे, हरिकंतस्स- पभे सुप्पभे पभकंते सुप्पभकंते, हरिस्सहस्स- पभे सुप्पभे सुप्पभकंते पभकंते, अग्गिसिहस्स- तेऊ तेउसिहे तेउकंते तेउप्पभे, अग्गिमाणवस्स- तेऊ तेउसिहे तेउप्पभे तेउकंते,

पुण्णस्स- रूवे रूवसे रूवकंते रूवप्पभे, विसिद्धस्स- रूवे रूवसे रूवप्पभे रूवकंते, जलकंतस्स- जले जलरते जलकंते जलप्पभे, जलप्पहस्स- जले जलरते जलप्पहे जलकंते, अमितगतिस्स- तुरियगति खिप्पगती सीहगती सीहविककमगती, अमितवाहणस्स- तुरियगती खिप्पगती सीहविककमगती सीहगती, वेलंबस्स- काले महाकाले अंजणे रिद्धे, पंभजणस्स- काले महाकाले रिद्धे अंजणे, धोसस्स- आवत्ते वियावत्ते नंदियावत्ते महानंदियावत्ते, महाधोसस्स- आवत्ते वियावत्ते महानंदियावत्ते नंदियावत्ते,

सक्कस्स- सोमे जमे वरुणे वेसमाणे, ईसाणस्स- सोमे जमे वेसमाणे वरुणे, एवं-एगंतरिता जाव अच्युतस्स,

चउव्विहा वाउकुमारा पन्नत्ता तं जहा- काले महाकाले वेलंबे पभंजणे ।

[२७१] चउव्विहा देवा पन्नत्ता तं जहा- भवणवासी वाणमंतरा जोइसिया विमाणवासी ।

[२७२] चउव्विहे पमाणे प० तं०- दव्वप्पमाणे खेत्तप्पमाणे कालप्पमाणे भावप्पमाणे ।

[२७३] चत्तारि दिसाकुमारिमहत्तरियाओ पण्णत्ताओ तं जहा- रुया रुयंसा सुरूवा रुयावती

।

ठाणं-४, उद्देसो-१

चत्तारी विज्जुकुमारीमहत्तरियाओ पन्नत्ताओ तं जहा चित्ता चित्तकणगा सतेरा सोतामणी ।

[२७४] सक्कस्स णं देविंदस्स देवरण्णो मज्झिमपरिसाए देवाणं चत्तारि पलिओवमाइं ठिती पन्नत्ता । ईसाणस्स णं देविंदस्स देवरण्णो मज्झिमपरिसाए देवीणं चत्तारि पलिओवमाइं ठिती पन्नत्ता ।

[२७५] चउव्विहे संसारे पण्णत्ते तं जहा- दव्वसंसारे खेततसंसारे कालसंसारे भाव-संसारे ।

[२७६] चउव्विहे दिट्ठिवाए प० तं० जहा- परिकम्मं सुत्ताइं पुव्वगए अणुजोगे ।

[२७७] चउव्विहे पायच्छित्ते पण्णत्ते तं जहा- नाणपायच्छित्ते दंसणपायच्छित्ते चरित्तपायच्छित्ते चियत्तकिच्चपायच्छित्ते; चउव्विहे पायच्छित्ते पण्णत्ते तं जहा- पडिसेवणा-पायच्छित्ते संजोयणापायच्छित्ते आरोवणापायच्छित्ते पलिउंचणापायच्छित्ते ।

[२७८] चउव्विहे काले पण्णत्ते तं जहा- पमाणकाले अहाउयनिव्वत्तिकाले मरणकाले अद्धाकाले ।

[२७९] चउव्विहे पोग्गलपरिणामे पण्णत्ते तं जहा- वण्णपरिणामे गंधपरिणामे रसपरिणामे फासपरिणामे ।

[२८०] भरहेरवएसु णं वासेसु पुरिम-पच्छिम-वज्जा मज्झिमगा बावीसं अरहंता भगवंता चाउज्जामं धम्मं पन्नवयंति तं जहा- सव्वाओ पाणातिवायाओ वेरमणं, सव्वाओ मुसावायाओ वेरमणं, सव्वाओ अदिन्नादाणाओ वेरमणं, सव्वाओ बहिद्धादाणाओ वेरमणं,

सव्वेसु णं महाविदेहेसु अरहंता भगवंतो चाउज्जामं धम्मं पण्णवयंति तं जहा- सव्वाओ पाणातिवायाओ वेरमणं जाव सव्वाओ बहिद्धदाणाओ वेरमणं ।

[२८१] चत्तारि दुग्गतीओ पन्नत्ताओ तं जहा- नेरइयदुग्गती तिरिक्खजोणिय-दुग्गती मणुस्सदुग्गती देवदुग्गती; चत्तारि सोग्गईओ पन्नत्ताओ तं जहा- सिद्धसोग्गती देवसोग्गती मणुयसोग्गती सुकुलपच्चायाती;

चत्तारि दुग्गता पन्नत्ता तं जहा- नेरइयदुग्गता तिरिक्खजोणियदुग्गता मणुयदुग्गता देव-दुग्गता; चत्तारि सुग्गता पन्नत्ता तं जहा- सिद्धसुग्गता देवसुग्गता मणुयसुग्गता सुकुलपच्चायाया ।

[२८२] पढमसमयजिणस्स णं चत्तारि कम्मंसा खीणा भवति तं जहा- नाणावरणिज्जं दंसणावरणिज्जं मोहणिज्जं अंतराइयं;

उप्पण्णनाणदंसणधरे णं अरहा जिणे केवली चत्तारि कम्मंसे वेदेति तं जहा- वेदणिज्जं आउयं नामं गोतं ।

पढमसमयसिद्धस्स णं चत्तारि कम्मंसा जुगवं खिज्जंति तं जहा- वेयणिज्जं आउयं नामं गोतं ।

[२८३] चउहिं ठाणेहिं हासुप्पत्ती सया तं जहा- पासेत्ता भासेत्ता सुणेत्ता संभरेत्ता ।

[२८४] चउव्विहे अंतरे पण्णत्ते तं जहा- कट्ठंतरे पम्हंतरे लोहंतरे पत्थरंतरे, एवामेव इत्थिए वा पुरिसस्स वा चउव्विहे अंतरे पण्णत्ते तं जहा- कट्ठंतरसमाणे पम्हंतरसमाणे लोहंतरसमाणे पत्थरंतरसमाणे ।

[२८५] चत्तारि भयगा पन्नत्ता तं जहा- दिवसभयए जत्ताभयए उच्चत्तभयए कब्बालभयए ।

[२८६] चत्तारि पुरिसजाया पन्नत्ता तं जहा- संपागडपडिसेवी नामेगे नो पच्छण्णपडिसेवी, ठाणं-४, उद्देसो-१

पच्छण्णपडिसेवी नामेगे नो संपागडपडिसेवी, एगे संपागडपडिसेवी वि पच्छण्णपडिसेवी वि, एगे नो संपागडपडिसेवी नो पच्छण्णपडिसेवी ।

[२८७] चमरस्स णं असुरिंदस्स असुरकुमारणो सोमस्स महारणो चत्तारि अग्गमहिंसीओ पन्नत्ताओ तं जहा- कणगा कणगलता चित्तगुत्ता वसुंधरा, एवं- जमस्स वरुणस्स वेसमणस्स; बलिस्स णं वइरोयणिंदस्स वइरोयणरणो सोमस्स महारणो चत्तारि अग्गमहिंसीओ पन्नत्ताओ तं जहा- मितगा सुभद्धा विज्जुता असणी; एवं- जमस्स वेसमणस्स वरुणस्स; धरणस्स णं नागकुमारिंदस्स नागकुमाररणो कालवालस्स महारणो चत्तारि अग्गमहिंसीओ पन्नत्ताओ तं जहा- असोगा विमला सुप्पभा सुंदसणा; एवं जावं संखवालस्स भूताणंदस्स णं नागकुमारिंदस्स नागकुमाररणो कालवालस्स महारणो चत्तारि अग्गमहिंसीओ पन्नत्ताओ तं जहा- सुणंदा सुभद्धा सुजाता सुमणा; एवं जाव सेलवालस्स जहा धरणस्स ।

एवं सव्वेसिं दाहिणिंदलोगपालाणं जाव घोसस्स जहा भूताणंदस्स एवं जाव महाघोसस्स लोगपालाणं, कालस्स णं पिसाइंदस्स पिसायरणो चत्तारि अग्गमहिंसीओ पन्नत्ताओ तं जहा- कमला कमलप्पभा उप्पला सुंदसणा; एवं- महाकालस्सवि; सुरूवस्स णं भूतिंदस्स भूतरणो चत्तारि अग्गमहिंसीओ पन्नत्ताओ तं जहा- रूवती बहुरूवा सुरूवा सुभगा एवं- पडिरूवस्सवि; पुणभद्धस्स णं

जकिखंदस्स जकखरण्णो चत्तारि अग्गमहिंसीओ पन्नत्ताओ तं जहा- पुण्णा बहुपुण्णित्ता उतमा तारगा, एवं- माणिभद्दस्सवि;

भीमस्स णं रक्खसिंदस्स रक्खसरण्णो चत्तारि अग्गमहिंसीओ पन्नत्ताओ तं जहा- पउमा वसुमती कणगा रतणप्पभा; एवं-महाभीमसस्सवि किण्णरस्स णं किण्णरिंदस्स चत्तारि अग्गमहिंसीओ पन्नत्ताओ तं जहा- वडैसा केतुमती रतिसेणा रतिप्पभा; एवं- कुंपुरिस्सवि सप्पुरिसस्स णं किंपुरिसिंदस्स चत्तारि अग्गमहिंसीओ पन्नत्ताओ तं जहा- रोहिणी नवमिता हिरी पुप्फवती; एवं- महापुरिसस्सवि अतिकायस्स णं महोरगिंदस्स चत्तारि अग्गमहिंसीओ पन्नत्ताओ तं जहा- भुयगा भुयगावती महाकच्छा फुडा; एवं- महाकायस्सवि गीतरतिस्स णं गंधव्विदस्स गंधव्वरण्णो चत्तारि अग्गमहिंसीओ पन्नत्ताओ तं जहा- सुघोसा विमला सुस्सरा सरस्सती; एवं-गीयजसस्सवि,

चंदस्स णं जोतिसिंदस्स जोतिसरण्णो चत्तारि अग्गमहिंसीओ पन्नत्ताओ तं जहा- चंदप्पभा दोसिणाभा अच्चिमाली पभंकरा; एवं-सूरस्सवि णवरं-सूरप्पभा दोसिणाभा अच्चिमाली पभंकरा; इंगालस्स णं महागहस्स चत्तारि अग्गमहिंसीओ पन्नत्ताओ तं जहा- विजया वेजयंति जयंती अपराजिया, एवं-सव्वेसिं महग्गहाणं जाव भावकेउस्स ।

सक्कस्स णं देविंदस्स देवरण्णो सोमस्स महारण्णो चत्तारि अग्गमहिंसीओ पन्नत्ताओ तं जहा- रोहिणी मयणा चित्ता सामा, एवं जाव वेसमणस्स; ईसाणस्स णं देविंदस्स देवरण्णो सोमस्स महारण्णो चत्तारि अग्गमहिंसीओ पन्नत्ताओ तं जहा- पुढवी राती रयणी विज्जू, एवं जाव वरुणस्स ।

[२८८] चत्तारि गोरसविगतीओ पन्नत्ताओ तं जहा- खीरं दहिं सप्पिं नवनीतं; चत्तारि सिणेहविगतीओ पन्नत्ताओ तं जहा- तेल्लं घयं वसा नवनीतं; चत्तारि महाविगतीओ पन्नत्ताओ तं जहा- महं मंसं मज्जं नवणीतं ।

[२८९] चत्तारि कूडागारा पन्नत्ता तं जहा- गुत्ते नामं एगे गुत्ते, गुत्ते नामं एगे अगुत्ते, अगुत्ते नामं एगे गुत्ते, अगुत्ते नामं एगे अगुत्ते एवामेव चत्तारि पुरिसजाया पन्नत्ता तं जहा- गुत्ते नामं एगे गुत्ते-४ ।

ठाणं-४, उद्देसो-१

चत्तारि कूडागारसालाओ पन्नत्ताओ तं जहा- गुत्ता णाममेगा गुत्तदुवारा, गुत्ता णाममेगा अगुत्तदारा, अगुत्ता णाममेगा गुत्तदुवारा, अगुत्ता णाममेगा अगुत्तदुवारा; एवामेव चत्तारितीओ पण्णत्ताओ तं जहा- गुत्ता णाममेगे गुत्तिंदिया, गुत्ता णाममेगा अगुत्तिंदिया-४ ।

[२९०] चउविहा ओगाहणा प० तं० जहा- दव्वोगाहणा खेत्तोगाहणा कालोगाहणा भावोगाहणा ।

[२९१] चत्तारि पन्नत्तीओ अंगबाहिरियाओ पन्नत्ताओ तं जहा- चंदपन्नत्ती सूरपन्नत्ती जंबुद्धीवपन्नत्ती दीवसागरपन्नत्ती ।

० चउत्थे ठाणे पढमो उद्देसो समत्तो ०

० बीओ-उद्देसो ०

[२९२] चत्तारि पडिसंलीणा पन्नत्ता तं जहा- कोहपडिसंलीणे माणपडिसंलीणे मायापडिसंलीणे लोभपडिसंलीणे; चत्तारि अपडिसंलीणा पन्नत्ता तं० कोहअपडिसंलीणे जाव

लोभअपडिसंलीणे चत्तारि पडिसंलीणा पन्नत्ता तं जहा- मणपडिसंलीणे वतिपडिसंलीणे कायपडिसंलीणे इंदियपडिसंलीणे चत्तारि अपडिसंलीणा प० तं०- मणअपडिसंलीणे जाव इंदियअपडिसंलीणे ।

[२९३] चत्तारि पुरिसजाया पन्नत्ता तं जहा- दीणे नाममेगे दीणे, दीणे नाममेगे अदीणे, अदीणे नाममेगे दीणे, अदीणे नाममेगे अदीणे; चत्तारि पुरिसजाया पन्नत्ता तं जहा दीणे नाममेगे दीणपरिणते, दीणे नाममेगे अदीणपरिणते, अदीणे नाममेगे दीणपरिणते, अदीणे नाममेगे अदीणपरिणते ।

चत्तारि पुरिसजाया पन्नत्ता तं जहा- दीणे नाममेगे दीणरूवे, दीणे नाममेगे अदीणरूवे, अदीणे नाममेगे दीणरूवे, अदीणे नाममेगे अदीणरूवे ।

एवं दीनमणे-४, दीनसंकप्पे-४, दीनपन्ने-४, दीनदिट्ठी-४, दीनसीलाचारे-४, दीनववहारे-४, चत्तारि पुरिसजाया प० तं०- दीने नाममेगे दीन परक्कमे, दीने नामएगे अदीनपरक्कमे,-४ । एवं सव्वेसिं चउभंगो भाणियव्वो ।

चत्तारि पुरिसजाया पन्नत्ता तं जहा- दीणे नाममेगे दीणपरक्कमे दीणे नाममेगे अदीणपरक्कमे अदीणे नाममेगे दीणपरक्कमे अदीणे नाममेगे अदीणपरक्कमे चत्तारि पुरिसजाया पन्नत्ता तं जहा- दीणे नाममेगे दीणवित्ती-४, एवं दीणजाति, दीणभासी, दीणोभासी ।

चत्तारि पुरिसजाया प० तं०- दीने नामएगे दीनसेवी-४ । एवं दीने नाम एगे दीनपरियाए-४। दीने नाम एगे दीन परियाले-४ । सव्वत्थ चउभंगो ।

[२९४] चत्तारि पुरिसजाया पन्नत्ता तं जहा- अज्जे नाममेगे अज्जे, अज्जे नाममेगे अणज्जे, अणज्जे नाममेगे अज्जे, अणज्जे नाममेगे अणज्जे । चत्तारि पुरिसजाया पन्नत्ता तं जहा- अज्जे नाममेगे अज्ज परिणए-४, एवं अज्जरूवे, अज्जमणे, अज्जसंकप्पे, अज्जपन्ने, अज्जदिट्ठी, अज्जसीलाचारे, अज्ज ववहारे, अज्जपरक्कमे, अज्जवित्ती, अज्जजाती, अज्जभासी, अज्जओभासी, अज्जसेवी, एवं अज्जपरियाए, अज्जपरियाले । एवं सत्तर आलावगा । जहा दीणेणं भाणिया तहा अज्जेणवि भाणियव्वा ।

चत्तारि पुरिसजाया पन्नत्ता तं जहा- अज्जे नाममेगे अज्जभावे अज्जे नाममेगे अणज्जभावे अणज्जे नाममेगे अज्जभावे अणज्जे नाममेगे अणज्जभावे ।

ठाणं-४, उद्देसो-२

[२९५] चत्तारि उसभा पन्नत्ता तं जहा- जातिसंपण्णे कुलसंपण्णे बलसंपण्णे रूवसंपण्णे एवामेव चत्तारि पुरिसजाया पन्नत्ता तं जहा- जातिसंपण्णे जाव रूवसंपण्णे ।

चत्तारि उसभा पन्नत्ता तं जहा- जातिसंपण्णे नामं एगे नो कुलसंपण्णे, कुलसंपण्णे नामं एगे नो जातिसंपण्णे, एगे जातिसंपण्णेवि कुलसंपण्णेवि, एगे नो जातिसंपण्णे नो कुलसंपण्णे; एवामेव चत्तारि पुरिसजाया पन्नत्ता तं जहा- जातिसंपण्णे नामएगे-४ ।

चत्तारि उसभा पन्नत्ता तं जहा- जातिसंपण्णे नामं एगे नो बलसंपण्णे-४ । एवामेव चत्तारि पुरिसजाया पन्नत्ता तं जहा- जातिसंपण्णे ।

चत्तारि उसभा पन्नत्ता तं जहा- जातिसंपण्णे नामं एगे नो रूवसंपण्णे-४ । एवामेव चत्तारि पुरिसजाया पन्नत्ता तं जहा- जातिसंपण्णे नामं एगे नो रूवसंपण्णे, रूवसंपण्णे नामं एगे नो जातिसं-
पण्णे-४ ।

चत्तारि उसभा पन्नत्ता तं जहा- कुलसंपण्णे नामं एगे नो बलसंपण्णे-४, एवामेव चत्तारि पुरिसजाया पन्नत्ता तं जहा- कुलसंपण्णे नामं एगे नो बलसंपण्णे-४,

चत्तारि उसभा पन्नत्ता तं जहा- कुलसंपण्णे नामं एगे नो रुवसंपण्णे-४, एवामेव चत्तारि पुरिसजाया पन्नत्ता तं जहा- कुलसंपण्णे नामं एगे-४, चत्तारि उसभा पन्नत्ता तं जहा- बलसंपण्णे नामं एगे नो रुवसंपण्णे-४, एवामेव चत्तारि पुरिसजाया पन्नत्ता तं जहा- बलसंपण्णे नामं एगे-४ ।

चत्तारि हत्थी पन्नत्ता तं जहा- भद्दे मंदे मिए संकिण्णे, एवामेव चत्तारि पुरिसजाया पन्नत्ता जं जहा- भद्दे मंदे मिए संकिण्णे,

चत्तारि हत्थी पन्नत्ता तं जहा- भद्दे नाममेगे भद्दमणे भद्दे नाममेगे मंदमणे भद्दे नाममेगे मियमणे भद्दे नाममेगे संकिण्णमणे, एवामेव चत्तारि पुरिसजाया पन्नत्ता तं जहा- भद्दे नाममेगे भद्दमणे, भद्दे नाममेगे मंदमणे, भद्दे नाममेगे मियमणे, भद्दे नाममेगे संकिण्णमणे,

चत्तारि हत्थी पन्नत्ता तं जहा- मंदे नाममेगे भद्दमणे, मंदे नाममेगे मंदमणे, मंदे नाममेगे मियमणे, मंदे नाममेगे संकिण्णमणे एवामेव चत्तारि पुरिसजाया पन्नत्ता तं जहा- मंदे नाममेगे भद्दमणे तं चेवा ।

चत्तारि हत्थी पन्नत्ता तं जहा- मिए नाममेगे भद्दमणे, मिए नाममेगे मंदमणे मिए नाममेगे मियमणे मिए नाममेगे संकिण्णमणे, एवामेव चत्तारि पुरिसजाया पन्नत्ता तं जहा- मिए नाममेगे भद्द मणे, तं चेव ।

चत्तारि हत्थी पन्नत्ता तं जहा- संकिण्णे नाममेगे भद्दमणे, संकिण्णे नाममेगे मंदमणे, संकिण्णे नाममेगे मियमणे, संकिण्णे नाममेगे संकिण्णमणे, एवामेव चत्तारि पुरिसजाया पन्नत्ता तं जहा- संकिण्णे नाममेगे भद्दमणे, तं चेव जाव संकिण्णे नाममेगे संकिण्णमणे ।

[२९६] मधुगुलिय-पिंगलक्खो अणुपुव्व-सुजाय-दीहणंगूलो ।

पुरओ उदग्गधीरो सव्वगसमाधितो भद्दो ॥

[२९७] चल-बहल-विसम-चम्मो थूलसिरो थलएण पेएण ।

थूलनह-दंत-वालो हरिपिंगल-लोयणो मंदो ॥

[२९८] तणुओ तणुयग्गीओ तणुयतओ तणुयदंत-नह-वालो ।

ठाणं-४, उद्देसो-२

भीरु तत्थुव्विग्गो तासी य भवे मिए नामं ॥

[२९९] एतेसिं हत्थीणं थोवा थोव तु जो अणुहरति हत्थी ।

रुवेण व सीलेण व सो संकिण्णत्ति नायव्वो ॥

[३००] भद्दो मज्जइ सरए मंदो उण मज्जते वसंतंमि ।

मिउ मज्जति हेमंते सकिण्णो सव्वकालंमि ॥

[३०१] चत्तारि विकहाओ पन्नत्ताओ तं जहा- इत्थिकहा भत्तकहा देसकहा रायकहा, इत्थिकहा चउव्विहा पन्नत्ता तं जहा- इत्थीणं जाइकहा इत्थीणं कुलकहा इत्थीणं रुवकहा इत्थीणं णेवत्थकहा; भत्तकहा चउव्विहा पन्नत्ता तं जहा- भत्तस्स आवावकहा भत्तस्स णिव्वावकहा भत्तस्स आरंभकहा भत्तस्स णिट्ठाणकहा; देसकहा चउव्विहा पन्नत्ता तं जहा- देंसविहिकहा देसविकप्पकहा

देसच्छंदकहा देसणेवत्थकहा; रायकहा चउव्विहा पन्नत्ता तं जहा- रण्णो अतियाणकहा रण्णो णिज्जाणकहा रण्णो बलवाहणकहा रण्णो कोसकोट्टागारकहा;

चउव्विहा कहा पन्नत्ता तं जहा- अक्खेवणी विक्खेवणी संवेयणी निव्वेदणी; अक्खेणी कहा चउव्विहा पन्नत्ता तं जहा- आयारअक्खेवणी ववहारअक्खेवणी पण्णत्तिअक्खेवणी दिट्ठिवातअक्खेवणी; विक्खेवणी कहा चउव्विहा पन्नत्ता तं जहा- ससमयं कहेइ ससमयं कहित्ता परसमयं कहेइ, परसमयं कहेत्ता ससमयं ठावइता भवति, सम्मवायं कहेइ सम्मवायं कहेत्ता मिच्छावायं कहेइ, मिच्छावायं कहेत्ता सम्मवायं ठावइत्ता भवति; संवेयणी कहा चउव्विहा पन्नत्ता तं जहा- इहलोगसंवेयणी परलोगसंवेयणी आतसरीरसंवेयणी परसरीरसंवेयणी; निव्वेदणी कहा चउव्विहा पन्नत्ता तं जहा- इहलोग दुच्चिण्ण कम्मा इहलोगे दुहफलविवाग-संजुता भवन्ति, इहलोगे दुच्चिण्णा कम्मा परलोगे दुहफलविवागसंजुता भवन्ति, परलोगे दुच्चिण्णा कम्मा इहलोगे दुहफलविवागसंजुत्ता भवन्ति, परलोगे दुच्चिण्णा कम्मा परलोगे दुहफलविवागसंजुत्ता भवन्ति,

इहलोगे सुचिण्णा कम्मा इहलोगे सुहफलविवागसंजुत्ता भवन्ति, इहलोगे सुचिण्णा कम्मा परलोगे सुहफलविवागसंजुत्ता भवन्ति एवं चउभंगो ।

[३०२] चत्तारि पुरिसजाया पन्नत्ता तं जहा- किसे नाममेगे किसे, किसे नाममेगे दढे, दढे नाममेगे किसे, दढे नाममेगे दढो चत्तारि पुरिसजाया प०- किसे नाममेगे किससरीरे, किसे नाममेगे दढसरीरे, दढे नाममेगे किससरीरे, दढे नाममेगे दढसरीरे,

चत्तारि पुरिसजाया प०- किससरीरस्स नाममेगस्स नाणदंसणे समुप्पज्जति नो दढसरीरस्स, दढसरीरस्स नाममेगस्स नाणदंसणे समुप्पज्जति नो किससरीरस्स, एगस्स किससरीरस्सवि नाणदंसणे समुप्पज्जति दढसरीरस्सवि, एगस्स नो किससरीरस्स नाणदंसणे समुप्पज्जति नो दढसरीरस्स ।

[३०३] चउहिं ठाणेहिं निग्गंथाण वा निग्गंथीण वा अस्सिं समयंसि अतिसेसे नाणदंसणे समुप्पज्जिउकामेवि न समुप्पज्जेज्जा तं जहा- अभिक्खणं-अभिक्खणं इत्थिकहं भत्तकहं देसकहं रायकहं कहेत्ता भवति; विवेगेण विउस्सग्गेणं नो सम्ममप्पाणं भावेत्ता भवति, पुव्वरत्तावरत्तकालसमयंसि नो धम्मजागरियं जागरइत्ता भवति, फासुयस्स एसणिज्जस्स उंछस्स सामुदाणियस्स नो सम्मं गवेसित्ता भवति; इच्चेतेहिं चउहिं ठाणेहिं निग्गंथाण वा निग्गंथीणं वा जाव नो समुप्पज्जेज्जा ।

चउहिं ठाणेहिं निग्गंथाण वा निग्गंथीण वा अस्सिं समयंसि अतिसेसे नानादंसणे समुप्प-
ठाणं-४, उट्ठेसो-२

ज्जिउकामे समुप्पज्जेज्जा तं जहा- इत्थिकहं भत्तकहं देसकहं रायकहं नो कहेत्ता भवति, विवेगेण विउस्सगणं सम्ममप्पाणं भावेत्ता भवति, पुव्वरत्तावरत्तकालसमयंसि धम्मजागरियं जागरइत्ता भवति, फासुयस्स एसणिज्जस्स उंछस्स सामुदाणियस्स सम्मं गवेसित्ता भवति; इच्चेतेहिं चउहिं ठाणेहिं निग्गंथाणं वा निग्गंथीणं वा अस्सिं समयंसि अतिसेसे नाणदंसणे समुप्पज्जिउकामे समुप्पज्जेज्जा ।

[३०४] नो कप्पति निग्गंथाण वा निग्गंथीण वा चउहिं महापाडिवएहिं सज्झायं करेत्तए, तं जहा- आसाढपाडिवए इंदमहपाडिवए कत्तियपाडिवए सुगिम्हगपाडिवए ।

नो कप्पति निग्गंथाणं वा निग्गंथीण वा चउहिं संझाहिं सज्झायं करेत्तए, तं जहा- पढमाए पच्छिमाए मज्झणहे अइढरत्ते ।

कप्पड़ निग्गंथाण वा निग्गंथीण वा चाउक्कालं सज्झायं करेत्तए तं जहा पुव्वणहे अवरणह पओसे पच्चूसे ।

[३०५] चउव्विहा लोगद्धिती पन्नत्ता तं जहा- आगासपतिट्ठिए वाते, वातपतिट्ठिए उदधी, उदधिपतिट्ठिया पुढवी, पुढवपतिट्ठिया तसा थावरा पाणा ।

[३०६] चत्तारि पुरिसजाया पन्नत्ता तं जहा- तहे नाममेगे, नोतहे नाममेगे, सोवत्थी नाममेगे, पधाणे नाममेगे; चत्तारि पुरिसजाया पन्नत्ता तं जहा- आयंतकरे नाममेगे नो परंतकरे, परंतकरे नाममेगे नो आयंकरे, एगे आयंकरेवि परंतकरेवि, एगे नो आयंकरे नो परंतकरे ।

चत्तारि पुरिसजाया प० तं०- आयंतमे नाममेगे नो परंतमे, परंतमे नाममेगे नो आयंतमे, एगे आयंतमेवि परंतमेवि, एगे नो आयंतमे नो परंतमे; चत्तारि पुरिसजाया पन्नत्ता तं जहा- आयंदमे नाममेगे नो परंदमे-४ ।

[३०७] चउव्विहा गरहा पन्नत्ता तं०- उवसंपज्जामित्तेगा गरहा, वित्तिगिच्छामित्तेगा गरहा, जंकिंचिमिच्छामित्तेगा गरहा, एवंपि पन्नत्तेगा गरहा ।

[३०८] चत्तारि पुरिसजाया पण्णता तं जहा- अप्पणो नाममेगे अलमंथू भवति नो परस्स, परस्स नाममेगे अलमंथू भवति नो अप्पणो, एगे अप्पणोवि अलमंथू भवति परस्सवि, एगे नो अप्पणो अलमंथू भवति नो परस्स ।

चत्तारि मग्गा पन्नत्ता तं जहा- उज्जू नाममेगे उज्जू, उज्जू नाममेगे वंके, वंके नाममेगे उज्जू, वंके नाममेगे वंके; एवामेव चत्तारि पुरिसजाया पन्नत्ता तं जहा- उज्जू नाममेगे उज्जू-४ ।

चत्तारि मग्गा पन्नत्ता तं जहा- खेमे नाममेगे खेमे, खेमे नाममेगे अखेमे, अखेमे नाममेगे खेमे, अखेमे नाममेगे अखेमे; एवामेव चत्तारि पुरिसजाया पन्नत्ता तं जहा- खेमे नाममेगे खेमे-४ ।

चत्तारि मग्गा पन्नत्ता तं जहा- खेमे नाममेगे खेमरूवे, खेमे नाममेगे अखेमरूवे, अखेमे नाममेगे खेमरूवे, अखेमे नाममेगे अखेमरूवे; एवामेव चत्तारि पुरिसजाया पन्नत्ता तं जहा- खेमे नाममेगे खेमरूवे-४ ।

चत्तारि संबुक्का पन्नत्ता तं जहा- वामे नाममेगे वामावत्ते, वामे नाममेगे दाहिणावते, दाहिणे नाममेगे वामावत्ते, दाहिणे नाममेगे दाहिणावत्ते; एवामेव चत्तारि पुरिसजाया पन्नत्ता तं जहा- वामे नाममेगे वामावत्ते-४ ।

चत्तारि धूमसिहाओ पन्नत्ताओ तं जहा- वामा नाममेगा वामावत्ता-४ । एवामेव चत्तारि ठाणं-४, उद्देसो-२

इत्थीओ पन्नत्ताओ तं जहा- वामा नाममेगा वामावत्ता-४ ।

चत्तारि अग्गिसिहाओ पन्नत्ताओ तं जहा- वामा नाममेगा दाहिणावत्ता-४; एवामेव चत्तारि इत्थीओ पन्नत्ताओ तं जहा- वामा नाममेगा दाहिणावत्ता-४ ।

चत्तारि वायमंडलिया पन्नत्ता तं जहा- वामा नाममेगा वामावत्ता-४; एवामेव चत्तारि इत्थीओ पन्नत्ताओ तं जहा- वामा नाममेगा वामावत्ता-४ ।

चत्तारि वणसंडा पन्नत्ता तं जहा- वामे नाममेगे वामावत्ते-४; एवामेव चत्तारि पुरिसजाया पन्नत्ता तं जहा- वामे नाममेगे वामावत्ते-४ ।

[३०९] चउहिं ठाणेहिं निग्गंथे निग्गंथिं आलावमाणे वा संलवमाणे वा नातिक्कमति तं जहा- पंथं पुच्छमाणे वा, पंथं देसमाणे वा, असणं वा पाणं वा खाइमं वा साइमं वा दलेमाणे वा, असणं वा पाणं वा खाइमं वा साइम वा दलावेमाणे वा ।

[३१०] तमुक्कायस्स णं चत्तारि णामधेज्जा पन्नत्ता तं जहा- तमेति वा तमुक्ककातेति वा अंधकारेति वा महंधकारेति वा । तमुक्कायस्स णं चत्तारि णामधेज्जा पन्नत्ता तं जहा- लोगंधगारेति वा लोगतमसेति वा देवंधगारेति वा देवतमसेति वा । तमुक्कायस्स णं चत्तारि णामधेज्जा पन्नत्ता तं जहा- वातफलिहेति वा वातफलिहोभेति वा देवरण्णेति वा देववूहेति वा ।

तमुक्काते णं चत्तारि कप्पे आवरित्ता चिट्ठति तं जहा- सोधम्मीसाणं सणंकुमार-माहिंदं ।

[३११] चत्तारि पुरिसजाया पन्नत्ता तं जहा- संपागडपडिसेवी नाममेगे, पच्छण्णपडिसेवी नाममेगे, पडुप्पण्णनंदी नाममेगे, निस्सरणनंदी नाममेगे ।

चत्तारि सेणाओ पन्नत्ताओ तं जहा- जइत्ता नाममेगा नो पराजिणित्ता, परिजिणित्ता नाममेगे नो जइत्ता, एगा जइत्तावि पराजिणित्तावि, एगा नो जइत्ता नो पराजिणित्ता; एवामेव चत्तारि पुरिसजाया पन्नत्ता तं जहा- जइत्ता नाममेगे नो पराजिणित्ता-४ । चत्तारि सेणाओ पन्नत्ताओ तं जहा- जइत्ता नाममेगा जयई, जइत्ता नाममेगा पराजिणति, पराजिणित्ता नाममेगे जयइ, पराजिणित्ता नाममेगा पराजिणति; एवामेव चत्तारि पुरिसजाया पन्नत्ता तं जहा- जइत्ता नाममेगे जयइ-४ ।

[३१२] चत्तारि केतणा पन्नत्ता तं जहा- वंसीमूलकेतणए मँढविसाणकेतणए गोमुत्तिकेतणए अवलेहणियकेतणए; एवामेव चउविधा माया पन्नत्ता तं जहा- वंसीमूलकेतणासमणा जाव अवलेहणियकेत- णासमणा; वंसीमूलकेतणासमाणं मायामणुपविट्ठे जीवे कालं करेति नेरइएसु उववज्जति, मँढविसाण- केतनासमाणं मायामणुपविट्ठे जीवे कालं करेति तिरिक्खजोणिएसु उववज्जति, गोमुत्ति० कालं करेति मणुस्सेसु उववज्जति, अवलेहणिय जाव देवेसु उववज्जति ।

चत्तारि थंभा पन्नत्ता तं जहा- सेलथंभे अट्ठिथंभे दारुथंभे तिणिसलताथंभे; एवामेव चउव्विधे माणे पण्णत्ते तं जहा- सेलथंभसमाणे जाव तिणिसलताथंभसमाणे, सेलथंभसमाणं माणं अणुपविट्ठे जीवे कालं करेति नेरइएसु उववज्जति, एवं जाव तिणिसलताथंभसमाणं माणं अणुपविट्ठे जीवे कालं करेति देवेसु उववज्जति ।

चत्तारि वत्था पन्नत्ता तं जहा- किमिरागरत्ते कद्धमरागरत्ते खंजणरागरत्ते हलिद्धरागरत्ते; एवामेव चउव्विधे लोभे पण्णत्ते तं जहा- किमिरागरत्तवत्थसमाणे कद्धमरागरत्त-वत्थसमाणे खंजणरागर- त्तवत्थ समाणे हलिद्धरागरत्तवत्थसमाणे; किमिरागरत्तवत्थसमाणं लोभमणुपविट्ठे जीवे कालं करेइ नेरइएसु

ठाणं-४, उद्देसो-२

उववज्जइ तहेव जाव हलिद्धरागरत्तवत्थ-समाणं लोभमणुपविट्ठे जीवे कालं करेइ देवेसु उववज्जइ ।

[३१३] चउव्विहे संसारे पण्णत्ते तं जहा- नेरइयसंसारे जाव देवसंसारे ।

चउव्विहे आउए पण्णत्ते तं जहा- नेरइयआउए जाव देवाउए ।

चउव्विहे भवे पण्णत्ते तं जहा- नेरइयभवे जाव देवभवे ।

[३१४] चउव्विहे आहारे पण्णत्ते तं जहा- असणे पाणे खाइमे साइमे; चउव्विहे आहारे पण्णत्ते तं जहा- उवक्खसरसंपण्णे उवक्खडसंपण्णे सभावसंपण्णे परिजुसियसंपण्णे ।

[३१५] चउव्विहे बंधे पण्णत्ते तं जहा- पगतिबंधे ठित्तिबंधे अणुभावबंधे पदेसबंधे ।

चउव्विहे उवक्कमे पण्णत्ते तं जहा- बंधणोवक्कमे उदीरणोवक्कमे उवसमणोवक्कमे विप्परिणामणोवक्कमे ।

बंधणोवक्कमे चउव्विहे पण्णत्ते तं जहा- पगतिबंधणोवक्कमे ठित्तिबंधणोवक्कमे अणुभावबंधणो-वक्कमे पदेसबंधणोवक्कमे । उदीरणोवक्कमे चउव्विहे पण्णत्ते तं जहा- पगतिउदीरणो-वक्कमे ठित्तिउदीरणोवक्कमे अणुभावउदीरणोवक्कमे पदेसउदीरणोवक्कमे । उवसमणोवक्कमे चउव्विहे पण्णत्ते तं जहा- पगतिउवसमणो-वक्कमे ठित्तिउवसमणोवक्कमे अणुभावउवसमणोवक्कमे पदेसउवसा-मणोवक्कमे । विप्परिणामणोवक्कमे चउव्विहे पण्णत्ते तं जहा- पगतविविप्परिणामणोवक्कमे ठित्तिविप्प-रिणामणोवक्कमे अणुभावविप्परिणाम-णोवक्कमे पएसविप्परिणामणोवक्कमे ।

चउव्विहे अप्पाबहुए पण्णत्ते तं जहा- पगतिअप्पाबहुए ठित्तिअप्पाबहुए अणुभावअप्पाबहुए पएसअप्पाहुए ।

चउव्विहे संकमे पण्णत्ते तं जहा- पगतिसंकमे ठित्तिसंकमे अणुभावसंकमे पएससंकमे ।

चउव्विहे निधत्ते पण्णत्ते तं जहा- पगतिणिधत्ते ठित्तिनिधत्ते अणुभावनिधत्ते पएसनिधत्ते ।

चउव्विहे णिगायिते पण्णत्ते तं जहा- पगतिणिगायिते ठित्तिणिगायिते अणुभावणिगायिते पएसणिगायिते ।

[३१६] चत्तारि एक्का पन्नत्ता तं जहा- दविएक्कए माउएक्कए पज्जवेक्कए संगहेक्कए ।

[३१७] चत्तारि कती पन्नत्ता तं जहा- दवितकती माउयकती पज्जवकती संगहकती ।

[३१८] चत्तारि सव्वा प० तं० - नामसव्वए ठवणसव्वए आएससव्वए निरवसेससव्वए ।

[३१९] माणुसुत्तरस्स णं पव्वयस्स चउदिसिं चत्तारि कूडा पन्नत्ता तं जहा- रयणे रतणुच्चए सव्वरयणे रतणसंचए ।

[३२०] जंबुद्दीवे दीवे भरहेरवतेसु वासेसु तीताए उस्सप्पिणीए सुसमसुसमाए समाए चत्तारि सागरोवमकोडाकोडीओ कालो हुत्था, जंबुद्दीवे दीवे भरहेरवतेसु वासेसु इमीसे ओसप्पिणीए सुसमसुसमाए समाए चत्तारि सागरोवमकोडाकोडीओ कालो पन्नत्तो, जंबुद्दीवे दीवे भरहेरवतेसु वासेसु आगमेस्साए उस्सप्पिणीए सुसमसुसमाए समाए चत्तारि सागरोवमकोडाकोडीओ कालो भविस्सइ ।

[३२१] जंबुद्दीवे दीवे देवकुरुउत्तरकुरुवज्जाओ चत्तारि अकम्मभूमीओ पन्नत्ताओ तं जहा- हेमवते हेरण्वत्ते हरिवरिसे रम्मगवरिसे, चत्तारि वट्टवेयइडपव्वत्ता पन्नत्ता तं जहा- सद्दावाती वियडावाती गंधावाती मालवंतपरिताते, तत्थ णं चत्तारि देवा महिइडिया जाव पलिओवमट्ठितीया परिवसंति तं जहा साती पभासे अरुणे पउमे

ठाणं-४, उद्देसो-२

जंबुद्दीवे दीवे महाविदेहे वासे चउव्विहे पण्णत्ते तं जहा- पुव्वविदेहे अवरविदेहे देवकुरा उत्तरकुरा, सव्वे वि णं निसडनीलवंतवासहरपव्वता चत्तारि जोयणसयाइं उड्ढं उच्चत्तेणं चत्तारि गाउसयाइं उव्वेहेणं पन्नत्ता

जंबुद्दीवे दीवे मंदरस्स पव्वयस्स पुरत्थिमे णं सीताए महानदीए उत्तरकूले चत्तारि वक्खारपव्वया पन्नत्ता तं जहा- चित्तकूडे पम्हकूडे नलिणकूडे एगसेले,

जंबुद्दीवे दीवे मंदरस्स पव्वयस्स पुरत्थिमे णं सीताए महानदीए दाहिणकूले चत्तारि वक्खारपव्वया पन्नत्ता तं जहा- तिकूडे वेसमणकूडे अंजणे मातंजणे ।

जंबुद्दीवे दीवे मंदरस्स पव्वयस्स पच्चत्थिमे णं सीओदाए महानदीए दाहिणकूले चत्तारि वक्खारपव्वया पन्नत्ता तं जहा- अंकावती पम्हावती आसीविसे सुहावहे ।

जंबुद्दीवे दीवे मंदरस्स पव्वयस्स पच्चत्थिमे णं सीओदाए महानदीए उत्तरकूले चत्तारि वक्खारपव्वया पन्नत्ता तं जहा- चंदपव्वते सूरपव्वते देवपव्वते नागपव्वते ।

जंबुद्दीवे दीवे मंदरस्स पव्वयस्स चउसु विदिसासु चत्तारि वक्खारपव्वया पन्नत्ता तं जहा- सोमणसे विज्जुप्पभे गंधमायणे मालवंते ।

जंबुद्दीवे दीवे महाविदेहे वासे जहण्णपए चत्तारि अरहंता चत्तारि चक्कवट्ठी चत्तारि बलदेवा चत्तारि वासुदेवा उप्पज्जिंसु वा उप्पज्जंति वा उप्पज्जिस्संति वा ।

जंबुद्दीवे दीवे मंदरे पव्वते चत्तारि वना पन्नत्ता तं जहा- भद्दसालवने नंदणवने सोमनसवने पंडगवने, जंबुद्दीवे दीवे मंदरे पव्वते पंडगवने चत्तारि अभिसेगसिलाओ पन्नत्ताओ तं जहा- पंडुकंबलसिला अइपंडुकंबलसिला रत्तकंबलसिला अतिरत्तकंबलसिला,

मंदरचूलिया णं उवरिं चत्तारि जोयणाइं विक्खंभेणं पन्नत्ता एवं- धायइसंडदीवपुरत्थिमद्धेवि कालं आदिं करेत्ता जाव मंदरचूलियत्ति, एवं जाव पुक्खरवरदीवपच्चत्थिमद्धे जाव मंदरचूलियत्ति ।

[३२२] जंबुद्दीवगआवस्सग तु कालाओ चूलिया जाव ।

घायइसंडे पुक्खरवरे य पुव्वावरे पासे ॥

[३२३] जंबुद्दीवस्स णं दीवस्स चत्तारि दारा पन्नत्ता तं जहा- विजये वेजयंते जयंते अपराजिते, ते णं दारा चत्तारि जोयणाइं विक्खंभेणं तावइयं चेव पवेसेणं पन्नत्ता, तत्थ णं चत्तारि देवा महिइडिया जाव पलिओवमट्ठितीया परिवसंति तं जहा- विजये वेजयंते जयंते अपराजिते ।

[३२४] जंबुद्दीवे दीवे मंदरस्स पव्वयस्स दाहिणे णं चुल्लहिमवंतस्स वासहरपव्वयस्स चउसु विदिसासु लवणसमुद्धं तिण्णि-तिण्णि जोयणसयाइं ओगाहत्ता एत्थ णं चत्तारि अंतरदीवा पन्नत्ता तं जहा- एगूरूयदीवे आभासियदीवे वेसाणियदीवे नंगोलियदीवे, तेसु णं दीवेसु चउव्विहा मणुस्सा परिवसंति, तं जहा- एगूरूया आभासिया वेसाणिया नंगोलिया,

तेसिं णं दीवाणं चउसु विदिसासु लवणसमुद्धं चत्तारि-चत्तारि जोयणसयाइं ओगाहेत्ता एत्थ णं चत्तारि अंतरदीवा पन्नत्ता तं जहा- हयकण्णदीवे गयकण्णदीवे गोकण्णदीवे सक्कुलिकण्णदीवे, तेसुं णं दीवेसु चउव्विहा मणुस्सा परिवसंति तं जहा- हयकण्णा गयकण्णा गोकण्णा सक्कुलिकण्णा ।

तेसिं णं दीवाणं चउसु विदिसासु लवणसमुद्धं पंच-पंच जोयणसयाइं ओगाहत्ता एत्थ णं चत्तारि अंतरदीवा पन्नत्ता तं जहा- आयंसमुहदीवे मेंढमुहदीवे अओमुहदीवे गोमुहदीवे, तेसु णं दीवेसु ठाणं-४, उद्देसो-२

चउव्विहा मणुस्सा भाणियव्वा,

तेसिं णं दीवाणं चउसु विदिसासु लवणसमुद्धं छ-छ जोयणसयाइं ओगाहेत्ता एत्थ णं चत्तारि अंतरदीवा पन्नत्ता तं जहा- आसमुहदीवे हत्थिमुहदीवे सीहमुहदीवे वग्धमुहदीवे, तेसु णं दीवेसु चउव्विहा मणुस्सा भाणियव्वा ।

तेसि णं दीवाणं चउसु विदिसासु लवणसमुद्धं सत्त-सत्त जोयणसयाइं ओगाहेत्ता एत्थ णं चत्तारि अंतरदीवा पन्नत्ता तं जहा- आसकण्णदीवे हत्थिकण्णदीवे अकण्णदीवे कण्णपाउरणदीवे, तेसु णं दीवेसु मणुस्सा भाणियव्वा ।

तेसि णं दीवाणं चउसु विदिसासु लवणसमुद्धं अट्ठजोयणसयाइं ओगाहेत्ता एत्थ णं चत्तारि अंतरदीवा पन्नत्ता तं जहा- उक्कामुहदीवे मेहमुहदीवे विज्जुमुहदीवे विज्जुदंतदीवे, तेसु णं दीवेसु मणुस्सा भाणियव्वा ।

तेसिं णं दीवाणं चउसु विदिसासु लवणसमुद्धं नव-नव जोयणसयाइं ओगाहेत्ता एत्थ णं चत्तारि अंतरदीवा पन्नत्ता तं जहा- धणदंतदीवे लद्धदंतदीवे गूढदंतदीवे सुद्धदंतदीवे, तेसु णं दीवेसु चउव्विहा मणुस्सा परिवसंति तं जहा- धणदंता लद्धदंता गूढदंता सुद्धदंता ।

जंबुदीवे दीवे मंदरस्स पव्वयस्स उत्तरेणं सिंहिरस्स वासहरपव्वयस्स चउसु विदि-सासु लवणसमुद्धं तिण्णि-तिण्णि जोयणसयाइं ओगाहेत्ता एत्थ णं चत्तारि अंतरदीवा पन्नत्ता तं जहा- एगूरुयदीवे सेसं तहेव निरवसेसं भाणियव्वं जाव सुद्धदंता ।

[३२५] जंबुदीवस्स णं दीवस्स बाहिरिल्लाओ वेइयंताओ चउदिसि लवणसमुद्धं पंचाणउइं जोयणसहस्साइं ओगाहेत्ता एत्थ णं महतिमहालता महालंजरंढाणसंठिता चत्तारि महापायाला पन्नत्ता तं जहा- वलयामुहे केउए जूवए ईसरे, तत्थ णं चत्तारि देवा महिइडिया जाव पलिओवमट्ठितीया परिवसंति तं जहा काल महाकाले वेलंबे पभंजणे ।

जंबुदीवस्स णं दीवस्स बाहिरिल्लाओ वेइयंताओ चउदिसि लवणसमुद्धं बायालीसं-बायालीसं जोयणसहस्साइं ओगाहेत्ता एत्थ णं चउण्हं वेलंधरणागराईणं चत्तारि आवासपव्वता पन्नत्ता तं जहा- गोथूभे उदओभासे संखे दगसीमे, तत्थ णं चत्तारि देवा महिइडिया जाव पलिओवमट्ठितीया परिवसंति तं जहा गोथूभे सिवए संखे मणोसिलाए ।

जंबुदीवस्स णं दीवस्स बाहिरिल्लाओ वेइयंताओ चउसु विदिसासु लवणसमुद्धं बायालीसं-बायालीसं जोयणसहस्साइं ओगाहेत्ता एत्थ णं चउण्हं अणुवेलंधरणागराईणं चत्तारि आवासपव्वत्ता पन्नत्ता तं जहा- क्ककोडए विज्जुप्पभे केलासे अरुणप्पभे, तत्थं णं चत्तारि देवा महिइडिया जाव पलिओवमट्ठितीया परिवसंति तं जहा- क्ककोडए कद्धमए केलासे अरुणप्पभे ।

लवणे णं समुद्धे चत्तारि चंदा पभासिंसु वा पभासंति वा पभासिस्संति वा, चत्तारि सूरिया तविंसु वा तवंति वा तविस्संति वा, चत्तारि कित्तियाओ जाव चत्तारि भरणीओ चत्तारि अग्गी जाव चत्तारि जमा चत्तारि अंगारा जाव चत्तारि भाव-केऊ,

लवणस्स णं समुद्धस्स चत्तारि दारा पन्नत्ता, तं जहा- विजए वेजयंते जयंते अपराजिते, ते णं दारा चत्तारि जोयणाइं विक्खभेणं तावइयं चेव पवेसेणं पन्नत्ता तत्थ णं चत्तारि देवा महिइडिया जाव पलिओवमट्ठितीया परिवसंति तं जहा विजए वेजयंति जयंते अपराजिए ।

ठाणं-४, उद्देसो-२

[३२६] घायइसंडे णं दीवे चत्तारि जोयणसयसहस्साइं चक्कवालविक्खंभेणं पण्णत्ते, जंबुदी-वस्स णं दीवस्स बहिया चत्तारि भरहाइं चत्तारि एरवयाइं, एवं जहा सट्ठुसेसए तहेव निरवसेसं भाणियव्वं जाव चत्तारि मंदरा चत्तारि मंदरचूलियाओ ।

[३२७] नंदीसरवरस्स णं दीवस्स चक्कवाल-विकखंभस्स बहुमज्झदेसभागे चउद्दिसिं चत्तारि अंजणगपव्वता पन्नत्ता तं जहा- पुरत्थिमिल्ले अंजणगपव्वते दाहिणिल्ले अंजणगपव्वते पच्चत्थिमिल्ले अंजणगपव्वते उत्तरिल्ले अंजणगपव्वते, ते णं अंजणगपव्वता चउरासीतिं जोयणसहस्साइं उड्ढं उच्चत्तेणं एगं जोयण सहस्सं उव्वहेणं मूले दसजोयणसहस्साइं विकखंभेणं तदणंतरं च णं मायाए-मायाए परिहायमाणा-परिहायमाणा उवरिमेणं जोयणसहस्सं विकखंभेणं पन्नत्ता मूले इक्कतीसं जोयणसहस्साइं छच्च तेवीसे जोयणसते परिकखेवेणं उवरिं तिण्णि-तिण्णि जोयणसहस्साइं एगं च छावट्ठं जोयणसतं परिकखेणं, मूले विच्छिण्णा मज्झे संखेत्ता, उप्पिं तणुया० गोपुच्छंसंठाणसंठिता सव्वअंजणमया अच्छा सण्हा लण्हा घट्ठा मट्ठा नीरया निम्मला निप्पंका निककं कड-च्छाया सप्पभा समिरीया सउज्जोया पासाईया दरिसणीया अभिरूवा पडिरूवा,

तेसि णं अंजणगपव्वयाणं उवरिं बहुसमरमणिज्जा भूमिभागा पन्नत्ता तेसि णं बहुसमर-मणिज्जाणं भूमिभागाणं बहुमज्झदेसभागे चत्तारि सिद्धायतणा पन्नत्ता, ते णं सिद्धायतणा एगं जोयणसयं आयामेणं पण्णासं जोयणाइं विकखंभेणं बावत्तरिं जोयणाइं उड्ढं उच्चत्तेणं, तेसिं सिद्धायतणाणं चउद्दिसिं चत्तारि दारा पन्नत्ता तं जहा- देवदारे असुरदारे नागदारे सुवण्णदारे, तेसु णं दारेसु चउत्विहा देवा परिवसंति तं जहा- देवा असुरा नागा सुवण्णा, तेसि णं दाराणं पुरओ चत्तारि मुहमंडवा पन्नत्ता, तेसि णं मुहमंडवाणं पुरओ चत्तारि पेच्छाघरमंडवा पन्नत्ता, तेसि णं पेच्छाघरमंडवाणं बहुमज्झदेसभागे चत्तारि वइरामया उक्खाडा पन्नत्ता, तेसि णं वइरामयाणं अक्खाडगाणं बहुमज्झदेसभागे चत्तारि मणिपेढियातो पन्नत्ताओ, तासि णं मणिपेढियाणं उवरिं चत्तारि सीहासणा पन्नत्ता,

तेसि णं सीहासणाणं उवरिं चत्तारिं विजयदूसा पन्नत्ता, तेसि णं विजयदूसगाणं बहुमज्झदेसभागे चत्तारि वइरामया अंकुसा पन्नत्ता, तेसु णं वइरामएसु अंकुसेसु चत्तारि कुंभिका मुत्तादामा पन्नत्ता, ते णं कुंभिका मुत्तादामा पत्तेयं-पत्तेयं अण्णेहिं तदद्धउच्चत्तपमाणमित्तेहिं चउद्दिसिं अद्धकुंभिकेहिं मुत्तादामेहिं, सव्वतो समंता संपरिक्खित्ता, तेसि णं पेच्छाघरमंडवाणं पुरओ चत्तारि मणिपेढियाओ पन्नत्ताओ, तासि णं मणिपेढियाणं उवरिं चत्तारि-चत्तारि वेइयथूभा पन्नत्ता, तेसि णं चेइयथूभाणं पत्तेयं-पत्तेयं चउद्दिसिं चत्तारि मणिपेढियाओ पन्नत्ताओ,

तासि णं मणिपेढियाणं उवरिं चत्तारि जिणपडिमाओ सव्वरयणामईओ संपत्तिं कणिसण्णाओ थूभाभिमुहाओ चिद्धंति तं जहा- रिसभा वद्धमाणा चंदानना वारिसेणा, तेसि णं चेइयथूभाणं पुरओ चत्तारि मणिपेढियाओ पन्नत्ताओ, तासि णं मणिपेढियाणं उवरिं चत्तारि चेइयरुक्खा पन्नत्ता, तेसि णं चेइयरुक्खाणं पुरओ चत्तारि मणिपेढियाओ पन्नत्ताओ, तासि णं मणिपेढियाणं उवरिं चत्तारि महिंदज्झया पन्नत्ता, तेसि णं महिंदज्झयाणं पुरओ चत्तारि नंदाओ पुक्खरिणीओ पन्नत्ताओ, तासि णं पुक्खरिणीणं पत्तेयं-पत्तेयं चउद्दिसिं चत्तारि वणसंडा पन्नत्ता, तं जहा- पुरत्थिमेणं दाहिणे पच्चत्थिमे णं उत्तरे णं ।

[३२८] पुव्वे णं असोगवणं दाहिणओ होइ सत्तवण्णवणं ।

अवरे णं चंपगवणं चूतवणं उत्तरे पासे ॥

ठाणं-४, उद्देसो-२

[३२९] तत्थ णं जे से पुरत्थिमिल्ले अंजणगपव्वते तस्स ण चउद्दिसिं चत्तारि नंदाओ पुक्खरिणीओ पन्नत्ताओ तं जहा- नंदुत्तरा नंदा आणंदा नंदिवद्धणा, ताओ णं नंदाओ पुक्खरिणीओ एगं

जोयणसयसहस्सं आयामेणं पण्णासं जोयणसहस्साइं विक्खंभेणं दसजोयणसताइं उव्वेहेणं, तासि णं पुक्खरिणीणं पत्तेयं-पत्तेयं चउद्धिसिं चत्तारि तिसोवाणपडिरूवगा पन्नत्ता, तेसि णं तिसोवाणपडिरूवगाणं पुरतो चत्तारि तोरणा पन्नत्ता तं जहा- पुरत्थिमे णं दाहिणे णं पच्चत्थिमे णं उत्तरे णं, तासि णं पुक्खरिणीणं पत्तेयं-पत्तेयं चउद्धिसिं चत्तारि वणसंडा पन्नत्ता तं जहा- पुरतो दाहिणे णं पच्चत्थिमे णं उत्तरे णं,

तासि णं पुक्खरिणीणं बहुमज्झदेसभागे चत्तारि दधिमुहगपव्वया पन्नत्ता ते णं दधिमुहगपव्वया चउद्धिसिं जोयणसहस्साइं उड्ढं उच्चत्तेणं एगं जोयणसहस्सं उव्वेहेणं सव्वत्थ समा पल्लगसंठाणसंठिता दस जोयणसहस्साइं विक्खंभेणं एककीसं जोयणसहस्साइं छच्च तेवीसे जोयणसते परिकखेवेणं, सव्वरयणामया अच्छा जाव पडिरूवा, तेसि णं दधिमुहगपव्वताणं उवरि बहुसमरमणिज्जा भूमिभागा पन्नत्ता सेसं जहेव अंजणगपव्वताणं तहेव निरवसेसं भाणियव्वं, जाव चूतवणं उत्तरे पासे,

तत्थ णं जे से दाहिणिल्ले अंजणगपव्वत्ते तस्स णं चउद्धिसिं चत्तारि नंदाओ पुक्खरिणीओ पन्नत्ताओ, तं जहा- भद्दा विसाला कुमुदा पोंडरीणिणी, ताओ णं नंदाओ पुक्खरिणीओ एगं जोयणसयसहस्सं सेसं तं चेव जाव दधिमुहगपव्वता जाव वणसंडा, तत्थ णं जे से पच्चत्थिमिल्ले अंजणगव्वत्ते तस्स णं छउद्धिसिं चत्तारि नंदाओ पुक्खरिणीओ पन्नत्ताओ तं जहा- नंदिसेणा अमोहा गोथूमा सुंदसणा, सेसं तं चेव तहेव दधिमुहगपव्वता तहेव सिद्धाययणा जाव वणसंडा,

तत्थ णं जे से उत्तरिल्ले अंजणगपव्वत्ते तस्स णं चउद्धिसिं चत्तारि नंदाओ पुक्खरिणीओ पन्नत्ताओ तं जहा- विजया वेजयंति जयंती अपराजिता, ताओ णं नंदाओ पुक्खरिणीओ एगं जोयणसयसहस्सं सेसं तं चेव पमाणं तहेव दधिमुहग-पव्वत्ता तहेव सिद्धाययणा जाव वणसंडा ।

नंदीसरवरस्स णं दीवस्स चक्कवाल-विक्खंभस्स बहुमज्झदेसभागे चउसु विदिसासु चत्तारि रतिकरगपव्वता पन्नत्ता तं जहा- उत्तरपुरत्थिमिल्ले रतिकरग-पव्वए दाहिणपुरत्थिमिल्ले रतिकरगपव्वए दाहिणपच्चत्थिमिल्ले रतिकरगपव्वए उत्तरपच्चत्थिमिल्ले रतिकरगपव्वए, ते णं रतिकरगपव्वता दस जोयणसयाइं उड्ढं उच्चत्तेणं दस गाउय-सताइं उव्वेहेणं सव्वत्थ समा झल्लरिसंठाणसंठिता दस जोयणसहस्साइं विक्खंभेणं एककी-तीसं जोयणसहस्साइं छच्च तेवीसे जोयणसते परिकखेवेणं, सव्वरयणामया अच्छा जाव पडिरूवा,

तत्थ णं जे से उत्तरपुरत्थिमिल्ले रतिकरगपव्वत्ते तस्स णं चउद्धिसिं ईसाणस्स देविं- द्वस्स देवरण्णो चउण्हमग्गमहिशीणं जंबुद्वीवपमाणाओ चत्तारि रायहाणीओ प० तं०- नंदुत्तरा नंदा उत्तरकुरा देवकुरा, कण्हाए कण्हराईए रामाए रामरक्खियाए, तत्थ णं जे से दाहिणपुरत्थिमिल्ले रतिकरगपव्वत्ते, तत्थ णं चउद्धिसिं सक्कस्स देविंदस्स देवरण्णो चउण्हमग्गमहिशीणं जंबुद्वीवपमाणाओ चत्तारि रायहाणीओ पन्नत्ताओ तं जहा- समणा सोमणासा अच्छिमाली मणोरमा पउमाए सिवाए सतीए अंजूए, तत्थ णं जे से दाहिणपच्चत्थिमिल्ले रतिकरगपव्वत्ते

तत्थ णं चउद्धिसिं सक्कस्स देविंदस्स देवरण्णो चउण्हमग्गमहिशीणं जंबुद्वीवपमाणमेत्ताओ चत्तारि रायहाणीओ पन्नत्ताओ तं जहा- भूता भूतवडेंसा गोथूमा सुंदसणा, अमलाए अच्छराए नवमियाए रोहिणीए ।

ठाणं-४, उद्देसो-२

तत्थ णं जे से उत्तरपच्चत्थिमिल्ले रतिकरगपव्वत्ते तस्स णं चउद्धिसिमीसाणस्स देविंदस्स

देवरण्णो चउण्हमग्गमहिंसीणं जंबुद्वीवप्पमाणमेत्ताओ चत्तारि रायहाणीओ पन्नत्ताओ तं जहा- रयणा रतणुच्चया सव्वरतणा रतणसंचया, वसूए वसुगुत्ताए वसुमित्ताए वसुंधराए ।

[३३०] चउव्विहे सच्चे प० तं० जहा- नामसच्चे ठवणसच्चे दव्वसच्चे भावसच्चे ।

[३३१] आजीवियाणं चउव्विहे तवे पण्णत्ते तं जहा- उग्गतवे घोरतवे रसनिज्जूहणता जिब्भंदियपडिसंलीणता ।

[३३२] चउव्विहे संजमे पण्णत्ते तं जहा- मणसंजमे वइसंजमे कायसंजमे उवगरणसंजमे ।

चउव्विधे चियाए पण्णत्ते तं जहा- मणचियाए वइचियाए कायचियाए उवगरणचियाए ।

चउव्विहा अकिंचणता पन्नत्ता तं जहा- मणअकिंचणता वइअकिंचणता कायअकिंचणता उवगरणअकिंचणता ।

० चउत्थे ठाणे बीओ उद्देसो समत्तो ०

० तइओ-उद्देसो ०

[३३३] चत्तारि राईओ पन्नत्ताओ तं जहा- पव्वयराई पुढविराई वालुयराई उदगराई, एवामेव चउव्विहे कोहे पण्णत्ते तं जहा- पव्वयराइसमाणे पुढविराइसमाणे वालुयराइसमाणे उदगराइसमाणे, पव्वयराइसमाणं कोहमणुपविट्ठे जीवे कालं करेइ नेरइएसु उववज्जति, पुढविराइसमाणं कोहमणुपविट्ठे जीवे कालं करेइ तिरिक्खजोणिएसु उववज्जति, वालुयराइसमाणं कोहमणुपविट्ठे जीवे कालं करेइ मणुस्सेसु उववज्जति, उदगराइसमाणं कोहमणुपविट्ठे जीवे कालं करेइ देवेसु उववज्जति ।

चत्तारि उदगा पन्नत्ता तं जहा- कद्धमोदए खंजणोदए वालुओदए सेलोदए, एवामेव चउव्विहे भावे पण्णत्ते तं जहा- कद्धमोदगसमाणे खंजणोदगसमाणे वालुओदगसमाणे सेलोदगसमाणे, कद्धमोदगसमाणं भावमणुपविट्ठे जीवे कालं करेइ नेरइएसु उववज्जति, एवं जाव सेलोदगसमाणं भावमणुपविट्ठे जीवे कालं करेइ देवेसु उववज्जति ।

[३३४] चत्तारि पक्खी पन्नत्ता तं जहा- रुतसंपण्णे नाममेगे नो रुवसंपण्णे, रुवसंपण्णे नाममेगे नो रुतसंपण्णे, एगे रुतसंपण्णेवि रुवसंपण्णेवि, एगे नो रुतसंपण्णे नो रुवसंपण्णे; एवामेव चत्तारि पुरिसजाया पन्नत्ता तं जहा- रुतसंपण्णे नाममेगे नो रुव संपण्णे-४;

चत्तारि पुरिसजाया पन्नत्ता तं जहा- पत्तियं करेमीतेगे पत्तियं करेति, पत्तियं करेमीतेगे अप्पत्तियं करेति, अप्पत्तियं करेमीतेगे पत्तियं करेति, अप्पत्तियं करेमीतेगे अप्पत्तियं करेति;

चत्तारि पुरिसजाया पन्नत्ता तं जहा- अप्पणो नाममेगे पत्तियं करेति नो परस्स, परस्स नाममेगे पत्तियं करेति नो अप्पणो, एगे अप्पणोवि पत्तियं करेति परस्सवि, एगे नो अप्पणो पत्तियं करेति नो परस्स ।

चत्तारि पुरिसजाया पन्नत्ता तं जहा- पत्तियं पवेसामीतेगे पत्तियं पवेसेति, पत्तियं पवेसामीतेगे अप्पत्तियं पवेसेति-४;

चत्तारि पुरिसजाया प० तं० जहा- अप्पणो नाममेगे पत्तियं पवेसेति नो परस्स परस्स-४ ।

[३३५] चत्तारि रुक्खा प० तं०- पत्तोवए पुप्फोवए फलोवए छायोवए; एवामेव चत्तारि पुरिस-जाया पन्नत्ता तं जहा- पत्तोवारुक्खसमाणे पुप्फोवारुक्खसमाणे फलोवारुक्खसमाणे छायोवारुक्खसमाणे ।

ठाणं-४, उद्देसो-३

[३३६] भारणं वहमाणस्स चत्तारि आसासा पन्नत्ता तं जहा- जत्थि यं अंसाओ अंसं साहरइ तत्थवि य से एगे आसासे पण्णत्ते, जत्थवि यं उच्चारं वा पासवणं वा परिद्वेति तत्थवि य से एगे आसासे पण्णत्ते, जत्थवि यं नागकुमारावासंसि वा सुवण्णकुमारावासंसि वा वासं उवेति तत्थवि य से एगे आसासे पण्णत्ते, जत्थवि यं आवकहाए चिद्वति तत्थवि य से एगे आसासे पण्णत्ते ।

एवामेव समणोवासगस्स चत्तारि आसासा पन्नत्ता तं जहा- जत्थवि यं सीलव्वत-गुणव्वत-वेरमण-पच्चक्खाण-पोसहोववासाइं पडिवज्जति तत्थवि य से एगे आसासे पण्णत्ते, जत्थवि यं सामाइयं देसावगासियं सम्ममणुपालेइ तत्थवि य से एगे आसासे पण्णत्ते, जत्थवि यं चाउदसमुदुपुण्णमासिणीसु पडिपुण्ण पोसहं सम्मं अणुपालेइ तत्थवि य से एगे आसासे पण्णत्ते, जत्थवि यं चाउदसमुदुद्विपुण्ण-मासिणीसु पडिपुण्णं पोसहं सम्मं अणुपालेइ तत्थवि य से एगे आसासे पण्णत्ते, जत्थवि यं अपच्छिम-मारणंति-संलेहणा-झूसणा-झूसिते भत्तपाण पियाइक्खिते पाओवगते कालमणवकंखमाणे विहरति तत्थवि य से एगे आसासे पण्णत्ते ।

[३३७] चत्तारि पुरिसजाया पन्नत्ता तं जहा- उदितोदिते नाममेगे उदितत्थमित्ते णाममेगे अत्थमितोदिते णाममेगे अत्थमितत्थमिते नाममेगे, भरहे राया चाउरंतचक्कवट्ठी णं उदितोदिते, बंभदत्ते णं राया चाउरंतचक्कवट्ठी उदितत्थमिते हरिएसबले णं अणगारे णं अत्थमितोदिते, काले णं सोयरिये अत्थमितत्थमिते ।

[३३८] चत्तारि जुम्मा पन्नत्ता तं जहा- कडजुम्मे तेयोए दावरजुम्मे कलिओए, नेरइयाणं चत्तारि जुम्मा पन्नत्ता तं जहा- कडजुम्मे तेओए दावरजुम्मे कलिओए, एवं-असुरकुमाराणं जाव थणियकुमाराणं, एवं-पुढविकाइयाणं आउ-तेउवाउ-वणस्सतिकाइयाणं बैदियाणं तेइंदियाणं चउरिंदियाणं पंचिदियतिरिक्खजोणियाणं मणुस्साणं वाणमंतर-जोइसियाणं वेमाणियाणं-सव्वेसिं जहा नेरइयाणं ।

[३३९] चत्तारि सूरा पन्नत्ता तं जहा- खतिसूरे तवसूरे दाणसूरे जुद्धसूरे, खतिसूरा अरहंता, तवसूरा अणगारा, दाणसूरे वेसमणे, जुद्धसूरे वासुदेवे ।

[३४०] चत्तारि पुरिसजाया पन्नत्ता तं जहा- उच्चे नाममेगे उच्चच्छंदे, उच्चे नाममेगे नीयच्छंदे, नीए नाममेगे उच्चच्छंदे, नीए नाममेगे नीयच्छंदे ।

[३४१] असुरकुमारा चत्तारि लेसाओ पन्नत्ताओ तं जहा- कण्हलेसा नीललेसा काउलेसा तेउलेसा एवं जाव थणियकुमाराणं एवं पुढविकाइयाणं आउ-वणस्सइकाइयाणं वाणमंतराणं-सव्वेसिं जहा असुरकुमाराणं ।

[३४२] चत्तारि जाणा पन्नत्ता तं जहा- जुत्ते नाममेगे जुत्ते, जुत्ते नाममेगे अजुत्ते, अजुत्ते नाममेगे जुत्ते, अजुत्ते नाममेगे अजुत्ते; एवामेव चत्तारि पुरिसजाया पन्नत्ता तं जहा- जुत्ते नाममेगे जुत्ते, जुत्ते नाममेगे अजुत्ते, अजुत्ते नाममेगे जुत्ते, अजुत्ते नाममेगे अजुत्ते ।

चत्तारि जाणा पन्नत्ता तं जहा- जुत्ते नाममेगे जुत्तपरिणते जुत्ते नाममेगे अजुत्तपरिणते० एवामेव चत्तारि पुरिसजाया पन्नत्ता तं जहा- जुत्ते नाममेगे जुत्तपरिणते-४ ।

चत्तारि जाणा पन्नत्ता तं जहा- जुत्ते नाममेगे जुत्तरूवे जुत्ते नाममेगे अजुत्तरूवे, अजुत्ते नाममेगे जुत्तरूवे, अजुत्ते नाममेगे अजुत्तरूवे; एवामेव चत्तारि पुरिसजाया पन्नत्ता तं जहा- जुत्ते नाममेगे जुत्तरूवे-४ ।

ठाणं-४, उद्देशो-३

चत्तारि जाणा पन्नत्ता तं जहा- जुत्ते नाममेगे जुत्तसोभे जुत्ते नाममेगे अजुत्तसोभे-४, एवामेव चत्तारि पुरिसजाया पन्नत्ता तं जहा- जुत्ते नाममेगे जुत्तसोभे-४ ।

चत्तारि जुग्गा पन्नत्ता तं जहा- जुत्ते नाममेगे जुत्ते जुत्ते नाममेगे अजुत्ते-४, एवामेव चत्तारि पुरिसजाया पन्नत्ता तं जहा- जुत्ते नाममेगे जुत्ते-४ ।

एवं जथा जाणेण चत्तारि आलावगा तथा जुग्गेणवि, पडिपक्खो तहेव पुरिसजाता जाव सोभेत्ति ।

चत्तारि सारही पन्नत्ता तं जहा- जोयावइत्ता णामं एगे नो विजोयावइत्ता, विजोयावइत्ता नाममेगे नो जोयावइत्ता, एगे जोयावइत्तावि विजोयावइत्तावि, एगे नो जोयावइत्ता नोविजोयावइत्ता; एवामेव चत्तारि पुरिसजाया पन्नत्ता तं जहा- जोयावइत्ता णामं एगे नो विजोयावइत्ता-४ ।

चत्तारि हया पन्नत्ता तं जहा- जुत्ते नाममेगे जुत्ते, जुत्ते नाममेगे अजुत्ते-४ । एवामेव चत्तारि पुरिसजाया पन्नत्ता तं जहा- जुत्ते नाममेगे जुत्ते-४ । एवं जुत्तपरिणते, जुत्तरूवे, जुत्तसोभे सव्वेसिं पडिपक्खो पुरिस जाता ।

चत्तारि गया पन्नत्ता तं जहा- जुत्ते नाममेगे जुत्ते जुत्ते नाममेगे अजुत्ते-४, एवामेव चत्तारि पुरिसजाया पन्नत्ता तं जहा- जुत्ते नाममेगे जुत्ते-४; एवं जहा हयाणं तहा गयाण वि भाणियव्वं, पडिपक्खो तहेव पुरिसजाया ।

चत्तारि जुग्गारिता पन्नत्ता तं जहा- पंथजाई नाममेगे नो उप्पहजाई, उप्पहजाई नाममेगे नो पंथजाई, एगे पंथजाईवि उप्पजाईवि, एगे नो पंथजाई नो उप्पहजाई; एवामेव चत्तारि पुरिसजाया पन्नत्ता तं जहा- पंथजाई नाममेगे नो उप्पहजाई-४ ।

चत्तारि पुप्फा पन्नत्ता तं जहा- रूवसंपण्णे नाममेगे नो गंधसंपण्णे, गंधसंपण्णे नाममेगे नो रूवसंपण्णे, एगे रूवसंपण्णेवि गंधसंपण्णेवि, एगे नो रूवसंपण्णे नो गंधसंपण्णे; एवामेव चत्तारि पुरिसजाया पन्नत्ता तं जहा- रूवसंपण्णे नाममेगे नो सीलसंपण्णे-४ ।

चत्तारि पुरिसजाया पन्नत्ता तं जहा- जातिसंपण्णे नाममेगे नो कुलसंपण्णे, कुलसंपण्णे नाममेगे नो जातिसंपण्णे-४, चत्तारि पुरिसजाया पन्नत्ता तं जहा- जातिसंपण्णे नाममेगे नो बलसंपण्णे बलसंपण्णे नाममेगे नो जातिसंपण्णे-४ ।

एवं जातीते रूवेण-४, चत्तारि आलावगा, एवं जातीते सुएण-४, एवं जातीते सीलेण-४, एवं जातीते चरित्तेण-४, एवं कुलेण बलेण-४, एवं कुलेण रूवेण-४, कुलेण सुतेण-४, कुलेण सीलेण-४, कुलेण चरित्तेण-४ ।

चत्तारि पुरिसजाया प० तं०- बलसंपण्णे नाम एगे नो रूवसंपण्णे-४, एवं बलेण सुतेण-४, एवं बलेण सीलेण-४, एवं बलेण चरित्तेण-४ ।

चत्तारि पुरिसजाया प० तं०- रूवसंपण्णे नाममेगे नो सुयसंपण्णे-४, एवं रूवेण सीलेण-४, रूवेण चरित्तेण-४ । चत्तारि पुरिसजाया प० तं०- सुयसंपण्णे नाममेगे नो सीलसंपण्णे-४, एवं सुत्तेण चरित्तेण-४ । चत्तारि पुरिसजाया प० तं०- सीलसंपण्णे नाममेगे नो चरित्तसंपण्णे-४ । एते एकक्कीसं भंगा भाणित्त्वा ।

चत्तारि फला पन्नत्ता तं जहा- आमलगमहुरे मुद्धियामहुरे खीरमहुरे खंडमहुरे, एवामेव चत्तारि

आयरिया पन्नत्ता तं जहा- आमलगमहुरफलसमाणे जाव खंडमहुरफलसमाणे ।

चत्तारि पुरिसजाया पन्नत्ता तं जहा- आतवेयावच्चकरे नाममेगे नो परवेयावच्चकरे, परवेयावच्चकरे नाममेगे नो आतवेयावच्चकरे, एगे आतवेयावच्चकरेवि परवेयावच्चकरेवि, एगे नो आतवेयावच्चकरे नो परवेयावच्चकरे; चत्तारि पुरिसजाया पन्नत्ता तं जहा- करेति नाममेगे वेयावच्चं नो पडिच्छइ पडिच्छइ नाममेगे वेयावच्चं नो करेति-४;

चत्तारि पुरिसजाया पन्नत्ता तं जहा- अड्डकरे नाममेगे नो माणकरे, माणकरे नाममेगे नो अड्डकरे, एगे अड्डकरेवि माणकरेवि, एगे नो अड्डकरे नो माणकरे; चत्तारि पुरिसजाया पन्नत्ता तं जहा- गणड्डकरे नाममेगे नो माणकरे-४; चत्तारि पुरिसजाया पन्नत्ता तं जहा- गणसंगहकरे नाममेगे नो माणकरे-४; चत्तारि पुरिसजाया पन्नत्ता तं जहा- गणसोभकरे नाममेगे नो माणकरे-४;

चत्तारि पुरिसजाया पन्नत्ता तं जहा- गणसोहिकरे नाममेगे नो माणकरे-४ ।

चत्तारि पुरिसजाया पन्नत्ता तं जहा- रूवं नाममेगे जहति नो धम्मं, धम्मं नाममेगे जहति नो रूवं, एगे रूवंपि जहति धम्मंपि, एगे नो रूवं जहति नो धम्मं; चत्तारि पुरिसजाया पन्नत्ता तं जहा- धम्मं नाममेगे जहति नो गणसंठितिं, गणसंठिति नाममेगे जहति नो धम्मं-४ ।

चत्तारि पुरिसजाया पन्नत्ता तं जहा- पियधम्मं नाममेगे नो दढधम्मं, दढधम्मं नाममेगे नो पियधम्मं, एगे पियधम्मं वि दढधम्मंवि, एगे नो पियधम्मं नो दढधम्मं;

चत्तारि आयरिया पन्नत्ता तं जहा- पच्चावणारिए नाममेगे नो उवट्ठावणारिए, उवट्ठावणारिए नाममेगे नो पच्चावणारिए, एगे पच्चावणारिएवि उवट्ठावणारिएवि, एगे नो पच्चावणारिए नो उवट्ठावणारिए धम्मायारिए, चत्तारि आयरिया पन्नत्ता तं जहा- उद्देसणारिए नाममेगे नो वायणारिए, वायणारिए नाममेगे नो उद्देसणारिए-४ ।

चत्तारि अंतेवासी पन्नत्ता तं जहा- पच्चयणंतेवासी नाममेगे नो उवट्ठाणंतेवासी-४-धम्मंतेवासी, चत्तारि अंतेवासी पन्नत्ता तं जहा- उद्देसणंतेवासी नाममेगे नो वायणंतेवासी-४-धम्मंतेवासी ।

चत्तारि निग्गंथा पन्नत्ता तं जहा- रातिणिए समणं निग्गंथे महाकम्मं महाकिरिए अणायावी असमित्ते धम्मस्स अणाराधं भवति, रातिणिए समणे निग्गंथे अप्पकम्मं अप्पकिरिए आतावी समिं धम्मस्स आराहं भवति, ओमरातिणिए समणे निग्गंथे महाकम्मं महाकिरिए अणातावी असमिते धम्मस्स अणाराहं भवति, ओमरातिणिए समणे निग्गंथे अप्पकम्मं अप्पकिरिए आतावी समिते धम्मस्स आराहं भवति ।

चत्तारि निग्गंथीओ पन्नत्ताओ तं जहा- रातिणिया समणी निग्गंथी महाकम्मा महाकिरिया अणायावी असमिता धम्मस्स अणाराधिया भवति एवं चेव-४ ।

चत्तारि समणोवसगा पन्नत्ता तं जहा- राइणिए समणोवासं महाकम्मं महाकिरिए अमायावी असमिते धम्मस्स अणाराधं भवति तहेव-४ ।

चत्तारि समणोवासियाओ पन्नत्तो तं जहा- राइणिया समणोवासिता महाकम्मा महाकिरिया अणायावी असमिता तहेव चत्तारिगमा ।

[३४३] चत्तारि समणोवासगा पन्नत्ता तं जहा- अम्मापितिसमाणे भातिसमाणे मित्तसमाणे

चत्तारि समणोवासगा प० तं०- अद्वागसमाणे पडागसमाणे खाणुसमाणे खरकंडय-समाणे ।

[३४४] समणस्स णं भवतो महावीरस्स समणोवासगाणं सोधम्मे कप्पे अरुणाभे विमाणे चत्तारि पलिओवमाइं ठिती पन्नत्ता ।

[३४५] चउहिं ठाणेहिं अहुणोववण्णे देवे देवलोगेसु इच्छेज्जा माणुसं लोगं हव्वमागच्छित्तए नो चेव णं संचातेति हव्वमागच्छित्तए, तं जहा- (१) अहुणोववण्णे देवे देवलोगेसु दिव्वेसु कामभोगेसु मुच्छित्ते गिद्धे गढिते अज्झोववण्णे से णं माणुस्सए कामभोगे नो आढाइ नो परियाणाति नो अढं बंधइ नो नियाणं पगरेति नो ठितिपगप्पं पगरेति

(२) अहुणोववण्णे देवे देवलोगेसु दिव्वेसु कामभोगेसु मुच्छित्ते गिद्धे गढिते अज्झोववण्णे तस्स णं माणुस्सए पेमे वोच्छिण्णे दिव्वे संकंते भवति,

(३) अहुणोववण्णे देवे देवलोगेसु दिव्वेसु कामभोगेसु मुच्छित्ते गिद्धे गढिते अज्झोववण्णे तस्स णं एवं भवति-इण्हिं गच्छं मुहुत्तेणं गच्छं तेणं कालेणमप्पाउया मणुस्सा कालधम्मणा संजुत्ता भवन्ति,

(४) अहुणोववण्णे देवे देवलोगेसु दिव्वेसु कामभोगेसु मुच्छित्ते गिद्धे गढिते अज्झोववण्णे तस्स णं माणुस्सए गंधे पडिकूले पडिलोमे यावि भवति उड्ढंपि य णं माणुस्सए गंधे जाव चत्तारि पंच जोयणसताइं हव्वमागच्छति; इच्छेतेहिं चउहिं ठाणेहिं अहुणोववण्णे देवे देवलोएसु इच्छेज्जा माणुसं लोगं हव्वमागच्छित्तए नो चेव णं संचाएति हव्वमागच्छित्तए ।

चउहिं ठाणेहिं अहुणोववण्णे देवे देवलोएसु इच्छेज्ज माणुसं लोगं हव्वमागच्छित्तए संचाएति हव्वमागच्छित्तए तं जहा-

(१)अहुणोववण्णे देवे देवलोगेसु दिव्वेसु कामभोगेसु अमुच्छित्ते अगिद्धे अगढिते अणज्झोववण्णे, तस्स णं एवं भवति- अत्थि खलु मम माणुस्सए भवे आयरिणति वा उवज्झाएति वा पवत्तीति वा थेरेति वा गणीति वा गणधरेति गणावच्छेदेति वा जेसिं पभावेणं मए इमा पतारूवा दिव्वा देविड्ढी दिव्वा देवजुती दिव्वे देवाणुभावे लद्धे पत्ते अभिसमण्णागते, तं गच्छामि णं ते भगवंते वंदामि नमंसामि सक्कारेमि सम्माणेमि कल्लाणं मंगलं देवयं चेइयं पज्जुवासामि,

(२)अहुणोववण्णे देवे देवलोएसु जाव अणज्झोववण्णे तस्स णमेवं भवति- एस णं माणुस्सए भवे नाणीति वा तवस्सीति वा अइदुक्कर-दुक्करकारगे, तं गच्छामि णं ते भगवंते वंदामि जाव पज्जुवासामि, (३)अहुणोववण्णे देवे देवलोएसु जाव अणज्झोववण्णे तस्स णमेव भवति- अत्थि णं मम माणुस्सए भवे माताति वा जाव सुण्हाति वा, तं गच्छामि णं तेसिमंतियं पाउब्भवामि पासंतु ता मे इममेतारूवं दिव्वं देविड्ढिं दिव्वं देवजुत्तिं दिव्वं देवाणुभावं लद्धं पत्तं अभिसमण्णागतं,

(४)अहुणोववण्णे देवे देवलोगेसु जाव अणज्झोववण्णे तस्स णमेवं भवति- अत्थि णं मम माणुस्सए भवे मित्तेति वा सहाति वा जाव सहाएति वा संगइएति वा, तेसिं च णं अम्हे अण्णमण्णस्स संगारे पडिसुते भवति, जो मे पुव्विं चयति से संबोहेतव्वे इच्छेतेहिं जाव संचाएति हव्वमागच्छित्तए ।

[३४६] चउहिं ठाणेहिं लोगंधगारे सिया तं जहा- अरहंतेहिं वोच्छिज्जमाणेहिं, अरहंतपण्णत्ते धम्मे वोच्छिज्जमाणे, पुव्वगते वोच्छिज्जमाणे, जायतेजे वोच्छिज्जमाणे ।

चउहिं ठाणेहिं लोउज्जोते सिया तं जहा- अरहंतेहिं जायमाणेहिं, अरहंतेहिं पव्वयमाणेहिं, अरहंताणं नाणुप्पायमहिमासु, अरहंताणं परिनिव्वाणमहिमासु ।

ठाणं-४, उद्देशो-३

एवं देवंधगारे देवुज्जोते देवसन्निवाते देवुक्कलिताते देवकहकहते चउहिं ठाणेहिं देविंदा माणुस्सं लोगं हव्वमागच्छंति एवं जहा तिठाणे जाव लोगंतिता देवा माणुस्सं लोगं हव्वमागच्छेज्जा, तं० अरहंतेहिं जयमाणेहिं जाव अरहंताणं परिनिव्वाणमहिमासु ।

[३४७] चत्तारि दुहसेज्जाओ पन्नत्ताओ तं जहा- तत्थ खलु इमा पढमा दुहसेज्जा तं० से णं मुंडे भवित्ता अगाराओ अणगारियं पव्वइए निग्गंथे पावयणे संकिते कंखिते वित्तिगिच्छते भेयसमावण्णे कलुससमावण्णे निग्गंथं पावयणं नो सद्वहति नो पत्तियाति नो रोएइ, निग्गंथं पावयणं असद्वहमाणे अपत्तियमाणे अरोएमाणे मणं उच्चावयं नियच्छति विणिघातमावज्जति पढमा दुहसेज्जा,

अहावरा दोच्चा दुहसेज्जा - से णं मुंडे भवित्ता अगाराओ अणगारियं पव्वइए सएणं लाभेणं नो तुस्सति परस्स लाभमासाएति पीहेति पत्थेति अभिलसति परस्स लाभमासाएमाणे जाव अभिलसमाणे मणं उच्चावयं नियच्छइ विणिघातमावज्जति दोच्चा दुहसेज्जा,

अहावरा तच्चा दुहसेज्जा-से णं मुंडे भवित्ता जाव पव्वइए दिव्वे माणुस्सए कामभोगे आसाएइ जाव अभिलसति दिव्वे माणुस्सए कामभोगे आसाएमाणे जाव अभिलसमाणे मणं उच्चावयं नियच्छति विणिघातमावज्जति- तच्चा दुहसेज्जा,

अहावरा चउत्था दुहसेज्जा - से णं मुंडे जाव पव्वइए तस्स णं एवं भवति जया णं अहमगारवासमावसामि तदा णमहं संवाहण-परिमद्वण-गातुब्भंग-गातुच्छोलणाइं लभामि जप्पभिइं च णं अहं मुंडे जाव पव्वइए तप्पभिइं च णं अहं संवाहण जाव गातुच्छोलणाइं नो लभामि, से णं संवाहण जाव गातुच्छोलणाइं आसाएति जाव अभिलसति से णं संवाहण जाव गातुच्छोलणाइं आसाएमाणे जाव मणं उच्चावयं नियच्छति विणिघातमावज्जति, चउत्था दुहसेज्जा ।

चत्तारि सुहसेज्जाओ पन्नत्ताओ तं जहा- तत्थ खलु इमा पढमा सुहसेज्जा- से णं मुंडे भवित्ता अगाराओ अणगारियं पव्वइए निग्गंथे पावयणे निस्संकिते निक्कंखिते निव्वित्तिगिच्छिणं नो भेदसमावण्णे नो कलुससमावण्णे निग्गंथं पावयणं सद्वहइ पत्तियइ रोएति निग्गंथं पावयणं सद्वहमाणे पत्तियमाणे रोएमाणे नो मणं उच्चावयं नियच्छति नो विणिघातमावज्जति पढमा सुहसेज्जा,

अहावरा दोच्चा सुहसेज्जा- से णं मुंडे जाव पव्वइए सएणं लाभेणं तुस्सति परस्स लाभं नो आसाएति नो पीहेति नो पत्थेति नो अभिलसति परस्स लाभमासाएमाणे जाव अणभिलसमाणे नो मणं उच्चावयं नियच्छति नो विणिघातमावज्जति, दोच्चा सुहसेज्जा,

अहावरा तच्चा सुहसेज्जा- से णं मुंडे जाव पव्वइए दिव्वमाणुस्सए कामभोगे नो आसाएति जाव नो अभिलसति दिव्वमाणुस्सए कामभोगे अणासाएमाणे जाव अणभिलसमाणे नो मणं उच्चावयं नियच्छति नो विणिघातमावज्जति, तच्चा सुहसेज्जा,

अहावरा चउत्था सुहसेज्जा- से णं मुंडे जाव पव्वइए तस्स णं एवं भवति- जइ ताव अरहंता भगवंतो हइ अरोगा बलिया कल्लसरीरा अण्णयराइं ओरालाइं कल्लाणाइं विउलाइं पयताइं पग्ग-हिताइं महाणुभागाइं कम्मक्खयकरणाइं तवोक्कमाइं पडिवज्जंति किमंग पुण अहं अब्भोवगमिओवक्कमियं वेयणं नो सम्मं सहामि खमामि तितिक्खेमि अहियासेमि ममं च णं अब्भोवगमिओवक्कमियं वेयणं नो

सम्मं सहामि खमामि तितिक्खेमि अहियासेमि ममं च णं अब्भोवगमिओवक्कमियं वेयणं
सम्ममसहमाणस्स अक्खममाणस्स अतितिक्खमाणस्स अणहियासेमाणस्स किं मण्णे कज्जति? एगंतसोमे
ठाणं-४, उद्देशो-३

पावे कम्मे कज्जति, ममं च णं अब्भोवगमिओ वक्कमियं वेयणं सम्मं सहमाणस्स जाव
अहियासेमाणस्स किं मण्णे कज्जति? एगंतसो मे निज्जरा कज्जति चउत्था सुहसेज्जा

[३४८] चत्तारि अवायणिज्जा प०-अविणीए विगईपडिबद्धे अविओसवितपाहुडे माई ।

चत्तारि वायणिज्जा प०-विणीते अविगतिपडिबद्धे विओसवितपाहुडे अमाई ।

[३४९] चत्तारि पुरिसजाया पन्नत्ता तं जहा- आतंभरे नाममेगे नो परंभरे, परंभरे नाममेगे
नो आतंभरे, एगे आतंभरेवि परंभरेवि, एगे नो आतंभरे नो परंभरे ।

चत्तारि पुरिसजाया पन्नत्ता तं जहा- दुग्गए नाममेगे दुग्गए, दुग्गए नाममेगे सुग्गए,
सुग्गए नाममेगे दुग्गए, सुग्गए नाममेगे सुग्गए ।

चत्तारि पुरिसजाया पन्नत्ता तं जहा- दुग्गए नाममेगे दुव्वए, दुग्गए नाममेगे सुव्वए,
सुग्गए नाममेगे दुव्वए, सुग्गए नाममेगे सुव्वए,

चत्तारि पुरिसजाया पन्नत्ता तं जहा- दुग्गए नाममेगे दुप्पडिताणंदे, दुग्गए नाममेगे
सुप्पडिताणंदे-४ ।

चत्तारि पुरिसजाया पन्नत्ता तं जहा- दुग्गए नाममेगे दुग्गतिगामी, दुग्गए नाममेगे
सुग्गतिगामी-४ ।

चत्तारि पुरिसजाया पन्नत्ता० तं जहा- दुग्गए नाममेगे दुग्गतिं गते, दुग्गए नाममेगे
सुग्गतिं गते-४

चत्तारि पुरिसजाया पन्नत्ता तं जहा- तमे नाममेगे तमे, तमे नाममेगे जोती, जोती
नाममेगे तमे जोती नाममेगे जोती ।

चत्तारि पुरिसजाया प० तं० जहा- तमे नाममेगे तमबले, तमे नाममेगे जोतिबले, जोती
नाममेगे तमबले, जोती नाममेगे जोतिबले,

चत्तारि पुरिसजाया प० तं० जहा- तमे नाममेगे तमबलपलज्जणे, तमे नाममेगे
जोतिबलपलज्जणे-४ ।

चत्तारि पुरिसजाया पन्नत्ता तं जहा- परिण्णातकम्मे नाममेगे नो परिण्णातसण्णे,
परिण्णातसण्णे नाममेगे नो परिण्णातकम्मे, एगं परिण्णातकम्मेवि परिण्णात०-४ ।

चत्तारि पुरिसजाया पन्नत्ता तं जहा- परिण्णातकम्मे नाममेगे नो परिण्णातगिहावासे,
परिण्णातगिहावासे नाममेगे नो परिण्णातकम्मे, एगे परिण्णातकम्मेवि०-४ ।

चत्तारि पुरिसजाया पन्नत्ता तं जहा- परिण्णातसण्णे नाममेगे नो परिण्णातगिहावासे,
परिण्णातगिहावासे नाममेगे नो परिण्णातसण्णे-४ ।

चत्तारि पुरिसजाया पन०तं० जहा-इहत्थे नाममेगे नो परत्थे, परत्थे नाममेगे नो इहत्थे-४ ।

चत्तारि पुरिसजाया पन्नत्ता तं जहा- एगेणं नाममेगे वड्ढति, एगेणं हायति एगेणं, एगेण
नाममेगे वड्ढति, दोहिं हायति दोहिं नाममेगे वड्ढति एगेणं हायति एगे दोहिं नाममेगे वड्ढति दोहिं
हायति ।

चत्तारि पकंथगा पन्नत्ता तं जहा- आइण्णे नाममेगे आइण्णे, आइण्णे नाममेगे खलुंके, खलुंके नाममेगे आइण्णे, खलुंके नाममेगे खलुंके; एवामेव चत्तारि पुरिसजाया पन्नत्ता तं जहा- आइण्णे ठाणं-४, उद्देसो-३

नाममेगे आइण्णे चउभंगो ।

चत्तारि पकंथगा पन्नत्ता तं जहा- आइण्णे नाममेगे आइण्णातए वहति, आइण्णे नाममेगे खलुंकताए वहति,-४, एवामेव चत्तारि पुरिसजाया पन्नत्ता तं जहा- आइण्णे नाममेगे आइण्णाताए वहति चउभंगो ।

चत्तारि पकंथगा पन्नत्ता तं जहा- जातिसंपण्णे नाममेगे नो कुलसंपण्णे, कुलसंपण्णे नाममेगे नो जातिसंपण्णे-४, एवामेव चत्तारि पुरिसजाया पन्नत्ता तं जहा- जातिसंपण्णे नाममेगे नो कुलसंपण्णे० चउभंगो ।

चत्तारि पकंथगा पन्नत्ता तं जहा- जातिसंपण्णे नाममेगे नो बलसंपण्णे-४, एवामेव चत्तारि पुरिसजाया पन्नत्ता तं जहा- जातिसंपण्णे नाममेगे नो बलसंपण्णे-४ ।

चत्तारि पकंथगा पन्नत्ता तं जहा- जातिसंपण्णे नाममेगे नो रुवसंपण्णे-४; एवामेव चत्तारि पुरिसजाया पन्नत्ता तं जहा- जातिसंपण्णे नाममेगे नो रुवसंपण्णे-४ ।

चत्तारि पकंथगा पन्नत्ता तं जहा- जातिसंपण्णे नाममेगे नो जयसंपण्णे-४; एवामेव चत्तारि पुरिसजाया पन्नत्ता तं जहा- जातिसंपण्णे नाममेगे नो जयसंपण्णे-४ ।

एवं कुलसंपण्णेण य बलसंपण्णेण य, कुलसंपण्णेण य रुवसंपण्णेण य, कुलसंपण्णेण य जयसंपण्णेण य, एवं बलसंपण्णेण य रुवसंपण्णेण य, बलसंपण्णेण य जय संपण्णेण य-४- सव्वत्थ पुरिसजाया पडिवक्खो ।

चत्तारि कंथगा य प० तं०- रुवसंपण्णे नाममेगे नो जयसंपण्णे-४; एवामेव चत्तारि पुरिसजाया प० तं०- रुवसंपण्णे नाममेगे नो जयसंपण्णे-४ ।

चत्तारि पुरिसजाया पन्नत्ता तं जहा- सीहत्ताए नाममेगे निक्खंते सीहत्ताए विहरइ, सीहत्ताए नाममेगे निक्खंते सीयालत्ताए विहरइ, सीयालत्ताए नाममेगे निक्खंते सीहत्ताए विहरइ, सीयालत्ताए नाममेगे निक्खंते सीयालत्ताए विहरइ ।

[३५०] चत्तारि लोगे समा पन्नत्ता तं जहा- अपइट्ठाणे नरए, जंबुद्वीवे दीवे, पालए जाणविमाणे, सव्वट्ठसिद्धे महाविमाणे । चत्तारि लोगे समा सपक्खिं सपडिदिसिं पन्नत्ता तं जहा- सीमंतए नरए, समयक्खेत्ते, उडुविमाणे, इसीपब्भरा पुढवी ।

[३५१] उड्ढलोगे णं चत्तारि बिसरीरा पन्नत्ता तं जहा- पुढविकाइया आउकाइया वणस्सइकाइया उराला तसा पाणा, अहोलोगे णं चत्तारि बिसरीरा पन्नत्ता तं जहा- पुढविकाइया० एवं चेव, एवं तिरियलोए वि-४ ।

[३५२] चत्तारि पुरिसजाया प० तं०-हिरिसत्ते हिरिमणसत्ते, चलसत्ते, थिरसत्ते ।

[३५३] चत्तारि सेज्जपडिमाओ पन्नत्ताओ, चत्तारि वत्थपडिमाओ पन्नत्ताओ, चत्तारि पायपडि-माओ पन्नत्ताओ, चत्तारि ठाणपडिमाओ पन्नत्ताओ ।

[३५४] चत्तारि सरीरगा जीवफुडा पन्नत्ता तं जहा- वेउव्विए आहारए तेयए कम्मए, चत्तारि सरीरगा कम्ममुम्मीसगा पन्नत्ता तं जहा- ओरालिए वेउव्विए आहारए तेयए ।

[३५५] चउहिं अत्थिकाएहिं लोगे फुडे पणत्ते तं जहा- धम्मत्थिकाएणं अधम्मत्थिकाएणं जीवत्थिकाएणं पुग्गलत्थिकाएणं; चउहिं बादरकाएहिं उववज्जमाणेहिं लोगे फुडे पणत्ते तं जहा- पुढविका- ठाणं-४, उद्देसो-३

इएहिं, आउकाइएहिं, वाउकाइएहिं, वणस्सकाइएहिं ।

[३५६] चत्तारि पएसग्गेणं तुल्ला पन्नत्ता तं जहा- धम्मत्थिकाए, अधम्मत्थिकाए, लोगागासे, एगजीवे ।

[३५७] चउण्हमेगं सरीरं नो सुपस्सं भवइ तं जहा- पुढविकाइयाणं, आउकाइयाणं, तेउकाइयाणं, वणस्सइकाइयाणं ।

[३५८] चत्तारि इंदियत्था पुट्ठा वेदंति तं जहा- सोइंदियत्थे घाणिंदियत्थे जिब्भिंदियत्थे फासिंदियत्थे ।

[३५९] चउहिं ठाणेहिं जीवा य पोग्गला य नो संचाएंति बहिया लोगंता गमणयाए, तं जहा- गतिअभावेणं, निरुवग्गहयाए, लुक्खताए, लोगाणुभावेणं ।

[३६०] चउव्विहे णाते प० तं०- आहरणे आहारणतद्देसे आहरणतद्देसे उवण्णासोवणए, आहरणे चउव्विहे पणत्ते तं जहा- अवाए उवाए ठवणाकम्मे पडुप्पण्णविणासी; आहारणतद्देसे चउव्विहे पणत्ते तं जहा- अणुसिद्धी उवालंभे पुच्छा निस्सावयणे; आहारणतद्देसे चउव्विहे पणत्ते तं जहा- अधम्मजुत्ते पडिलोभे अत्तोवणीते दुरुवणीते; उवण्णासोवणए चउव्विहे पणत्ते तं जहा- तव्वत्थुते तवण्णत्थुते पडिणिभे हेतू,

हेऊ चउव्विहे पणत्ते तं जहा- जावए थावए वंसए लूसए, अहवा-हेऊ चउव्विहे पणत्ते तं जहा- पच्चकखे अनुमाने ओवम्मे आगमे, अहवा-हेऊ चउव्विहे पणत्ते तं जहा- अत्थितं अत्थि सो हेऊ, अत्थित्तं नत्थि सो हेऊ, नत्थित्तं अत्थि सो हेऊ, नत्थित्तं नत्थि सो हेऊ ।

[३६१] चउव्विहे संखाणे पणत्ते तं जहा- परिकम्मं ववहारे रज्जू रासी ।

अहोलोगे णं चत्तारि अंधगारं करंति तं जहा- नरगा नेरइया पावाइं कम्माइं असुभा पोग्गला, तिरियलोगे णं चत्तारि उज्जोतं करंति तं जहा- चंदा सूरा मणी जोती,

उड्ढलोगे णं चत्तारि उज्जोतं करंति तं जहा- देवा देवीओ विमाणा आभरणा ।

० चउत्थे ठाणे तइओ उद्देसो समत्तो ०

० चउत्थो-उद्देसो ०

[३६२] चत्तारि पसप्पगा पन्नत्ता तं जहा- अणुप्पन्नणं भोगाणं उप्पाएत्ता एगे पसप्पए पुव्वुप्पन्नणं भोगाणं अविप्पओगेणं एगे पसप्पए अणुप्पन्नणं सोक्खाणं उप्पाइत्ता एगे पसप्पए पुव्वुप्पन्नणं सोक्खाणं अविप्पओगेणं एगे पसप्पए ।

[३६३] पोरइयाणं चउव्विहे आहारे पणत्ते तं जहा- इंगालोवमे मुम्मुरोवमे सीतले हिमसीतले ।

तिरिक्खजोणियाणं चउव्विहे आहारे प० तं०- कंकोवमे बिलोवमे नाममंसोवमे पुत्तमंसोवमे

।

मणुस्साणं चउव्विहे आहारे पण्णत्ते तं जहा- असणे पाणे खाइमे साइमे देवाणं चउव्विहे आहारे पण्णत्ते तं जहा- वण्णमंते गंधमंते रसमंते फासमंते ।

[३६४] चत्तारि जातिआसीविसा प० तं०- विच्छुयजातिआसीविसे मंडुक्कजातिआसीविसे उरगजातिआसीविसे मणुस्सजातिआसीविसे ।

ठाणं-४, उद्देशो-४

विच्छुयजातिआसीविसस्स णं भंते! केवइए विसए पण्णत्ते? पभू णं विच्छुयजातिआसीविसे अद्धभरहप्पमाणमेत्तं बौदिं विसेणं विसपरिणयं विसट्टमाणिं करित्तए विसए से विसट्टताए नो चेव णं संपत्तीए करैसु वा करैति वा करिस्संति वा

मंडुक्कजातिआसीविसस्स णं भंते! केवइए विसए पण्णत्ते? पभू णं मंडुक्कजातिवआसीविसे भरहप्पमाणमेत्तं बौदिं विसेणं विसपरिणयं विसट्टमाणिं० सेसं तं चेव- जाव करिस्संति वा

उरगजाति पुच्छा- पभू णं उरगजातिआसीविसे जंबुद्धीवपमाणमेत्तं बौदिं विसेणं० सेसं तं चेव जाव करिस्संति वा,

मणुस्सजाति पुच्छा- पभू णं मणुस्सजातिआसीविसे समयखेत्तपमाणमेत्तं बौदि विसेणं विसपरिणतं विसट्टमाणिं करेत्तए, विसए से विसट्टताए नो चेव णं जाव करिस्संति वा ।

[३६५] चउव्विहे वाही पण्णत्ते तं जहा- वातिए पित्तिए सिंभिए सण्णिवातिए ।

चउव्विहा तिगिच्छा पन्नत्ता तं० विज्जो ओसधाइं आउरे परियारए ।

[३६६] चत्तारि तिगिच्छा पन्नत्ता तं जहा- आततिगिच्छए नाममेगे नो परितिगिच्छए, परितिगिच्छए नाममेगे नो आततिगिच्छए-४ ।

चत्तारि पुरिसजाया पन्नत्ता तं जहा- वणकरे णाममेगे नो वणपरिभासी, वणपरिभासी नाममेगे नो वणकरे, एगे वणकरेवि वणपरिमासीवि, एगे नो वणकरे नो वणपरिभासी;

चत्तारि पुरिसजाया पन्नत्ता तं जहा- वणकरे नाममेगे नो वणसारक्खी-४ ।

चत्तारि पुरिसजाया पन्नत्ता तं जहा- वणकरे नाममेगे नो वणसंरोही-४ ।

चत्तारि वणा पन्नत्ता तं जहा- अंतोसल्ले नाममेगे नो बाहिंसल्ले-४ । चत्तारि पुरिसजाया पन्नत्ता तं जहा- अंतोसल्ले नाममेगे नो बाहिंसल्ले-४ ।

चत्तारि वणा पन्नत्ता तं जहा- अंतोदुट्ठे नाममेगे नो बाहिंदुट्ठे, बाहिंदुट्ठे नाममेगे नो अंतोदुट्ठे-४ । एवामेव चत्तारि पुरिसजाया पन्नत्ता तं जहा- अंतोदुट्ठे नाममेगे नो बाहिंदुट्ठे-४ ।

चत्तारि पुरिसजाया पन्नत्ता तं जहा- सेयंसे नाममेगे सेयंसे, सेयंसे नाममेगे पावंसे, पावंसे नाममेगे सेयंसे, पावंसे नाममेगे पावंसे ।

चत्तारि पुरिसजाया पन्नत्ता तं जहा- सेयंसे नाममेगे सेयंसेत्ति सालिसए, सेयंसे नाममेगे पावंसेत्ति सालिसए-४ ।

चत्तारि पुरिसजाया पन्नत्ता तं जहा- सेयंसे नाममेगे सेयंसेत्ति मण्णति सेयंसे नाममेगे पावंसेत्ति मण्णति-४ । ।

चत्तारि पुरिसजाया पन्नत्ता तं जहा- सेयंसे नाममेगे सेयंसेत्ति सालिसए मण्णत्ति सेयंसे नाममेगे पावंसेत्ति सालिसए मण्णत्ति-४ ।

चत्तारि पुरिसजाया पन्नत्ता तं जहा- आधवइत्ता नाममेगे नो परिभावइत्ता, परिभावइत्ता नाममेगे नो आधवइत्ता-४ ।

चत्तारि पुरिसजाया पन्नत्ता तं जहा- आधवइत्ता नाममेगे नो उंछजीवीसंपण्णे, उंछजीविसंपण्णे नाममेगे नो आधवइत्ता-४ ।

चउव्विहा रूक्खविगुव्वणा पन्नत्ता तं जहा- पवालत्ताए पत्तत्ताए पुप्फत्ताए फलत्ताए ।
ठाणं-४, उद्देसो-४

[३६७] चत्तारि वादिसमोसरणा पन्नत्ता तं जहा- किरियावादी अकिरियावादी अन्नाणियावादी वेणइयावादी ।

नेरइयाणं चत्तारि वादिसमोसरणा पन्नत्ता तं जहा- किरियावादी जाव वेणइयावादी, एवमसुर-कुमाराणवि जाव थणियकुमाराणं एवं- विगल्लिंदियवज्जं जाव वेमाणियाणं ।

[३६८] चत्तारि मेहा पन्नत्ता तं जहा- गज्जित्ता नाममेगे नो वासित्ता, वासित्ता नाममेगे नो गज्जित्ता, एगे गज्जित्तावि वासित्तावि, एगे नो गज्जित्ता नो वासित्ता; एवामेव चत्तारि पुरिसजाया पन्नत्ता तं जहा- गज्जित्ता नाममेगे नो वासित्ता-४ ।

चत्तारि मेहा पन्नत्ता तं जहा- गज्जित्ता नाममेगे नो विज्जुयाइत्ता विज्जुयाइत्ता नाममेगे नो गज्जित्ता-४ । एवामेव चत्तारि पुरिसजाया पन्नत्ता तं जहा- गज्जित्ता नाममेगे नो विज्जुयाइत्ता-४ ।

चत्तारि मेहा पन्नत्ता तं जहा- वासित्ता नाममेगे नो विज्जुयाइत्ता, विज्जुयाइत्ता नाममेगे नो वासित्ता-४ । एवामेव चत्तारि पुरिसजाया पन्नत्ता तं जहा- वासित्ता नाममेगे नो विज्जुयाइत्ता-४ ।

चत्तारि मेहा पन्नत्ता तं जहा- कालवासी नाममेगे नो अकालवासी, अकालवासी नाममेगे नो कालवासी-४ । एवामेव चत्तारि पुरिसजाया पन्नत्ता तं जहा- कालवासी नाममेगे नो अकालवासी-४ ।

चत्तारि मेहा पन्नत्ता तं जहा- खेत्तवासी नाममेगे नो अखेत्तवासी, अखेत्तवासी नाममेगे नो खेत्तवासी-४ । एवामेव चत्तारि पुरिसजाया पन्नत्ता तं जहा- खेत्तवासी नाममेगे नो अखेत्तवासी-४ ।

चत्तारि मेहा पन्नत्ता तं जहा- जणइत्ता नाममेगे नो निम्मवइत्ता, निम्मवइत्ता नाममेगे नो जणइत्ता-४ । एवामेव चत्तारि अम्मपियरो पन्नत्ता तं जहा- जणइत्ता नाममेगे नो निम्मवइत्ता निम्मवइत्ता-४ ।

चत्तारि मेहा पन्नत्ता तं जहा- देसवासी नाममेगे नो सव्ववासी, सव्ववासी नाममेगे नो देसवासी-४ । एवामेव चत्तारि रायाणो पन्नत्ता तं जहा- देसाधिवती नाममेगे नो सव्वाधिवती-४ ।

[३६९] चत्तारि मेहा पन्नत्ता तं जहा- पुक्खलसंवट्ठते पज्जुण्णे जीमूते जिम्हे, पुक्खलसं-
वट्ठए णं महामेहे एगेणं वासेणं दसवाससहस्साइं भावेति पज्जुण्णे णं महामेहे एगेणं वासेणं दसवाससयाइं
भावेति, जीमूते णं महामेहे एगेणं वासेणं दसवासाइं भावेति जिम्हे णं महामेहे बहूहिं वासेहिं एगं वासं
भावेति वा न वा भावेति ।

[३७०] चत्तारि करंडगा पन्नत्ता तं जहा- सोवागकरंडए वेसियाकरंडए गाहावतिकरंडए
रायकरंडए; एवामेव चत्तारि आयरिया पन्नत्ता तं जहा- सोवागकरंडगसमाणे वेसियाकरंडगसमाणे
गाहावतिकरंडगसमामे रायकरंडगसमाणे ।

[३७१] चत्तारि रुक्खा पन्नत्ता तं जहा- साले नाममेगे सालपरियाए साले नाममेगे एरंडपरियाए एरंडे नाममेगे सालपरियाए एरंडे नाममेगे एरंडपरियाए; एवामेव चत्तारि आयरिया पन्नत्ता तं जहा- साले नाममेगे सालपरियाए साले नाममेगे एरंडपरियाए-४ ।

चत्तारि रुक्खा पन्नत्ता तं जहा- साले नाममेगे सालपरिवारे, साले नाममेगे एरंडपरिवारे-४ । एवामेव चत्तारि आयरिया पन्नत्ता तं जहा- साले नाममेगे सालपरिवारे साले नाममेगे एरंडपरिवारे एरंडे-४ ।

[३७२] सालदुममज्झयारे जह साले नाम होइ दुमराया ।

इय सुंदर आयरिए सुंदर सीसे मुणेयव्वे ॥

[३७३] एरंडमज्झयारे जह साले नाम होइ दुमराया ।

ठाणं-४, उद्देशो-४

इय सुंदरआयरिए मंगुलसीसे मुणेयव्वे ॥

[३७४] सालदुममज्झयारे एरंडे नाम होइ दुमराया ।

इय मंगुलआयरिए सुंदरीसीसे मुणेयव्वे ॥

[३७५] एरंडमज्झयारे एरंडे नाम होइ दुमराया ।

इय मंगुलआयरिए मंगुलसीसे मुणेयव्वे ॥

[३७६] चत्तारि मच्छा पन्नत्ता तं जहा- अणुसोयचारी पडिसोयचारी अंतचारी मज्झचारी, एवामेव चत्तारि भिक्खागा पन्नत्ता तं जहा- अणुसोयचारी पडिसोयचारी अंतचारी मज्झचारी ।

चत्तारि गोला पन्नत्ता तं जहा- मधुसिन्धुगोले जउगोले दारुगोले मट्टियागोले एवामेव चत्तारि पुरिसजाया पन्नत्ता तं जहा- मधुसिन्धुगोलसमाणे-४ ।

चत्तारि गोला पन्नत्ता तं जहा- अयगोले तउगोले तंबगोले सीयगोले, एवामेव चत्तारि पुरिसजाया पन्नत्ता तं जहा- अयगोलसमाणे जाव सीयगोलसमाणे ।

चत्तारि गोला पन्नत्ता तं जहा- हिरण्णगोले सुवण्णगोले रयणगोले वयरगोले, एवामेव चत्तारि पुरिसजाया पन्नत्ता तं जहा- हिरण्णगोलसमाणे जाव वयरगोलसमाणे ।

चत्तारि पत्ता पन्नत्ता तं जहा- असिपत्ते करपत्ते खुरपत्ते कलंबचीरियापत्ते एवामेव चत्तारि पुरिसजाया पन्नत्ता तं जहा- असिपत्तसमाणे जाव कलंबचीरियापत्तसमाणे ।

चत्तारि कडा पन्नत्ता तं जहा- सुंबकडे विदलकडे चम्मकडे कंबलकडे, एवामेव चत्तारि पुरिसजाया पन्नत्ता तं जहा- सुंबकडसमाणे जाव कंबलकडसमाणे ।

[३७७] चउव्विहा चउप्पया पन्नत्ता तं जहा- एगखुरा दुखुरा गंडीपदा सणप्फया ।

चउव्विहा पक्खी पन्नत्ता तं जहा- चम्मपक्खी लोमपक्खी समुग्गपक्खी विततपक्खी ।

चउव्विहा खुड्डपाणा पन्नत्ता तं जहा- बेइंदिया तेइंदिया चउरिंदिया संमुच्छिमपंचिंदिय-तिरिक्खजोणिया ।

[३७८] चत्तारि पक्खी पन्नत्ता तं जहा- निवतित्ता नाममेगे नो परिवइत्ता परिवइत्ता नाममेगे नो निवतित्ता एगे निवतित्तावि परिवइत्तावि एगे नो निवतित्ता नो परिवइत्ता; एवामेव चत्तारि भिक्खागा पन्नत्ता तं जहा- निवतित्ता नाममेगे नो परिवइत्ता परिवइत्ता नाममेगे नो निवतित्ता-४ ।

[३७९] चत्तारि पुरिसजाया पन्नत्ता तं जहा- निक्कट्ठे नाममेगे निक्कट्ठे, निक्कट्ठे नाममेगे अनिक्कट्ठे, अनिक्कट्ठे नाममेगे निक्कट्ठे, अनिक्कट्ठे नाममेगे अनिक्कट्ठे ।

चत्तारि पुरिसजाया पन्नत्ता तं जहा- निक्कट्ठे नाममेगे निक्कट्ठप्पा निक्कट्ठे नाममेगे अनिक्कट्ठप्पा अनिक्कट्ठे नाममेगे निक्कट्ठप्पा अनिक्कट्ठे नाममेगे अनिक्कट्ठप्पा ।

चत्तारि पुरिसजाया पन्नत्ता तं जहा- बुहे नाममेगे बुहे बुहे नाममेगे अबुहे अबुहे-४ ।

चत्तारि पुरिसजाया पन्नत्ता तं जहा- बुधे नाममेगे बुधहियए बुधे नाममेगे अबुधहियए अबुधे नाममेगे बुधहियए अबुधे नाममेगे अबुधहियए ।

चत्तारि पुरिसजाया पन्नत्ता तं जहा- आयाणुकंपए नाममेगे नो पराणुकंपए पराणुकंपए नाममेगे नो आयाणुकंपए-४ ।

[३८०] चउच्चिहे संवासे पण्णत्ते तं जहा- दिव्वे आसुरे रक्खसे माणुसे;
ठाणं-४, उद्देसो-४

चउच्चिहे संवासे पण्णत्ते तं जहा- देवे नाममेगे देवीए सद्धिं संवासं गच्छति, देवे नाममेगे असुरीए सद्धिं संवासं गच्छति असुरे नाममेगे देवीए सद्धिं संवासं गच्छति, असुरे नाममेगे असुरीए सद्धिं संवासं गच्छति ।

चउच्चिहे संवासे पण्णत्ते तं जहा- देवे नाममेगे देवीए सद्धिं संवासं गच्छति, देवे नाममेगे रक्खसीए सद्धिं संवासं गच्छति, रक्खसे नाममेगे देवीए सद्धिं संवासं गच्छति, रक्खसे ममेगे रक्खसीए सद्धिं संवासं गच्छति ।

चउच्चिधे संवासे पण्णत्ते तं जहा- देवे नाममेगे देवीए सद्धिं संवासं गच्छति, देवे नाममेगे मणुस्सीए सद्धिं संवासं गच्छति, मणुस्से नाममेगे देवीए सद्धिं संवासं गच्छति, मणुस्से नाममेगे मणुस्सीए सद्धिं संवासं गच्छति ।

चउच्चिधे संवासे पण्णत्ते तं जहा- असुरे नाममेगे असुरीए सद्धिं संवासं गच्छति, असुरे नाममेगे रक्खसीए सद्धिं संवासं गच्छति, रक्खसे नाममेगे असुरीए सद्धिं संवासं गच्छति, रक्खसे नाममेगे रक्खसीए सद्धिं संवासं गच्छति ।

चउच्चिधे संवासे पण्णत्ते तं जहा- असुरे नाममेगे असुरीए सद्धिं संवासं गच्छति, असुरे नाममेगे मणुस्सीए सद्धिं संवासं गच्छति, मणुस्से नाममेगे असुरीए सद्धिं संवासं गच्छति, मणुस्से नाममेगे मणुस्सीए सद्धिं संवासं गच्छति ।

चउच्चिधे संवासे पण्णत्ते तं जहा- रक्खसे नाममेगे रक्खसीए सद्धिं संवासं गच्छति रक्खसे नाममेगे मणुस्सीए सद्धिं संवासं गच्छति, मणुस्से नाममेगे रक्खसीए सद्धिं संवासं गच्छति, मणुस्से नाममेगे मणुस्सीए सद्धिं संवासं गच्छति ।

[३८१] चउच्चिहे अवद्धंसे पण्णत्ते तं जहा- आसुरे आभिओगे संमोहे देविकिब्बिसे चउहिं ठाणेहिं जीवा आसुरत्ताए कम्मं पगरंति तं जहा- कोवसीलताए पाहुडसीलताए संसत्ततवोक्कमेणं निमित्ता-जीवयाए ।

चउहिं ठाणेहिं जीवा आभिओगत्ताए कम्मं पगरंति तं जहा- अत्तुक्कमोसेणं परपरिवाएणं भूति-कम्ममेणं कोउयकरणेणं ।

चउहिं ठाणेहिं जीवा सम्मोहत्ताए कम्मं पगरेंति तं जहा- उम्मग्गदेसणाए मग्गंत-राएणं कामासंपओगेणं भिज्जानियाणकरणेणं ।

चउहिं ठाणेहिं जीवा देवकिब्बिसियत्ताए कम्मं पगरेंति तं जहा- अरहंताणं अवण्णं वदमाणे अरहंतपन्नत्तस्स धम्मस्स अवण्णं वदमाणे आयरियउवज्झायाणमवण्णं वदमाणे चाउवण्णस्स संधस्स अवण्णं वदमाणे ।

[३८२] चउव्विहा पव्वज्जा पन्नत्ता तं जहा- इहलोगपडिबद्धा परलोगपडिबद्धा दुहतोलोग-पडिबद्धा अप्पडिबद्धा; चउव्विहा पव्वज्जा पन्नत्ता तं जहा- पुरओपडिबद्धा मग्गओ पडिबद्धा दुहतोपडिबद्धा अप्पडिबद्धा ।

चउव्विहा पव्वज्जा पन्नत्ता तं जहा- ओवायपव्वज्जा अक्खातपव्वज्जा संगारपव्वज्जा विहगगइपव्वज्जा ।

चउव्विहा पव्वज्जा पन्नत्ता तं जहा- तुयावइत्ता पुयावइत्ता बुआवइत्ता परिपुयावइत्ता
चउव्विहा

ठाणं-४, उद्देशो-४

पव्वज्जा पन्नत्ता तं जहा- नडखइया भडखइया सोहखइया सियालखइया ।

चउव्विहा किसी पन्नत्ता तं जहा- वाविया परिवाविया निंदिता परिनिंदिता एवामेव
चउव्विहा पव्वज्जा पन्नत्ता तं जहा- वाविता परिवाविता निंदिता परिनिंदिता ।

चउव्विहा पव्वज्जा पन्नत्ता तं जहा- धण्णपुंजितसमाणा धण्णविरल्लितसमाणा
धण्णविकिखत्तसमाणा धण्णसंकटितसमाणा ।

[३८३] चत्तारि सन्नाओ प० तं०- आहारसन्ना भयसन्ना मेहुणसन्ना परिग्गहसन्ना ।

चउहिं ठाणेहिं आहारसण्णा समुप्पज्जति तं जहा- ओमकोट्ठाताए, छुहावेयणिज्जस्स
कम्मस्स उदएणं, मतीए, तदट्ठोवओगेणं ।

चउहिं ठाणेहिं भयसन्ना समुप्पज्जति तं जहा- हीणसत्तत्ताए, भयवेयणिज्जस्स कम्मस्स
उदएणं, मतीए, तदट्ठोवगेणं ।

चउहिं ठाणेहिं मेहुणसन्ना समुप्पज्जति तं जहा- चित्तमंससोणिययाए, मोहणिज्जस्स
कम्मस्स उदएणं, मतीए, तदट्ठोवओगेणं ।

चउहिं ठाणेहिं परिग्गहसन्ना समुप्पज्जति तं जहा- अविमुत्तयाए, लोभवेयणिज्जस्स
कम्मस्स उदएणं, मतीए, तदट्ठोवओगेणं ।

[३८४] चउव्विहा कामा प० तं०-सिंगारा कलुणा बीभच्छा रोद्धा; सिंगारा कामा देवाणं,
कलुणा कामा मणुयाणं, बीभच्छा कामा तिरिक्खजोणियाणं, रोद्धा कामा नेरइयाणं ।

[३८५] चत्तारि उदगा प० तं०- उत्ताणे नाममेगे उत्ताणोदए, उत्ताणे नाममेगे गंभीरोदए,
गंभीरे नाममेगे उत्ताणोदए, गंभीरे नाममेगे गंभीरोदए; एवामेव चत्तारि पुरिसजाया पन्नत्ता तं जहा-
उत्ताणे नाममेगे उत्ताणहिदए उत्ताणे नाममेगे गंभीरहिदए गंभीरे नाममेगे उत्तारणहिदए गंभीरे नाममेगे
गंभीरहिदए ।

चत्तारि उदगा पन्नत्ता तं जहा- उत्ताणे नाममेगे उत्ताणोभासी, उत्ताणे नाममेगे गंभीरोभासी, गंभीरे नाममेगे उत्तानोभासी, गंभीरे नाममेगे गंभीरोभासी; एवामेव चत्तारि पुरिसजाया पण्णत्ता तं जहा- उत्ताणे नाममेगे उत्ताणोभासी उत्ताणे नाममेगे गंभीरोभासी-४ ।

चत्तारि उदही पन्नत्ता तं जहा- उत्ताणे नाममेगे उत्तानोदही, उत्ताणे नाममेगे गंभीरोदही-४ । एवामेव चत्तारी पुरिसजाया पन्नत्ता तं जहा- उत्ताणे नाममेगे उत्ताणहियए-४ ।

चत्तारि उदही पन्नत्ता तं जहा-उत्ताणे नाममेगे उत्ताणोभासी, उत्ताणे नाममेगे गंभीरोभासी-४। एवामेव चत्तारि पुरिसजाया पन्नत्ता तं जहा- उत्ताणे नाममेगे उत्ताणोभासी-४ ।

[३८६] चत्तारि तरगा पन्नत्ता तं जहा- समुद्धं तरामीतेगे समुद्धं तरति, समुद्धं तरामीतेगे गोप्पयं तरति गोप्पयं तरामीतेगे-४ ।

चत्तारि तरगा पन्नत्ता तं जहा- समुद्धे तरेत्ता नाममेगे समुद्धे विसीयति, समुद्धं तरेत्ता नाममेगे गोप्पए विसीयति, गोप्पयं तरेत्ता नाममेगे समुद्धे विसीयति-४ ।

[३८७] चत्तारि कुंभा पन्नत्ता तं जहा- पुण्णे नाममेगे पुण्णे, पुण्णे नाममेगे तुच्छे, तुच्छे नाममेगे पुण्णे, तुच्छे नाममेगे तुच्छे, एवामेव चत्तारि पुरिसजाया पन्नत्ता० पुण्णे नाममेगे पुण्णे-४ ।

चत्तारि कुंभा पन्नत्ता तं जहा- पुण्णे नाममेगे पुण्णोभासी, पुण्णे नाममेगे तुच्छोभासी, तुच्छे नाममेगे पुण्णोभासी, तुच्छे नाममेगे तुच्छोभासी; एवामेव चत्तारि पुरिसजाया पन्नत्ता तं जहा- पुण्णे नाम-

ठाणं-४, उद्देसो-४

मेगे पुण्णोभासी-४ ।

चत्तारि कुंभा पन्नत्ता तं जहा- पुण्णे नाममेगे पुण्णरूवे पुण्णे नाममेगे तुच्छरूवे-४ । एवामेव चत्तारि पुरिसजाया पन्नत्ता तं जहा- पुण्णे नाममेगे पुण्णरूवे-४ ।

चत्तारि कुंभा पन्नत्ता तं जहा- पुण्णेवि एगे पियट्ठे, पुण्णेवि एवे अवदत्ते, तुच्छेवि एगे पियट्ठे, तुच्छेवि एगे अवदत्ते; एवामेव चत्तारि पुरिसजाया पन्नत्ता तं जहा- पुण्णेवि एगे पियट्ठे ।

चत्तारि कुंभा पन्नत्ता तं जहा- पुण्णेवि एगे विस्संदति, पुण्णेवि एगे नो विस्संदति, तुच्छेवि एगे विस्संदति, तुच्छेवि एगे नो विस्संदति; एवामेव चत्तारि पुरिसजाया पन्नत्ता तं जहा- पुण्णेवि एगे विस्संदति-४ ।

चत्तारि कुंभा पन्नत्ता तं जहा- भिण्णे जज्जरिए परिस्साई अपरिस्साई; एवामेव चउच्चिहे चरित्ते पण्णत्ते तं जहा- भिण्णे जाव अपरिस्साई ।

चत्तारि कुंभा पन्नत्ता तं जहा- महुकुंभे नाममेगे महुप्पिहाणे, महुकुंभे नाममेगे विसपिहाणे, विसकुंभे नाममेगे महुपिहाणे, विसकुंभे नाममेगे विसपिहाणे; एवामेव चत्तारि पुरिसजाया पन्नत्ता तं जहा- महुकुंभे नाममेगे महुपिहाणे-४ ।

[३८८] हिययमपावमकलुसं जीहाऽवि य मधुरभासिणी निच्चं ।

जम्मि पुरिसम्मि विज्जति से मधुकुंभे मधुपिहाणे ॥

[३८९] हिययमपावमकलुसं जीहाऽवि यं कडुयभासिणी निच्चं ।

जम्मि पुरिसम्मि विज्जति से मधुकुंभे विसपिहाणे ॥

[३९०] जं हिययं कलुसमयं जीहाऽवि य मधुरभासिणी निच्चं ।

जम्मि पुरिसम्मि विज्जति से विसकुंभे मधुपिहाणे ॥

[३९१] जं हिययं कलुसमयं जीहाऽवि य कडुयभासिणी निच्चं ।

जम्मि पुरिसम्मि विज्जति से विसकुंभे विसपिहाणे ॥

[३९२] चउव्विहा उवसग्गा पन्नत्ता तं- दिव्वा माणुसा तिरिक्खजोणिया आयसंचेयणिज्जा, दिव्वा उवसग्गा चउव्विहा पन्नत्ता तं जहा- हासा पाओसा वीमंसा पुढोवेमाता, माणुसा उवसग्गा चउव्विहा पन्नत्ता तं जहा- हासा पाओसा वीमंसा कुसीलपडिसेवणया, तिरिक्खजोणिया उवसग्गा चउव्विहा पन्नत्ता तं जहा- भया पदोसा आहारहेउं अवच्चेलणसारक्खणया, आयसंचेयणिज्जा उवसग्गा चउव्विहा पन्नत्ता तं जहा- घट्टणता पवडणता थंभणता लेसणता ।

[३९३] चउव्विहे कम्मे पणत्ते तं जहा- सुभे नाममेगे सुभे, सुभे नाममेगे असुभे, असुभे नाममेगे सुभे, असुभे नाममेगे असुभे ।

चउव्विहे कम्मे प० तं जहा- सुभे नाममेगे सुभविवागे, सुभे नाममेगे असुभविवागे, असुभे नाममेगे सुभविवागे, असुभे नाममेगे असुभविवागे ।

चउव्विहे कम्मे पणत्ते तं जहा- पगडीकम्मे ठितीकम्मे अणुभावकम्मे पदेसकम्मे ।

[३९४] चउव्विहे संघे प० तं जहा- समणा समणीओ सावगा सावियाओ ।

[३९५] चउव्विहा बुद्धी पन्नत्ता तं जहा- उप्पत्तिया वेणइया कम्मिया परिणामिया ।

चउव्विहा मई पन्नत्ता तं जहा- उग्गहमती ईहामती अवायमती धारणामती; अहवा-
ठाणं-४, उद्देसो-४

चउव्विहा मती पन्नत्ता तं जहा- अरंजरोदगसमाणा वियरोगदसमाणा सरोदगसमाणा सागरोदगसमाणा ।

[३९६] चउव्विहा संसारसमावण्णगा जीवा पन्नत्ता तं जहा- नेरइया तिरिक्खजोणिया मणुस्सा देवा चउव्विहा सव्वजीवा पन्नत्ता तं जहा- मणजोगी वइजोगी कायजोगी अजोगी, अहवा- चउव्विहा सव्वजीवा पन्नत्ता तं जहा- इत्थिवेयगा पुरिसवेयगा नंपुसकवेयगा अवेयगा,

अहवा- चउव्विहा सव्वजीवा पन्नत्ता तं जहा- चक्खुदंसणी अचक्खुदंसणी ओहिंदसणी केवलदंसणी, अहवा- चउव्विहा सव्वजीवा पन्नत्ता तं जहा- संजया असंजया संजया-संजया नोसंजया नोअसंजया ।

[३९७] चत्तारि पुरिसजाया पन्नत्ता तं जहा- मित्ते नाममेगे मित्ते, मित्ते नाममेगे अमित्ते, अमित्ते नाममेगे मित्ते, अमित्ते नाममेगे अमित्ते;

चत्तारि पुरिसजाया पन्नत्ता० मित्ते नाममेगे मित्तरूवे चउभंगो ।

चत्तारि पुरिसजाया पन्नत्ता तं जहा- मुत्ते नाममेगे मुत्ते, मुत्ते नाममेगे अमुत्ते-४ ।

चत्तारि पुरिसजाया पन्नत्ता तं जहा- मुत्ते नाममेगे मुत्तरूवे मुत्ते नाममेगे अमुत्तरूवे-४ ।

।

[३९८] पंचिंदियतिरिक्खजोणिया चउगईया चउआगईया प० तं- पंचिंदियतिरिक्खजोणिए पंचिंदियतिरिक्खजोणिएसु उववज्जमाणे नेरइएहिंतो वा तिरिक्खजोणिएहिंतो वा मणुस्सेहिंतो वा देवेहिंतो वा उववज्जेज्जा, से चेव णं से पंचिंदियतिरिक्खजोणिए पंचिंदियतिरिक्खजोणियत्तं विप्पजहमाणे नेरइयत्ताए वा जाव देवत्ताए वा उवागच्छेज्जा, मणुस्सा चउगईया चउआगईआ, एवं चेवमणुस्सावि ।

[३९९] बेइंदिया णं जीवा असमारभमाणस्स चउव्विहे संजमे कज्जति तं० जिब्भामयातो सोक्खातो अवरोवेत्ता भवति, जिब्भामएणं दुक्खेणं असंजोगेत्ता भवति, फासामयातो सोक्खतो अवरोवेत्ता भवति एवं चेव-४, ।

बेइंदिया णं जीवा समारभमाणस्स चउविधे असंजमे कज्जति तं जहा- जिब्भामयातो सोक्खातो ववरोवेत्ता भवति, जिब्भामएणं दुक्खेणं संजोगेत्ता भवति, फासामयातो सोक्खातो ववरोवेत्ता भवति ।

[४००] सम्मद्धिद्वियाणं नेरइयाणं चत्तारि किरियाओ पन्नत्ताओ तं जहा- आरंभिया पारिग्गहिया मायावत्तिया अपच्चक्खाणकिरिया ।

सम्मद्धिद्वियाणमसुरकुमाराणं चत्तारि किरियाओ पन्नत्ताओ तं जहा एवं चेव, एवं विगल्लिंदियवज्जं जाव वेमाणियाणं ।

[४०१] चउहिं ठाणेहिं संते गुणे नासेज्जा तं जहा- कोहेणं पडिनिवेसेणं अकयणमुयाए मिच्छत्ताभिनिवेसेणं ।

चउहिं ठाणेहिं असंते गुणे दीवेज्जा तं जहा- अब्भावसत्तियं परच्छंदाणुवत्तियं कज्जहेउं कतपडिकतेति वा ।

[४०२] नेरइयाणं चउहिं ठाणेहिं सरीरुप्पत्ती सिया तं जहा- कोहेणं माणेणं मायाए लोभेणं एवं जाव वेमाणियाणं, नेरइयाणं चउट्ठाणनिव्वत्तिते सरीरे पण्णत्ते तं जहा- कोहनिव्वत्तिए माणनिव्वत्तिए मायानिव्वत्तिए लोभनिव्वत्तिए एवं जाव वेमाणियाणं ।

[४०३] चत्तारि धम्मदारा पन्नत्ता तं जहा- खंती मुत्ती अज्जवे मद्दवे ।
ठाणं-४, उद्देसो-४

[४०४] चउहिं ठाणेहिं जीवा नेरइयाउयत्ताए कम्मं पगरंति तं० महारंभताते महापरिग्गहयाए पंचिदियवहेणं कुणिमाहारेणं ।

चउहिं ठाणेहिं जीवा तिरिक्खजोणिय आउयत्ताए कम्मं पगरंति तं जहा- माइल्लताए नियडिल्लताए अलियवणेणं कूडतुलकूडमाणेणं ।

चउहिं ठाणेहिं जीवा मणुस्साउयत्ताए कम्मं पगरंति तं जहा- पगतिभदताए पगतिविणीययाए साणुक्कोसयाए अमच्छरिताए

चउहिं ठाणेहिं जीवा देवाउयत्ता कम्मं पगरंति तं जहा- सरागसंजमेणं संजमासंजमेणं बालतवोकम्मेणं अकामनिज्जराए ।

[४०५] चउव्विहे वज्जे पण्णत्ते तं जहा- तते वितते घणे झुसिरे; चउव्विहे नट्टे पण्णत्ते तं जहा- अंचिए रिभिए आरभडे भसोले चउव्विहे गेए पण्णत्ते तं जहा- उक्खित्तए पत्तए मंदए रोविंदए,

चउव्विहे मल्ले पण्णत्ते तं जहा- गंधिमे वेढिमे पूरिभे संघातिमे; चउव्विहे अलंकारे पण्णत्ते तं जहा- केसालंकारे वत्थालंकारे मल्ललंकारे आभरणालंकारे ।

चउव्विहे अभिणए पण्णत्ते तं जहा- दिट्ठतिए पाडिसुते सामण्णओविणिवाइयं लोगमज्झा- वसिते ।

[४०६] सणंकुमार-माहिंदेसु णं कप्पेसु विमाणा चउवण्णा पन्नत्ता तं जहा- नीला लोहिता हालिद्धा सुक्किल्ला;

महासुक्क-सहस्सारेसु णं कप्पेसु देवाणं भवधारणिज्जा सरीरगा उक्कोसेणं चत्तारि रयणीओ उइढं उच्चत्तेणं पन्नत्ता ।

[४०७] चत्तारि दगगब्भा पन्नत्ता तं जहा- उस्सा महिया सीता उसिणा चत्तारि दगगब्भा पन्नत्ता तं जहा- हेमगा अब्भसंथडा सीतोसिणा पंचरुविया ।

[४०८] माहे उ हेमगा गब्भा फग्गुणे अब्भसंथडा ।

सीतोसिणा उ चित्ते वइसाहे पंचरुविया ॥

[४०९] चत्तारि माणुस्सीगब्भा पन्नत्ता तं जहा- इत्थित्ताए पुरिसत्ताए नपुंसगत्ताते बिंबत्ताए ।

[४१०] अप्पं सुक्कं बहुं ओयं इत्थी तत्थ पजायति ।

अप्पं ओयं बहुं सुक्कं पुरिसो तत्थ जायति ॥

[४११] दोण्हंपि रत्तसुक्काणं तुल्लभावे नपुंसओ ।

इत्थी-ओयसमायोगे बिंबं तत्थ पजायति ॥

[४१२] उप्पायपुव्वस्स णं चत्तारि चलवत्थू पन्नत्ता ।

[४१३] चउव्विहे कव्वे पण्णत्ते तं जहा- गज्जे पज्जे कत्थे गेए

[४१४] नेरइयाणं चत्तारि समुग्घाता पन्नत्ता तं जहा- वेयणासमुग्घाते कसायसमुग्घाते मारणंतियसमुग्घाते वेउव्विसमुग्घाते एवं वाउक्कइयाणवि ।

[४१५] अरहंतो णं अरिद्धनेमिस्स चत्तारि सया चोद्धसपुव्वीणमजिणाणं जिणसंकासाणं सव्वक्खरसण्णिवाईणं जिणो जिणाणं इव अवितथं वागरमाणाणं उक्कोसिया चउद्धस पुव्विसंपया हुत्था ।

[४१६] समणस्स णं भगवओ महावीरस्स चत्तारि सया वादीणं सदेवमणुयासुराएपरिसाए ठाणं-४, उद्देसो-४

अपराजियाणं उक्कोसिता वादिसंपया हुत्था ।

[४१७] हेड्डिल्ला चत्तारि कप्पा अद्धचंदसंठाणसंठिया पन्नत्ता तं जहा- सोहम्मं ईसाणे सणंकुमारे माहिंदे, मज्झिल्ला चत्तारि कप्पा पडिपुण्णचंदसंठाणसंठिया पन्नत्ता तं जहा- बंभलोगे लंतए महा-

सुक्के सहस्सारे, उवरिल्ला चत्तारि कप्पा अद्धचंदसंठाणसंठिया पन्नत्ता तं जहा- आणते पाणते आरणे अच्युते ।

[४१८] चत्तारि समुद्धा पत्तेयरसा प० तं०-लवणोदे वरुणोदे खीरोदे घतोदे ।

[४१९] चत्तारि आवता पन्नत्ता तं जहा- खरावत्ते उण्णतावत्ते गूढावत्ते आमिसावत्ते, एवामेव चत्तारि कसाया पन्नत्ता तं जहा- खरावत्तसमाणे कोहे उण्णतावत्तसमाणे माणे गूढावत्तसमाणा माया आमिसावत्तसमाणे लोभे । खरावत्तसमाणं कोहं अणुपविट्ठे जीवे कालं करेति नेरइएसु उववज्जति उण्णतावत्तसमाणं माणं अणुपविट्ठे जाव नेरइएसु उववज्जति गूढावत्तसमाणं मायं जाव नेरइएसु उववज्जति आमिसावत्तसमाणं लोभमणुपविट्ठे जीवे कालं करेति नेरइएसु उववज्जति ।

[४२०] अनुराहनक्खत्ते चउत्तारे पण्णत्ते, पुव्वासाढा एवं चेव । उत्तरासाढा एवं चेव ।

[४२१] जीवाणं चउद्वाणनिव्वत्तिते पोग्गले पावकम्मत्ताए चिणिंसु वा चिणंति वा चिणिस्संति वा, नेरइयनिव्वत्तिते तिरिक्खजोणियनिव्वत्तिते मणुस्सनिव्वत्तिते देवनिव्वत्तिते एवं-उवचिणिंसु वा उवचिणंति वा उवचिणिस्संति वा, एवं-चिण-उवचिण-बंध-उदीर-वेय तह निज्जरा चेव ।

[४२२] चउपदेसिया खंधा अनंता पन्नत्ता, चउपदेसोगाढा पोग्गला अनंता पन्नत्ता, चउसमयद्वितीया पोग्गला अनंता पन्नत्ता, चउगुणकालगा पोग्गला अनंता, जाव चउगुणलुक्खा पोग्गला अनंता पन्नत्ता ।

◦ चउत्थे ठाणे चउत्थो उद्देसो समत्तो ◦

० चउत्थं ठाणं समत्तं ०

◦ मुनि दीपरत्नसागरेण संशोधितः सम्पादित्तश्च चउत्थं ठाणं समत्तं ◦

[] पंचमं-ठाणं []

० पढमो-उद्देसो ०

[४२३] पंच महव्वया प० तं०- सव्वाओ पाणातिवायाओ वेरमणं, [सव्वाओ मुसावायाओ वेरमणं, सव्वाओ अदिन्नादाणाओ वेरमणं, सव्वाओ मेहुणाओ वेरमणं], सव्वाओ परिग्गहाओ वेरमणं ।

पंचाणुव्वया प० तं०- थूलाओ पाणाइवायाओ वेरमणं, थूलाओ मुसावायाओ वेरमणं, थूलाओ अदिन्नादाणाओ वेरमणं, सदारसंतोसे, इच्छापरिमाणे ।

[४२४] पंच वण्णा पन्नत्ता तं जहा- किण्हा नीला लोहिता हालिद्धा सुक्किल्ला; पंच रसा पन्नत्ता तं जहा- तित्ता कडूया कसाया अंबिला मधुरा,

पंच कामगुणा पन्नत्ता तं जहा- सद्दा रूवा गंधा रसा फासा, पंचहिं ठाणेहिं जीवा सज्जंति तं जहा- सद्देहिं जाव फासेहिं, एवं रज्जंति, मुच्छंति, गिज्झंति, अज्झोववज्जंति ।

पंचहिं ठाणेहिं जीवा विणिघायमावज्जंति तं जहा- सद्देहिं जाव फासेहिं, पंच ठाणा अपरिण्णाता जीवाणं अहिताए असुभाए अखमाए अनिस्सेस्साए अणाणुगामियत्ताए भवंति तं जहा- सद्दा ठाणं-५, उद्देसो-१

जाव फासा, पंच ठाणा सुपरिण्णता जीवाणं हिताए सुभाए जाव आणुगामियत्ताए भवंति, तं जहा- सद्दा जाव फासा, पंच ठाणा अपरिण्णत्ता जीवाणं दुग्गतिगमणाए भवंति तं जहा- सद्दा जाव फासा, पंच ठाणा सुपरिण्णाता जीवाणं सुग्गतिगमणाए भवंति तं० सद्दा जाव फासा ।

[४२५] पंचहिं ठाणेहिं जीवा दोग्गतिं गच्छंति तं जहा- पाणातिवाएणं जाव परिग्गहेणं, पंचहिं ठाणेहिं जीवा सोगंति गच्छंति तं जहा- पाणातिवातवेरमणेणं जाव परिग्गह-वेरमणेणं ।

[४२६] पंच पडिमाओ पन्नत्ताओ तं जहा- भद्दा सुभद्दा महाभद्दा सव्वतोभद्दा भद्दुत्तरपडिमा ।

[४२७] पंच थावरकाया पन्नत्ता तं जहा- इंदे थावरकाए बंधे थावरकाए सिप्पे थावरकाए संमती थावरकाए पायावच्चे ।

थावरकाए पंच थावरकायाधिपती पन्नत्ता तं जहा- इंदे थावरकायाधिपती बंधे थावरकाया-धिपती सिप्पे थावरकायाधिपती सम्मती थावरकायाधिपती पायावच्चे थावरकायाधिपती ।

[४२८] पंचहिं ठाणेहिं ओहिदंसणे समुप्पज्जिउकामेवि तप्पढमयाए खंभाएज्जा तं जहा- अप्पभूतं वा पुढविं पासित्ता तप्पढमयाए खंभाएज्जा कुंथुरासिभूतं वा पुढविं पासित्ता तप्पढमयाए खंभाएज्जा, महतिमहालयं वा महोरगसरीरं पासित्ता तप्पढमयाए खंभाएज्जा देवं वा महिड्ढियं जाव महासोक्खं पासित्ता तप्पढमयाए खंभाएज्जा पुरेसु वा पोराणाइं उरालाइं महतिमहालयाइं महानिहाणाइं पहीणसामियाणइं पहीणसेउयाइं पहीणगुत्तागाराइं उच्छिण्णसामियाइं उच्छिण्णसेउयाइं उच्छिण्णगुत्तागाराइं जाइं इमाइं गामागर-नगर-खेड-कब्बड-मडंब-दोणमुह-पट्टणासम-संबाह-सण्णिवेसेसु सिंघाडग-तिग-चउक्क-चच्चर-चउम्मह-महापह-पहेसु नगर-निद्धमणेसु सुसाण-सुण्णागारा-गिरिकंदर-संति-सेलोवद्वावण-भवण-गिहेसु सण्णिक्खित्ताइ चिट्ठंति ताइं वा पासित्ता तप्पढमयाए खंभाएज्जा, इच्चेतेहिं पंचहिं ठाणेहिं ओहि- दंसणे समुप्पज्जिउकामे तप्पढमयाए खंभाएज्जा ।

पंचहिं ठाणेहिं केवलवरनाणंदसणे समुप्पज्जिउकामे तप्पढमयाए नो खंभाएज्जा तं जहा- अप्पभूतं वा पुढविं पासित्ता तप्पढमयाए नो खंभाएज्जा, सेसं तहेव जाव- भवणगिहेसु सण्णिक्खित्ताइं चिट्ठंति ताइं वा पासित्ता तप्पढमयाए नो खंभाएज्जा; इच्चेतेहिं पंचहिं ठाणेहिं केवलनाणंदसणे समुप्पज्जिउकामे तप्पढमयाए नो खंभाएज्जा ।

[४२९] नेरइयाणं सरीरगा पंचवण्णा पंचरसा पन्नत्ता तं जहा- किण्हा जाव सुक्किल्ला, तित्ता जाव मधुरा; एवं-निरंतरं जाव वेमाणियाणं पंच सरीरगा पन्नत्ता तं जहा- ओरालिए वेउव्विए आहारए तेयए कम्मए ओरालियसरीरे पंच-वण्णे पंचरसे पण्णत्ते तं जहा- किण्हे जाव सुक्किल्ले, तित्ते जाव महुरे एवं जाव कम्मगसरीरे । सव्वेवि णं बादरबोदिधरा कलेवरा पंचवण्णा पंचरसा दुग्धा अट्ठफासा ।

[४३०] पंचहिं ठाणेहिं पुरिम-पच्छिमगाणं जिणाणं दुग्गमं भवति तं जहा- दुआइक्खं दुव्विभज्जं दुपस्सं दुतित्तिक्खं दुरणुचरं । पंचहिं ठाणेहिं मज्झिमगाणं जिणाणं सुग्गमं भवति तं जहा- सुआइक्खं सुविभज्जं सुपस्सं सुतित्तिक्खं सुरणुचरं ।

पंच ठाणाइं समणेणं भगवता महावीरेणं समणाणं निग्गंथाणं निच्चं वण्णिताइं निच्चं कित्तिताइं निच्चं बुइयाइं निच्चं पसत्थाइं निच्चमब्भणुन्नाताइं भवंति तं जहा- खंती मुत्ती अज्जवे मद्दवे लाघवे, पंच ठाणाइं समणेणं भगवता महावीरेणं जाव अब्भणुण्णाताइं भवंति, तं जहा- सच्चे संजमे तवे चियाए बंभचेरवासे,
ठाणं-५, उद्देसो-१

पंच ठाणाइं समणेणं भगवता महावीरेणं समणाणं जाव अब्भणुण्णाताइं भवंति, तं जहा- उक्खित्तचरणं निक्खित्तचरणं अंतचरणं पंतचरणं लूहचरणं,

पंच ठाणाइं समणेणं भगवता जाव अब्भणुण्णाताइं भवंति तं जहा- अण्णातचरणं अण्णइलायचरणं मोणचरणं संसट्ठकप्पिए तज्जातसंसट्ठकप्पिए,

पंच ठाणाइं समणेणं भगवता जाव अब्भणुण्णाताइं भवंति तं जहा- उवणिहिए सुद्धेसणिए संखादत्तिए दिट्ठालाभिए पुट्ठालाभिए ।

पंच ठाणाइं समणेणं भगवता जाव अब्भणुण्णाताइं भवंति तं जहा- आयंबिलिए निव्विइए पुरिमइडिए परिमितपिंडवातिए भिण्णपिंडवातिए,

पंच ठाणाइं समणेणं भगवता जाव अब्भणुण्णाताइं भवंति तं जहा- अरसाहारे विरसाहारे
अंताहारे पंताहारे लूहाहारे,

पंच ठाणाइं समणेणं भगवता जाव अब्भणुण्णाताइं भवंति तं जहा- अरसजीवी विसरजीवी
अंतजीवी पंतजीवी लूहजीवी,

पंच ठाणाइं समणेणं भगवता जाव अब्भणुण्णाताइं भवंति तं जहा- ठाणातिए
उक्कुडुआसणिए पडिमट्टाई वीरासणिए नेसज्जिए,

पंच ठाणाइं समणेणं भगवता जाव अब्भणुण्णाताइं भवंति तं जहा- दंडायतिए लगंडसाई
आतावए अवाउडए अकूंडयए ।

[४३१] पंचहिं ठाणेहिं समणे निग्गंथे महानिज्जरे महापज्जवसाणे भवति, तं जहा अगिलाए
आयरियवेयावच्चं करेमाणे, अगिलाए उवज्झायवेयावच्चं करेमाणे, अगिलाए थेरवेयावच्चं करेमाणे,
अगिलाए तवस्सिवेयावच्चं करेमाणे, अगिलाए गिलाणवेयावच्चं करेमाणे,

पंचहिं ठाणेहिं समणे निग्गंथे महानिज्जरे महापज्जवसाणे भवंति तं जहा- अगिलाए
सेहवेयावच्चं करेमाणे, अगिलाए कुलवेयावच्चं करेमाणे, अगिलाए गणवेयावच्चं करेमाणे, अगिलाए
संघवेयावच्चं करेमाणे, अगिलाए साहम्मियवेयावच्चं करेमाणे ।

[४३२] पंचहिं ठाणेहिं समणे निग्गंथे साहम्मियं संभोइयं विसंभोइयं करेमाणे नातिक्कमति,
तं जहा- सकिरियट्ठाणं पडिसेवित्ता भवति, पडिसेवित्ता नो आलोएइ, आलोइत्ता नो पट्टवेति, पट्टवेत्ता नो
निव्विसति, जाइं इमाइं थेराणं ठितिपकप्पाइं भवंति ताइं अतियंचिय-अतियंचिय पडिसेवेति से हंदसंहं
पडिसेवामि किं मं थेरा करेस्संति ?

पंचहिं ठाणेहिं समणे निग्गंथे साहम्मियं पारंचित्तं करेमाणे नातिक्कमति, तं जहा- कुले
वसति कुलस्स भेदाए अब्भुट्ठित्ता भवति, गणे वसति गणस्स भेदाए अब्भुट्ठित्ता भवति, हिंसप्पेहि,
छिद्वप्पेही, अभिक्खणं अभिक्खणं पसिणायतणाइं पउंजित्ता भवति ।

[४३३] आयरियउवज्झायस्स णं गणंसि पंचा वुग्गहट्ठाणा प० तं० - आयरियउवज्झाए णं
गणंसि आणं वा धारणं वा नो सम्मं पउंजित्ता भवति, आयरियउवज्झाए णं गणंसि आधारतिणियाए
कितिकम्मं नो सम्मं पउंजित्ता भवति, आयरियउवज्झाए णं गणंसि से सुत्तपज्जवजाते धारेति ते काले-
काले नो सम्ममणुप्पवाइत्ता भवति, आयरियउवज्झाए णं गणंसि गिलाणसेहवेयावच्चं नो सम्ममब्भुट्ठित्ता
भवति, आयरियउवज्झाए णं गणंसि अणापुच्छियचारी यावि हवइ नो आपुच्छियचारी ।

ठाणं-५, उट्ठेसो-१

आयरियउवज्झायस्स णं गणंसि पंचावुग्गहट्ठाणा पन्नत्ता तं जहा- आयरियउवज्झाए णं
गणंसि आणं वा धारणं वा सम्मं पउंजित्ता भवति, एवं आधारतिणिताए सम्मं किइकम्मं पउंजित्ता
भवति आयरियउवज्झाए णं गणंसि से सुत्तपज्जवजाते धारेति ते काले-काले सम्मं अणुपवाइत्ता भवति
आयरियउवज्झाए गणंसि गिलाणसेहवेयावच्चं सम्मं अब्भुट्ठित्ता भवति, आयरियउवज्झाए गणंसि
आपुच्छियचारी यावि भवति नो अणापुच्छियचारी ।

[४३४] पंच निसिज्जाओ प० उक्कुडुया गोदोहिया समपायपुत्ता पलियंका अद्धपलियंका ।

पंच अज्जवट्ठाणा प० तं०- साधुअज्जवं साधुमद्वं साधुलाघवं साधुखंति साधुमुत्ती ।

[४३५] पंचविहा जोइसिया पण्णत्ता तं जहा- चंदा सूरा गहा नक्खत्ता ताराओ ।

पंचविहा देवा प० तं० भवियदव्वदेवा नरदेवा धम्मदेवा देवातिदेवा भावदेवा ।

[४३६] पंचविहा परियारणा पन्नत्ता तं जहा- कायपरियारणा फासपरियारणा रूपपरियारणा सद्दपरियारणा मणपरियाणा ।

[४३७] चमरस्स णं असुरिंदस्स असुरकुमाररण्णो पंच अग्गमहिंसीओ पन्नत्ताओ तं जहा- काली राती रयणी विज्जू मेहा ।

बलिस्स णं वइरोयणिंदस्स वइरोयणरण्णो पंच अग्गमहिंसीओ पन्नत्ताओ तं जहा- सुंभा निसुंभा रंभा निरंभा मदना ।

[४३८] चमरस्स णं असुरिंदस्स असुरकुमाररण्णो पंच संगामिया अनिया पंच संगामिया अनियाधिवती पन्नत्ता तं जहा- पायत्ताणिए पीढाणिए कुंजराणिए महिसाणिए रहाणिए, दुमे पायत्तानियाधिवती सोदामे आसराया पीढणियाधिवती कूथू हत्थिराया कुंजराणियाधिवती लोहितक्खे महिसाणियाधिवती किण्णरे रधाणियाधिवती ।

बलिस्स णं वइरोणिंदस्स वइरोयणरण्णो पंच संगामियाणिया पंच संगामियाणियाधिवती पन्नत्ता तं जहा- पायत्ताणिए जाव रधाणिए, महद्दुमे पायत्ताणियाधिवती महासोदामे आसराया पीढाणियाधिवती मालंकारे हत्थिराया कुंजराणियाधिपती महालोहिअक्खे महिसाणि याधिपती कुंपुरिसे रधाणियाधिपती ।

धरणस्स णं नागकुमारिंदस्स नागकुमाररण्णो पंच संगामिया अनिया पंच संगामिया- मियाधिपती पन्नत्ता तं जहा- पायत्ताणिया जाव रहाणिए ।

भद्दसेणे पायत्ताणियाधिपती जसोधरे आसराया पीढाणियाधिपती सुदंसणे हत्थिराया कुंजराणियाधिपती नीलकंठे महिसाणियाधिपती आनंदे रहाणियाहिवई ।

भूयाणंदस्स णं नागकुमारिंदस्स नागकुमाररण्णो पंच संगामियाणिया पंच संगामियाणिया- हिवई पन्नत्ता तं जहा- पायत्ताणिए जाव रहाणिए दक्खे पायत्ताणियाहिवई सुग्गीवे आसराया पीढाणियाहि-वई सुवक्कमे हत्थिराया कुंजराणियाहिवई सेयकंठे महिसाणियाहिवई नंदुत्तरे रहामियाहिवई ।

वेणुदेवस्स णं सुवण्णिंदस्स सुवण्णकुमाररण्णो पंच संगामियाणिया पंच संगामियाणि- याधिपती पन्नत्ता तं जहा- पायत्ताणिए एवं जधा धरणस्स तथा वेणुदेवस्सवि वेणुदालियस्स जहा भूताणंदस्स,

जधा धरणस्स तथा सव्वेसिं दाहिणिल्लाणं जाव घोसस्स जधा भूताणंदस्स तथा सव्वेसिं ठाणं-५, उद्देशो-१

उत्तरिल्लाणं जाव महाघोसस्स ।

सक्कस्स णं देविंदस्स देवरण्णो पंच संगामिया अणिया पंच संगामियाणियाधिवती पन्नत्ता तं जहा- पायत्ताणिए उसभाणिए, हरिणेगमेसी पायत्ताणियाधिवती वाऊ आसराया पीढाणियाधिवती एरावणे हत्थिराया कुंजराणियाधिपती दामड्डी उसभाणियाधिपती माढरे रधाणियाधिपती ।

ईसाणस्स णं देविंदस्स देवरण्णो पंच संगामिया अणिया जाव पायत्ताणिए पीढाणिए कुंजराणिए उसभाणिए रधाणिए, लहुपरक्कमे पायत्ताणियाधिवती महावाऊ आसराया पीढाणियाधिवती पुप्फदंते हत्थिराया कुंजराणियाधिवती महामाढरे रधाणियाधिवती जधा

सक्कस्स तहा सव्वेसिं दाहिणिल्लाणं जाव आरणस्स जथा ईसाणस्स तहा सव्वेसिं उत्तरिल्लाणं जाव अच्चुतस्स ।

[४३९] सक्कस्स णं देविंदस्स देवरण्णो अब्भंतरपरिसाए देवाणं पंच पत्तिओवमाइं ठिती पन्नत्ता ईसाणस्स णं देविंदस्स देवरण्णो अब्भंतरपरिसाए देवीणं पंच पत्तिओवमाइं ठिती पन्नत्ता ।

[४४०] पंचविहा पडिहा पन्नत्ता तं जहा- गतिपडिहा ठितिपडिहा बंधणपडिहा भोगपडिहा बल-वीरिय-पुरिसयार-परक्कमपडिहा ।

[४४१] पंचविधे अजीवे प० तं० जातिआजीवे कुलाजीवे कम्माजीवे सिप्पाजीवे लिंगाजीवे ।

[४४२] पंच रायककुधा प०तं०- खग्गं छत्तं उप्फेसं पाणहाओ वालवीअणी ।

[४४३] पंचहिं ठाणेहिं छउमत्थे णं उदिण्णे परिस्सहोवसग्गे सम्मं सहेज्जा खमेज्जा तितिक्खेज्जा अहियासेज्जा, तं जहा-

(१) उदिण्णकम्मे खलु अयं पुरिसे उम्मत्तगभूते, तेण मे एस पुरिसे अक्कोसति वा अवहसति वा निच्छोडेति वा निब्भंछेति वा बंधेति वा रूभति वा छविच्छेदं करेति वा पमारं वा नेति उद्वेइ वा वत्थं वा पडिग्गहं वा कंबलं वा पायपुंछणमच्छिंदति वा विच्छिंदति वा भिंदति वा अवहरति वा,

(२) जक्खाइठ्ठे खलु अयं पुरिसे तेण मे एस पुरिसे अक्कोसति वा तहेव जाव अवहरति वा,

(३) ममं च णं तब्भव-वेयणिज्जे कम्मे उतिण्णे भवति, तेण मे एस पुरिसे अक्कोसति वा जाव अवहरति वा,

(४) ममं च णं सम्ममसहमाणस्स अखममाणस्स अतितिक्खमाणस्स अणधियासमाणस्स किं मण्णे कज्जति? एगंतसो मे पावे कम्मे कज्जति,

(५) ममं च णं सम्मं सहमाणस्स जाव अहियासेमाणस्स किं मण्णे कज्जति? एगंतसो मे निज्जरा कज्जति, इच्चेतेहिं पंचहिं ठाणेहिं छउमत्थे उदिण्णे परिसहोवसग्गे सम्मं सहेज्जा जाव अहियासेज्जा ।

पंचहिं ठाणेहिं केवली उदिण्णे परिसहोवसग्गे सम्मं सहेज्जा जाव तहेव जाव अवहरति वा, अहियासेज्जा, तं जहा-

(१) खित्तचित्ते खलु अयं पुरिसे तेण मे एस पुरिसे अक्कोसति वा

(२) दित्तचित्ते खलु अयं पुरिसे तेण मे एस पुरिसे जाव अवहरति वा ।

(३) जक्खाइठ्ठे खलु अयं पुरिसे तेण मे एस पुरिसे जाव अवहरति वा ।

ठाणं-५, उद्देशो-१

(४) ममं च णं तब्भववेयणिज्जे कम्मे उदिण्णे भवति तेण मे एस पुरिसे जाव अवहरति वा ।

(५) ममं च णं सम्मं सहमाणं खममाणं तितिक्खमाणं अहियासेमाणं पासेत्ता बहवे अन्ने छउमत्था समणा निग्गंथा उदिण्णे-उदिण्णे परिसहोव-सग्गे एवं सम्मं सहिस्संति जाव अहियासिस्संति, इच्चेतेहिं पंचहिं ठाणेहिं केवली उदिण्णे परिसहोवसग्गे सम्मं सहेज्जा जाव अहियासेज्जा ।

[४४४] पंच हेऊ पन्नत्ता तं जहा- हेउं न जाणति, हेउं न पासति, हेउं न बुज्झति, हेउं नाभिगच्छति, हेउं अन्नाणमरणं मरति।

पंच हेऊ पन्नत्ता तं जहा- हेउणा न जाणति जाव हेउणा अन्नाणमरणं मरति।

पंच हेऊ पन्नत्ता तं जहा- हेउं जाणइ जाव हेउं छउमत्थमरणं मरति।
 पंच हेऊ पन्नत्ता तं जहा- हेउणा जाणइ जाव हेउणा छउमत्थमरणं मरइ ।
 पंच अहेऊ पन्नत्ता तं जहा- अहेउं न जाणति जाव अहेउं छउमत्थमरणं मरति।
 पंच अहेऊ पन्नत्ता तं जहा- अहेउणा न जाणति जाव अहेउणा छउमत्थमरणं मरति।
 पंच अहेऊ पन्नत्ता तं जहा- अहेउं जाणति जाव अहेउं केवलिमरणं मरति।
 पंच अहेऊ पन्नत्ता तं जहा- अहेउणा जाणति जाव अहेउणा केवलिमरणं मरति ।
 केवलिस्स णं पंच अनुत्तरा पन्नत्ता तं जहा- अनुत्तरे नाणे अनुत्तरे दंसणे अनुत्तरे
 चरित्ते अनुत्तरे वीरिए ।

[४४५] पउमप्पहे णं अरहा पंचचित्ते हुत्था, तं जहा- चित्ताहिं चुत्ते चइत्ता गब्भं वक्कंते
 चित्ताहिं जाते चित्ताहिं मुंडे भवित्ता अगाराओ अणगारितं पव्वइए चित्ताहिं अनंते अनुत्तरे निव्वाघाए
 निरावरणे कसिणे पडिपुण्णे केवलवरणाणदंसणे समुप्पण्णे चित्ताहिं परिणिव्वुते,
 पुप्फदंतं णं अरहा पंचमूले हुत्था तं जहा- मूलेणं चुते चइत्ता गब्भं वक्कंते ।

[४४६] पउमप्पभस्स चित्ता मूले पुण होइ पुप्फदंतस्स ।

पुव्वाइं आसाढा सीयलस्सुत्तर विमलस्स भद्वता ॥

[४४७] रेवतिति अनंतजिणो पूसो धम्मस्स संतिणो भरणी ।

कुंथुस्स कत्तियाओ अरस्स तह रेवतीतो य ॥

[४४८] मुनिसुव्वयस्स सवणो आसिणि नमिणो य नेमिणो चित्ता।

पासस्स विसाहाओ पंच य हत्थुत्तरे वीरो ॥

[४४९] समणे भगवं महावीरे पंचहत्थुत्तरे होत्था तं जहा- हत्थुत्तराहिं चुते चइत्ता गब्भं
 वक्कंते हत्थुत्तराहिं गब्भाओ गब्भं साहरिते हत्थुत्तराहिं जाते हत्थुत्तराहिं मुंडे भवित्ता अगाराओ
 अणगारितं पव्वइए हत्थुत्तराहिं अनंते अनुत्तरे निव्वाघाए निरावरणे कसिणे पडिपुण्णे केवलवरणाणदंसणे
 समुप्पण्णे ।

◦ पंचमे ठाणे पढमो उद्देसो समत्तो ◦

० बीओ-उद्देसो ०

[४५०] नो कप्पइ निग्गंथाणं वा निग्गंथीण वा इमाओ उद्धिद्धाओ गणियाओ वियं जियाओ
 पंच महण्णवाओ महानदीओ अंतो मासस्स दुक्खुत्तो वा तिक्खुत्तो वा उत्तरित्तए वा संतरित्तए वा तं-
 गंगा

ठाणं-५, उद्देसो-२

जउणा सरऊ एरावती मही ।

पंचहिं ठाणेहिं कप्पति तं जहा- भयंसि वा दुब्भिक्खंसि वा पव्वहेज्ज वा णं कोई दओघंसि
 वा एज्जमाणंसि महता वा अणारिएसु ।

[४५१] नो कप्पइ निग्गंथाण वा निग्गंथीण वा पढमपाउसंसि गामाणुगामं दूइज्जित्तए,
 पंचहिं ठाणेहिं कप्पइ तं जहा- भयंसि वा दुब्भिक्खंसि वा जाव महता वा अणारिएहिं ।

वासावासं पज्जोसविताणं नो कप्पइ निग्गंथाण वा निग्गंथीणं वा गामाणुगामं दूइज्जित्तए, पंचहिं ठाणेहिं कप्पइ तं जहा- नाणद्वयाए दंसणद्वयाए चरित्तद्वयाए आयरिय-उवज्झाया वा से वीसुंभेज्जा आयरिय-उवज्झायाण वा बहिता वेआवच्चं करणयाए ।

[४५२] पंच अणुग्घातिया पन्नत्ता तं जहा- हत्थकम्मं करेमाणे मेहुणं पडिसेवेमाणे रातीभोयणं भुंजेमाणे सागारियपिंडं भुंजेमाणे रायपिंडं भुंजेमाणे ।

[४५३] पंचहिं ठाणेहिं समणे निग्गंथे रायंतेउरमणुपविसमाणे नाइक्कमति, तं जहा- नगरे सिया सव्वतो समंता गुत्ते गुत्तदुवारे बहवे समणमाहणा नो संचाएंति भत्ताए वा पाणाए वा निक्खमित्तए वा पविसित्तए वा तेसिं विण्णवणद्वयाए रायंतेउरमणुपविसेज्जा, पाडिहारियं वा पीढ-फल-ग-सेज्जा-संधारग पच्चप्पिणमाणे रायंतेउरमणुपविसेज्जा, हयस्स वा गयस्स वा दुद्धस्स आगच्छमाणस्स भीते रायंतेउर-मणुपविसेज्जा, परो व णं सहसा वा बलसा वा वाहाए गहाय रायंतेउरमणुपवेसेज्जा, बहिता व णं आरा-मगयं वा उज्जाणगयं वा रायंतेउरजणो सव्वतो समंता संपरिक्खिवित्ता णं सण्णिवेसिज्जा । इच्चेतेहिं पंचहिं ठाणेहिं समणे निग्गंथे रायंतेउरमणुपविसमाणे नातिक्कमइ ।

[४५४] पंचहिं ठाणेहिं इत्थी पुरिसेण सद्धिं असंवसमाणीवि गब्भं धरेज्जा तं जहा- इत्थी दुव्वियडा दुण्णिसण्णा सुक्कपोग्गले अधिद्विज्जा, सुक्कपोग्गलसंसिद्धे व से वत्थे अंतो जोणीए अणुपवेसेज्जा, सइं वा से सुक्कपोग्गले अणुपवेसेज्जा, परो व से सुक्कपोग्गले अणुपवेसेज्जा, सीओदगवियडेणं वा से आयममाणीए सुक्कपोग्गला अणुपवेसेज्जा इच्चेतेहिं पंचहिं ठाणेहिं धरेज्जा ।

पंचहिं ठाणेहिं इत्थी पुरिसेणं सद्धिं संवसमाणीवि गब्भं नो धरेज्जा, तं जहा- अप्पत्त-जोव्वणा अतिकंतजोव्वणा जातिवंझा गेलण्णपुट्ठा दोमणंसिया, इच्चेतेहिं पंचहिं ठाणेहिं जाव नो धरेज्जा ।

पंचहिं ठाणेहिं इत्थी पुरिसेणं सद्धिं संवसमाणीवि नो गब्भं धरेज्जा, तं जहा- निच्चोउया अणोउया वावण्णसोया वाविद्धसोया अणंगपडिसेवणी, इच्चेतेहिं पंचहिं ठाणेहिं पुरिसेण सद्धिं संवसमाणीवि गब्भं नो धरेज्जा ।

पंचहिं ठाणेहिं इत्थी पुरिसेणं सद्धिं संवसमाणीवि गब्भं नो धरेज्जा तं जहा उउंमि नो निगामपडिसेविणी यावि भवति, समागता वा से सुक्कपोग्गला पडिविद्धंसंति, उदिण्णे वा से पित्तसोणिते, पुरा वा देवकम्मणा, पुत्तफले वा नो निव्विद्धे भवति, इच्चेतेहिं पंचहिं जाव नो धरेज्जा ।

[४५५] पंचहिं ठाणेहिं निग्गंथा निग्गंथीओ य एगतओ ठाणं वा सेज्जं वा निसीहियं वा चेतेमाणा नातिक्कमंति, तं जहा- अत्थेगइया निग्गंथा य निग्गंथीओ य एगं महं अगामियं छिण्णावायं दीहमद्वपडिविमणुपविट्ठा तत्थेगयतो ठाणं वा सेज्जं वा निग्गंथीओ वा चेतेमाणा नातिक्कमंति, अत्थेगइया निग्गंथा य निग्गंथीओ य गामंसि वा नगरंसि वा जाव रायहाणिंसि वा वासं उवागता एगतिया ठाणं-५, उद्देसो-२

जत्थ उवस्सयं लभंति एगतिया नो लभंति तत्थेगतो ठाणं वा जाव नातिक्कमंति, अत्थेगइया निग्गंथा य निग्गंथीओ य नागकुमारवासंसि वा० वासं उवागता तत्थेगओ जाव नातिक्कमंति आमोसगा दीसंति ते इच्छंति निग्गंथीओ चीवरपडियाए पडिगाहित्तए तत्थेगओ ठाणं वा जाव नातिक्कमंति, जुवाणा दीसंति ते इच्छंति निग्गंथीओ मेहुणपडियाए पडिगाहित्तए तत्थेगओ ठाणं वा जाव नातिक्कमंति, इच्चेतेहिं पंचहिं ठाणेहिं जाव नातिक्कमंति ।

पंचहिं ठाणेहिं समणे निग्गंथे अचेलए सचेलियाहिं निग्गंथीहिं सद्धिं संवसमाणे नातिक्कमति, तं जहा- खित्तचित्ते समणे निग्गंथे निग्गंथेहिमविज्जमाणेहिं अचेलए सचेलियाहिं निग्गंथीहिं सद्धिं संवसमाणे नातिक्कमति एवं एतेणं गमएणं जक्खाइड्डे, उम्मापयत्ते, निग्गंथीपच्चाइयए समणे निग्गंथेहिं अविज्जमाणेहिं अचेलए सचेलियाहिं निग्गंथीहिं सद्धिं संवसमाणे नातिक्कमति ।

[४५६] पंच आसवदारा पन्नत्ता तं जहा- मिच्छत्तं अविरती पमादो कसाया जोगा ।

पंच संवरदारा पन्नत्ता तं जहा- समत्तं विरती अपमादो अकसाइत्तं अजोगित्तं ।

पंच दंडा पणत्ता तं जहा- अट्ठादंडे अणट्ठादंडे हिंसादंडे अकस्मादंडे दिट्ठीविप्परियासियादंडे ।

[४५७] मिच्छादिट्ठियाणं पंच किरियाओ पन्नत्ताओ तं जहा- आरंभिया पारिग्गहिया माया- वत्तिया अपच्चक्खाणकिरिया मिच्छादंसणवत्तिया,

मिच्छादिट्ठियाणं नेरइयाणं पंच किरियाओ पन्नत्ताओ तं जहा- आरंभिया जाव मिच्छा- दंसणवत्तिया, एवं सव्वेसिं निरंतरं जाव मिच्छदिट्ठियाणं वेमाणियाणं नवरं विगल्लिंदिया मिच्छदिट्ठी न भण्णंति, सेसं तहेव ।

पंच किरियाओ पन्नत्ताओ तं जहा- काइया आहिगरणिया पाओसिया पारितावणिया पाणातिवातकिरिया, नेरइयाणं पंच एवं चेव एवं निरंतरं जाव वेमाणियाणं ।

पंच किरियाओ पन्नत्ताओ तं जहा- आरंभिया जाव मिच्छादंसणवत्तिया, नेरइयाणं पंच किरिया निरंतरं जाव वेमाणियाणं ।

पंच किरियाओ पन्नत्ताओ तं जहा- दिट्ठिया पुट्ठिया पाडुच्चिया सामंतोवणिवाइया साहत्थिया, एवं नेरइयाणं जाव वेमाणियाणं ।

पंच किरियाओ पन्नत्ताओ तं जहा- नेसत्थिया आणवणिया वेयारणिया अणाभोगवत्तिया अणवकंखवत्तिया, एवं जाव वेमाणियाणं ।

पंच किरियाओ पणत्तओ तं जहा- पेज्जवत्तिया दोसवत्तिया पओगकिरिया समुदाणकिरिया ईरियावहिया, एवं-मणुस्साणवि सेसाणं नत्थिं ।

[४५८] पंचविहा परिण्णा पन्नत्ता तं जहा- उवहिपरिण्णा उदस्सयपरिण्णा कसायपरिण्णा, जोगपरिण्णा भत्तपाणपरिण्णा ।

[४५९] पंचविहे ववहारे पणत्ते तं जहा- आगमे सुत्ते आणा धारणा जीते, जहा से तत्थ आगमे सिया आगमेणं ववहारं पट्टवेज्जा नो से तत्थ आगमे सिया जहा से तत्थ सुते सिया सुतेणं ववहारं पट्टवेज्जा नो से तत्थ सुते सिया एवं जाव जहा से तत्थ जीते सिया जीतेणं ववहारं पट्टवेज्जा, इच्चेतेहिं पंचहिं ववहारं पट्टवेज्जा-आगमेणं जाव जीतेणं, जथा-जथा से तत्थ आगमे जाव जीते तथातथा

ठाणं-५, उद्देसो-२

ववहारं पट्टवेज्जा ।

से किमाहु भंते! आगम-बलिया समणा निग्गंथा ? इच्चेतं पंचविधं ववहारं जया-जया जहिं- जहिं तया-तया तहिं-तहिं अनिस्सितोवस्सितं सम्मं ववहरमाणे समणे निग्गंथे आणाए आराधए भवति ।

[४६०] संजयमणुस्साणं सुत्ताणं पंच जागरा पन्नत्ता तं जहा- सद्धा जाव फासा, संजत- मणुस्साणं जागराणं पंच सुत्ता पन्नत्ता तं जहा- सद्धा जाव फासा ।

असंजय मणुस्साणं सुत्ताणं वा जागराणं वा पंच जागरा पन्नत्ता तं जहा सद्वा जाव फासा

।

[४६१] पंचहिं ठाणेहिं जीवा रयं आदिज्जंति तं जहा- पाणातिवातेणं जाव परिग्गहेणं ।

पंचहिं ठाणेहिं जीवा रयं वमंति तं-पाणातिवातवेरमणेणं जाव परिग्गहवेरमणेणं ।

[४६२] पंचमासियं णं भिक्खुपडिमं पडिवण्णस्स अणगारस्स कप्पंति पंच दत्तीओ भोयणस्स पडिगाहेत्तए पंच पाणगस्स ।

[४६३] पंचविधे उवधाते पण्णत्ते तं जहा- उग्गमोवधाते उप्पायणोवधाते एसणोवधाते परिकम्मोवधाते परिहरणोवधाते ।

पंचविहा विसोही पन्नत्ता तं जहा- उग्गमविसोही उप्पायणविसोही एसणविसोही परिकम्मविसोही परिहरणविसोही ।

[४६४] पंचहिं ठाणेहिं जीवा दुल्लभबोधियत्ताए कम्मं पकरेंति तं जहा- अरहंताणं अवण्णं वदमाणे, अरहंतपन्नत्तस्स धम्मस्स अवण्णं वदमाणे, आयरियउवज्झायाणं अवण्णं वदमाणे चाउवण्णस्स संघस्स अवण्णं वदमाणे, विवक्कतव-बंधेराणं देवाणं अवण्णं वदमाणे ।

पंचहिं ठाणेहिं जीवा सुल्लभबोधियत्ताए कम्मं पकरेंति तं जहा- अरहंताणं वण्णं वदमाणे जाव विवक्क-तव-बंधेराणं देवाणं वण्णं वदमाणे ।

[४६५] पंच पडिसंलीणा पन्नत्ता तं०- सोत्तिंदियपडिसंलीणे जाव फासिंदियपडिसंलीणे ।

पंच अपडिसंलीणा पन्नत्ता तं०- सोत्तिंदियअपडिसंलीणे जाव फासिंदियअपडिसंलीणे ।

पंचविधे संवरे पन्नत्ते तं०- सोत्तिंदियसंवरे जाव फासिंदियसंवरे ।

पंचविधे असंवरे पन्नत्ते तं०- सोत्तिंदियअसंवरे जाव फासिंदियअसंवरे ।

[४६६] पंचविधे संजमे प० तं० सामाइयसंजमे छेदोवद्वावणिसंजमे परिहारविसुद्धियसंजमे सुहुमसंपरागसंजमे अहक्खायचरित्तसंजमे ।

[४६७] एगिंदिया णं जीवा असमारभमाणस्स पंचविधे संजमे कज्जति तं जहा- पुढविकाइयसंजमे जाव वणस्सतिकाइयसंजमे ।

एगिंदिया णं जीवा समारभमाणस्स पंचविहे असंजमे कज्जति तं जहा- पुढविकाइयअसंजमे जाव वणस्सतिकाइयअसंजमे ।

[४६८] पंचिंदिया णं जीवा असमारभमामस्स पंचविहे संजमे कज्जति, तं जहा- सोत्तिंदियसंजमे जाव फासिंदियसंजमे,

पंचिंदिया णं जीवा समारभमाणस्स पंचविधे असंजमे कज्जति तं जहा- सोत्तिंदियअसंजमे जाव फासिंदियअसंजमे,

ठाणं-५, उद्देसो-२

सव्वपाणभूयजीवसत्ता णं असमारभमाणस्स पंचविहे संजमे कज्जति तं जहा- एगिंदियसंजमे जाव पंचिंदियसंजमे ।

सव्वपाणभूयजीवसत्ता णं समारभमाणस्स पंचविहे असंजमे कज्जति तं जहा- एगिंदियअसंजमे जाव पंचिंदियअसंजमे ।

[४६९] पंचविहा तणवणस्सतिकाइया पन्नत्ता तं जहा- अग्गबीया मूलबीया पोरबीया खंधबीया बीयरूहा ।

[४७०] पंचविहे आयारे प० तं०- नाणायारे दंसणायारे चरित्तायारे तवायारे वीरियायारे ।

[४७१] पंचविहे आयारपक्कपे पन्नत्ते तं जहा- मासिए उग्घातिए, मासिए अणुग्घातिए, चउमासिए उग्घातिए, चउमासिए अणुग्घातिए, आरोवणा,

आरोवण पंचविहा पन्नत्ता तं० पट्ठविया ठविया कसिणा अकसिणा हाडहडा ।

[४७२] जंबुद्धीवे दीवे मंदरस्स पव्वयस्स पुरत्थिमे णं सीयाए महानदीए उत्तरे णं पंच वक्खारपव्वता पन्नत्ता तं जहा- मालवंते चित्तकूडे पम्हकूडे नलिणकूडे एगसेले, जंबुद्धीवे दीवे मंदरस्स पव्वयस्स पुरत्थिमे णं सीयाए महानदीए दाहिणे णं पंच वक्खारपव्वता पन्नत्ता तं जहा- तिकूडे वेसमणकूडे अंजणे मायंजणे सोमणसे, जंबुद्धीवे दीवे मंदरस्स पव्वयस्स पच्चत्थिमे णं सीओयाए महानदीए दाहिणे णं पंच वक्खारपव्वता पन्नत्ता तं जहा- विज्जुप्पभे अंकावती पम्हावती आसीविसे सुहावहे, जंबुद्धीवे

दीवे मंदरस्स पव्वयस्स पच्चत्थिमे णं सीओयाए महानदीए उत्तरे णं पंच वक्खारपव्वता पन्नत्ता तं जहा- पचंदपव्वते सूरपव्वते नागपव्वते देवपव्वते गंधमादणे ।

जंबुद्धीवे दीवे मंदरस्स पव्वयस्स दाहिणे णं देवकुराए कुराए पंच महद्दहा पन्नत्ता तं जहा- निसहदहे दुवकुरुदहे सूरदहे सुलसदहे विज्जुप्पभदहे, जंबुद्धीवे दीवे मंदरस्स पव्वयस्स उत्तरे णं उत्तरकुराए कुराए पंच महादहा पन्नत्ता तं जहा- नीलवंतदहे उत्तरकुरुदहे पंचदहे एरावणदहे मालवंतदहे ।

सव्वेणि णं वक्खारपव्वया सीया-सीओयाओ महानईओ मंदरं वा पव्वतं पंच जोयणसताइं उइं उच्चत्तेणं पंचगाउसताइं उव्वेहेणं ।

घायइसंडे दीवे पुरत्थिमद्धे णं मंदरस्स पव्वयस्स पुरत्थिमे णं सीयाए महानदीए उत्तरे णं पंच वक्खारपव्वता पन्नत्ता तं जहा- मालवंते एवं जहा जंबुद्धीवे तहा जाव पुक्खरवरदीवइं पच्चत्थिमद्धे वक्खारपव्वया दहा य उच्चत्तं भाणियव्वं ।

समयक्खेत्ते णं पंच भरहाइं पंच एरवताइं एवं जहा चउट्ठाणे बितीयउद्देसे तहा एत्थवि भाणियव्वं जाव पंच मंदरा पंच मंदरचूलियाओ नवरं उसुयारा नत्थि ।

[४७३] उसभे णं अरहा कोसलिए पंच धणुसताइं उइं उच्चत्तेणं होत्था ।

भरहे णं राया चाउरंतचक्कवट्ठी पंच धणुसताइं उइं उच्चत्तेणं होत्था ।

बाहुबली णं अणगारे चेव बंभी णं अज्जा एवं चेव, एवं सुंदरी वि ।

[४७४] पंचहिं ठाणेहिं सुत्ते विबुज्जेज्जा तं जहा- सद्देणं फासेणं भोयणपरिणामेणं निद्वक्खएणं सुविणदंसणेणं ।

[४७५] पंचहिं ठाणेहिं समणे निग्गंथे निग्गंथिं गिण्हमाणे वा अवलंबमाणे वा नातिक्कमति, तं जहा- निग्गंथिं च णं अण्णयरे पसुजातिए वा पक्खिजातिए वा ओहातेज्जा तत्थ निग्गंथे निग्गंथिं ठाणं-५, उद्देसो-२

गिण्हमाणे वा अवलंबमाणे वा नातिक्कमति ।

निगंगंथे निगंगंथि दुगंगंसि वा विसमंसि वा पक्खलमाणिं वा पवडमाणिं वा गिण्हमाणे वा अवलंबमाणे वा नातिक्कमति, निगंगंथे निगंगंथिं सेयंसि वा पंकंसि वा पणगंसि वा उदगंसि वा उक्कसमाणिं वा उबुज्झमाणिं वा गिण्हमाणे वा अवलंबमाणे वा नातिक्कमति,

निगंगंथे निगंगंथिं नावं आरुभमाणे वा ओरोहमाणे वा नातिक्कमति, खित्तचित्तं दित्तचित्तं जक्खाइडं उम्मायपत्तं उवसग्गपत्तं साहिगरणं सपायच्छित्तं जाव भत्तपाणपडियाइक्खियं अट्टजायं वा निगंगंथे निगंगंथिं गेण्हमाणे वा अवलंबमाणे वा नातिक्कमति ।

[४७६] आयरिय-उवज्झायस्स णं गणंसि पंच अतिसेसा पन्नत्ता तं जहा- आयरिय-उवज्झाए अंतो उवस्सयस्स पाए निगज्झिय-निगज्झिय पप्फोडेमाणे वा पमज्जेमाणे वा नातिक्कमति, आयरिय-उवज्झाए अंतो उवस्सयस्स उच्चारपासवणं विगिंचमाणे वा विसोधेमाणे वा नातिक्कमति, आयरिय-उवज्झाए पभू इच्छा वेयावडियं करेज्जा इच्छा नो करेज्जा, आयरिय-उवज्झाए अंतो उवस्सयस्स एगरातं वा दुरातं वा एगगो वसमाणे नातिक्कमति, आयरिय-उवज्झाए बाहिं उवस्सयस्स एगरातं वा दुरातं वा एगओ वसमाणे नातिक्कमति ।

[४७७] पंचहिं ठाणेहिं आयरिय-उवज्झायस्स गणावक्कमणे पन्नत्ते तं जहा- आयरिय-उवज्झाए गणंसि आणं वा धारणं वा नो सम्मं पउंजित्ता भवति, आयरिय-उवज्झाए गणंसि आधारायणियाए कितिकम्मं वेणइयं नो सम्मं पउंजित्ता भवति, आयरिय-उवज्झाए गणंसि जे सुयपज्जवजाते धारेति ते काले-काले नो सम्ममणुपवादेत्ता भवति, आयरिय-उवज्झाए गणंसि सगणियाए वा परगणियाए वा निगंगंथीए बहिल्लेसे भवति, मित्ते नातिगणे वा से गणाओ अवक्कमेज्जा तेसिं संगहोवग्गहट्ठयाए गणावक्कमणे पण्णत्ते ।

[४७८] पंचविहा इड्ढिमंता मणुस्सा पन्नत्ता तं जहा- अरहंता चक्कवट्ठी बलदेवा वासुदेवा भावियप्पाणो अणगारा ।

◦ पंचमे ठाणे बीओ उद्देसो समत्तो ◦

० तईओ-उद्देसो ०

[४७९] पंच अत्थिकाया पन्नत्ता तं जहा- धम्मत्थिकाए अधम्मत्थिकाए आगासत्थिकाए जीवत्थिकाए पोग्गलत्थिकाए,

धम्मत्थिकाए अवण्णे अगंधे अरसे अफासे अरूवी अजीवे सासए अवट्ठिए लोगदव्वे, से समासओ पंचविधे पन्नत्ते तं जहा- दव्वओ खेत्तओ कालओ भावओ, गुणओ दव्वओ णं धम्मत्थिकाए एगं दव्वं खेत्तओ लोगपमाणम्मेते कालओ न कयाइ नासी न कयाइ न भवति न कयाइ न भविस्सइत्ति भुविं च भवति य भविस्सति य धुवे निइए सासते अक्खए अव्वए अवट्ठिते निच्चे भावओ अवण्णे अगंधे अरसे अफासे गुणओ गमणगुणे ।

अधम्मत्थिकाए अवण्णे एवं चेव, नवरं गुणतो ठाणगुणो ।

आगासत्थिकाए अवण्णे एवं चेव नवरं खेत्तओ लोगालोगपमाणमेत्ते गुणओ अवगाहणागुणे सेसं तं चेव ।

जीवत्थिकाए णं अवण्णे एवं चेव, नवरं दव्वओ णं जीवत्थिकाए अनंताइं दव्वाइं, अरूवि ठाणं-५, उद्देसो-३

जीवे सासते गुणओ उवओगगुणे ।

पोग्गलत्थिकाए पंचवण्णे पंचरसे दुग्ंधे अट्ठफासे रूवी अजीवे सासते अवट्ठिते जाव दव्वओ
णं पोग्गलत्थिकाए अनंतइं दव्वाइं खेत्तओ लोगपमाणमेत्ते कालओ न कयाइ नासि जाव निच्चे भावओ
वण्णमंते जाव फासमंते, गुणओ गहणगुणे ।

[४८०] पंच गतीओ पन्नत्ताओ तं० निरयगती तिरियगती मणुयगती देवगती सिद्धिगती ।

[४८१] पंच इंदियत्था प० तं० सोतिंदियत्थे जाव फासिंदियत्थे ।

पंच मुंडा पन्नत्ता० सोतिंदियमुंडे जाव फासिंदियमुंडे,

अहवा- पंच मुंडा पन्नत्ता० कोहमुंडे मानमुंडे मायामुंडे लोभमुंडे सिरमुंडे ।

[४८२] अहेलोगे णं पंच बायरा पन्नत्ता तं जहा- पुढविकाइया आउकाइया वाउकाइया
वणस्सइकाइया ओराला तसा पाणा, उड्ढलोगे णं पंच बायरा पन्नत्ता तं जहा- एवं चेव ।

तिरियलोगे णं पंच बायरा पन्नत्ता तं जहा- एगिंदिया जाव पंचिदिया ।

पंचविहा बायरतेउकाइया पन्नत्ता तं जहा- इंगाले जाले मुम्मुरे अच्छी अलाते, पंचविधा
बादरवुकाइया पन्नत्ता तं जहा- पाईणवाते पडीणवाते दाहिणवाते उदीणवाते विदिसवाते ।

पंचविधा अचित्ता वाउकइया पन्नत्ता तं जहा- उक्कंते धंते पीलिए सरीराणुगते संमुच्छिमे

।

[४८३] पंच निग्गंथा पन्नत्ता तं० पुलाए बउसे कुसीले निग्गंथे सिणाते,

पुलाए पंचविहे पन्नत्ते तं जहा- नाणपुलाए दंसणपुलाए चरित्तपुलाए लिंगपुलाए
अहासुहुमपुलाए नामं पंचमे,

बउसे पंचविधे पन्नत्ते णं जहा- आभोगबउसे अणाभोगबउसे संवुडबउसे अंसवुडबउसे
अहासुहुमवउसे नामं पंचमे,

कुसीले पंचविधे पन्नत्ते तं जहा- नाणकुसीले दंसणकुसीले चरित्तकुसीले लिंगकुसीले अहा-
सुहुमकुसीले नाम पंचमे,

नियंठे पंचविहे पणत्ते तं जहा- पढमसमयनियंठे अपढमसमयनियंठे चरिमसमयनियंठे
अचरिमसमयनियंठे अहासुहुमनियंठे नामं पंचमे,

सिणाते पंचविधे पणत्ते तं जहा- अच्छी असबले अकम्मंसे संसुद्ध-नाणदंसणधरे अरहा
जिणे केवली, अपरिस्साई ।

[४८४] कप्पति निग्गंथाण वा निग्गंथीण वा पंच वत्थाइं धारित्तए वा परिहरेत्तए वा तं
जहा- जंगिए भंगिए साणए पोत्तिए तिरिडपट्टए नामं पंचमए ।

कप्पति निग्गंथाण वा निग्गंथीण वा पंच रयहरणिं धारित्तए वा परिहरेत्तए वा तं जहा-
उण्णिणए उट्ठिए साणए पच्चापिच्चिए मुंजापिच्चिए नामं पंचमए ।

[४८५] धम्मंणं चरमाणस्स पंच निस्साट्ठाणा पन्नत्ता तं जहा- छक्काया गणे राया
गाहावती सरीरं ।

[४८६] पंच निहिं पन्नत्ता तं० जहा पुत्तनिही मित्तनिही सिप्पनिही धणनिही धण्णनिही ।

[४८७] पंचविहे सोए पन्नत्ता तं० जहा- पुढविसोए आउसोए तेउसोए मंतसोए बंधसोए ।

[४८८] पंच ठाणाइं छउमत्थे सव्वभावेणं न जाणति न पासति तं जहा- धम्मत्थिकायं

ठाणं-५, उद्देसो-३

अधम्मत्थिकायं आगासत्थिकायं जीवं असरीरपडिबद्धं परमाणुपोग्गलं, एयाणि चेव उप्पन्ननाणदंसणधरे अरहा जिणे केवली सव्वभावेणं जाणति पासति तं जहा- धम्मत्थिकायं जाव परमाणुपोग्गलं ।

[४८९] अधेलोगे णं पंच अनुत्तरा महतिमहालया महाणिरया पन्नत्ता तं जहा- काले महाकाले रोरू महारोरू अप्पत्तिट्ठाणे, उड्ढलोगे णं पंच अनुत्तरा महतिमहालया महाविमाणा पन्नत्ता तं जहा- विजये वेजयंते जयंते अपराजिते सव्वट्ठसिद्धे ।

[४९०] पंच पुरिसजाया पन्नत्ता तं जहा-हिरिसत्ते हिरिमणसते चलसत्ते थिरसत्ते उदयणसत्ते ।

[४९१] पंच मच्छा पन्नत्ता तं जहा- अनुसोतचारी पडिसोतचारी अंतचारी मज्झचारी सव्वचारी एवामेव पंच भिक्खागा पन्नत्ता तं जहा- अनुसोतचारी जाव सव्वचारी ।

[४९२] पंच वणीमगा पन्नत्ता तं जहा- अतिहिवणीमगे किवणवणीमगे माहण वणीमगे सावणीमगे समणवणीमगे ।

[४९३] पंचहिं ठाणेहिं अचेलए पसत्थे भवति तं जहा- अप्पा पडिलेहा, लाघविए पसत्थे, रूवे वेसासिए, तवे अणुण्णाते, विउले इंदियनिग्गहे ।

[४९४] पंच उक्कला पन्नत्ता तं जहा- दंडुक्कले रज्जुक्कले तेणुक्कले देसुक्कले सव्वक्कले ।

[४९५] पंच समितीओ पन्नत्ताओ तं जहा- इरियासमिती भासासमिती एसणासमिती आयाणभंड-मत्त-निक्खेवणासमिती उच्चार-पासवण-खेल-सिंधाणजल्ल-पारिठावणिया समिती ।

[४९६] पंचविधा संसारसमावण्णगा जीवा पन्नत्ता तं०- एगिंदिया जाव पंचिदिया ।

एगिंदिया पंचगतिया पंचागतिया पन्नत्ता तं जहा- एगिंदिए एगिंदिएसु उववज्जमाणे एगिंदिएहिंतो वा जाव पंचिदिएहिंतो वा उववज्जेज्जा से चेव णं से एगिंदिए एगिंदियत्तं विप्पजहमाणे एगिंदियत्ताए वा जाव पंचिंदियत्ताए वा गच्छेज्जा बेइंदिया पंचगतिया पंचागतिया एवं चेव एवं जाव पंचिंदिया पंचगतिया पंचागतिया पन्नत्ता तं जहा- पंचिंदिए जाव गच्छेज्जा ।

पंचविधा सव्वजीवा पन्नत्ता तं जहा- कोहकसाई माणकसाई मायाकसाई लोभकसाई अकसाई, अहवा- पंचविधा सव्वजीवा पन्नत्ता तं जहा- नेरइया तिरिक्ख-जोणिया मणुस्सा देवा सिद्धा ।

[४९७]अह भंते कल-मसूर-तिल-मुग्ग-मास-निप्फाव-कुलत्थ-आलिसंदग-सतीण-पलिमंथगाणं एतेसि णं धन्नाणं कुट्टाउत्ताणं [पल्लाउत्ताणं मंचाउत्ताणं मालउत्ताणं ओलि-त्ताणं लित्ताणं लंछियाणं मुद्धियाणं पिहिताणं] केवइयं कालं जोणी संचिद्धति? गोयमा! जहण्णेणं अंतोमुहुत्तं उक्कोसेणं पंच संवच्छराइं, तेण परं जोणी पमिलायति तेण परं जोणी पविद्धंसति तेण परं जोणी विद्धंसति तेण परं बीए अबीए भवति तेण परं जोणीवोच्छेदे पन्नत्ते ।

[४९८] पंच संवच्छरा पन्नत्ता तं जहा- नक्खत्तसंवच्छरे जुगसंवच्छरे पमाणसंवच्छरे लक्खणसंवच्छरे सणिंकरसंवच्छरे, जुगसंवरच्छरे पंचविहे पन्नत्ते तं जहा- चंदे चंदे अभिवड्ढिते चंदे अभिवड्ढिते चेव । पमाणसंवच्छरे पंचविहे पण्णत्ते तं जहा- नक्खत्ते चंदे उऊ आदिच्चे अभिवड्ढिते । लक्खणसंवच्छरे पंचविहे पण्णत्ते तं जहा:-।

[४९९] समगं नक्खत्ताजोगं जोयंति समगं उदू परिणमंति ।

नच्चुण्हं नातिसीतो बहूदओ होति नक्खत्तो ॥

[५००] ससिसगलपुण्णमासीं जोएइ विसमचारिनक्खत्ते ।

कडुओ बहूदओ वा तमाहु संवच्छरं चंदं ॥

[५०१] विसमं पवालिणो परिणमंति अणुदूसु देंति पुप्फफलं ।

वासं न सम्म वासति तमाहु संवच्छरं कम्मं ॥

[५०२] पुढविदगाणं तु रसं पुप्फफलाणं तु देइ आदिच्चो ।

अप्पेणवि वासेणं सम्मं निप्फज्जए सासं ॥

[५०३] आदिच्चतेयतविता खणलवदिवसा उऊ परिणमंति ।

पुरिंति रेणु थलयाइं तमाहु अभिवड्ढितं जाण ॥

[५०४] पंचविधे जीवस्स निज्जाणमग्गे पन्नत्ते तं जहा- पाएहिं ऊरुहिं उरेणं सिरेणं सव्वंगेहि, पाएहिं निज्जायमाणे निरयंगामी भवति, ऊरुहिं निज्जायमाणे तिरियगामी भवति, उरेणं निज्जायमाणे मणुयगामी भवति, सिरेणं निज्जायमाणे मणुयगामी भवति सिरेणं निज्जायमाणे देवगामी भवति, सव्वंगेहिं निज्जायमाणे सिद्धिगति-पज्जवसाणे पन्नत्ते ।

[५०५] पंचविहे छेयणे पन्नत्ते तं जहा- उप्पाछेयणे वियच्छेयणे वंधच्छेयणे पएसच्छेयणे दोधारच्छेयणे,

पंचविहे आणंतरिए पन्नत्ते तं जहा- उप्पायाणंतरिए वियाणंतरिए पएसणंतरिए समयाणंतरिए सामण्णाणंतरिए,

पंचविधे अनंतए पन्नत्ते तं जहा- नामाणंतए ठवणाणंतए दव्वाणंतए गणणाणंतए पदेसाणंतए अहवा- पंचविहे अणंतए पन्नत्ते तं जहा- एगंतोऽनंतए दुहओनंतए देसवित्थारानंतए सव्ववित्थारानंतए सासयानंतए ।

[५०६] पंचविहे नाणे पन्नत्ते तं जहा- आभिनिबोहियनाणे सुयनाणे ओहिनाणे मणपज्जवनाणे केवलनाणे ।

[५०७] पंचविहे नाणावरणिज्जे कम्मे पण्णत्ते तं जहा- आभिनिबोहियनाणवरणिज्जे सुयनाणावरणिज्जे ओहिनाणवरणिज्जे मणपज्जवनाणावरणिज्जे केवलनाणावरणिज्जे ।

[५०८] पंचविहे सज्झाए प० तं०- वायणा पुच्छणा परियट्ठणा अणुप्पेहा धम्मकहा ।

[५०९] पंचविहे पच्चक्खाणे पण्णत्ते तं जहा- सद्धहणसुद्धे विनयसुद्धे अनुभासणासुद्धे अनुपालणासुद्धे भावसुद्धे ।

[५१०] पंचविहे पडिक्कमणे पण्णत्ते तं जहा- आसवदारपडिक्कमणे मिच्छत्तपडिक्कमणे कसायपडिक्कमणे जोगपडिक्कमणे भावपडिक्कमणे ।

[५११] पंचहिं ठाणेहिं सुत्तं वाएज्जा तं जहा- संगहद्वयाए उवग्गहणद्वयाए निज्जरणद्वयाए सुत्ते वा मे पज्जवयाते भविस्सति सुत्तस्स वा अवोच्छित्तिणयद्वयाए ।

पंचहिं ठाणेहिं सुत्तं सिक्खेत्ता तं जहा- नाणद्वयाए दंसणद्वयाए चरित्तद्वयाए वुग्गहविमो- यणद्वयाए अहत्थे वा भावे जाणिस्सामीतिकट्ठ ।

[५१२] सोहम्मीसाणेसु णं कप्पेसु विमाणा पंचवण्णा प० तं०- किण्हा जाव सुक्किल्ला ।

सोहम्मीसाणेसु णं कप्पेसु विमाणा पंचजोयणसयाइं उड्ढं उच्चत्तेणं पन्नत्ता ।

बंभलोगलंतएसु णं कप्पेसु देवाणं भवधारणिज्जसरीरगा उक्कोसेणं पंचरयणी उड्ढं उच्चत्तेणं पन्नत्ता ।

नेरइया णं पंचवण्णे पंचरसे पोग्गले बंधेंसु वा बंधंति वा बंधिस्संति वा तं जहा- किण्हे जाव सुक्किल्ले तित्ते जाव मधुरे एवं जाव वेमाणिया ।

[५१३] जंबुद्धीवे दीवे मंदरस्स पव्वयस्स दाहिणेणं गंगं महानदिं पंच महानदीओ समप्पेंति तं जहा- जउणा सरऊ आवी कोसी मही ।

जंबुद्धीवे दीवे मंदरस्स पव्वयस्स दाहिणे णं सिंधुं महानदिं पंच महानदीओ समप्पेंति तं जहा- सतद्द वितत्था विभासा एरावती चंदभागा ।

जंबुद्धीवे दीवे मंदरस्सपव्वयस्स उत्तरे णं रत्तं महानदिं पंच महानदीओ समप्पेंति तं० किण्हा महाकिण्हा नीला महानीला महातीरा ।

जंबुद्धीवे दीवे मंदरस्स पव्वयस्स उत्तरे णं रत्तांवतिं महानदिं पंच महानदीओ समप्पेंति तं०-इंदा इंदसेणा सुसेणा वारिसेणा महाभोगा ।

[५१४] पंच तित्थगरा कुमारवासमज्झे वासित्ता मुंडा भवित्ता अगाराओ अणगारियं पव्वइया तं जहा- वासुपुज्जे मल्ली अरिद्धनेमी पासे वीरे ।

[५१५] चमरचंचाए रायहाणीए पंच सभा पन्नत्ता तं जहा- सुधम्मा सभा उववातसभा अभिसेयसभा अलंकारियसभा ववसायसभा,

एगमेगे णं इंदद्वाणे पंच सभाओ प० तं० सुहम्मासभा उववातसभा अभिसेयसभा अलंकारियसभा ववसायसभा ।

[५१६] पंचनक्खत्ता पंचतारा पन्नत्ता तं जहा- धणिद्वा रोहिणी पुणव्वसू हत्थो विसाहा ।

[५१७] जीवा णं पंचद्वाणनिव्वत्तिए पोग्गले पावकम्मत्ताए चिणिंसु वा चिणंति वा चिणिस्संति वा तं जहा- एगिंदियनिव्वत्तिए जाव पंचिंदियनिव्वत्तिए एवं-चिण-उवचिण-बंध-उदीर-वेद तह निज्जरा चेव पंचपएसिया खंधा अनंता पन्नत्ता पंचपएसोगाढा पोग्गला अनंता पन्नत्ता जाव पंचगुणलुक्खा पोग्गला अनंता पन्नत्ता ।

० पंचमे ठाणे तइओ उद्देशो समत्तो ०

0 पंचमं ठाणं समत्तं 0

० मुनि दीपरत्नसागरेण संशोधितः सम्पादितश्च पंचमं ठाणं समत्तं ०

[] छड्डं-ठाणं []

[५१८] छहिं ठाणेहिं संपण्णे अणगारे अरिहति गणं धारित्ते तं जहा- सड्ढी पुरिसजाते, सच्चे पुरिसजाते, मेहावी पुरिसजाते, बहुस्सुते पुरिसजाते, सत्तिमं, अप्पाधिकरणे ।

[५१९] छहिं ठाणेहिं निग्गंथे निग्गंथिं गिण्हमाणे वा अवलंबमाणे वा नाइक्कमइ तं जहा- खित्तचित्तं दित्तचित्तं जक्खाइड्डं उम्मायपत्तं उवसग्गपत्तं साहिकरणं ।

[५२०] छहिं ठाणेहिं निग्गंथा निग्गंथीओ य साहम्मियं कालगतं समायरमाणा नाइक्कमंति तं जहा- अंतोहितो वा बाहिं नीणेमाणा बाहीहितो वा निब्बाहिं नीणेमाणा, उवेहेमणा वा, उवासमाणा वा,

अणुणवेमाणा वा, तुसिणीए वा संपव्वयमाणा ।

[५२१] छ ठाणाइं छउमत्थे सव्वभावेणं न जाणति न पासति तं जहा- धम्मत्थिकायं अधम्मत्थिकायं आयासं जीवमसरीरपडिबद्धं परमाणुपोग्गलं सद्धं, एताणि चेव उप्पन्ननाणदंसणधरे अरहा जिणे केवली सव्वभावेणं जाणति पासति तं जहा- धम्मत्थिकायं जाव सद्धं ।

[५२२] छहिं ठाणेहिं सव्वजीवाणं नत्थि इड्ढीति वा जुतीति वा जसेति वा बलेति वा वीरिएति वा पुरिसक्कार-परक्कमेति वा तं जहा- जीवं वा अजीवं करणताए, अजीवं वा जीवं करणताए, एगसमए णं वा दो भासाओ भासित्तए, सयं कडं वा कम्मं वेदेमि वा मा वा वेदेमि, परमाणुपोग्गलं वा छिंदित्तए वा भिंदित्तए वा अगणिकाएणं वा समोदहित्तए, बहिता वा लोगंता गमणताए ।

[५२३] छज्जीवनिकाया पन्नत्ता तं जहा- पुढविकाइया जाव तसकाइया ।

[५२४] छ तारग्गहा प० तं-सुक्के बुहे बहस्सती अंगारए सणिच्छरे केतू ।

[५२५] छव्विहा संसारसमावण्णगा जीवा प० तं- पुढविकाइया जाव तसकाइया ।

पुढविकाइया छगतिया छआगतिया प० तं जहा- पुढविकाइए पुढविकाइएसु उववज्जमाणे पुढविकाइएहिंतो वा जाव तसकाइएहिंतो वा उववज्जेज्जा, से चेव णं से पुढविकाइए पुढविकाइयत्तं विप्पजहमाणे पुढविकाइयत्ताए वा जाव तसकाइयत्ताए वा गच्छेज्जा,

आउकाइयावि छगतिया छआगतिया, एवं चेव जाव तसकाइया ।

[५२६] छव्विहा सव्वजीवा पन्नत्ता तं जहा- आभिनिबोहियनाणी जाव केवलनाणी अन्नाणी, अहवा- छव्विहा सव्वजीवा पन्नत्ता तं जहा- एणिंदिया जाव पंचिंदिया अणिंदिया, अहवा- छव्विहा सव्वजीवा पन्नत्ता तं जहा- ओरालियसरीरी वेउव्वियसरीरी आहारगसरीरी तेअगसरीरी कम्मगसरीरी असरीरी ।

[५२७] छव्विहा तणवणस्सतिकाइया पन्नत्ता तं जहा- अग्गबीया मूलबीया पोर्बीया खंधबीया बीयरूहा संमुच्छिमा ।

[५२८] छट्ठाणाइं सव्वजीवाणं नो सुलभाइं भवंति तं जहा- माणुस्सए भवे, आरिए खेत्ते जम्मं, सुकुले पच्चायाती, केवलीपन्नत्तस्स धम्मस्स सवणता, सुतस्स वा सद्धहणता, सद्धहितस्स वा पत्तितस्स वा रोइतस्स वा सम्मं काएणं फासणता ।

[५२९] छ इंदियत्था प० तं- सोइंदियत्थे जाव फासिंदियत्थे नोइंदियत्थे ।

[५३०] छव्विहे संवरे प० तं- सोतिंदियसंवरे जाव फासिंदियसंवरे नोइंदियसंवरे, छव्विहे असंवरे प० तं- सोतिंदियअसंवरे जाव फासिंदियअसंवरे नोइंदियअसंवरे ।

[५३१] छव्विहे साते पन्नत्ते तं जहा- सोतिंदियसाते जाव नोइंदियसाते ।

छव्विहे असाते पण्णत्ते तं जहा- सोतिंदियअसाते जाव नोइंदियअसाते ।

[५३२] छव्विहे पायच्छित्ते पण्णत्ते तं जहा- आलोयणारिहे पडिक्कमणारिहे तदुभयारिहे विवेगारिहे विउस्सग्गारिहे तवारिहे ।

[५३३] छव्विहा मणुस्सा पन्नत्ता तं जहा- जंबूदीवगा घायइसंडदीवपुरत्थिमद्धगा घायइ-संडदीव पच्चत्थिमद्धगा पुक्करवरदीवइडपुरत्थिमद्धगा पुक्खरवरदीवइडपच्चत्थिमद्धगा अंतरदीवगा अहवा छव्विहा मणुस्सा प०- संमुच्छिमणुस्सा कम्मभूमगा अकम्मभूमगा अंतरदीवगा गब्भवक्कंति-अमणुस्सा

कम्मभूमगा अकम्मभूमगा अंतरदीवगा ।

[५३४] छविहा इड्ढिमंता मणुस्सा पन्नत्ता तं जहा- अरहंता चक्कवट्ठी बलदेवा वासु- देवा चारणा विज्जाहरा, छविहा अण्डिमंता मणुस्सा पन्नत्ता तं जहा- हेमवतगा हेरणवतगा हरिवासगा रम्मगवासगा कुरुवासिणो अंतरदीवगा ।

[५३५] छविहा ओसप्पिणी पन्नत्ता तं जहा- सुसम-सुसमा सुसमा सुसम-दूसमा दूसम-सुसमा दूसमा दूसम-दूसमा; छविहा उस्सप्पिणी पन्नत्ता तं- दुस्सम-दुस्समा जाव सुसम-सुसमा ।

[५३६] जंबुद्वीवे दीवे भरहेरवएसु वासेसु तीताए उस्सप्पिणीए सुसम-सुसमाए समाए मणुया छ धणुसहस्साइं उड्ढमुच्चत्तेणं हुत्था, छच्च अद्धपलिओवमाइं परमाउं पालयित्था ।

जंबुद्वीवे दीवे भरहेरवएसु वासेसु इमीसे ओसप्पिणीए सुसम-सुसमाए समाए एवं चेव । जंबुद्वीवे दीवे भरहेरवएसु वासेसु आगमेस्साए उस्सप्पिणीए सुसम-सुसमाए समाए, एवं चेव जाव छच्च अद्धपलिओवमाइं परमाउं पालइस्संति ।

जंबुद्वीवे दीवे देवकुरु-उत्तरकुरुकुरासु मणुसा छ धणुस्सहस्साइं उड्ढं उच्चत्तेणं पन्नत्ता, छच्च अद्धपलिओवमाइं परमाणुं पालेतिं; एवं धायइसंडदीवपुरत्तिमद्धे चत्तरि आलावगा जाव पुक्खरवरदीवड्ढ-पच्चत्थिमद्धे चत्तारि आलवगा ।

[५३७] छविहे संघयणे प० तं०- वइरोसभनारायसंघयणे उसभनारायसंघयणे नारायसंघयणे अद्धनारायसंघयणे खीलियासंघयणे छेवट्टसंघयणे ।

[५३८] छविहे संठाणे प० तं०- समचउरंसे नग्गोहपरिमंडले साई खुज्जे वामणे हुंडे ।

[५३९] छट्ठाणा अणत्तवओ अहिताए असुभाए अखमाए अनीसेसाए अनानुगामियत्ता भवंति, तं जहा- परियाए परियाले सुते तवे लाभे पूयासक्कारे, छट्ठाणा अत्तवत्तो हिताए [सुभाए खमाए नीसेसाए] आणुगामियत्ताए भवंति तं जहा- परियाए परियाले [सुते तवे लाभे] पूयासक्कारे ।

[५४०] छविहा जाइ-आरिया मणुस्सा पन्नत्ता तं जहा- ।

[५४१] अंबट्टा य कलंदा य वेदेहा वेदिगादिया ।
हरिता चुंचुणा चेव छप्पेता इब्भजातिओ ॥

[५४२] छविहा कुलारिया मणुस्सा प० तं०- उग्गा भोगा राइण्णा इक्खागा नाता कोरव्वा ।

[५४३] छविहा लोगट्ठिती पन्नत्ता तं जहा- आगासपतिट्ठिते वाए वातपतिट्ठिते उदही उदधिपतिट्ठिता पुढवी पुढविपतिट्ठिता तसा थावरा पाणा, अजीवा जीवपतिट्ठिता, जीवा कम्मपतिट्ठिता ।

[५४४] छदिसाओ पन्नत्ताओ तं जहा- पाईणा पडीणा दाहिणा उदीणा उड्ढा अधा,
छहिं दिसाहिं जीवाणं गती पवत्तति, तं जहा- पाईणाए जाव अधाए; एवं आगई, वक्कंती, आहारे, वुड्ढी, निवुड्ढी, विगुव्वणा, गतिपरियाए, समुग्घाते, कालसंजोगे, दंसणाभिगमे, नाणाभिगमे, जीवाभिगमे, अजीवाभिगमे, एवं पंचिदियतिरिक्खजोणियाणवि मणुस्साणवि ।

[५४५] छहिं ठाणेहिं समणे निग्गंथे आहारमाहारेमाणे नातिक्कमति तं ।

[५४६] वेयण-वेयावच्चे ईरियट्ठाए य संजमट्ठाए ।
तह पामवत्तियाए छट्ठं पुण धम्मचिंताए ॥

[५४७] छहिं ठाणेहिं समणे निग्गंथे आहारं वोच्छिंदमाणे नातिक्कमति तं० ।

[५४८] आतंके उवसग्गे तित्तिक्खणे बंभचेरगुत्तीए ।

पाणिदया- तवहेउं सरीरवुच्छेयणद्वाए ॥

[५४९] छहिं ठाणेहिं आया उम्मायं पाउणेज्जा, तं जहा- अरहंताणं अवण्णं वदमाणे अरहंतपन्नत्तस्स धम्मस्स अवण्णं वदमाणे, आयरिय-उवज्झायाणं अवण्णं वदमाणे, चाउव्वण्णस्स संधस्स अवण्णं वदमाणे, जक्खावेसेणं चेव, मोहणिज्जस्स चेव कम्मस्स उदएणं ।

[५५०] छव्विहे पमाए पण्णत्ते तं जहा- मज्जपमाए निद्वपमाए विसयपमाए कसायपमाए जूतपमाए पडिलेहणापमाए ।

[५५१] छव्विहा पमायपडिलेहणा पन्नत्ता तं जहा-

[५५२] आरभडा संमद्दा वज्जेयव्वा य मोसली ततिया ।

पप्फोडणा चउत्थी वक्खित्ता वेइया छट्ठी ॥

[५५३] छव्विहा अप्पमायपडिलेहणा पन्नत्ता तं जहा- ।

[५५४] अनच्चावितं अवलितं अणाणुबंधि अमोसलिं चेव ।

छप्पुरिमा नव खोडा पाणीपाणविसोहणी ॥

[५५५] छ लेसाओ पन्नत्ताओ तं जहा- कण्हलेसा [नीललेसा काउलेसा तेउलेसा पम्हलेसा] सुक्कलेसा पंचिंदियतिरिक्खजोणियाणं छ लेसाओ पन्नत्ताओ तं जहा- कण्हलेसा जाव सुक्कलेसा एवं मणुस्स-देवाण वि ।

[५५६] सक्कस्स णं देविंदस्स देवरण्णो सोमस्स महारण्णो छ अग्गमहिंसीओ पन्नत्ताओ

सक्कस्स णं देविंदस्स देवरण्णो जम्मस्स महारण्णो छ अग्गमहिंसीओ प. ।

[५५७] ईसाणस्स णं देविंदस्स देवरण्णो मज्झिमपरिसाए देवाणं छ पलिओवमाइं ठिती पन्नत्ता ।

[५५८] छ दिसाकुमारिमहत्तरियाओ प० तं०- रूवा रूवंसा सुरूवा रूववती रूवकंता रूवप्पभा ।

छ विज्जुमारिमहत्तरियाओ पन्नत्ताओ तं जहा- अला सक्का सतेरा सोता-मणी इंदा धणविज्जुया ।

[५५९] घरणस्सं णं नागकुमारिंदस्स नागकुमाररण्णो छ अग्गमहिंसीओ पन्नत्ताओ तं जहा- अला सक्का सतेरा सोतामणी इंदा धणविज्जुया ।

भूताणंदस्स णं नागकुमारिंदस्स नागकुमाररण्णो छ अग्गमहिंसीओ पन्नत्ताओ तं जहा- रूवा रूवंसा सुरूवा रूववती रूवकंता रूवप्पभा ।

जहा धरणस्स तहा सव्वेसिं दाहिणिल्लाणं जाव घोसस्स जहा भूताणंदस्स तहा सव्वेसिं उत्तरिल्लाणं जाव महाधोसस्स ।

[५६०] घरणस्स णं नागकुमारिंदस्स नागकुमाररण्णो छस्सामाणियसाहस्सीओ पण्णत्ताओ एवं भूताणंदस्सवि जाव महाधोसस्स ।

[५६१] छव्विहा ओगहमती प० तं० जहा- खिप्पमोगिण्हति बहुमोगिण्हति बहुविधमोगिण्हति धुवमोगिण्हति अनिस्सियमोगिण्हति असंदिद्धमोगिण्हति ।

छविहा ईहामती पन्नत्ता तं जहा- खिप्पमीहति बहुमीहति जाव असंदिद्धमीहति ।

छविधा अवायमती पन्नत्ता तं जहा- खिप्पमवेति जाव असंदिद्धमवेति ।

छविहा धारणामती पन्नत्ता तं जहा- बहुं धरेति बहुविह धरेति पोराणं धरेति दुद्धरं धरेति अनिस्सतं धरेति असंदिद्धं धरेति ।

[५६२] छविहे बाहिरए तवे पण्णत्ते तं जहा- अणसणं ओमोदरिया भिक्खायरिया रसपरि-
च्चाए कायकिलेसो पडिसंलीणता ।

छविहे अब्भंतरिए तवे पन्नत्ता तं जहा- पायच्छित्तं विणओ वेयावच्चं सज्झाओ ज्ञाणं
विउस्सग्गो ।

[५६३] छविहे विवादे पण्णत्ते तं जहा- ओसक्कइत्ता उस्सक्कइत्ता अणुलोमइत्ता पडि-
लोमइत्ता भइत्ता भेलइत्ता ।

[५६४] छविहा खुड्डा पाणा पन्नत्ता तं जहा- बेइंदिया तेइंदिया चउरिंदिया
संमुच्छिमपंचिदियतिरिक्खजोणिया तेउकाइया वाउकाइया ।

[५६५] छविहा गोयरचरिया पन्नत्ता तं जहा- पेडा अद्धपेडा गोमुत्तिया पतंगवीहिया
संबुक्कावट्टा गंतुं पच्चागता ।

[५६६] जंबुद्धीवे दीवे मंदरस्स पव्वयस्स दाहिणेणं ईमीसे रयणप्पभाए पुढवीए छ
अवक्कंतमहानिरया पन्नत्ता तं जहा- लोले लोलुए उद्धइडे निदइडे जरए पज्जरए ।

चउत्थीए णं पंकप्पभाए पुढवीए छ अवक्कंतमहानिरया पन्नत्ता तं जहा- आरे वारे मारे
रोरे रोरूव खाडखडे ।

[५६७] बंभलोगे णं कप्पे छ विमाण-पत्थडा पन्नत्ता तं जहा- अरए विरए नीरए निम्मले
वितिमिरे विसुद्धे ।

[५६८] चंदस्स णं जोतिसिंदस्स जोतिसरण्णो छ नक्खत्ता पुव्वंभागा समखेत्ता
तीसतिमुहुत्ता पन्नत्ता तं जहा- पुव्वाभद्धवया कत्तिया महा पुव्वफग्गुणी मूलो पुव्वासाढा ।

चंदस्स णं जोतिसिंदस्स जोतिसरण्णो छ नक्खत्ता नत्तंभागा अवड्ढक्खेत्ता
पन्नरसमुहुत्ता पन्नत्ता तं जहा- सयभिसया भरणी भद्धा अस्सेसा साती जेड्डा ।

चंदस्स णं जोइसिंदस्स जोति- सरण्णो छ नक्खत्ता उभयभागा दिवड्ढक्खेत्ता
पणयालीसमुहुत्ता पन्नत्ता तं जहा- रोहिणी पुनव्वसू उत्तराफग्गुणी विसाहा उत्तरासाढा उत्तराभद्धवया ।

[५६९] अभिचंदे णं कुलकरे छ घणुसयाइं उड्ढं उच्चत्तेणं हुत्था ।

[५७०] भरहे णं राया चाउरंतचक्कवट्ठी छ पुव्वसतसहस्साइं महाराया हुत्था ।

[५७१] पासस्स णं अरहओ पुरिसादाणियस्स छ सता वादीणं सदेवमणुयासुराए परिसाए
अपराजियाणं संपया होत्था ।

वासुपुज्जे णं अरहा छहिं पुरिससतेहिं सद्धिं मुंडे जाव अणगारियं पव्वइए ।

चंदप्पभे णं अरहा छम्मासे छउमत्थे हुत्था ।

[५७२] तेइंदिया णं जीवा असमारभमाणस्स छविहे संजमे कज्जति तं जहा- धाणामातो
सोक्खातो अववरोवेत्ता भवति घाणामएणं दुक्खेणं असंजोएत्ता भवति, जिब्भामातो सोक्खातो अववरोवेत्ता

भवति एवं चेव फासामातोवि ।

तेइंदिया णं जीवा समारभमाणस्स छव्विहे असंजमे कज्जति तं जहा- घाणामातो सोक्खातो ववरोवेत्ता भवति, घाणामएणं दुक्खेणं संजोगेत्ता भवति जाव फासामएणं दुक्खेणं संजोगेत्ता भवति ।

[१७३] जंबुद्धीवे दीवे छ अकम्मभूमीओ पन्नत्ताओ तं जहा- हेमवते हेरण्णवते हरिवस्से रम्मगवासे देवकुरा उत्तरकुरा ।

जंबुद्धीवे दीवे छव्वासा प० तं० जहा- भरहे एरवते हेमवते हेरण्णवए हरिवासे रम्मगवासे ।

जंबुद्धीवे दीवे छ वासहरपव्वत्ता पन्नत्ता तं जहा- चुल्लहिमवंते महाहिमवंते निसडे नीलवंते रूप्पी सिहरी ।

जंबुद्धीवे दीवे मंदरस्स पव्वयस्स दाहिणे णं छ कूडा पन्नत्ता तं जहा- चुल्लहिमवंतकूडे वेसमणकूडे महाहिमवंतकूडे वेरुलियकूडे निसढकूडे रूयगकूडे, जंबुद्धीवे दीवे मंदरस्स पव्वयस्स उत्तरेणं छ कूडा पन्नत्ता तं जहा- नीलवंतकूडे उवदंसणकूड रूप्पिकूडे मणिकचणकूडे सिहरिकूडे तिगिच्छकूडे ।

जंबुद्धीवे दीवे छ महद्धहा पन्नत्ता तं जहा- पउमद्धहे महापउमद्धहे तिगिंछिद्धहे केसरिद्धहे महापोंडरीयद्धहे पुंडरीयद्धहे, तत्थ णं छ देवयाओ महिइडियाओ जाव पलिओमट्टितियाओ परिवसंति तं जहा- सिरी हिरी धिती कित्ति बुद्धी लच्छी ।

जंबुद्धीवे दीवे मंदरस्स पव्वयस्स दाहिणे णं छ महानदीओ पन्नत्ताओ तं जहा- गंगा सिंधू रोहिया रोहितंसा हरी हरिकंता, जंबुद्धीवे दीवे मंदरस्स पव्वयस्स उत्तरे णं छ महानदीओ पन्नत्ताओ तं जहा- नरकंता नारिकंता सुवण्णकूला रूप्पकूला रत्ता रत्तवती ।

जंबुद्धीवे दीवे मंदरस्स पव्वयस्स पुरत्थिमे णं सीताए महानदी उभयकूले छ अंतरनदीओ पन्नत्ताओ तं जहा- गाहावती दहवती पंकवती तत्तयला मत्तयला उम्मत्तयला, जंबुद्धीवे दीवे मंदरस्स पव्वयस्स पच्चत्थिमे णं सीतोदाए महानदीए उभयकूले छ अंतरनदीओ पन्नत्ताओ तं जहा- खीरोदा सीहसोता अंतोवाहिणी उम्मिमालिणी फेणमालिणी गंभीरमालिणी ।

घायइसंडदीवपुरत्थिमद्धे णं छ अकम्मभूमीओ पन्नत्ताओ तं जहा- हेमवए० एवं जहा जंबुद्धीवे दीवे जाव अंतरनदीओ जाव पुक्खरवरदीवद्धपच्चत्थिमद्धे भाणितव्वं ।

[१७४] छ उदू पन्नत्ता तं जहा- पाउसे वरिसारत्ते सरए हेमंते वसंते गिम्हे ।

[१७५] छ ओमरत्ता पन्नत्ता तं जहा- ततिए पव्वे सत्तमे पव्वे एक्कारसमे पव्वे पण्णरसमे पव्वे एगूणवीसइमे पव्वे तेवीसइमे पव्वे ।

छ अतिरत्ता पन्नत्ता तं जहा- चउत्थे पव्वे अट्टमे पव्वे दुवालसमे पव्वे सोलसमे पव्वे वीसइमे पव्वे चउवीसइमे पव्वे ।

[१७६] आभिनिबोहियनाणस्स णं छव्विहे अत्थोग्गहे पण्णत्ते तं जहा- सोइंदियत्थोग्गहे चक्खिंदियत्तोग्गहे धाणिंदियत्थोग्गहे जिब्भिंदियत्थोग्गहे फासिंदियत्थोग्गहे नोइंदियत्थोग्गहे ।

[१७७] छव्विहे ओहिनाणे पण्णत्ते तं जहा- आणुगामिए अणाणुगामिए वड्डमाणए हीयमाणए पडिवाती अपडिवाती ।

[१७८] नो कप्पइ निग्गंथाण वा निग्गंथीण वा इमाइं छ अवयणाइं वदित्तए तं जहा- अलियवयणे हालियवयणे खिसितवयणे फरुसवयणे गारत्थियवयणे विउसवितं वा पुणो उदीरित्तए ।

[५७९] छ कप्पस्स पत्थारा पन्नत्ता तं जहा- पाणातिवायस्स वयं वयमाणे, मुसावायस्स वायं वयमाणे, अदिन्नादाणस्स वायं वयमाणे, अविरतिवायं वयमाणे, अपुरिसवायं वयमाणे, दासवायं वयमाणे इच्छेते छ कप्पस्स पत्थारे पत्थारेत्ता सम्ममपडिपूरेमाणे तद्वाणपत्ते ।

[५८०] छ कप्पस्स पलिमंथू पन्नत्ता तं जहा- कोकुइते संजमस्स पलिमंथू, मोहरिए सच्चवयणस्स पलिमंथू, चक्खुलोलुए ईरियावहियाए पलिमंथू, तित्तिणिए एसणागोयरस्स पलिमंथू, इच्छालोभिते मोत्तिमग्गस्स पलिमंथू, भिज्जानिदाणकरणे मोक्खमग्गस्स पलिमंथू, सव्वत्थ भगवता अनिदाणता पसत्था ।

[५८१] छव्विहा कप्पट्ठिती प० तं० -सामाइयकप्पट्ठिती छेओवद्वावणियकप्पट्ठिती निव्विसमाणकप्पट्ठिती निव्विड्ढकप्पट्ठिती जिणकप्पट्ठिती थेरकप्पट्ठिती ।

[५८२] समणे भगवं महावीरे छट्ठेणं भत्तेणं अपाणएणं मुंडे जाव पव्वइए ।

समणस्स णं भगवओ महावीरस्स छट्ठेणं भत्तेणं अपाणएणं अनंते अनुत्तरे जाव समुप्पण्णे ।

समणे भगवं महावीरे छट्ठेणं भत्तेणं अपाणएणं सिद्धे जाव सव्वदुक्खप्पहीणे ।

[५८३] सणंकुमार-माहिंदेसु णं कप्पेसु विमाणा छ जोयणसयाइं उड्ढंउच्चत्तेणं पण्णत्ता

सणंकुमार-माहिंदेसु णं कप्पेसु देवाणं जोयणसयाइं उड्ढंउच्चत्तेणं पन्नत्ता ।

सणंकुमारमाहिंदेसु णं कप्पेसु देवाणं भवधारणिज्जगा सरीरगा उक्कोसेणं छ रयणीओ उड्ढं उच्चत्तेणं पन्नत्ता ।

[५८४] छव्विहे भोयणपरिणामे पण्णत्ते तं जहा- मणुण्णे रसिए पीणणिज्जे दीवणिज्जे मयणिज्जे दप्पणिज्जे ।

छव्विहे विसपरिणामे पण्णत्ते तं जहा- उक्के भुत्ते निवतिते मंसाणुसारी सोणिताणुसारी अट्ठिमिंजाणुसारी ।

[५८५] छव्विहे पट्ठे पन्नत्ता तं जहा संसयपट्ठे वुग्गहपट्ठे अणुजोगी अणुलोमे तहनाणे अतहनाणे ।

[५८६] चमरचंचा णं रायहाणी उक्कोसेणं छम्मासा विरहिया उववातेणं ।

एगमेगे णं इंद-द्वाणे उक्कोसेणं छम्मासे विरहिते उववातेणं ।

अधेसत्तमा णं पुढवी उक्कोसेणं छम्मासा विरहिता उववातेणं

सिद्धगती णं उक्कोसेणं छम्मासा विरहिता उववातेणं ।

[५८७] छव्विधे आउयबंधे पण्णत्ते तं जहा- जातिनामनिधत्ताउए गतिनामनिधत्ताउए ठित्तिनामनिधत्ताउए ओगाहणानामनिधत्ताउए पएसनामनिधत्ताउए अणुभागनामनिहत्ताउए ।

नेरइयाणं छव्विहे आउयबंधे पण्णत्ते तं जहा- जातिनामनिहत्ताउए जाव अणुभागनाम- निहत्ताउए एवं जाव वेमाणियाणं ।

नेरइया नियमा छम्मासावसेताउया परभवियाउयं पगरेंति, एवं असुरकुमारावि जाव थणियकुमारा,

असंखेज्जवासाउया सण्णिपंचिदियतिरिक्खजोगिया नियमं छम्मासावसेसाउया परभवियाउयं पगरेंति, असंखेज्जवासाउया सन्निमणुस्सा नियमं छम्मसावसेसाउया परभवियाउयं पगरेंति वाणमंतरा, ठाणं-६

जोतिसवासिया वेमाणिया जहा नेरइया ।

[५८८] छव्विहे भावे पण्णत्ते तं जहा- ओदइए उवसमिए खइए खओवसमिए पारिणामिए सण्णिवातिए ।

[५८९] छव्विहे पडिक्कमणे पण्णत्ते तं जहा- उच्चारपडिक्कमणे पासवणपडिक्कमणे इत्तरिए आवकहिए जंकिंचिमिच्छा सोमणंतिए ।

[५९०] कत्तियानक्खत्ते छत्तारे पण्णत्ते, असिलेसानक्खत्ते छत्तारे पण्णत्ते ।

[५९१] जीवा णं छट्ठाणनिव्वत्तिए पोग्गले पावकम्मत्ताए चिणिसु वा चिणंति वा चिणिस्संति वा तं जहा- पुढविकाइयनिव्वत्तिए जाव तसकायनिव्वत्तिए, एवं-चिण-उवचिण-बंध-उदीर-वेय तह निज्जरा चेव ।

छप्पएसिया णं खंधा अनंता पण्णत्ता, छप्पएसोगाढा पोग्गला अनंता पण्णत्ता, छसमयद्वितीया पोग्गला अनंता पण्णत्ता, छगुणकालगा पोग्गला जाव छगुणलुक्खा पोग्गला अनंता पण्णत्ता ।

• छड्ढं ठाणं समत्तं •

• मुनि दीपरत्नसागरेण संशोधितः सम्पादित्तश्च छड्ढं ठाणं समत्तं •

[] सत्तमं-ठाणं []

[५९२] सत्तविहे गणावक्कमणे पण्णत्ते तं जहा- सव्वधम्मा रोएमि, एगइया रोएमि एगइया रोएमि एगइया नो रोएमि, सव्वधम्मा वितिगिच्छामि, एगइया वितिगिच्छामि एगइया नो वितिगिच्छामि, सव्वधम्मा जुहुनामि, एगइया जुहुनामि एगइया नो जुहुनामि, इच्छामि णं भंते एगल्लविहार-पडिमं उवसंपिज्जत्ता णं विहरित्तए ।

[५९३] सत्तविहे विभंगनाणे पण्णत्ते तं जहा- एगदिसिं लोगाभिगमे, पंचदिसिं लोगाभिगमे, किरियावरणे जीवे, मुदग्गे जीवे, अमुदग्गे जीवे, रूवी जीवे, सव्वमिणं जीवा ।

तत्थ खलु इमे पढमे विभंगनाणे-जया णं तहारूवस्स समणस्स वा माहणस्स वा विभंगनाणे समुप्पज्जति, से णं तेणं विभंगनाणेणं समुप्पण्णेणं पासति पाईणं वा पडिणं वा दाहिणं वा उदीणं वा उड्ढं वा जाव सोहम्मे कप्पे, तस्स णं एवं भवति- अत्थि णं मम अतिसेसे नाणदंसणे समुप्पण्णे- एगदिसिं लोगाभिगमे, संतेगइया समणा वा माहणा वा एवमाहंसु- पंचदिसिं लोगाभिगमे, जे ते एवमाहंसु मिच्छं ते एवमाहंसु पढमे विभंगनाणे ।

अहावरे दोच्चे विभंगनाणे- जया णं तहारूवस्स समणस्स वा माहणस्स वा विभंगनाणे समुप्पज्जति, से णं तेणं विभंगनाणेणं समुप्पण्णेणं पासति पाईणं वा पडिणं वा दाहिणं वा उदीणं वा उड्ढं वा जाव सोहम्मे कप्पे तस्स णं एवं भवति- अत्थि णं मम अतिसेसे नाणदंसणे समुप्पण्णे- पंचदिसिं लोगाभिगमे, संतेगइया समणा वा माहणा वा एवमाहंसु- एगदिसिं लोगाभिगमे, जे ते एवमाहंसु मिच्छं ते एवमाहंसु- दोच्चे विभंगनाणे ।

अहावरे तच्चे विभंगनाणे-जया णं तहारूवस्स समणस्स वा माहणस्स वा विभंगनाणे समुप्पज्जति, से णं तेणं विभंगनाणेणं समुप्पण्णेणं पासति पाणे अतिवातेमाणे मुसं वयमाणे अदिन्नामा-
ठाणं-७

दियमाणे मेहुणं पडिसेवमाणे परिग्गहं परिगिण्हमाणे राइभोयणं भुंजमाणे पावं च णं कम्मं कीरमाणं नो पासति, तस्स णं एवं भवति- अत्थि णं मम अतिसेसे नाणदंसणे समुप्पण्णे किरियावरणे जीवे, संतेगइया समणा वा माहणा वा एवमाहंसु- नो किरियावरणे जीवे, जे ते एवमाहंसु मिच्छं ते एवमाहंसु, तच्चे विभंगनाणे ।

अहावरे चउत्थे विभंगनाणे- जया णं तधारूवस्स समणस्स वा माहणस्स वा विभंगनाणे समुप्पज्जति, से णं तेणं विभंगनाणेणं समुप्पण्णेणं देवामेव पासति, बाहिरब्भंतरए पोग्गले अपरियाइत्ता पुढेगत्तं नाणत्तं फुसित्ता फुरित्ता फुट्टित्ता विकुव्वित्ता णं चिड्डित्तए, तस्स णं एवं भवति- अत्थि णं मम अतिसेसे नाणदंसणे समुप्पण्णे- मुदग्गे जीवे, संतेगइया समणा वा माहणा वा एवमाहंसु- अमुदग्गे जीवे, जे ते एवमाहंसु मिच्छं ते एवमाहंसु, चउत्थे विभंगनाणे ।

अहावरे पंचमे विभंगनाणे, जधाणं तधारूवस्स समणस्स जाव समुप्पज्जति, से णं तेणं विभंग-नाणेणं समुप्पण्णेणं देवामेव पासति, बाहिरब्भंतरए पोग्गले अपरियादित्ता पुढे गत्तं नाणत्तं जाव विउव्वित्ताणं चिड्डित्तए तस्स णं एवं भवति- अत्थि जाव समुप्पण्णे अमुदग्गे जीवे, संतगतिता समणा वा माहणा एवमाहंसु- मुदग्गे जीवे, जे ते एवमाहंसु मिच्छं ते एवमाहंसु, पंचमे विभंगनाणे ।

अहावरे छट्ठे विभंगनाणे-जया णं तहारूवस्स समणस्स वा माहणस्स वा विभंगनाणे समुप्पज्जति, से णं तेणं विभंगनाणेणं समुप्पण्णेणं देवामेव पासति, बाहिरब्भंतरए पोग्गले परियाइत्ता वा अपरियाइत्ता वा पुढेगत्तं नाणत्तं फुसित्ता फुरित्ता फुट्टित्ता विकुव्वित्ता णं चिड्डित्तए तस्स णं एवं भवति-अत्थि णं मम अतिसेसे नाणदंसणे समुप्पण्णे-रूवी जीवे, संतेगइया समणा वा माहणा वा एवमाहंसु- अरूवी जीवे जे ते एवमाहंसु मिच्छं ते एवमाहंसु, छट्ठे विभंगनाणे

अहावरे सत्तमे विभंगनाणे-जया णं तहारूवस्स समणस्स वा माहणस्स वा विभंगनाणे समुप्पज्जति, से णं तेणं विभंगनाणेणं समुप्पण्णेणं पासई सुहुमेणं वायुकाएणं फुडं पोग्गलकायं एयंतं वेयंतं चलंतं खुब्भंतं फंदंतं घट्टंतं उदीरंतं तं तं भावं परिणमंतं, तस्स णं एवं भवति-अत्थि णं मम अतिसेसे नाणदंसणे समुप्पण्णे, सव्वमिणं जीवा संतेगइया समणा वा माहणा वा एवमाहंसु- जीवा चेव अजीवा चेव जे ते एवमाहंसु मिच्छं ते एवमाहंसु, तस्स णं इमे चत्तारि जीवनिकाया नो सम्मेमुवगता भवंति, तं० पुढवीकाइया आऊ तेऊ वाउकाइया इच्चेतेहिं चउहिं जीवनिकाएहिं मिच्छदंडं पवत्तेइ-सत्तमे विभंगनाणे ।

[५९४] सत्तविधे जोणिसंगहे पण्णत्ते तं जहा- अंडजा पोतजा जराउजा रसजा संसेयगा संमुच्छिमा उब्भिगा,

अंडगा सत्तगतिया सत्तागतिया पन्नत्ता तं जहा- अंडगे अंडगेसु उववज्जमाणे अंडतेहिंतो वा पोतजेहिंतो वा जाव उब्भिगेहिंतो वा उव्वज्जेज्जा सेच्चेव णं से अंडए अंडगत्तं विप्पजहमाणे अंडगत्ताए वा पोतगत्ताए वा जाव उब्भिगत्ताए वा गच्छेज्जा ।

पोतगा सत्तगतिया सत्तागतिया, एवं चेव सत्तण्हवि गतिरागती भाणियव्वा जाव उब्भियत्ति ।

[५९५] आयरिय-उवज्झायस्स णं गणंसि सत्त संगहठाणा पन्नत्ता तं जहा- आयरिय-उवज्झाए णं गणंसि आपं वा धारणं वा सम्मं पउंजित्ता भवति, एवं जधा पंचद्वाणे जाव आयरिय-उवज्झाए णं गणंसि आपुच्छिचारी यावि भवति नो अणापुच्छिचारी यावि भवति ।

आयरिय-उवज्झाए णं गणंसि अणुप्पण्णाइं उवगरणाइं सम्मं उप्पाइत्ता भवति, आयरिय-ठाणं-७

उवज्झाए णं गणंसि पुव्वुप्पणिं उवकरणाइं सम्मं सारक्खेत्ता संगोवित्ता भवति नो असम्मं सारक्खेत्ता संगोवित्ता भवति ।

आयरिय-उवज्झायस्स णं गणंसि सत्त असंगहद्वाणा पन्नत्ता तं जहा- आयरिय-उवज्झाए णं गणंसि आपं वा धारणं वा नो सम्मं पउंजित्ता भवति एवं जाव उवगरणाणं नो सम्मं सारक्खेत्ता संगोवेत्ता भवति ।

[५९६] सत्त पिंडसणाओ पन्नत्ताओ । सत्त पाणेसणाओ पन्नत्ताओ । सत्त उग्गहपडिमाओ पन्नत्ताओ । सत्तसत्तिक्कया पन्नत्ता । सत्त महज्झायणा पन्नत्ता ।

सत्तसत्तमिया णं भिक्खुपडिमा एकूणपन्नत्ताए राइंदिएहिं एगण य छण्णउएणं भिक्खासतेणं अहासुत्तं जाव आराहिया यावि भवति ।

[५९७] अहेलोगे णं सत्त पुढवीओ पन्नत्ताओ, सत्त घणोदधीओ पन्नत्ताओ, सत्त घणवाता पन्नत्ता सत्त तणुवाता पन्नत्ता, सत्त ओवासंतरा पन्नत्ता, एतेसु णं सत्तसु ओवासंतरेसु सत्त तणुवाया पइड्डिया एतेसु णं सत्तसु घणवातेसु सत्त घणोदधी पइड्डिया ।

एतेसु णं सत्तसु घणोदधीसु पिंडलग-पिहुल-संठाण-संठियाओ सत्त पुढवीओ पन्नत्ताओ तं जहा- पढमा जाव सत्तमा, एतासि णं सत्तण्हं पुढवीणं सत्त नामधेज्जा पन्नत्ता तं जहा- धम्मा वंसा सेला अंजणा रिद्धा मघा माघवती ।

एतासि णं सत्तण्हं पुढवीणं सत्त गोत्ता पन्नत्ता तं जहा- रयणप्पभा सक्करप्पभा वालुअप्पभा पंकप्पभा धूमप्पभा तमा तमतमा ।

[५९८] सत्तविहा बायरवाउकाइया पन्नत्ता तं जहा- पाईणवाते पडीणवाते दाहिणवाते उदीणवाडे उड्ढवाते अहेवाते विदिसिवाते ।

[५९९] सत्त संठाणा प०तं०-दीहे रहस्से वट्टे तंसे चउरंसे पिहुले परिमंडले ।

[६००] सत्त भयद्वाणा पन्नत्ता तं जहा- इहलोगभए परलोगभए आदाणभए अकम्हाभए वेयणभए मरणभए असिलोगभए ।

[६०१] सत्तहिं ठाणेहिं छउमत्थं जाणेज्जा, तं जहा- पाणे अइवाएत्ता भवति मुसं वइत्ता भवति अदिन्नं आदित्ता भवति सद्धफरिसरसरूवगंधे आसादेत्ता भवति पूयासक्कारं अणुवूहेत्ता भवति इमं सावज्जंति पण्णवेत्ता पडिसेवेत्ता भवति नो जहावादी तहाकारी यावि भवति ।

सत्तहिं ठाणेहिं केवलीं जाणेज्जा तं जहा- नो पाणे अइवाइत्ता भवति जाव जहावादी तहाकारी यावि भवति ।

[६०२] सत्त मूलगोत्ता प० तं० कासवा गोतमा वच्छा कोच्छा कोसिआ मंडवा वासिद्धा ।

जे कासवा ते सत्तविधा पन्नत्ता तं जहा- ते कासवा ते संडिल्ला ते गोला ते वाला ते मुंजइणो ते पव्वपेच्छतिणो ते वरिसकण्हा,

जे गोतमा ते सत्तविधा पन्नत्ता तं जहा- ते गोतमा ते गग्गा ते भारद्वा ते अंगिरसा ते
सक्कराभा ते भक्खराभा ते उदत्ताभा ।

जे वच्छा ते सत्तविधा पन्नत्ता तं जहा- ते वच्छा ते अग्गेया ते मित्तेया ते सामलिणो
सेलयया ते अट्ठिसेणा ते वीयकम्हा ।

ठाणं-७

जे कोच्छा ते सत्तविधा पन्नत्ता तं जहा- ते कोच्छा ते मोग्गलायणा ते पिंगलायणा ते
कोडिणो बा ते मंडलिणो ते हारिता ते सोमया,

जे कोसिआ ते सत्तविधा प० तं० ते कोसिआ ते कच्चायणा ते सालंकायणा ते
गोलिकायणा ते पक्खिकायणा ते अग्गिच्चा ते लोहिच्चा ।

जे मंडवा ते सत्तविधा पन्नत्ता तं०-ते मंडवा ते अरिद्धा ते संमुता ते तेला ते एलावच्चा ते
कंडिल्ला ते खारायणा ।

जे वसिद्धा ते सत्तविधा पन्नत्ता तं जहा- ते वसिद्धा ते उजायणा ते जारुकण्हा ते
वग्घावच्चा ते कौडिण्णा ते सण्णी ते पारासरा ।

[६०३] सत्त मूलनया प० तं० नेगमे संगहे ववहारे उज्जुसुते सद्धे समभिरूढे एवंभूते ।

[६०४] सत्त सरा पन्नत्ता तं जहा ।

[६०५] सज्जे रिसभे गंधारे मज्झिमे पंचमे सरे ।
धेवते चेव नेसादे सरा सत्त वियाहिता ॥

[६०६] एएसिं णं सत्तण्हं सराणं सत्त सरद्धाणा प०तं० जहा- ।

[६०७] सज्जं तु अग्गजिब्भाए उरेण रिसभं सरं ।
कंठुग्गतेण गंधारं मज्झिजिब्भाए मज्झिमं ॥

[६०८] नासाए पंचमं बूया दंतोद्वेण य धेवतं ।
मुद्धाणेण य नेसादं सरद्धाणा वियाहिता ॥

[६०९] सत्त सरा जीवनिस्सिता पन्नत्ता तं जहा- ।

[६१०] सज्जं रवति मयूरो कुक्कुडो रिसभं सरं ।
हंसो नदति गंधारं मज्झिमं तु गवेलगा ॥

[६११] अह कुसुमसंभवे काले कोइला पंचमं सरं ।
छट्ठं च सारसा कौचा नेसायं सत्तमं गजो ॥

[६१२] सत्त सरा अजीवनिस्सिता पन्नत्ता तं जहा- ।

[६१३] सज्जं रवति मुडंगो गोमुही रिसभं सरं ।
संखो नदति गंधारं मज्झिमं पुण झल्लरी ॥

[६१४] चउचलणपतिद्धाणा गोहिया पंचमं सरं ।
आडंबरो धेवतियं महाभेरी य सत्तमं ॥

[६१५] एतेसि णं सत्तण्हं सराणं सत्त सरलक्खणा पन्नत्ता तं०- ।

[६१६] सज्जेण लभति वित्तिं कतं च न विणस्सति ।
गावो मित्ता य पुत्ता य नारीणं चेव वल्लभो ॥

- [६१७] रिसभेण उ एसज्जं, सेणावच्चं धणाणि य ।
वत्थगंधमलंकारं, इत्थिओ सयणाणि य ॥
- [६१८] गंधारे गीतजुत्तिण्णा वज्जवित्ती कलाहिया ।
भवन्ति कइणो पण्णा जे अण्णे सत्थापारगा ॥

ठाणं-७

- [६१९] मज्झिमसरसंपण्णा भवन्ति सुहजीविणो ।
खायती पियती देती मज्झिमसरमस्सितो ॥
- [६२०] पंचमसरसंपण्णा भवन्ति पुढवीपती ।
सूरा संगहकत्तारो अणेगगणंनायगा ॥
- [६२१] रेवतसरसंपण्णा भवन्ति कलहप्पिया ।
साउणिया वग्गुरिया सोयरिया मच्छबंधा य ॥
- [६२२] चंडाला मुट्ठिया सेया जे अण्णे पावकम्मिणो ।
गोधातगा य जे चोरा नेसाय सरमस्सिता ॥

[६२३] एतेसि णं सत्तण्हं सराणं तओ गामा पन्नत्ता तं जहा- सज्जगामे मज्झिमगामे,
गंधारगामे सज्जगामस्स णं सत्त मुच्छणाओ पन्नत्ताओ तं जहा- ।

- [६२४] मंगी कोरव्वीया हरी य रयणी य सारकंता य ।
छट्ठी य सारसी नाम सुद्ध-सज्जा य सत्तमा ॥

[६२५] मज्झिमगामस्स णं सत्त मुच्छणाओ पन्नत्ताओ तं जहा- ।

- [६२६] उत्तरमंदा रयणी उत्तरा उत्तरायता ।
अस्सोकंता य सोवीरा अभिरू हवति सत्तमा ॥

[६२७] गंधारगामस्स णं सत्त मुच्छणाओ पन्नत्ताओ तं- ।

- [६२८] नंदी य खुद्धिमा पूरिमा य चउत्थी य सुद्धगंधारा ।
उत्तरगंधारावि य पंचमिया हवति मुच्छा उ ॥

- [६२९] सुद्धुत्तरमायामा सा छट्ठी नियमसो उ नायव्वा ।
अह उत्तरायता कोडिमा य सा सत्तमी मुच्छा ॥

- [६३०] सत्त सरा कतो संभवन्ति गीतस्स का भवति जोणी ।
कतिसमया उस्साया कति वा गीतस्स आगारा ॥

- [६३१] सत्त सरा नाभीतो भवन्ति गीतं च रुण्णजाणीयं ।
पदसमया ऊसासा तिण्णि य गोयस्स आगारा ॥

- [६३२] आइमिउ आरभंता समुव्वहंता य मज्झगारंमि ।
अवसाणे य झव्वेता तिण्णि य गोयस्स आगारा ॥

- [६३३] छट्ठोसे अट्ठगुणे तिण्णि य वित्ताइं दो य भणितीओ ।
जो नाहिति-सो गाहिइ सुसिक्खिओ रंगमज्झम्मि ॥

- [६३४] भीतं दूतं रहस्सं गायंतो मा य गाहि उत्तालं ।
काकस्सरमणुणासं च होंति गोयस्स छट्ठोसा ॥

[६३५] पुण्णं रत्तं च अलंकियं च वत्तं तहा अविधुदं ।
 मधुरं समं सुललियं अट्ट गुणा होंति गेयस्स ॥
 [६३६] उर-कंठ-सिर-पसत्थं च गिज्जते मउय-रिभिअ-पदबद्धं ।
 समतालपदुक्खेवं सत्तसरसीहरं गेयं ॥

ठाणं-७

[६३७] निदोसं सारवंतं च हेउजुत्तमलंकियं ।
 उवणीतं सोवयारं च मितं मधुरमेव य ॥
 [६३८] सममद्धसमं चेव सव्वत्थ विसमं च जं ।
 तिण्णि वित्तप्पयाराइं चउत्थं नोपलब्भती ॥
 [६३९] सक्कता पागता चेव दोण्णि य भणिति आहिया ।
 सरमंडलंमि गिज्जंते पसत्था इसिभासिता ॥
 [६४०] केसी गायति मधुरं केसि गायति खरं च रुक्खं च ।
 केसी गायति चउरं केसि विलंब दुत्तं केसी ॥
 [६४१] विस्सरं पुण केरिसी? सामा गायइ मधुरं काली गयइ खरं च ।
 रुक्खं च गोरी गायि चउरं काण विलंबं दुत्तं अंधा ॥
 [६४२] विस्सरं पुण पिंगला तंतिसमं तालसमं पादसमं लयसमं गहसमं च ।
 नीससिऊससियसमं संचारसमा सरा सत्त ॥
 [६४३] सत्त सरा तओ गामा मुच्छणा एकविंसी ।
 ताणा एगूणपन्नासा समत्तं सरमंडलं ॥

[६४४] सत्तविधे कायकिलेसे पण्णत्ते तं जहा- ठाणाति एउकुडुयासणिए पडिमठाई
 वीरसणिए नेसज्जिए दंडायति ए लगंडसाई ।

[६४५] जंबुद्धीवे दीवे सत्त वासा पन्नत्ता तं जहा- भरहे एरवते हेमवते हेरम्णवते हरिवासे
 रम्मगवासे महाविदेहे ।

जंबुद्धीवे दीवे सत्त वासहरपव्वता पन्नत्ता तं जहा- चुल्लहिमवंते महाहिमवंते निसडे
 नीलवंते रूपी सिहरी मंदरे ।

जंबुद्धीवे दीवे सत्त महानदीओ पुरत्थाभिमुहीओ लवणसमुद्धं समप्पंति तं जहा- गंगा रोहिता
 हरी सीता नरकंता सुवण्णकूला रत्ता, जंबुद्धीवे दीवे सत्त महानदीओ पच्चत्थाभिमुहीओ लवणसमुद्धं
 समप्पंति तं जहा- सिंधू रोहितंसा हरिकंता सीतोदा नारिकंता रूपकूला रत्तावती

घायइसंडदीवपुरत्थिमद्धे णं सत्त वासा पन्नत्ता तं जहा- भरहे जाव महाविदेहे ।

घायइसंडदीवपुरत्थिमद्धे णं सत्त वासहरपव्वता पन्नत्ता तं जहा- चुल्लहिमवंते जाव मंदरे
 ।

घायइसंडदीवपुरत्थिमद्धे णं सत्त महानदीओ पुरत्थाभिमुहीओ कालोयसमुद्धं समप्पंति तं
 जहा- गंगा जाव रत्ता घायइसंडदीवपुरत्थिमद्धे णं सत्त महानदीओ पच्चत्थाभिमुहीओ लवणसमुद्धं
 समप्पंति तं जहा- सिंधू जाव रत्तवती,

घायइसंडदीवे पच्चत्थिमद्धे णं सत्त वासा एवं चेव, नवरं- पुरत्थाभिमुहीओ लवणसमुद्धं समप्पेति पच्चत्थाभिमुहीओ कालोदं, सेसं तं चेव,

पुक्खरवरदीवड्ढपुरत्थिमद्धे णं सत्त वासा तहेव, नवरं- पुरत्थाभिमुहीओ पुक्खरोदं समुद्धं समप्पेति पच्चत्थाभिमुहीओ कालोदं समुद्धं समप्पेति सेसं तं चेव एवं पच्चत्थिमद्धेवि नवरं पुरत्थाभिमुहीओ कालोदं समुद्धं समप्पेति पच्चत्थाभिमुहीओ पुक्खरोदं समप्पेति, सव्वत्थ वासा वासहर-पव्वता नदीओ य भाणितव्वाणि ।

ठाणं-७

[६४६] जंबुद्धीवे दीवे भारहे वासे तीताए उस्सप्पिणीए सत्त कुलगरा हुत्था तं जहा-

[६४७] मित्तदामे सुदामे य सुपासे य सयंपभे ।
विमलधोसे सुधोसे य महाधोसे य सत्तमे ॥

[६४८] जंबुद्धीवे भारहे वासे इमीसे ओसप्पिणीए सत्त कुलगरा हुत्था ।

[६४९] पढमित्थ विमलवाहण चक्खुम जसमं चउत्थमभिचंदे ।
तत्तो य पसेणइ पुण मरुदेवे चेव नाभी य ॥

[६५०] एएसि णं सत्तण्हं कुलगराणं सत्त भारियाओ हुत्था तं जहा-

[६५१] चंदजस चंदकंता सुरूव पडिरूव चक्खुकंता य ।
सिरिकंता मरुदेवी कुलकरइत्थीण नामाइं ॥

[६५२] जंबुद्धीवे दीवे भारहे वासे आगमिस्साए उस्सप्पिणीए सत्त कुलकरा भविस्संति-

[६५३] मित्तवाहण सुभोमे य सुप्पभे य सयंपभे ।
दत्ते सुहुमे सुबंधू य आगमिस्सेण होक्खती ॥

[६५४] विमलवाहणे णं कुलकरे सत्तविधा रूक्खा उवभोगत्ताए हव्वमागच्छिंसु तं जहा-

[६५५] मतंगता य भिंगा चित्तंगा चेव होंति चित्तरसा ।
मणियंगा य अणियणा सत्तमगा कप्परूक्खा य ॥

[६५६] सत्तविधा दंडनीति पन्नत्ता तं जहा- हक्कारे मक्कारे धिक्कारे परिभासे मंडलबंधे चारए छविच्छेदे ।

[६५७] एगमेगस्स णं रण्णो चाउरंतचक्कवट्ठिस्स सत्त एगिंदियरयणा पन्नत्ता तं जहा- चक्करयणे छत्तरयणे चम्मरयणे दंडयरणे असिरयणे मणिरयणे काकणियरणे ।

एगमेगस्स णं रण्णो चाउरंतचक्कवट्ठिस्स सत्त पंचिदियरयणा पन्नत्ता तं जहा- सेनावतिरयणे गाहावतिरयणे वड्ढइरयणे पुरोहितरयणे इत्थिरयणे आसरयणे हत्थिरयणे ।

[६५८] सत्तहिं ठाणेहिं ओगाढं दुस्समं जाणेज्जा तं जहा- अकाले वरिसइ काले न वरिसइ असाधू पुज्जंति साधू न पुज्जंति गुरुहिं जणो मिच्छं पडिवण्णो मणोदुहता वइदुहता ।

सत्तहिं ठाणेहिं ओगाढं सुसमं जाणेज्जा तं जहा- अकाले न वरिसइ काले वरिसइ असाधू न पुज्जंति साधू पुज्जंति गुरुहिं जणो सम्मं पडिवण्णो मणोसुहता वइसुहता ।

[६५९] सत्तविहा संसारसमावण्णगा जीवा पन्नत्ता तं जहा- नेरइया तिरिक्खजोणिआ तिरिक्खजोणिणीओ मणुस्सा मणुस्सीओ देवा देवीओ ।

[६६०] सत्तविधे आउभेदे पण्णत्ते तं जहा- ।

[६६१] अज्झवसाण-निमित्ते आहारे वेयणा पराधाते ।

फासे आणापाणू सत्तविधं मिज्जए आउं ॥

[६६२] सत्तविधा सव्वजीवा पन्नत्ता तं जहा- पुढविकाइया आउकाइया तेउकाइया वाउकाइया वणस्सतिकाइया तसकाइया अकाइया ।

अहवा-सत्तविहा सव्वजीवा पन्नत्ता तं जहा- कण्हलेसा [नीललेसा काउलेसा तेउलेस पम्ह-लेसा] सुक्कलेसा अलेसा ।

ठाणं-७

[६६३] बंभदत्ते णं राया चाउरंतचक्कवट्ठी सत्त धणूइं उड्ढं उच्चत्तेणं सत्त य वाससयाइं परमाउं पालइत्ता कालमासे कालं किच्चा अधेसत्तमाए पुढवीए अप्पतिट्ठणे नरए नेरइयत्ताए उववण्णे ।

[६६४] मल्ली णं अरहा अप्पसत्तमे मुंडे भवित्ता अगाराओ अणगारियं पव्वइए तं जहा- मल्ली विदेहरायवरकण्णगा, पडिबुद्धी-इक्खागराया, चंदच्छाये-अंगराया, रूप्पी-कुणा-लाधिपती, संखे-कासीराया, अदीनसत्तू-कुरुराया, जितसत्तू-पंचालराया ।

[६६५] सत्तविहे दंसणे पण्णत्ते तं जहा- सम्मदंसणे मिच्छदंसणे सम्मामिच्छदंसणे चक्खुदंसणे अचक्खुदंसणे ओहिदंसणे केवलदंसणे ।

[६६६] छउमत्थ-वीयरगे णं मोहणिज्जवज्जाओ सत्त कम्मपयडीओ वेदेति तं जहा- नाणावरणिज्जं दंसणावरणिज्जं वेयणिज्जं आउयं नामं गोतं अंतराइयं ।

[६६७] सत्त ठाणाइं छउमत्थे सव्वभावेणं न याणति न पासति तं जहा- धम्मत्थिकायं अधम्मत्थिकायं आगासत्थिकायं जीवं असीररपडिबद्धं परमाणुपोग्गलं सद्धं गंधं एयाणि चेव उप्पन्ननाणे जाव जाणति पासति, तं जहा- धम्मत्थिकायं जाव गंधं ।

[६६८] समणे भगवं महावीरे वइरोसभनारायसंघयणे समचउरंस-संठाण-संठित्ते सत्त रयणीओ उड्ढं उच्चत्तेणं हुत्था ।

[६६९] सत्त विकहाओ पन्नत्ताओ तं जहा- इत्थिकहा भत्तकहा देसकहा रायकहा मिउकालुणिया दंसणभेयणी चरित्तभेयणी ।

[६७०] आयरिय-उवज्झायस्स णं गणंसि सत्त अइसेसा पन्नत्ता तं जहा- आयरिय-उवज्झाए अंतो उवस्सगस्स पाए निगिज्झिय-निगिज्झिय पप्फोडेमाणे वा पमज्जमाणे वा नातिक्कमति एवं जथा पंचट्ठाणे जाव बाहिं उवस्सगस्स एगरातं वा दुरातं वा एगओ वसमाणे नातिक्कमति उवकरणातिसेसे भत्तपाणातिसेसे ।

[६७१] सत्तविधे संजमे पण्णत्ते तं जहा- पुढविकाइयसंजमे जाव तसकातितसंजमे, अजीवकाइयसंजमे, सत्तविधे असंजमे पण्णत्ते तं जहा- पुढविकाइयअसंजमे जाव तसकाइयअसंजमे अजीवकाइयअसंजमे ।

सत्तविहे आरंभे प० तं० जहा- पुढविकाइयआरंभे जाव अजीवकाइयआरंभे । एवं अनारम्भे वि, एवं सारंभे वि, एवं असारंभे वि, एवं समारंभे वि, एवं असमारंभे वि जाव अजीवकाय असमारंभे ।

[६७२] अध भंते! अदसि-कुसुंभ-कोद्धव-कंगु-रालग-वरट्ट-कोद्धसग-सण-सरिसव-मुलग-बीयाणं - एतेसि णं धण्णाणं कोट्ठाउत्ताणं पल्लाउत्ताणं जाव ।

एवं अणारंभेवि, एवं सारंभेवि, एवं असारंभेवि, एवं समारंभेवि, एवं असमारंभेवि, जाव अजीवकाय असमारंभे ।

पिहियाणं केवइयं कालं जोणी संचिद्धति? गोयमा! जहण्णेणं अंतोमुहुत्तं उक्कोसेणं सत्त संवच्छराइं, तेण पर जोणी पमिलायति जाव जोणीवोच्छेदे पण्णत्ते ।

[६७३] बायरआउकाइयाणं उक्कोसेणं सत्त वाससहस्साइं ठिती पन्नत्ता ।

तच्चाए णं वालुयप्पभाए पुढवीए उक्कोसेणं नेरइयाणं सत्तं सागरोवमाइं ठिती पन्नत्ता, चउत्थीए णं पंकप्पमाए पुढवीए जहण्णेणं नेरइयाणं सत्त सागरोवमाइं ठिती पन्नत्ता ।

ठाणं-७

[६७४] सक्कस्स णं देविंदस्स देवरण्णो वरुणस्स महारण्णो सत्त अग्गमहिंसीओ पण्णत्ताओ,

ईसाणस्स णं देविंदस्स देवरण्णो सोमस्स महारण्णो सत्त अग्गमहिंसीओ पन्नत्ताओ,

ईसाणस्सं णं देविंदस्स देवरण्णो जमस्स महारण्णो सत्त अग्गमहिंसीओ पन्नत्ताओ ।

[६७५] ईसाणस्स णं देविंदस्स देवरण्णो अब्भिंतरपरिसाए देवाणं सत्त पलिओवमाइं ठिती पन्नत्ता ।

सक्कस्स णं देविंदस्स देवरण्णो अग्गमहिंसीणं देवीणं सत्त पलिओवमाइं ठिती पन्नत्ता ।

सोहम्मे कप्पे परिग्गहियाणं देवीणं उक्कोसेणं सत्त पलिओवमाइं ठिती प. ।

[६७६] सारस्सयमाइच्चाणं देवाणं सत्त देवा सत्त देवसता पन्नत्ता ।

गद्धतोयतुसियाणं देवाणं सत्त देवा सत्त देवसहस्सा पन्नत्ता ।

[६७७] सणकुमारे कप्पे उक्कोसेणं देवाणं सत्त सागरोवमाइं ठिती पन्नत्ता ।

माहिंदे कप्पे उक्कोसेणं देवाणं सातिरेगाइं सत्त सागरोवमाइं ठिती पन्नत्ता ।

[६७८] बंभलोगे कप्पे जहण्णेणं देवाणं सत्त सागरोवमाइं ठिती पन्नत्ता ।

बंभलोय-लंतएसु णं कप्पेसु विमाणा सत्त जोयणसताइं उड्डं उच्चत्तेणं पन्नत्ता ।

[६७९] भवणवासीणं देवाणं भवधारणिज्जा सरीरगा उक्कोसेणं सत्त रयणीओ उड्डं उच्चत्तेणं पन्नत्ता, एवं वाणमंतराणं, एवं जोइसियाणं,

सोहम्मीसाणेसु णं कप्पेसु देवाणं भवधारणिज्जा सरीरगा उक्कोसेणं सत्त रयणीओ उड्डं उच्चत्तेणं पन्नत्ता ।

[६८०] नंदिस्सरवरस्स णं दीवस्स अंतो सत्त दीवा पन्नत्ता तं जहा- जंबुद्वीवे घायइसंडे पोक्खरवरे वरुणवरे खीरवरे घयवरे खोयवरे, नंदीसरवरस्स णं दीवस्स अंतो सत्त समुद्धा पन्नत्ता तं जहा- लवणे कालोदे पुक्खरोदे वरुणोदे खीरोदे घओदे खोओदे ।

[६८१] सत्त सेढीओ पन्नत्ताओ तं जहा- उज्जुआयता एगतोवंका दुहतोवंका एगतोखहा दुहतोखहा चक्कवाला अद्धचक्कवाला ।

[६८२] चमरस्स णं असुरिंदस्स असुरकुमाररण्णो सत्त अणिया सत्त अणियाधिपती पन्नत्ता तं जहा- पायत्ताणिए पीढाणिए कुंजराणिए महिसाणिए रहाणिए नट्टाणिए गंधच्चाणिए, दुमे पायत्ताणियाधिवती एवं जहा पंचट्टाणे जाव किन्नरे रधाणियाधिवती रिद्धे नट्टाणियाधिवती गीतरती गंधच्चाणियाधिवती ।

बलिस्स णं वड़ोयणिंदस्स वड़ोयणरण्णो सत्ताणिया सत्त अणियाधिपती पन्नत्ता तं जहा- पायत्ताणिए जाव गंधव्वाणिए, महद्दुमे पायत्ताणियाधिपती जाव किंपुरिसे-रधाणियाधिपती महारिद्धे नट्टाणियाधिपती गीतजसे गंधव्वाणियाधिपती ।

घरणस्स णं नागकुमारिंदस्स नागकुमाररण्णो सत्त अणिया सत्त अणियाधिपती पन्नत्ता तं जहा- पायत्ताणिए जाव गंधव्वाणिए भद्दसेणे पायत्ताणियाधिपती जाव आणंदे रधाणियाधिपती नंदणे नट्टामियाधिपती तेतली गंधव्वाणियाधिपती ।

भूताणंदस्स णं नागकुमारिंदस्स नागकुमाररण्णो सत्त अणिया सत्त अणियाहिवई पन्नत्ता तं

जहा- पायत्ताणिए जाव गंधव्वाणिए दक्खे पायत्ताणियाहिवती जाव नंदुत्तरे रहाणियाहिवइ रती नट्टाणिया-

ठाणं-७

हिवई माणसे गंधव्वाणियाहिवई, एवं जाव घोस-महाघोसाणं नेयव्वं ।

सक्कस्स णं देविंदस्स देवरण्णो सत्त अणिया सत्त अणियाहिवती पन्नत्ता तं जहा- पायत्ता-णिए जाव गंधव्वाणिए हरिणेगमेसी पायत्ताणियाधिपती जाव माढरे रधाणियाधिपती सेते नट्टाणियाहिवती तुंबुरु गंधव्वाणियाधिपती

ईसाणस्स णं देविंदस्स देवरण्णो सत्त अणिया सत्त अणियाहिवई पन्नत्ता तं जहा- पायत्ता-णिए जाव गंधव्वाणिए लहुपरक्कमे पायत्ताणियाहिवती जाव महासेते नट्टाणियाहिवती रते गंधव्वाणिता-धिपती, सेसं जहा पंचट्ठाणे, एवं जाव अच्युतस्स वि नेयव्वं ।

[६८३] चमरस्स णं असुरिंदस्स असुरकुमाररण्णो दुमस्स पायत्ताणियाधिपतिस्स सत्त कच्छाओ पन्नत्ताओ तं जहा- पढमा कच्छा जाव सतमा कच्छा ।

चमरस्स णं असुरिंदस्स असुरकुमाररण्णो दुमस्स पायत्ताणियाधिपतिस्स पढमाए कच्छाए चउसट्ठि देवसहस्सा पन्नत्ता जावतिया पढमा कच्छा तव्विगुणा दोच्या कच्छा जावतिया दोच्या कच्छा तव्विगुणा तच्या कच्छा एवं जाव जावतिया छट्ठा कच्छा तव्विगुणा सत्तमा कच्छा ।

एवं बलिस्सवि, नवरं-महद्दुमे सट्ठिदैवसाहस्सिओ, सेसं तं चेव धरणस्स एवं चेव नवरं अट्ठावीसं देवसहस्सा, सेसं ते चेव, जथा धरणस्स एवं जाव महाघोसस्स, नवरं-पायत्ताणियाधिपती अण्णे ते पुव्वभाणिता ।

सक्कस्स णं देविंदस्स देवरण्णो हरिणेगमेसिस्स सत्त कच्छाओ पन्नत्ताओ तं जहा- पढमा कच्छा एवं जहा चमरस्स तहा जाव अच्युतस्स, नाणत्तं पायत्ताणियाधिपतीणं ते पुव्वभाणिता देवपरिमाणं इमं-सक्कस्स चउरासीतिं देवसहस्सा जाव जावतिया छट्ठा कच्छा तव्विगुणा सत्तमा कच्छा देवा इमाए गाथाए अणुगंतव्वा । जाव अच्युतस्स लहुपरक्कमस्स दस देव सहस्सा जाव जावतिता छट्ठा कच्छा तव्विगुणा सत्तमा कच्छा ।

[६८४] चउरासीति असीति बावत्तरी सतरी य सट्ठी य ।

पन्ना चत्तालीसा तीसा वीसा य दससहस्सा ॥

[६८५] सत्तविहे वयणविकप्पे पण्णत्ते तं जहा- आलावे अणालावे उल्लावे अणुल्लावे संलावे पलावे विप्पलावे ।

[६८६] सत्तविहे विनए पण्णत्ते तं जहा- नाणविनए दंसणविनए चरित्तविनए मणविनए वइविनए कायविनए लोगोवयारविनए,

पसत्थमणविनए सत्तविधे पण्णत्ते तं जहा- अपावए असावज्जे अकिरिए निरुवक्के से अण्हयकरे अच्छविकरे अभूताभिसंकणे, अपसत्थमणविनए सत्तविधे पण्णत्ते तं जहा- पावए सावज्जे सकिरिए सउवक्के से अण्हयकरे छविकरे भूताभिसंकणे,

पसत्थवइविनए सत्तविधे पण्णत्ते तं जहा- अपावए असावज्जे जाव अभूताभिसंकणे अपसत्थवइविणए सत्तविधे पण्णत्ते तं जहा- पावए जाव भूताभिसंकणे ।

पसत्थकायविणए सत्तविधे प० तं जहा- आउत्तं गमणं आउत्तं ठाणं आउत्तं निसीयणं आउत्तं तुअट्ठणं आउत्तं उल्लंधणं आउत्तं पल्लंधणं आउत्तं सव्विंदियजोगजुंजणता, अपसत्थकायविणए

सत्तविधे पण्णत्ते तं जहा- अणाउत्तं गमणं जाव अणाउत्तं सव्विंदियजोगजुंजणता, ठाणं-७

लोगोवयारविणए सत्तविधे पण्णत्ते तं जहा- अब्भासवत्तितं परच्छंदाणुवत्तितं कज्जहेउं कतपडिकतिता अत्तगवेसणता देसकालण्णुता सव्वत्थेसु य अपडिलोमता ।

[६८७] सत्त समुग्धाता प० तं० वेयणासमुग्धाए कसायसमुग्धाए मारणंतियसमुग्धाए वेउव्वियसमुग्धाए तेजससमुग्धाए आहारगसमुग्धाए केवलिसमुग्धाए, मणुस्साणं सत्त समुग्धाता पण्णत्ता, एवं चेव ।

[६८८] समणस्स णं भगवओ महावीरस्स तित्थंसि सत्त पवयणनिण्हगा पण्णत्ता तं जहा- बहुरता जीवपएसिया अवत्तिया सामुच्छेइया दोकिरिया तेरासिया अबद्धिया, एएसि णं सत्तण्हं पवयण निण्हगाणं सत्त धम्मायरिया हुत्था तं०-जमाली तीसगुत्ते आसाढे आसमित्ते गंगे छलुए गोढामाहिले, एतेसि णं सत्तण्हं पवयणनिण्हगाणं सत्तउप्पत्तिनगरा हुत्था तं० ।

[६८९] सावत्थी उसभपुरं सेयविया मिहिलउल्लगातीरं ।
पुरिमंतरंजि दसपुरं निण्हगउप्पत्तिनगराइं ॥

[६९०] सातावेयणिज्जस्स णं कम्मस्स सत्तविधे अनुभावे पण्णत्ता तं जहा- मणुण्णा सद्धा मणुण्णा रूवा मणुण्णा गंधा मणुण्णा रसा मणुण्णा फासा मणोसुहता वइसुहता, असातावेयणिज्जस्स णं कम्मस्स सत्तविधे अणुभावे पण्णत्ता तं जहा- अमणुण्णा सद्धा जाव वइदुहता ।

[६९१] महानक्खत्ते सत्ततारे पण्णत्ता, अभिइयादिया णं सत्त नक्खत्ता पुव्वदारिया पण्णत्ता तं जहा- अभिइं सवणो घणिट्ठा सतभिसया पुव्वभद्वया उत्तरभद्वया रेवती, अस्सिणियादिणा णं सत्त नक्खत्त । दाहिणदारिया पण्णत्ता तं जहा- अस्सिणा भरणी कित्तिया रोहिणी मिगसिरे अद्धा पुणव्वसू, पुस्सादिया णं सत्त नक्खत्ता अवरदारिया पण्णत्ता तं जहा- पुस्सो असिलेसा मघा पुव्वाफग्गुणी उत्तराफग्गुणी हत्थो चित्ता, सातियाइया णं सत्त नक्खत्ता उत्तरदारिया प०तं०-साति विसाहा अणुराहा जेद्धा मूलो पुव्वासाढा उत्तरासाढा ।

[६९२] जंबुद्वीवे दीवे सोमणसे वक्खारपव्वते सत्त कूडा प० तं० -

[६९३] सिद्धे सोमणसे या बोद्धव्वे मंगलावतीकूडे ।

देवकुरु विमल कंचण विसिद्धकूडे य बोद्धव्वे ॥

[६९४] जंबुद्धीवे गंधमायणे वक्खारपव्वते सत्त कूडा प० तं० जहा- ।

[६९५] सिद्धे य गंधमायण बोद्धव्वे गंधिलावतीकूडे ।

उत्तरकुरु फलिहे लोहितकखे आणंदणे चेव ॥

[६९६] बिड्दियाणं सत्त जाति-कुलकोडि-जोणीपमुह-सयसहस्सा प० ।

[६९७] जीवा णं सत्तद्वाणनिव्वत्तिते पोग्गले पावकम्मत्ताए चिणिंसु वा चिणंति वा चिणिस्संति वा तं जहा- नेरइयनिव्वत्तिते जाव देवीनिव्वत्तिते एवं-चिण- निज्जरा चेव ।

[६९८] सत्त पतेसिया खंधा अनंता पन्नत्ता, सत्त पतेसोगाढा पोग्गला जाव सत्त गुण लुक्खा पोग्गला अनंता पन्नत्ता ।

० सत्तमं ठाणं समत्तं ०

मुनि दीपरत्नसागरेण संशोधितः सम्पादितश्च सत्तमं ठाणं सम्मत्तं

ठाणं-८

[] अट्ठमं ठाणं []

[६९९] अट्ठहिं ठाणेहिं संपण्णे अणगारे अरिहति एगल्लविहारपडिमं उवसंपज्जित्ताणं विहरित्तए, तं जहा- सड्ढी पुरिसजाते सच्चे पुरिसजाते मेहावी पुरिसजाते बहुस्सुते पुरिसजाते सत्तिमं अप्पाधिगरणे धितिमं वीरियसंपण्णे ।

[७००] अट्ठविधे जोणिसंगहे पन्नत्ता तं जहा- अंडगा पोतगा [जराउजा रसजा संसेयगा संमुच्छिमा] उब्भिगा उववातिया,

अंडगा अट्ठगतिया अट्ठागतिया पण्णत्ता तं जहा- अंडए अंडएसु उववज्जमाणे अंडएहिंतो वा पोतएहिंतो वा [जराउजेहिंतो वा रसजेहिंतो वा संसेयगेहिंतो वा संमुच्छिमेहिंतो वा उब्भिएहिंतो वा उववातिएहिंतो वा] उववज्जेज्जा, से चेव णं से अंडए अंडगत्तं विप्पजहमाणे अंडगत्ताए वा पोतगत्ताए वा जाव उववातियत्ताए वा गच्छेज्जा, एवं पोतगावि, जराउजावि, सेसाणं गतिरागती नत्थि ।

[७०१] जीवा णं अट्ठ कम्मपगडीओ चिणिंसु वा चिणंति वा चिणिस्संति वा, तं जहा- नाणावरणिज्जं दरिसणावरणिज्जं वेयणिज्जं मोहणिज्जं आउयं नामं गोत्तं अंतराइयं,

नेरइया णं अट्ठ कम्मपगडीओ चिणिंसु वा चिणंति वा चिणिस्संति वा एवं चेव, एवं निरंतरं जाव वेमाणियाणं ।

जीवा णं अट्ठ कम्मपगडीओ उवचिणिंसु वा उचचिणंति वा उवचिणिस्संति वा एवं चेव ।

एवं-चिण-उवचिण-बंध-उदीर-वेय तह निज्जरा चेव एते छ चउवीसा दंडगा भाणियव्वा ।

[७०२] अट्ठहिं ठाणेहिं मायी मायं कट्ठु नो आलोएज्जा नो पडिक्कमेज्जा [नो निंदेज्जा नो गरिहेज्जा नो विउट्ठेज्जा नो विसोहेज्जा नो अकरणाए अब्भुट्ठेज्जा नो अहारिहं पायच्छित्तं तवोकम्मं] पडिवज्जेज्जा तं जहा- करिंसु वाऽहं, करेमि वाऽहं, करिस्सामि वाऽहं, अकित्ती वा मे सिया अवण्णे वा मे सिया, अविनाए वा मे सिया, कित्ती वा मे परिहाइस्सइ, जसे वा मे परिहाइस्सइ ।

अट्ठहिं ठाणेहिं मायी मायं कट्ठु आलोएज्जा जाव पडिवज्जेज्जा तं जहा- मायिस्स णं अस्सिं लोए गरहिते भवति, उववाए गरहिते भवति, आयाती गरहिता भवति, एगमवि मायी मायं कट्ठु नो

आलोएज्जा जाव पडिवज्जेज्जा नत्थि तस्स आराहणा, एगमवि मायी मायं कट्ठु आलोएज्जा पडिवज्जेज्जा अत्थि तस्स आराहणा ।

बहुओवि मायी मायं कट्ठु आलोएज्जा जाव तवोकम्मं पडिवज्जेज्जा अत्थि तस्स आराहणा, आयरिय-उवज्झायस्स वा मे अतिसेसे नाणदंसणे समुप्पज्जेज्जा से यं मममालोएज्जा मायी णं एसे।

मायी णं मायं कट्ठु से जहाणामए अयागरेति वा तंबागरेति वा तउआगरेति वा सीसागरेति वा रूप्पागरेति वा सुवण्णागरेति वा तिलागणीति वा तुसागणीति वा बुसागणीति वा नलागणीति वा दलगणीति सौंडियालिंछाणि वा भंडियालिंछाणि वा गोलियालिंछाणि वा कुंभारावाएति वा कवेल्लुआवाएति वा इट्ठावाएति वा जंतवाडचुल्लीति वा लोहारंबरिसाणि वा तत्ताणि समजोतिभूताणि किंसुकफुल्लसमाणाणि उक्कासहस्साइं विणिम्मुयमाणाइं-विणिम्मुयमाणाइं जालासहस्साइं पमुंचमाणाइं-पमुंचमाणाइं इंगाल सहस्साइं पविक्खरमाणाइं-पविक्खर-माणाइं अंतो-अंतो झियायंति एवामेव मायी मायं कट्ठु अंतो-अंतो ठाणं-८

झियाइ जंवि य णं अण्णे वदंति तंपि य णं मायी जाणति अहमेसे अभिसकिज्जामि अभिसंकिज्जामि,

मायी णं मायं कट्ठु अनालोइयपडिक्कमंते कालमासे कालं किच्चा अन्नतरेसु देवलोगेसु देवत्ताए उववत्तारो भवंति तं जहा- नो महिइडिएसु जाव नो दूरंगतिएसु नो चिरद्वितिएसु, से णं तत्थ देवे भवति नो महिइडिए जाव नो चिरद्वितिए जावि य से तत्थ बाहिरब्भंतरिया परिसा भवति सावि य णं नो आढाति नो परिजाणाति नो महरिहेणं आसणेणं उवणिमंतेति भासंपि य से भासमाणस्स जाव चत्तारि पंच देवा अणुत्ता चेव अब्भुट्ठंतिमा बहुं देवे भासउ-भासउ,

से णं ततो देवलोगाओ आउक्खाएणं भवक्खएणं ठितिक्खएणं अणंतरं चयं चइत्ता इहेव माणुस्साए भवे जाइं इमाइं कुलाइं भवंति तं जहा- अंतकुलाणि वा पंतकुलाणि वा तुच्छकुलाणि वा दरिद्वकुलाणि वा भिक्खागकुलाणि वा किवणकुलाणि वा तहप्पगारेसु कुलेसु पुमत्ताए पच्चायाति, से णं तत्थ पुमे भवति दुरूवे दुवण्णे दुग्गंथे दुरसे दुफासे अणिट्ठे अकंते अप्पिए अमणुण्णे अमणामे हीणस्सरे दीणस्सरे अणिट्ठ-स्सरे अंकतस्सरे अपियस्सरे अमणुण्णस्सरे अमणामस्सरे अणाएज्जवयणे पच्चायाते जावि य से तत्थ बाहिरब्भंतरिया परिसा भवति सावि य णं नो आढाति नो परिजाणाति नो महरिहेण आसणेणं उवणिमंतेति भासंपि य से भासमाणस्स जाव चत्तारि पंच जणा अणुत्ता चेव अब्भुट्ठंति-मा बहुं अज्जउत्तो भासउ-भासउ ।

मायी णं मायं कट्ठु आलोचित-पडिक्कंते कालमासे कालं किच्चा अन्नतरेसु देवलोगेसु देवत्ताए उववत्तारो भवंति तं जहा- महिइडिएसु जाव चिरद्वितिएसु, से णं तत्थ देवे भवति महिइडिए जाव चिरद्वितिए हार-विराइय-वच्छे कडक-तुडित-थंभित-भुए अंगद-कुंडल-मट्ठ-गंडतल-कण्णपीढधारी विचित्त-हत्थाभरणे विचित्तवत्थाभरणे विचित्तमालामउली कल्लाणग-पवर-वत्थ-परिहिते कल्लाणग-पवर-गंध-मल्ला-णुलेवणधरे भासुरबौदी पलंब-वणमालधरे दिव्वेणं वण्णेणं दिव्वेणं गंधेणं दिव्वेणं रसेणं दिव्वेणं फासेणं दिव्वेणं संघातेणं दिव्वेणं संठाणेणं दिव्वाए इड्डीए दिव्वाए जुईए दिव्वाए पभाए दिव्वाए छायाए दिव्वाए अच्चीए दिव्वेणं तेएणं दिव्वाए लेस्साए दस दिसाओ उज्जोवेमाणे पभासेमाणे महयाहत-नट्टगीत-वादित-तंती-तल-ताल-तुडित-धण-मुइंग-पडुप्प-वादित-रवेणं दिव्वाइं भोगभोगाइं भुंजमाणे विहरइ जावि य से

तत्थ बाहिरब्भंतरिया परिसा भवति सावि य णं आढाइ परिजाणाति महारिहेणं आसणेणं उवनिमंतेति भासंपि य से भासमाणस्स जाव चत्तारि पंच देवा अणुत्ता चेव अब्भुट्ठंति-बहुं देवे भासउ-भासउ ।

से णं ताओ देवलोगाओ आउक्खएणं जाव चइत्ता इहेव माणुस्सए भवे जाइं इमाइं कुलाइं भवंति-इइढाइं जाव बहुजणस्स अपरिभूताइं तहप्पगारेसु कुलेसु पुमत्ताए पच्चायाति, से णं तत्थ पुमे भवति सुरूवे सुवण्णे सुगंधे सुरसे सुफासे इहे कंते पिए मणुण्ण मणामे अहीणस्सरे जाव मणामस्सरे आदेज्जवयणे पच्चायाते, जावि य से तत्थ बाहिरब्भंतरिया परिसा भवति सावि य णं आढाति जाव बहुं अज्जउत्ते भासउ-भासउ ।

[७०३] अट्ठविहे संवरे पन्नत्ते तं जहा- सोइंदियसंवरे जाव फासिंदियसंवरे, मणसंवरे, वइसंवरे, कायसंवरे,

अट्ठविहे असंवरे पन्नत्ता तं जहा- सोतिंदियअसंवरे जाव कायअसंवरे ।

[७०४] अट्ठ फासा पणत्ता तं जहा- कक्खडे मउए गरुए लहुए सीते उसिणे निद्धे लुक्खे ।

[७०५] अट्ठविधा लोगट्ठिती पणत्ता तं जहा- आगासपतिट्ठिते वाते, वातपतिट्ठिते

ठाणं-८

उदही, उदधिपतिट्ठिता पुढवी पुढविपतिट्ठिता तसा थावरा पाणा, अजीवा जीव-पतिट्ठिता जीवा कम्मप-तिट्ठिता, अजीवाजीवसंगहीता, जीवा कम्मसंगहीता ।

[७०६] अट्ठविहा गणिसंपया प० तं जहा- आचारसंपया सुयसंपया सरीरसंपया वयणसंपया वायणासंपया मतिसंपया पओगसंपया संगहपरिण्णा नाम अट्ठमा ।

[७०७] एगमेणे णं महानिही अट्ठचक्कवालपतिट्ठाणे अट्ठजोयणाइं उइं उच्चत्तेणं पन्नत्ता ।

[७०८] अट्ठ समितीओ पणत्ताओ तं जहा- इरियासमिती, भासासमिती, एसणासमिती, आयाणभंड-मत्त-निक्खेवणासमिती, उच्चार-पासवण-खेल-सिंधाणंजल्ल-परिठावणियासमिती, मणसमिती, वइसमिती, कायसमिती ।

[७०९] अट्ठहिं ठाणेहिं संपन्ने अणगारे अरिहति आलोयणं पडिच्छित्तए तं जहा- आयारवं आधारवं ववहारवं ओवीलए पकुव्वए अपरिस्साई निज्जावए अवायदंसी ।

अट्ठहिं ठाणेहिं संपन्ने अणगारे अरिहति अत्तदोसमालोइत्ताए तं जहा जातिसंपण्णे कुलसंपन्ने विनयसंपन्ने नाणसंपन्ने दंसणसंपन्ने चरित्तसंपन्ने खंते दंते ।

[७१०] अट्ठविहे पायच्छित्ते पन्नत्ता तं जहा- आलोयणारिहे पडिक्कमणारिहे तदुभयारिहे विवेगारिहे विउसग्गारिहे तवारिहे छेयारिहे मूलारिहे ।

[७११] अट्ठा मयट्ठाणा पन्नत्ता तं जहा- जातिमए कुलमए बलमए रूवमए तवमए सुतमए लाभमए इस्सरियमए ।

[७१२] अट्ठ अकिरियावाई पणत्ता तं जहा- एगावाई अनेगावाई मितवाई निम्मितवाई सायवाई समुच्छेदवाई नितावाई नसंतिपरलोगवाई ।

[७१३] अट्ठविहे महानिमित्ते पन्नत्ता तं जहा- भोमे उप्पाते सुविणे अंतलिक्खे अंगे सरे लक्खण वंजणे ।

[७१४] अट्ठविधा वयणविभत्ती पणत्ता तं जहा- ।

- [७१५] निद्वेसे पढमा होती बितिया उवएसणे ।
ततिया करणम्मि कता चउत्थी संपदावणे ॥
- [७१६] पंचमी य अवादाणे छट्ठी सस्साभिवादणे ।
सत्तमी सण्णिहाणत्थे अट्ठमी आमंतणी भवे ॥
- [७१७] तत्थ पढमा विभत्ती निद्वेसे-सो इमो अहं वत्ति ।
बितिया उण उवएसे-भण कुण व इमं व तं वत्ति ॥
- [७१८] ततिया करणंमि कया-नीतं व कतं व तेण व मए वा ।
हंदि नमो साहाए हवति चउत्थी पदाणंमि ॥
- [७१९] अवणे गिण्हसु तत्तो इत्तोत्ति वा पंचमी अवादाणे ।
छट्ठी तस्स इमस्स व गतस्स वा सामि-संबंधे ॥
- [७२०] हवइ पुण सत्तमी तमिमम्मि आहारकालभावे य ।
आमंतणी भवे अट्ठमी उ जह हे जुवाण त्ति ॥

ठाणं-८

[७२१] अट्ठ ठाणाइं छउमत्थे सव्वभावेणं न याणति न पासति तं जहा- धम्मत्थिकायं जाव गंधं वातं, एताणि चेव उप्पन्ननाणदंसणणधरे अरहा जिणे केवली सव्वभावेणं जाणइ पासइ तं जहा- धम्मत्थिकायं जाव वातं ।

[७२२] अट्ठविधे आउवेदे पन्नत्ता तं जहा- कुमारभिच्चे कायतिगिच्छा सालाई सल्लहत्ता जंगोली भूतवेज्जा खारतंते रसायणे ।

[७२३] सक्कस्स णं देविंदस्स देवरण्णो अट्ठग्गमहिंसीओ पण्णत्ताओ तं जहा- पउमा सिवा सची अंजू अमला अच्छरा नवमिया रोहिणी ।

ईसाणस्स णं देविंदस्स देवरण्णो अट्ठग्गमहिंसीओ पण्णत्ताओ तं जहा- कण्हा कण्हराई रामा रामरक्खित्ता वसू वसुगुत्ता वसुमित्ता वसुंधरा ।

सक्कस्स णं देविंदस्स देवरण्णो सोमस्स महारण्णो अट्ठग्गमहिंसीओ पण्णत्ताओ, ईसाणस्स णं देविंदस्स देवरण्णो वेसमणस्स महारण्णो अट्ठग्गमहिंसीओ पण्णत्ताओ,

अट्ठ महग्गहा पण्णत्ता तं जहा- चंदे सूरै सुक्के बुहे बहस्सती अंगारे सण्णिचरे केऊ ।

[७२४] अट्ठविधा तणवणस्सतिकाइया पण्णत्ता तं जहा- मूले कंदे खंधे तया साले पवाले पत्ते पुप्फे ।

[७२५] चउरिंदिया णं जीवा असमारभमाणस्स अट्ठविधे संजमे कज्जति तं जहा- चक्खुमातो सोक्खातो अवरोवेत्ता भवति, चक्खुमएणं दुक्खेणं असंजोएत्ता भवति एवं जाव फासामातो सोक्खातो अवरोवेत्ता भवति फासामएणं दुक्खेणं असंजोगेत्ता भवति ।

चउरिंदिया णं जीवा समारभमाणस्स अट्ठविधे असंजमे कज्जति तं जहा- चक्खुमातो सोक्खातो ववरोवेत्ता, भवति चक्खुमएणं दुक्खेणं संजोगेत्ता भवति, एवं जाव फासामातो सोक्खातो ववरोवेत्ता भवति फासामएणं दुक्खेणं संजोगेत्ता भवति ।

[७२६] अट्ठ सुहुमा पण्णत्ता तं जहा- पाणसुहुमे पणगसुहुमे बीयसुहुमे हरितसुहुमे पुप्फसुहुमे अंडसुहुमे लेणसुहुमे सिणेहसुहुमे ।

[७२७] भरहस्स णं रण्णो चाउरंतचक्कवट्टिस्स अट्ठ पुरिसजुगाइं अणुबद्धं सिद्धाइं जाव सव्वदुक्खप्पहीणाइं तं जहा- आदिच्चजसे महाजसे अतिबले महाबले तेयवीरिए कत्तवीरिए दंडवीरिए जलवीरिए ।

[७२८] पासस्स णं अरहओ पुरिसादाणियस्स अट्ठ गणा अट्ठ गणहरा होत्था तं जहा- सुभे अज्जघोसे वसिट्ठे बंभचारी सोमे सिरिधरे वीरभद्ध जसोभद्धे ।

[७२९] अट्ठविधे दंसणे पन्नत्ता तं जहा- सम्मदंसणे मिच्छदंसणे सम्मामिच्छदंसणे चक्खुदंसणे अचक्खुदंसणे ओहिदंसणे केवलदंसणे सुविणदंसणे ।

[७३०] अट्ठविधे अट्ठोवमिए पन्नत्ता तं जहा- पलिओवमे सागरोवमे ओसप्पिणी उस्सप्पिणी पोग्गलपरियट्ठे तीतद्धा अणागतबद्धा सव्वद्धा ।

[७३१] अरहतो णं अरिद्धनेमिस्स जाव अट्ठमातो पुरिसजुगातो जुगंतकरभूमी दुवासपरियाए अंतमकासी ।

[७३२] समणेणं भगवता महावीरेणं अट्ठ रायाणो मुंडे भवेत्ता अगाराओ अणगारित्तं पच्चा-
ठाणं-८

इया तं जहा- वीरंगए वीरजसे संजय एणिज्जए रायरिसी सेये सिवे उद्दायणे तह संखे कासिवद्धणे ।

[७३३] अट्ठविधे आहारे पन्नत्ता तं जहा- मणुण्णे असणे पाणे खाइमे साइमे अमणुण्णे-
[असणे पाणे खाइमे] साइमे ।

[७३४] उप्पिं सणंकुमार-माहिंदाणं कप्पाणं हेट्ठिं बंभलोगे कप्पे रिद्धविमाणे-पत्थडे एत्थ णं अक्खाडग-समचउरंस-संठाण-संठिताओ अट्ठ कण्हराईओ पण्णत्ताओ तं जहा- पुरत्थिमे णं दो कण्हराईओ, दाहिणेणं दो कण्हराईओ, पच्चत्थिमे णं दो कण्हराईओ, उत्तरेणं दो कण्हराईओ, पुरत्थिमा अब्भंतरा कण्हराई दाहिणे बाहिरं कण्हराई पुट्ठा, दाहिणा अब्भंतरा कण्हराई पच्चत्थिमं बाहिरं कण्हराई पुट्ठा, पच्चत्थिमा अब्भंतरा कण्हराई उत्तरं बाहिरं कण्ह-राइं पुट्ठा, उत्तरा अब्भंतरा कण्हराई पुरत्थिमं बाहिरं कण्हराई पुट्ठा, पुरत्थिमपच्चत्थिमिल्लाओ बाहिराओ दो कण्हराईओ छलंसाओ, उत्तरदाहिणाओ बाहिराओ दो कण्हराईओ तंसाओ, सव्वाओ वि णं अब्भंतरकण्हराईओ चउरंसाओ ।

एतासि णं अट्ठण्हं कण्हराईणं अट्ठ नामधेज्जा पण्णत्ता तं जहा- कण्हराईति वा मेहरा-ईति वा मधाति वा माधवतीति वा वातफलिहेति वा वातपलिक्खोमेति वा देवफलिहेति वा देवपलिक्खो-मेति वा ।

एतासि णं अट्ठण्हं कण्हराई णं अट्ठसु ओवासंतरेसु अट्ठ लोगंतियविमाणा पण्णत्ता तं जहा- अच्ची अच्चिमाली वइरोअणे पभंकरे चंदाभे सूराभे सुपइट्ठाभे अग्गिच्चामे ।

एतेसु णं अट्ठसु लोगंतियविमाणसु अट्ठविधा लोगंतिया देवा तं जहा- ।

[७३५] सारस्सतमाइच्चा वण्णी वरुणा य गद्धतोया य ।

तुसिता अच्चाबाहा अग्गिच्चा चेव बोद्धव्वा ॥

[७३६] एतेसि णं अट्ठण्हं लोगंतियदेवाणं अजहण्णमणुक्कोसेणं अट्ठ सागरोवमाइं ठिती पण्णत्ता अट्ठ धम्मत्थिकाय-मज्झपएसा पण्णत्ता अट्ठ अधम्मत्थिकाय० एवं चेव अट्ठ आगासत्थिकाय० एवं चेव अट्ठ जीव-मज्झपएसा पन्नत्ता ।

[७३७] अरहा णं महापउमे अट्ठ रायाणो मुंडा भवित्ता अगाराओ अणगारितं प्वावेस्सति तं०-पउमं पउमगुम्मं नलिणं नलिणगुम्मं पउमद्धयं धणुद्धयं कणगरहं भरहं ।

[७३८] कणहस्स णं वासुदेवस्स अट्ठ अग्गमहिसीओ अरहतो णं अरिद्धनेमिस्स अंतिते मुंडा भवेत्ता अगाराओ अणगारितं पव्वइया सिद्धाओ जाव सव्वदुक्खप्पहीणाओ तं जहा-

| पउमावती य गोरी गंधारी लक्खाणा सुसीमा य |

|| जंबवती सच्चभामा रुप्पिणी कणह अग्गमहिसीओ ||

[७३९] वीरियपुव्वस्स णं अट्ठ वत्थू चूलवत्थू पण्णत्ता ।

[७४०] अट्ठ गतीओ पण्णत्ताओ तं जहा- निरयगती तिरियगती मणुयगती देवगती सिद्धगती गुरुगती पणोल्लणगती पब्भारगती ।

[७४१] गंगा-सिंधु-रत्ता-रत्तवतिदेवीणं दीवा अट्ठ-अट्ठ जोयणाइं आयामविक्खंभेणं पण्णत्ता ।

[७४२] उक्कामुह-मेहमुह-विज्जुमुह-विज्जुदंतदीवा णं दीवा अट्ठ-अट्ठ जोयणसयाइं आयामविक्खंभेणं पण्णत्ता ।

[७४३] कालोदे णं समुद्धे अट्ठ जोयणसयसहस्साइं चक्कवालविक्खंभेणं पन्नत्ते ।

ठाणं-८

[७४४] अब्भंतरपुक्खरद्धे णं अट्ठ जोयणसयसहस्साइं चक्कवालविक्खंभेणं पन्नत्ते एवं बाहिरपुक्खरद्धेवि ।

[७४५] एगमेगस्स णं रण्णो चाउरंतचक्कवट्ठिस्स अट्ठसोवण्णिण ककणिरयणे छत्तले दुवालवसंसिए अट्ठकण्णिण अधिकरणिसंठिते ।

[७४६] मागधस्स णं जोयणस्स अट्ठ धणुसहस्साइं निधत्ते पन्नत्ता ।

[७४७] जंबू णं सुदंसणा अट्ठ जोयणाइं उड्ढं उच्चत्तेणं बहुमज्झदेसभाए अट्ठ जोयणाइं विक्खंभेणं सातिरेगाइं जोयणाइं सव्वग्गेणं पण्णत्ता कूडसामली णं अट्ठ जोयणाइं एवं चेव ।

[७४८] तिमिसगुहा णं अट्ठ जोयणाइं उड्ढं उच्चत्तेणं, खंडप्पवातगुहा णं अट्ठ जोयणाइं उड्ढं उच्चत्तेणं एवं चेव ।

[७४९] जंबुद्धीवे दीवे मंदरस्स पव्वयस्स पुरत्थिमे णं सीताए महानदीए उभतो कूले अट्ठ वक्खारपव्वया पण्णत्ता तं जहा- चित्तकूडे पम्हकूडे नलिनकूडे एगसेले तिकूडे वेसमणकूडे अंजणे मायंजणे । जंबुद्धीवे दीवे मंदरस्स पव्वयस्स पच्चत्थिमेणं सीतोयाए महानदीए उभतो कूले अट्ठ वक्खारपव्वता पण्णत्ता तं जहा- अंकावती पम्हावती आसीविसे सुहावहे चंदपव्वते सूरपव्वते नागपव्वते देवपव्वते,

जंबुद्धीवे दीवे मंदरस्स पव्वयस्स पुरत्थिमे णं सीताए महानदीए उत्तरे णं अट्ठ चक्कवट्ठिविजया पण्णत्ता तं जहा- कच्छे सुकच्छे महाकच्छे कच्छगावती आवते मंगलावत्ते पुक्खले पुक्खलावती, जंबुद्धीवे दीवे मंदरस्स पव्वयस्स पुरत्थिमे णं सीताए महानदीए दाहिणे णं अट्ठ चक्कवट्ठिविजया पण्णत्ता तं जहा- वच्छे सुवच्छे महावच्छे वच्छगावती रम्मं रम्मगे रमणिज्जे मंगलावती, जंबुद्धीवे दीवे मंदरस्स पव्वयस्स पच्चत्थिमे णं सीतोयाए महानदीए दाहिणे णं अट्ठ चक्कवट्ठिविजया पण्णत्ता तं जहा- पम्हे सुपम्हे महपम्हे पम्हगावती संखे नलिणे कुमुए सलिलावती, जंबुद्धीवे दीवे मंदरस्स पव्वयस्स पच्चत्थिमे णं सीतोयाए महानदीए उत्तरे णं अट्ठ चक्कवट्ठिविजया पण्णत्ता तं जहा- वप्पे सुवप्पे महावप्पे वेप्पगावती वग्गू सुवग्गु गंधिल्ले गंधिलावती ।

जंबुद्वीवे दीवे मंदरस्स पव्वयस्स पुरत्थिमे णं सीताए महानदीए उत्तरे णं अट्ठरायहाणीओ पण्णत्ताओ तं जहा- खेमा खेमपुरी रिट्ठा रिट्ठपुरी खग्गी मंजूसा ओसधो पुंडरीगिणी, जंबुद्वीवे दीवे मंदरस्स पव्वयस्स पुरत्थिमे णं सीताए महानदीए दाहिणे णं अट्ठरायहाणीओ पण्णत्ताओ तं जहा- सुसीमा कुंडला अपराजिया पभंकरा अंकावई पम्हावई सुभा रयणसंचया, जंबुद्वीवे दीवे मंदरस्स पव्वयस्स पच्चत्थिमे णं सीओदाए महानदीए दाहिणे णं अट्ठ रायहाणीओ पण्णत्ताओ तं जहा- आसपुरा सोहपुरा महापुरा विजयपुरा अवराजिता अवरा असोया वीतसोगा, जंबुद्वीवे दीवे मंदरस्स पव्वयस्स पच्चत्थिमे णं सीतोयाए महानदीए उत्तरे णं अट्ठ रायहाणीओ पण्णत्ताओ तं जहा- विजया वेजयंती जयंती अपराजिया चक्कपुरा खग्गपुरा अवज्झा अउज्झा ।

[७५०] जंबुद्वीवे दीवे मंदरस्स पव्वयस्स पुरत्थिमे णं सीताए महानदीए उत्तरे णं उक्कोसपए अट्ठ अरहंता अट्ठ चक्कवट्ठी अट्ठ बलदेवा अट्ठ वासुदेवा उप्पज्जिंसु वा उप्पज्जंति वा उप्पज्जिस्संति वा, जंबुद्वीवे दीवे मंदरस्स पव्वयस्स पुरत्थिमे णं सीताए महानदीए दाहिणे णं उक्कोसपए एवं चेव, जंबुद्वीवे दीवे मंदरस्स पव्वयस्स पच्चत्थिमे णं सीओयाए महानदीए दाहिणे णं उक्कोसपए एवं चेव, एवं उत्तरेणवि ।

ठाणं-८

[७५१] जंबुद्वीवे दीवे मंदरस्स पव्वयस्स पुरत्थिमे णं सीताए महानदीए उत्तरे णं अट्ठ दीहवेयड्ढा अट्ठ तिमिसमगुहाओ अट्ठ खंडगप्पवातगुहाओ अट्ठ कयमालगा देवा अट्ठ नट्टमालगा देवा अट्ठ गंगाकुंडा अट्ठ सिंधुकुंडा अट्ठ गंगाओ अट्ठ सिंधुओ अट्ठ उसभकूडा पव्वता अट्ठ उसभकूडा देवा पण्णत्ता ।

जंबुद्वीवे दीवे मंदरस्स पव्वयस्स पुरत्थिमे णं सीताए महानदीए दाहिणे णं अट्ठ दीहवेयड्ढा एवं चेव जाव अट्ठ उसभकूडा देवा पण्णत्ता, नवरमेत्थ रत्तरत्तावती तासिं चेव कुंडा

जंबुद्वीवे दीवे मंदरस्स पव्वयस्स पच्चत्थिमे णं सीतोयाए महानदीए दाहिणे णं अट्ठ दिहवो जाव अट्ठ नट्टमालगा देवा अट्ठ गंगाकुंडा अट्ठ सिंधुकुंडा अट्ठ गंगाओ अट्ठ सिंधूओ अट्ठ उसभकूडा पव्वता अट्ठ उसभकूडा देवा पण्णत्ता ।

जंबुद्वीवे दीवे मंदरस्स पव्वयस्स पच्चत्थिमे णं सीओयाए महानदीए उत्तरे णं अट्ठ दीहवेयड्ढा जाव अट्ठ नट्टमालगा देवा पण्णत्ता अट्ठ रत्ताकुंडा अट्ठ रत्तावतिकुंडा अट्ठ रत्ताओ अट्ठ रतावतीओ अट्ठ उसभकूडा पव्वत्ता अट्ठ उसभकूडा देवा पण्णत्ता ।

[७५२] मंदरचूलिया णं बहुमज्झदेसभाए अट्ठ जोयणाइं विक्खंभेणं प० ।

[७५३] धायइसंडदीव पुरत्थिमद्धे णं घायइरूक्खे अट्ठ जोयणाइं उड्ढं उच्चत्तेणं प० बहुमज्झदेसभाए अट्ठ जोयणाइं विक्खंभेणं साइरेगाइं अट्ठ जोयणाइं सव्वग्गेणं पण्णत्ता एवं घायइरूक्खात्तो आढेत्ता सच्चेव जंबूदीववत्तव्वता भाणियव्वा जाव मंदरचूलियत्ति एवं पच्चत्थिमद्धेवि महाधातइरूक्खात्तो आढेत्ता जाव मंदरचूलियत्ति एवं पुक्खरवरदीवड्ढ-पुरत्थिमद्धेवि पउमरूक्खाओ आढेत्ता जाव मंदरचूलियत्ति एवं पुक्खरवरदीवड्ढ-पच्चत्थिमद्धेवि महापउमरूक्खातो जाव मंदरचूलियत्ति ।

[७५४] जंबुद्वीवे दीवे मंदरे पव्वते भट्टसालवणे अट्ठ दिसाहत्थिकूडा पण्णत्ता (तं जहा-)

[७५५] चउमुत्तर नीलवंते सुहत्थि अंजणागिरी ।

कुमुदे य पलासे य वड्ढेसे रोयणागिरी ॥

[७५६] जंबुद्वीवस्स णं दीवस्स जगती अट्ठ जोयणाइं उड्ढं उच्चत्तेणं बहुमज्झदेसभाए अट्ठ जोयणाइं विक्खंभेणं पण्णत्ता ।

[७५७] जंबुद्वीवे दीवे मंदरस्स पव्वयस्स दाहिणे णं महाहिमवंते वासहरपव्वते अट्ठ कूडा पण्णत्ता तं जहा ।

[७५८] सिद्धे महाहिमवंते हिमवंते रोहिता हरीकूडे ।
हरिकंता हरिवासे वेरुलिए चेव कूडा उ ॥

[७५९] जंबुद्वीवे दीवे मंदरस्स पव्वयस्स उत्तरे णं रूपिंमि वासहरपव्वते अट्ठ कूडा पण्णत्ता तं जहा- ।

[७६०] सिद्धे य रूपि रम्मग नरकंता बुद्धि रूप्पकूडे य ।
हिरण्णवते मणिकंचणे य रूपिम्मि कूडा उ ॥

[७६१] जंबुद्वीवे दीवे मंदरस्स पव्वयस्स पुरत्थिमे णं रूयगवरे पव्वते अट्ठ कूडा पण्णत्ता तं जहा-

[७६२] रिद्धे तवणिज्ज कंचण रयत दिसाओत्थिते पलंबे य ।

ठाणं-८

अंजणे अंजणपुलए रूयगस्स पुरत्थिमे कूडा ॥

[७६३] तत्थ णं अट्ठ दिसाकुमारिमहत्तरियाओ महिड्ढियाओ जाव पलिओवमद्वितीयाओ परिवसंति तं जहा- ।

[७६४] नंदुत्तरा य नंदा आणंदा नंदिवद्धणा ।
विजया य वेजयंती जयंती अपराजिया ॥

[७६५] जंबुद्वीवे दीवे मंदरस्स पव्वयस्स दाहिणे णं रूयगवरे पव्वते अट्ठ कूडा पण्णत्ता तं जहा- ।

[७६६] कणए कंचणे पउमे नलिणे ससि दिवायरे चेव ।
वेसमणे वेरुलिए रूयगस्स उ दाहिणे कूडा ॥

[७६७] तत्थ णं अट्ठ दिसाकुमारिमहत्तरियाओ महिड्ढियाओ जाव पलिओवमद्वितीयाओ परिवसंति तं जहा-

[७६८] समाहारा सुप्पतिण्णा सुप्पबुद्धा जसोहरा ।
लच्छिवत सेसवती चित्तगुत्ता वसुंधरा ॥

[७६९] जंबुद्वीवे दीवे मंदरस्स पव्वयस्स पच्चत्थिमे णं रूयगवरे पव्वते अट्ठ कूडा पण्णत्ता तं जहा-

[७७०] सोत्थिते य अमोहे य हिमवं मंदरे तहा ।
रूअगे रूयगुत्तमे चंदे अट्ठमे य सुदंसणे ॥

[७७१] तत्थ णं अट्ठ दिसाकुमारिमहत्तरियाओ महिड्ढियाओ जाव पलिओवमद्वितीयाओ परिवसंति तं जहा-

[७७२] इलादेवी सुरादेवी पुढवी पउमावती ।
एगणासा नवमिया सीता भद्दा य अट्ठमा ॥

[७७३] जंबुद्धीवे दीवे मंदरस्स पव्वयस्स उत्तरे णं रूअगवरे पव्वते अट्ठ कूडा पण्णत्ता तं जहा- ।

[७७४] रयण-रयणुच्चए या सव्वरयण रयणसंचए चेव ।
विजये य वेजयंति जयंते अपराजिते ॥

[७७५] तत्थ णं अट्ठ दिसाकुमारिमहत्तरियाओ महड्ढियाओ जाव पलिओवमद्वितीयाओ परिवसंति तं जहा- ।

[७७६] अलंबुसा मित्तकेसी पोंडरि गीयवारुणी ।
आसा सव्वगा चेव सिरी हिरी चेव उत्तरतो ॥

[७७७] अट्ठ अहेलोगवत्थव्वाओ दिसाकुमारिमहत्तरियाओ प०-

[७७८] भोगंकरा भोगवती सुभोगा भोगमालिणी ।
सुवच्छा वच्छमित्ता य वारिसेणा बलाहगा ॥

[७७९] अट्ठ उड्ढलोगवत्थव्वाओ दिसाकुमारिमहत्तरियाओ पन्नत्ताओ तं जहा-

[७८०] मेघंकरा मेघवती सुमेधा मेघमालिणी ।

ठाणं-८

तोयधारा विचित्ताय पुप्फमाला अनिंदिता ॥

[७८१] अट्ठ कप्पा तिरियमिस्सोववण्णगा पण्णत्ता तं जहा- सोहम्मं जाव सहस्सारे, एतेसु णं अट्ठसु कप्पेसु अट्ठ इंदा पण्णत्ता तं जहा- सक्के जाव सहस्सारे ।

एतेसि णं अट्ठण्हं इंदाणं अट्ठ परियाणिया विमाणा पण्णत्ता तं जहा- पालए पुप्फए सोमणसे सिरिवच्छे नंदियावत्ते कामकमे पीतिमणे विमले ।

[७८२] अट्ठमिया णं भिक्खुपडिमा चउसट्ठीए राइदिएहिं दोहि य अट्ठासीतेहिं भिक्खासतेहिं अहासुत्तं जाव अणुपालितावि भवति ।

[७८३] अट्ठविधा संसारसमावण्णगा जीवा प० तं०- जहा- पढमसमयनेरइया अपढमसमय-नेरइया पढमसमयतिरिया एवं जाव अपढमसमयदेवा ।

अट्ठविधा सव्वजीवा पण्णत्ता तं जहा- नेरइया तिरिक्खजोणिया तिरिक्खजोणिणीओ मणुस्सा मणुस्सीओ देवा देवीओ सिद्धा, अहवा- अट्ठविधा सव्वजीवा पण्णत्ता तं जहा- आभिणिबोहिय-नाणी जाव । केवलनाणी मतिअन्नाणी सुतअन्नाणी विभंगनाणी ।

[७८४] अट्ठविधे संजमे पन्नत्ता तं जहा- पढमसमयसुहुमसंपरायसरागसंजमे अपढमसमय-सुहुमसंपरायसरागसंजमे पढमसमयबादरसंपरायसरागसंजमे अपढमसमयबादरसंपरायसरागसंजमे पढम-समयउवसंतकसायवीतरागसंजमे अपढमसमयउवसंतकसायवीतरागसंजमे पढमसमयखीणकसायवीतराग-संजमे अपढमसमयखीणकसायवीतरागसंजमे ।

[७८५] अट्ठ पुढवीओ प० तं०- रयणप्पभा जाव अहेसत्तमा ईसिपब्भारा ईसिपब्भाराणं पुढवीए बहुमज्झदेसभागे अट्ठजोयणिए खेत्ते अट्ठ जोयणाइं वाहल्लेणं पन्नत्ता ।

ईसिपब्भाराए णं पुढवीए अट्ठ नामधेज्जा पण्णत्ता तं जहा- ईसिति वा ईसिपब्भाराति वा तणूति वा तणुतणूइ वा सिद्धीति वा सिद्धलएति वा मुत्तीति वा मुत्तालएति वा ।

[७८६] अद्वहिं ठाणेहिं सम्मं घडितत्वं जतितत्वं परक्कमितत्वं अस्सिं च णं अद्वे नो पमाएतत्वं भवति असुयाणं धम्माणं सम्मं सुणणताए अब्भुट्ठेतत्वं भवति, सुताणं धम्माणं ओगिण्हणयाए उवधारणयाए अब्भुट्ठेतत्वं भवति, पावाणं कम्माणं संजमेणकरणताए अब्भुट्ठेतत्वं भवति, पोराणाणं कम्माणं तवसा विगिंचणताए विसोहणताए अब्भुट्ठेतत्वं भवति,

असंगिहीतपरिजणस्स संगिण्हणताए अब्भुट्ठेतत्वं भवति, सेहं आयागोयरं गाहणताए अब्भुट्ठेतत्वं भवति, गिलाणस्स अगिलाए वेयावच्चकरणताए अब्भुट्ठेतत्वं भवति, साहम्मियाणमधि-करणंसि उप्पणंसि तत्थ अणिसिस्तोवस्सितो अपक्खग्गाही मज्झत्थभावभूते कह नु साहम्मिया अप्पसद्धा अप्पझंझा अप्पतुमंतुमा उवसामणताए अब्भुट्ठेतत्वं भवति ।

[७८७] महासुक्का-सहस्सारेसु णं कप्पेसु विमाणा अद्व जोयणसताइं उड्ढं उच्चत्तेणं पण्णत्ता ।

[७८८] अरहतो णं अरिद्वनेमिस्स अद्वसया वादीणं सदेवमणुयासुराए परिसाए वादे अपराजिताणं उक्कोसिया वादिसंपया हत्था ।

[७८९] अद्वसमइए केवलिसमुग्धाते पन्नत्ता तं जहा- पढमे समए दंडं करेति बीए समए ठाणं-८

कवाडं करेति ततिए समए मंथं करेति चउत्थे समए लोगं पुरेति पंचमे समए लोगं पडिसाहरति छट्ठे समए मंथं पडिसाहरति सत्तमे समए कवाडं पडिसाहरति अद्वमे दंडं पडिसाहरति ।

[७९०] समणस्स णं भगवतो महावीरस्स अद्व सया अनुत्तरोववाइयाणं गतिकल्लाणाणं ठितिकल्लाणाणं आगमेसिभद्धानं उक्कोसिया अनुत्तरोववाइयसंपया हत्था ।

[७९१] अद्वविधा वाणमंतरा देवा पण्णत्ता तं जहा- पिसाया भूता जक्खा रक्खसा किन्नरा किंपुरिसा महोरगा गंधच्वा ।

एतेसि णं अद्वविहाणं वाणमंतरदेवाणं अद्व चेइयरुक्खा पण्णत्ता तं जहा- ।

[७९२] कलंबो उ पिसायाणं वडो जक्खाण चेइयं ।

तुलसी भूयाण भवे रक्खासाणं च कंडओ ॥

[७९३] असोओ किन्नराणं च किंपुरिसाणं तु चंपओ ।

नागरुक्खो भुयंगाणं गंधच्वाण य तेंदुओ ॥

[७९४] इमीसे रयणप्पभाए पुढवीए बहुसमरमणिज्जाओ भूमिभागाओ अद्वजोयणसते उड्ढमबाहाए सुरविमाणे चारं चरति ।

[७९५] अद्व नक्खत्ता चंदेणं सद्धिं पमद्धं जोगं जोएंति तं जहा- कत्तिया रोहिणी पुनव्वसू महा चित्ता विसाहा अनुराधा जेद्धा ।

[७९६] जंबुद्धीवस्स णं दीवस्स दारा अद्व जोयणाइं उड्ढं उच्चत्तेणं पण्णत्ता ।

सव्वेसिंपि दीवसमुद्धानं दारा अद्व जोयणाइं उड्ढं उच्चत्तेणं पण्णत्ता ।

[७९७] पुरिसवेयणिज्जस्स णं कम्मस्स जहन्नेणं अद्वसंवच्छराइं बंधठिती पन्नत्ता

जसोकित्तीनामस्स णं कम्मस्स जहन्नेणं अद्व मुहुत्ताइं बंधठिती पन्नत्ता ।

उच्चगोतस्स णं कम्मस्स [जहन्नेणं अद्व मुहुत्ताइं बंधठिती पन्नत्ता]

[७९८] तेइंदियाणं अद्व जाति-कुलकोडी-जोणीपमुह-सतसहस्सा प० ।

[७९९] जीवा णं अट्ठठाणनिव्वत्तिते पोग्गले पावकम्मत्ताए चिणिंसु वा चिणंति वा चिणिस्संति वा तं जहा- पढमसमयनेरइयनिव्वत्तिते जाव अपढमसमयदेवनिव्वत्तिते, एवं-चिण-उवचिण जाव निज्जरा चेव अट्ठपएसिया खंधा अनंता पण्णत्ता ।

अट्ठपएसोगाढा पोग्गला अनंता पण्णत्ता जाव अट्ठणलुक्खा पोग्गला अनंता पण्णत्ता ।

◦ अट्ठमं ठाणं समत्तं ◦

◦ मुनि दीपरत्नसागरेण संशोधितः सम्पादितश्च पढमं अज्झयणं समत्तं ◦

[] नवमं-ठाणं []

[८००] नवहिं ठाणेहिं समणे निग्गंथे संभोइयं विसंभोइयं करेमाणे नातिक्कमति तं जहा- आयरियपडिणीयं उवज्झायपडिणीयं थेरपडिणीयं कुलपडिणीयं गणपडिणीयं संघपडिणीयं नाणपडिणीयं दंसणपडिणीयं चरित्तपडिणीयं ।

[८०१] नव बंभचेरा पण्णत्ता तं जहा- सत्थपरिण्णा लोगविजओ जाव उवहाणसुयं महापरिण्णा ।

ठाणं-९

[८०२] नव बंभचेरगुत्तीओ पण्णत्ताओ तं जहा- विवित्ताइं सयणासणाइं सेवित्ता भवति-नो इत्थिसंसत्ताइं नो पसुसंसत्ताइं नो पंडगसंसत्ताइं, नो इत्थीणं कहं कहेत्ता भवति, नो इत्थिठाणाइं सेवित्ता भवति, नो इत्थीणमिंदियाइं मणोहराइं मनोरमाइं आलोइत्ता निज्झाइता भवति, नो पणीतरसभोइं भवती, नो पाणभोयणस्स अतिमत्तमाहारए सया भवति, नोपुव्वरतं पुव्वकीलियं सरेत्ता भवति, नो सद्धानुवाती नो रुवाणुवाती नो सिलोगाणुवाती भवति, नो सातसोक्खपडिबद्धे यावि भवति,

नव बंभचेरअगुत्तीओ पण्णत्ताओ तं जहा- नो विवित्ताइं सयणासणाइं सेवित्ता भवति इत्थीसंसत्ताइं पसुसंसत्ताइं पंडगसंसत्ताइं इत्थीणं कहं कहेत्ता भवति इत्थिठाणाइं सेवित्ता भवति, इत्थीणं इंदियाइ जाव निज्झाइत्ता भवति, पणीयरसभोइ भवति, पाणभोयणस्स अइमायमाहारए सया भवति, पुव्वरयं पुव्वकीलियं सरित्ता भवति, सद्धानुवाई रुवाणुवाई सिलोगाणुवाई भवति, सायासोक्खपडिबद्धे यावि भवति ।

[८०३] अभिनंदणाओ णं अरहओ सुमती अरहा नवहिं सागरोवमकोडीसयसहस्सेहिं वीइक्कंतेहिं समुप्पण्णे ।

[८०४] नव सब्भावपयत्था पण्णत्ता तं जहा- जीवा अजीवा पुण्णं पावं आसवो संवरो निज्जरा बंधो मोक्खो ।

[८०५] नवविहा संसारसमावण्णगा जीवा पण्णत्ता तं जहा- पुढविकाइया जाव वणस्सइका-इया, बेइंदिया जाव पंचिंदियत्ति ।

पुढविकाइया नवगतिया नवआगतिया पण्णत्ता तं जहा- पुढविकाइए पुढविकाइएसु उववज्ज-माणे पुढविकाइएहिंतो वा जाव पंचिंदिएहिंतो वा उववज्जेज्जा ।

से चेव णं से पुढविकाइए पुढविकायत्तं विप्पजहमाणे पुढविकाइत्ताए वा जाव पंचिंदियत्ताए वा गच्छेज्जा, एवमाउकाइयावि जाव पंचिंदियत्ति ।

नवविधा सव्वजीवा पण्णत्ता तं जहा- एगिंदिया बेइंदिया तेइंदिया चउरिंदिया नेरइया पंचिंदियतिरिक्खजोणिया मणुय देवा सिद्धा, अहवा- नवविहा सव्वजीवा पण्णत्ता तं जहा- पढमसमयनेरइया अपढमसमयनेरइया जाव [पढमसमयतिरिया अपढमसमयतिरिया पढमसमयमणुया अपढमसमयमणुया पढमसमयदेवा] अपढमसमयदेवा सिद्धा,

नवविहा सव्वजीवोगाहणा पण्णत्ता तं जहा- पुढविकाइओगाहणो आउकाइओगाहणा जाव वणस्सइकाइओगाहणा बेइंदियओगाहणा तेइंदियओगाहणा चउरिंदियओगाहणा पंचिंदियओगाहणा ।

जीवा णं नवहिं ठाणेहिं संसारं वत्तिंसु वा वत्तंति वा वत्तिस्संति वा तं जहा- पुढविकाइत्ताए जाव पंचिंदियत्ताए ।

[८०६] नवहिं ठाणेहिं रोगुप्पत्ती सिया तं जहा- अच्चासणयाए अहितासणयाए अतिनिद्धाए अतिजागरितेणं उच्चारनिरोहेणं पासवणनिरोहेणं अद्धाणगममेणं भोयणपडिकूलताए इंदियत्थविकोवणयाए ।

[८०७] नवविधे दरिसणावरणिज्जे कम्मे पन्नत्ता तं जहा- निद्धा निद्धानिद्धा पयला पयलापयला थीणगिद्धी चक्खुदंसणावरणे अचक्खुदंसणावरणे ओहिदंसणावरणे केवलदंसणावरणे ।

[८०८] अभिई णं नक्खत्ते सातिरेगे नवमुहुत्ते चंदेण सद्धिं जोगं जोएति,

अभिइआइया णं नव नक्खत्ता णं चंदस्स उत्तरेणं जोगं जोएति, तं जहा- अभिई सवणो ठाणं-९

घणिट्ठा सयभिसया पुव्वाभद्धवया उत्तरापोद्धवया रेवई अस्सिणी भरणी ।

[८०९] इमीसे णं रयणप्पभाए पुढवीए बहुसमरमणिज्जाओ भूमीभागाओ नव जोअणसताइं उड्ढं अबाहाए उवरिल्ले तारारूवे चारं चरति ।

[८१०] जंबुद्धीवे णं दीवे नवजोयणिआ मच्छा पविसिंसु वा पविसंति वा पविसिस्संति वा ।

[८११] जंबुद्धीवे दीवे भारहे वासे इमीसे ओसप्पिणीए नव बलदेव-वासुदेवपियरो हुत्था (तं जहा) ।

[८१२] पयावती य बंभे रोद्धे सोमे सिवेति य ।

महसीहे अग्गिसीहे दसरहे नवमे य वसुदेवे ॥

[८१३] इत्तो आढत्तं जधा समवाये निरवसेसं जाव एगा से गब्भवसही सिज्झिहिति आगमेस्सेणं ।

जंबुद्धीवे दीवे भारहे वासे आगमेसाए उस्सप्पिणीए नव बलदेव-वासुदेवपितरो भविस्संति, नव बलदेव-वासुदेवमायरो भविस्संति, एवं जधा समवाए निरवसेसं जाव महाभीमसेणे सुग्गीवे य अपच्छिमे ।

[८१४] एए खलु पडिसत्तू कित्तिपुरिसाण वासुदेवाणं ।

सव्वे वि चक्कजोही हम्ममेहिंती सचक्केहिं ॥

[८१५] एगमेगे णं महानिधी नव-नव जोयणाइं विक्खंभेणं पन्नत्ता, एगमेगस्स णं रण्णो चाउरंतचक्कवट्ठिस्स नव महानिहिओ पन्नत्ता (तं जहा) ।

[८१६] नेसप्पे पंडुयए पिंगलए सव्वरयण महापउमे ।

काले य महाकाले माणवग महानिही संखे ॥

[८१७] नेसप्पंमि निवेसा गामागर-नगर-पट्टणाणं च ।

दोणमुह-मडंबाणं खंधाराणं गिहाणं च ॥

- [८१८] गणियस्स य बीयाणं माणुम्माणस्स जं पमाणं च ।
धणस्स य बीयाणं उप्पती पंडुए भणिया ॥
- [८१९] सव्वा आभरणविही पुरिसाणं जा य होइ महिलाणं ।
आसाण य हत्थीण य पिंगलगनिहिंमि सा भणिया ॥
- [८२०] रयणाइं सव्वरयणे चोद्धस पवराइं चक्कवट्टिस्स ।
उपज्जंति एगिंदियाइं पंचिंदियाइं च ॥
- [८२१] वत्थाण य उप्पत्ती निप्फत्ती चेव सव्वभत्तीणं ।
रंगाण य धोयाण य सव्वा एसा महापउमे ॥
- [८२२] काले कालन्नाणं भव्व पुराणं च तीसु वासेसु ।
सिप्पसतं कम्माणि य तिण्णि पयाए हियकराइं ॥
- [८२३] लोहस्स य उप्पत्ती होइ महाकाले आगाराणं च ।
रुप्पस्स सुवण्णस्स य मणि-मोत्ति-सिल-प्पवालाणं ॥
- [८२४] जोधाण य उप्पत्ती आवरणाणं च पहरणाणं च ।

ठाणं-९

- सव्वा य जुद्धनीती माणवए दंडनीती य ॥
- [८२५] नट्टविही नाडगविही कव्वस्स चउव्विहस्स उप्पत्ती ।
संखे महाणिहिम्मी तुडियंगाणं च सव्वेसिं ॥
- [८२६] चक्कट्टपड्डाणा अट्टुस्सेहा य नव य विक्खंभे ।
बारसदीह मंजूस-संठिया जहणवीइ मुहे ॥
- [८२७] वेरुलियमणि-कवाडा कणगमया विविध-रयण-पडिपुण्णा ।
ससि-सूर-चक्क-लक्खण-अणुसम-जुग-बाहु-वयणा य ॥
- [८२८] पलिओवमट्ठितीया निहिसरिणामा य तेसु खलु देवा ।
जेसिं ते आवासा अक्किज्जा आहिवच्चा वा ॥
- [८२९] एए ते नवनिहिणो पभूतधणरयणसंचयसमिद्धा ।
जे वसमुवगच्छंति सव्वेसिं चक्कवट्टीणं ॥

[८३०] नव विगतीओ प० तं० खीरं दधिं नवनीतं सप्पिं तेलं गुडो मुहं मज्जं मंसं ।

[८३१] नव-सोत-परिस्सवा बोंदी प० तं० तं दो सोता दो नेत्ता दो घाणा मुहं पोसए पाऊ ।

[८३२] नवविधे पुण्णे पन्नत्ता तं जहा- अण्णपुण्णे पानपुण्णे वत्थपुण्णे लेणपुण्णे
सयणपुण्णे मणपुण्णे वड्ढपुण्णे कायपुण्णे नमुक्कारपुण्णे ।

[८३३] नव पावस्सायतणा पण्णत्ता तं जहा- पाणातिवाते [मुसावाए अदिन्नादाणे मेहुणे]
परिग्गहे कोहे माने माया लोभे ।

[८३४] नवविधे पावसुयपसंगे पन्नत्ता (तं जहा)- ।

[८३५] उप्पाते निमित्ते मंते आइक्खिए तिगिच्छए ।
कला आवरणे अन्नाणे मिच्छापवयणे ति य ॥

[८३६] नव नेउणिया वत्थू पण्णत्ता तं जहा- ।

संखाणे निमित्ते काइए पोराणे पारिहत्थिए ।
परपंडिते वाई य भूतिकम्मे तिगिच्छिए ॥

[८३७] समणस्स णं भगवतो महावीरस्स नव गणा हुत्था तं जहा- गोदासगणे उत्तर बलिस्सहगणे उद्देहगणे चारणगणे उद्वाइयगणे विस्सवाइयगणे कामड्ढिगणे माणवगणे कोडियगणे ।

[८३८] समणेणं भगवता महावीरेणं समणाणं निग्गंथाणं नवकोडिपरिसुद्धे भिक्खे पन्नत्ता तं जहा- न हणइ न हणावइ हणंतं नाणुजाणइ, न पयइ न पयावेति पयंतं नाणुजाणति, न किणति न किणावेति किणंतं नाणुजाणति ।

[८३९] ईसाणस्स णं देविंदस्स देवरण्णो वरुणस्स महारण्णो नव अग्गमहिंसीओ पण्णत्ताओ ।

[८४०] ईसाणस्स णं देविंदस्स देवरण्णो अग्गमहिंसीणं नव पलिओवमाइं ठिती पण्णत्ता, ईसाणे कप्पे उक्कोसेणं देवीणं नव पलिओवमाइं ठिती पण्णत्ता ।

[८४१] नव देवणिकाया पण्णत्ता तं जहा- ।

[८४२] सारस्सयमाइच्चा वण्ही वरुणा य गद्धतोया य ।

ठाणं-९

तुसिया अच्चावाहा अग्गिच्चा चेव रिद्धा य ॥

[८४३] अच्चावाहाणं देवाणं नव देवा नव देवसया प० एवं अग्गिच्चावि, एवं रिद्धावि ।

[८४४] नव गेवेज्जा-विमाण-पत्थडा पन्नत्ता तं जहा- हेट्ठिम-हेट्ठिम-गेविज्ज-विमाण-पत्थडे, हेट्ठिम-मज्झिम-गेविज्ज-विमाण-पत्थडे, हेट्ठिम-उवरिम-गेविज्ज-विमाण-पत्थडे, मज्झिम-हेट्ठिम-गेविज्ज-विमाण-पत्थडे, मज्झिम-मज्झिम-गेविज्ज-विमाण-पत्थडे, मज्झिम-उवरिम-गेविज्ज-विमाण-पत्थडे, उवरिम-हेट्ठिम-गेविज्ज-विमाण-पत्थडे, उवरिम-मज्झिम-गेविज्ज-विमाण-पत्थडे, उवरिम-उवरिम-गेविज्ज-विमाण-पत्थडे,

एतेसि णं नवण्हं गेविज्ज-विमाण-पत्थडाणं नव नामधिज्जा पन्नत्ता तं जहा- ।

[८४५] भद्धे सुभद्धे सुजाते सोमणसे पियदरिसणे ।

सुदंसणं अमोहे य सुप्पबुद्धे जसोधरे ॥

[८४६] नवविहे आउपरिणामे प पन्नत्ते तं जहा- गतिपरिणामे गतिबंधणपरिणामे ठिती-परिणामे ठिति-बंधणपरिणामे उड्ढंगारवपरिणामे अहेगारवपरिणामे तिरियंगारवपरिणामे दीहंगारवपरिणामे रहस्संगारवपरिणामे ।

[८४७] नवनवमिया णं भिक्खुपडिमा एगासीतीए रातिंदिएहिं चउहिं य पंचुत्तरेहिं भिक्खासतेहिं अहासुत्तं जाव आराहिया यावि भवति ।

[८४८] नवविधे पायच्छित्ते पन्नत्ता तं जहा- आलोयणारिहे पडिक्कमणारिहे तदुभयारिहे विवेगारिहे विउसग्गारिहे तवारिहे छेयारिहे मूलारिहे अणवट्ठप्पारिहे ।

[८४९] जंबुद्धीवे दीवे मंदरस्स पव्वयस्स दाहिणे णं भरहे दीहवेतड्ढे नव कूडा पन्नत्ता (तं जहा-)

[८५०] सिद्धे भरहे खंडग माणी वेयड्ढ पुण्ण तिमिसगुहा ।

भरहे वेसमणे या भरहे कूडाण नामाइं ॥

[८५१] जंबुद्वीवे दीवे मंदरस्स पव्वयस्स दाहिणे णं निसहे वासहरपव्वते नव कूडा पन्नत्ता
तं जहा- ।

[८५२] सिद्धि निसहे हरिवास विदेह हरि धिति अ सीतोया ।
अवरविदेहे रूयगे निसहे कूडाण नामाणि ॥

[८५३] जंबुद्वीवे दीवे मंदरपव्वते नंदनवने नव कूडा प० तं०-

[८५४] नंदणे मंदरे चेव निसहे हेमवते रयय रूयए य ।
सागरचित्ते वडरे बलकूडे चेव बोद्धव्वे ॥

[८५५] जंबुद्वीवे दीवे मालवंतवक्खारपव्वते नव कूडा पन्नत्ता तं०- ।

[८५६] सिद्धे य मालवंते उत्तकुरु कच्छ सागरे रयते ।
सीता य पुन्ननामे हरिस्सहकूडे य बोद्धव्वे ॥

[८५७] जंबुद्वीवे दीवे कच्छे दीहवेयड्ढे नव कूडा पन्नत्ता तं जहा-

[८५८] सिद्धे कच्छे खंडग माणी वेयड्ढ पुण्ण तिमिसगुहा ।
कच्छे वेसमणे या कच्छ कूडाण नामाइं ॥

ठाणं-९

[८५९] जंबुद्वीवे दीवे सुकच्छे दीहवेयड्ढे नव कूडा पन्नत्ता तं०-

[८६०] सिद्धे सुकच्छे खंडग माणी वेयड्ढ पुण्ण तिमिसगुहा ।
सुकच्छे वेसमणे या सुकच्छे कूडाण नामाइं ॥

[८६१] एवं जाव पोक्खलावडंमि दीहवेयड्ढे एवं वच्छे दीहवेयड्ढे एवं जाव मंगलावतिंमि
दीहवेयड्ढे जंबुद्वीवे दीवे विज्जुप्पभे वक्खारपव्वते नव कूडा प० तं०-

[८६२] सिद्धे अ विज्जुनामे देवकुरा पम्ह कणग सोवत्थी ।
सीओदा य सयजले हरिकूडे चेव बोद्धव्वे ॥

[८६३] जंबुद्वीवे दीवे पम्हे दीहवेयड्ढे नव कूडा प० तं० सिद्धे पम्हे खंडग माणी वेयड्ढ पुण्ण
तिमिसगुहा पम्हे वेसमणे या पम्हे कूडाण नामाइं एवं चेव जाव सलिलातिंमि दीहवेयड्ढे, एवं वप्पे
दीहवेयड्ढे एवं जाव गंधिलावतिंमि दीहवेयड्ढे नव कूडा प० तं०-

[८६४] सिद्धे गंधिल खंडग माणि वेयड्ढ पुण्ण तिमिसगुहा ।
गंधिलावति वेसमणे कूडाणं होंति नामाइं ॥

[८६५] एवं-सव्वेसु दीहवेयड्ढेसु दो कूडा सरिसनामगा सेसा ते चेव,
जंबुद्वीवे दीवे मंदरस्स पव्वयस्स उत्तरे णं नेलवंते वासहरपव्वते नव कूडा प० तं०-

[८६६] सिद्धे नेलवंते विदेहे सीता किट्ठी य नारिकंता य ।
अवरविदेहे रम्मगकूडे उवदंसणे चेव ॥

[८६७] जंबुद्वीवे दीवे मंदरस्स पव्वयस्स उत्तरे णं एरवते दीहवेतड्ढे नव कूडा पन्नत्ता

तं जहा-

[८६८] सिद्धेरवए खंडग माणी वेयड्ढ पुण्ण तिमिसगुहा ।
एरवते वेसमणे एरवते कूडनामाइं ॥

[८६९] पासे णं अरहा पुरिसादाणिए वज्जरिसहनारायसंघयणे समचउरंस-संठाण-संठिते नव रयणीओ उड्ढं उच्चत्तेणं हुत्था ।

[८७०] समणस्स णं भगवतो महावीरस्स तित्थंसि नवहिं जीवेहिं तित्थगरनामगोत्ते कम्मे निव्वत्तिते तं जहा- सेणिएणं सुपासेणं उदाइणा पोढिलेणं अणगारेणं दढाउणा संखेणं सतएणं सुलसाए सावियाए रेवतीए ।

[८७१] एस णं अज्जो कण्हे वासुदेवे, रामे बलदेवे, उदए पेढालपुत्ते, पुढिले, सतए गाहा- वती, दारुए नियंठे, सच्चई नियंठीपुत्ते, सावियबुद्धे अंबडे परिव्वायए, अज्जावि णं सुपासा पासावच्चिज्जा, आगमेस्साए उस्सप्पिणीए चाउज्जामं धम्मं पण्णवइत्ता सिज्झिहिति । जाव अंतं काहिति ।

[८७२] एस णं अज्जो सेणिए राया भिभिसारे कालमासे कालं किच्चा इमीसे रयणप्पभाए पुढवीए सीमंतए नरए चउरासीतिवाससहस्सद्वितीयंसि निरयंसि नेरइयत्ताए उववज्जिहिति से णं तत्थ नेरइए भविस्सति-काले कालोभासे जाव परमकिण्हे वण्णेणं से णं तत्थ वेयणं वेदिहिती उज्जलं जाव दुरहियासं ।

से णं ततो नरयाओ उव्वट्टेत्ता आगमेसाए उस्सप्पिणीए इहेव जंबुद्धीवे दीवे भरहे वासे वेयइढगिरिपायमूले पुंडेसु जणवेएसु सतदुवारे नगरे संमुइस्स कुलकरस्स भद्दाए भारियाए कुच्छिंसि पुमत्ताए
ठाणं-९

पच्चायाहिति, तए णं सा भद्दा भारिया नवण्हं मासाणं बहुपडिपुण्णाणं अद्धद्वमाण य राइंदियाणं वीतिक्क- मंताणं सुकुमालपाणिपायं अहीणपडिपुण्ण-पंचिंदिय-सरीरं लक्खण-वंजण-जाव सुरूवं दारगं पयाहिती जं रयणिं च णं से दारए पयाहिती तं रयणिं च णं सतदुवारे नगरे सब्भंतरबाहिरए भारग्गसो य कुंभग्गसो य पउमवासे य रयणवासे य वासे वासिहिति ।

तए णं तस्स दारयस्स अम्मापियरो एक्कारसमे दिवसे वीइक्कंते [निवत्ते असुइजाय- कम्मकरणे संपत्ते] बारसाहे अयमेयारूवं गोण्णं गुणनिप्फणं नामधिज्जं काहिति जम्हा णं अम्हमिमंसि दारगंसि जातंसि समाणंसि सयदुवारे नगरे सब्भंतरबाहिरए भारग्गसो य कुंभग्गसो य पउमवासे य रयणवासे य वासे वुट्ठे तं होउ नमम्हमिमस्स दारगस्स नामधिज्जं महापउमे-महापउमे ।

तए णं तस्स दारगस्स अम्मापियरो नामधिज्जं काहिति- महापउमेत्ति तए णं महापउमं दारगं अम्मापितरो सातिरेगं अड्ढवासजातगं जाणित्ता महता-महता रायाभिसेएणं अभिसिंचिहिति, से णं तत्थ राया भविस्सति महता-हिमवंत-महंत-मलय-मंदर-महिंदसारे रायवण्णओ जाव रज्जं पसासेमाणे विहरिस्सति ।

तए णं तस्स महापउ-मस्स रण्णो अन्नदा कयाइ दो देवा महिइडिया जाव महासोक्खा सेणाकम्मं काहिंती तं जहा- पुण्णभद्दे य मणिभद्दे य, तए णं सतदुवारे नगरे बहवे राईसर-तलवर-माडंबिय- कोडुंबिय-इब्भ-सेट्ठिसेणावति-सत्थववाह-प्पभतियो अण्णमण्णं सद्दावेहिति एवं वइस्संतिजम्हा णं देवाणुप्पिया! अम्हं महापउमस्स रण्णो दो देवा महिइडिया जाव महासोक्खा सेणाकम्मं करेति तं जहा- पुण्णभद्दे य माणिभद्दे य, तं होउ णं अम्हं देवाणुप्पिया! महापउमस्स रण्णो दोच्चेवि नामधेज्जे देवसेणे- देवसेणे, तते णं तस्स महापउमस्स रण्णो दोच्चेवि नामधेज्जे भविस्सइ देवसेणेति ।

तए णं तस्स देवसेणस्स रण्णो अन्नया कयाई सेय-संखतल-विमल-सण्णिकासे चउदंते हत्थिरयणे समुप्पजिहिति तए णं से देवसेणे राया तं सेयं संखतल-विमल-सण्णिकासं चउदंतं हत्थिरयणं दुरुढे समाणे सतदुवारं नगरं मज्झमज्झेणं अभिक्खणं-अभिक्खणं अतिज्जाहिति य निज्जाहिति य, तए णं सतदुवारे नगरे बहवे राईसर-तलवर जाव अण्णमण्णं सद्दावेहिति एवं वइस्संति-जम्हा णं देवाणुप्पिया अम्हं देवसेणस्स रण्णो सेते संखतल-विमल-सण्णिकासे चउदंते हत्थिरयणे समुप्पण्णे तं होउ णं अम्हं देवाणुप्पिया! देवसेणस्स तच्चेवि नामधेज्जे विमलवाहणे-

तए णं तस्स देवसेणस्स रण्णो तच्चेवि नामधेज्जे भविस्सति विमलवाहणेति ।

तए णं से विमलवाहणे राया तीसं वासाइं अगारवासमज्झे वसित्ता अम्मापितीहिं देवत्तं गतेहिं गुरुमहत्तरएहिं अब्भणुण्णाते समाणे उदुंमि सरए संबुद्धे अनुत्तरे मोक्खमग्गे पुणरवि लोगंतिएहिं जीय-कप्पिहिं देवेहिं ताहिं इट्ठाहिं कंताहिं पियाहिं मणुण्णाहिं मणामाहिं उरालाहिं कल्लाणाहिं सिवाहिं धण्णाहिं मंगलाहिं सस्सिरिआहिं वग्गूहिं अभिणंदिज्जमाणे अभिथुव्वमाणे य बहिया सुभूमिभागे उज्जाणे एगं देवदूसमायदाय मुंडे भवित्ता अगाराओ अणगारियं पव्वयाहिति ।

तस्स णं भगवंतस्स साइरेगाइं दुवालस वासाइं निच्चं वोसइकाए चियत्तदेहे जे केइ उवसग्गा उप्पज्जिहिति तं दिव्वा वा माणुसा वा तिरिक्खजोणिया वा उप्पन्ने, ते सव्वे सम्मं सहिस्सइ खमिस्सइ तितिक्खिस्सइ अहियासिस्सइ, तए णं से भगवं अणगारे भविस्सइ इरियासमि ए भासासमि ए जाव गुत्तबंभयारी अममे अकिंचणे छिन्नगंथे निरुपलेवे कंसापाईव मुक्कतोए जहा भावणाए जाव सुहुय-ठाणं-९

हुयासणे तिव तेयसा जलंते ।

[८७३] कंसे संखे जीवे गगणे वाते य सारए सलिले ।

पुक्खरपत्ते कुम्मे विहगे खग्गे य भारंडे ॥

[८७४] कुंजर वसहे सीहे नगराया चेव सागरमखोहे ।

चंदे सूरे कणगे वंसुधरा चेव सुहुयहुए ॥

[८७५] नत्थि णं तस्स भगवंतस्स कत्थइ पडिबंधे भविस्सइ, से य पडिबंधे चउव्विहे पन्नत्ता तं जहा- अंडएइ वा पोयएइ वा उग्गहेइ वा पग्गहिएइ वा, जं णं जं णं दिसं इच्छइ तं णं तं णं दिसं अपडिबद्धे सुचिभूए लहुभूए अणप्पगंथे संजमेणं अप्पाणं भावेमाणे विहरिस्सइ,

तस्स णं भगवंतस्स अनुत्तरेणं नाणेणं अनुत्तरेणं दंसणेणं अनुत्तरेणं चरित्तेणं एवं आलएणं विहारेणं अज्जवेणं मद्दवेणं लाघवेणं खंत्तीए मुत्तीए गुत्तीए सच्च संजम तव गुण सुचरिय सोय चिय फलपरिनिव्वाणमग्गेणं अप्पाणं भावेमाणस्स झाणंतरियाए वट्टमाणस्स अणंते अनुत्तरे निव्वाधाए निरावरणे कसिणे पडिपुण्णे केवलवरणाणदंसणे समुप्पजिहिति ।

तए णं से भगवं अरहे जिणे भविस्सति केवली सव्वन्नू सव्वदरिसी सदेवमणुआसुरस्स लोगस्स परियागं जाणइ पासइ सव्वलोए सव्वजीवाणं आगइं गतिं ठियं चयणं उववायं तक्कं मणोमाणसियं भुत्तं कडं परिसेवियं आवीकम्मं रहोकम्मं अरहा अरहस्स भागी तं तं कालं मणसवयसकाइए जोगे वट्टमाणानं सव्वलोए सव्वजीवाणं सव्वभावे जाणमाणे पासमाणे विहरिस्सइ ।

तएणं से भगवं तेणं अनुत्तरेणं केवलवरणाणदंसणेणं सदेवमणुआसुराइं लोगं अभिसमिच्चा

समणाणं निग्गंथाणं जे केइ उवसग्गा उप्पज्जिहिंति तं जहा- दिव्वा वा माणुसा वा तिरिक्खजोणिया वा ते सव्वे सम्मं सहिस्सइ खमिस्सइ तितिक्खिस्सइ अहियास्सिइ,

तए णं से भगवं अणगारे भविस्सति-इरियासमिते भासासमिते एवं जहा वद्धमाणसामी तं चेव निरवसेसं जाव अक्कावारविउ-सजोगजुत्ते, तस्स णं भगवंतस्स एतेणं विहारेणं विहरमाणस्स दुवालसहिं संवच्छरेहिं वीतिक्कंतेहिं तेरसहिं य पक्खेहिं तेरसमस्स णं संवच्छरस्स अंतरा वद्धमाणस्स अनुत्तरेणं नाणेणं जहा भावणाते केवल-वरणाणदंसणे समुप्पजिहिंति जिणे भविस्सति केवली सव्वण्णू सव्वदरिसी सणेइय जाव पंच महव्वयाइं सभावणाइं छच्च जीवणिकाए धम्मं देसेमाणे विहरिस्सति ।

से जहाणामए अज्जो! मए समणाणं निग्गंथाणं एगे आरंभठाणे पन्नत्ते, एवामेव महापउमेवि अरहा समणाणं निग्गंथाणं एगं आरंभठाणं पण्णवेहिंति,

से जहाणामए अज्जो मए समणाणं निग्गंथाणं दुविहे बंधणे पन्नत्ता तं जहा- पेज्जबंधणे य दोसबंधणे य, एवामेव महापउमेवि अरहा समणाणं निग्गंथाणं दुविहे बंधणं पण्णवेहिंति तं जहा- पेज्जबंधणं च दोसबंधणं च,

से जहाणामए अज्जो मए समणाणं निग्गंथाणं तओ दंडा पन्नत्ता तं जहा- मणदंडे वयदंडे-कायदंडे एवामेव महापउमेवि अरहा समणाणं निग्गंथाणं तओ दंडे पण्णवेहिंति तं जहा- मणोदंडं वयदंडं कायदंडं ।

से जहाणामए अज्जो मए समणाणं निग्गंथाणं चत्तारि कसाया पण्णत्ता तं जहा- कोहकसाए जाव लोभकसाए, पंच कामगुणे प० तं० छज्जीवनिकाया पन्नत्ता तं जहा- पुढविकाइया जावसद्धे जाव फासे
ठाणं-९

तसकाइया, एवामेव महापउमेवि अरहा समणाणं निग्गंथाणं छज्जीव-णिकाए पण्णवेहिंति तं जहा- पुढविकाइए जाव तसकाइए ।

से जहाणामए अज्जो मए समणाणं निग्गंथाणं सत्त भयद्वाणा पन्नत्ता, अट्ठ मयद्वाणे, नव बंभ-चेरगुत्तीओ, दसविधे समणधम्मं, एवं जाव तेत्तीसमासातणाउत्ति ।

से जहाणामए अज्जो मए समणाणं निग्गंथाणं नग्गभावे मुंडभावे अण्हाणए अदंतवणए अच्छत्तए अनुवाहणए भूमिसेज्जा फलगसेज्जा कट्ठसेज्जा केसलोए बंभचेरवासे परघरपवेसे जाव लद्धावलद्धवित्तीओए पण्णत्ताओ, एवामेव महापउमेवि अरहा समणाणं निग्गंथाणं नग्गभावं जाव लद्धावलद्धवित्ती पण्णवेहिंति ।

से जहाणाणए अज्जो! मए समणाणं निग्गंथाणं आधाकम्मिणंति वा उद्देसिणंति वा मीसज्जाएति वा अज्झोयरएति वा पूतिए कीते पामिच्चे अच्छेज्जे अणिसद्धे अभिहंडंति वा कंतारभत्तेति वा दुब्भिक्खमत्तेति वा गिलाणमत्तेति वा वद्धलिया-भत्तेति वा पाहुणभत्तेति वा मूलभोयणेति वा कंदभोयणेति वा फलभोयणेति वा बीयभोयणेति वा हरियभोयणेति वा पडिसिद्धे एवामेव महापउमेवि अरहा समणाणं निग्गंथाणं आधाकम्मियं वा जाव हरितभोयणं पडिसेहिस्सति,

से जहाणामए अज्जो! मए समणाणं निग्गंथाणं पंचमहव्वतिणं सपडिक्कमणे अचेलए धम्मं पन्नत्ते एवामेव महापउमेवि अरहा समणाणं निग्गंथाणं पंच महव्वतियं सपडिक्कमणं अचेलगं धम्मं पण्णवेहिंति ।

से जहाणामए अज्जो! मए समणोवासगाणं पंचाणुव्वतिए सत्तसिक्खावतिए दुवालस-
विधे सावगधम्मं पन्नत्ते एवामेव महापउमेवि अरहा समणोवागाणं पंचाणुव्वतियं जाव सावगधम्मं
पण्णवेस्सति ।

से जहाणामए अज्जो! मए समणाणं निग्गंथाणं सेज्जातरपिंडेति वा रायपिंडेति वा पडिसिद्धे
एवामेव महापउमेवि अरहा समणाणं निग्गंथाणं सेज्जातरपिंडं वा पडिसेहिस्सति ।

से जहाणामए अज्जो! मम नव गणा एगारस गणधरा एवामेव अहापउमस्सवि अरहतो नव
गणा एगारस गणधरा भविस्संति ।

से जहाणामए अज्जो अहं तीसं वासाइं अगारवासमज्झे वसित्ता मुंडे भवित्ता अगाराओ
अणगारिय पव्वइए दुवालस संवच्छराइं तेरस पक्खा छउमत्थपरियागं पाउणित्ता तेरसहिं पक्खेहिं ऊणगाइं
तीसं वासाइं केवलिपरियागं पाउणित्ता बायालीसं वासाइं सामण्णपरियागं पाउणित्ता बावत्तरि वासाइं
सव्वाउयं पालइत्ता सिज्झिस्सं जाव सव्वदुक्खाणमंतं करेस्सं एवामेव महापउमेवि अरहा तीसं वासाइं
अगारवासमज्झे वसित्ता जाव पव्वाहिती दुवालस संवच्छराइं जाव बात्तरिवासाइं सव्वाउयं पालइत्ता
सिज्झिहिती जाव सव्वदुक्खाणमंतं काहिती- ।

[८७६] जस्सील-समायारो अरहा तित्थंकरो महावीरो ।
तस्सील-समायारो होति उ अरहा महापउमो ॥

[८७७] नव नक्खता चंदस्स पच्छंभागा पन्नत्ता (तं जहा)-

[८७८] अभिई समणो घणिद्धा रेवति अस्सिणि मग्गसिर पूसो ।
हत्थो चित्ता य तहा पच्छंभागा नव हवंति ॥

ठाणं-१०

[८७९] आणत-पाणत-आरणच्युतेसु कप्पेसु विमाणा नव जोयणसयाइं उड्ढं उच्चत्तेणं
पन्नत्ता ।

[८८०] विमलवाहणे णं कुलकरे नव घणुसताइं उड्ढं उच्चत्तेणं हुत्था ।

[८८१] उसभेणं अरहा कोसलिएणं इमीसे ओसप्पिणीए नवहिं सागरोवमकोडाकोडीहिं
वीड्ढकंताहिं तित्थे पवत्तिते ।

[८८२] घणदंत-लड्ढदंत-गूढदंत-सुद्धदंतदीवा णं दीवा नव-नव जोयणसताइं आयाम-विक्खंभेणं
पन्नत्ता ।

[८८३] सुक्कस्स णं महागहस्स नव वीहीओ पण्णओ तं जहा- हयवीही गयवीही नाग-वीही
वसहवीही गोवीही उरगवीही अयवीही मियवीही वेसाणरवीही ।

[८८४] नवविधे नोकसायवेजणिज्जे कम्मं पन्नत्ता तं जहा- इत्थिवेए पुरिसवेए नपुंसकवेए
हासे रती अरती भये सोगे दुगुंछा ।

[८८५] चउरिंदियाणं नवजाइ-कुलकोडि-जोणिपमुह-सयसहस्सा पन्नत्ता, भुयगपरिसप्प
थलयर-पंचिदिय तिरिक्खजोणियाणं नवजाइ-कुलकोडि-जोणिपमुह-सयसहस्सा प० ।

[८८६] जीवा णं नवट्ठाणनिव्वत्तिते पोग्गले पावकम्मत्ताए चिणिंसु वा चिणंति वा
चिणिस्संति वा तं जहा- पुढविकाइयनिव्वत्तिते जाव पंचिंदियनिव्वत्तिते, एवं-चिण-उवचिण जाव तह
निज्जरा चेव ।

[८८७] नवपएसिया खंधा अनंता पन्नत्ता जाव नवगुणलुक्खा पोग्गला अनंता पन्नत्ता ।

० नवमं ठाणं समत्तं ०

० मुनि दीपरत्नसागरेण संशोधितः सम्पादितश्च पढमं अज्झयणं समत्तं ०

[] दसमं-ठाणं []

[८८८] दसविधा लोगट्ठिती पन्नत्ता तं जहा- जण्णं जीवा उद्दाइत्ता-उद्दाइत्ता तत्थेव-तत्थेव भुज्जो-भुज्जो पच्चायंति एवंप्पेगा लोगट्ठिती पन्नत्ता, जण्णं जीवाणं सया समितं पावे कम्मं कज्जति-एवंप्पेगा लोगट्ठिती पन्नत्ता, जण्णं जीवाणं सया समित्तं मोहणिज्जे पावे कम्मं कज्जति-एवंप्पेगा लोगट्ठिती पन्नत्ता न एवं भूतं वा भव्वं वा भविस्सति वा जं जीवा अजीवा भविस्संति अजीवा वा जीवा भविस्संति एवंप्पेगा लोगट्ठिती पन्नत्ता, न एवं भूतं वा भव्वं वा भविस्सति वा जं तसा पाणा वोच्छिज्जिस्संति थावरा पाणा भविस्संति थावरा पाणा वोच्छिज्जिस्संति तसा पाणा भविस्संति- एवंप्पेगा लोगट्ठिती पन्नत्ता ण एवं भूतं वा भव्वं वा भविस्सति वा जं लोगे अलोगे भविस्सति अलोगे वा लोगे भविस्सति-एवंप्पेगा लोगट्ठिती पन्नत्ता, न एवं भूतं वा भव्वं वा भविस्सति वा जं लोए अलोए पविस्सति एलोए वा लोए पविस्सति- एवंप्पेगा लोगट्ठिती पन्नत्ता, जाव ताव लोगे ताव ताव जीवा जाव ताव जीवा ताव ताव लोए एवंप्पेगा लोगट्ठिती पन्नत्ता, जाव ताव जीवाण य पोग्गलाण य गतिपरियाए ताव ताव लोए जाव ताव लोगे ताव ताव जीवाण य पोग्गलाण य गतिपरियाए एवंप्पेगा लोगट्ठिती प० सव्वेसुवि णं लोगंतेसु अबद्धपासपुट्ठा पोग्गला लुक्खत्ताए कज्जंति जेणं जीवा य पोग्गला य नो संचायंति बहिया लोगंता गमणयाए- एवंप्पेगा लोगट्ठिती प० ।

ठाणं-१०

[८८९] दसविहे सद्दे पन्नत्ता (तं जहा)-

[८९०] नीहारि पिंडिमे लुक्खे भिण्णे जज्जरिते इ य ।

दीहे रहस्से पुहत्ते य काकणी खिंखिनिस्सरे ॥

[८९१] दस इंदियत्था तीता पन्नत्ता तं जहा- देसेणवि एगे सद्दाइं सुणिंसु सव्वेणवि एगे सद्दाइं सुणिंसु देसेणवि एगे रूवाइं पासिंसु सव्वेणवि एगे रूवाइं पासिंसु देसेणवि, सव्वेणवि एगे गंधाइं जिंधिसु देसेणवि एगे रसाइं आसादेसुं सव्वेणवि एगे रसाइं आसादेसुं देसेणवि एगे एवं गंधाइं रसाइं फासाइं जाव सव्वेण वि एगे फासाइं पडिसंवेदेंसु,

दस इंदियत्था पडुप्पण्णा पन्नत्ता तं जहा- देसेणवि एगे सद्दाइं सुणेंति जाव फासाइं पडिसंवेदेंति, दस इंदियत्था अणागता पन्नत्ता तं जहा- देसेणवि एगे सद्दाइं सुणिस्संति जाव फासाइं पडिसंवेदेस्संति ।

[८९२] दसहिं ठाणेहिं अच्छिण्णे पोग्गले चलेज्जा, तं जहा- आहारिज्जमाणे वा चलेज्जा परिणामेज्जमाणे वा चलेज्जा उस्ससिज्जमाणे वा चलेज्जा निस्ससिज्जमाणे वा चलेज्जा वेदेज्जमाणे वा चलेज्जा निज्जरिज्जमाणे वा चलेज्जा विउव्विज्जमाणे वा चलेज्जा परियारिज्जमाणे वा चलेज्जा जक्खाइडे वा चलेज्जा वातपरिगए वा चलेज्जा ।

[८९३] दसहिं ठाणेहिं कोधुप्पत्ती सिया तं जहा- (१) मणुण्णाइं मे सद्द-फरिस-रस-रूव-गंधाइं अवहरिंसु (२) अमणुण्णाइं मे सद्द-फरिस-रस-रूव-गंधाइं उवहरिंसु (३) मणुण्णाइं मे सद्द-फरिस-रस-

रूव-गंधाडं अवहरइ, (४) अमणुण्णाडं मे सद्ध-फरिस-रस-रूव-गंधाडं उवहरति (५) मणुण्णाडं मे सद्ध-फरिस-रस-रूव-गंधाडं अवहरिस्सति, (६) अमणुण्णाडं मे सद्ध-जाव उवहरिस्सति, (७) मणुण्णाडं मे सद्ध-जाव अवहरिस्सति, (८) अमणुण्णाडं मे सद्ध जाव उवहरिंसु वा उवहरति वा उवहरिस्सति वा (९) मणुण्णामणुण्णाडं मे सद्ध-जाव गंधाडं अवहरिंसु वा अवहरति वा अवहरिस्सति, (१०) अहं च णं आयरिय-उवज्झायाणं सम्मं वट्टामि ममं च णं आयरिय-उवज्झाया मिच्छं विप्पडिवन्ना ।

[८९४] दसविधे संजमे पन्नत्ता तं जहा- पुढविकाइयसंजमे जाव वणस्सतिकाइयसंजमे बेइंदियसंजमे तेइंदियसंजमे चउरिंदियसंजमे पंचिंदियसंजमे अजीवकायसंजमे ।

दसविधे असंजमे पन्नत्ता तं जहा- पुढविकाइयअसंजमे आउकाइयअसंजमे तेउकाइअसंजमे वाउकाइयअसंजमे वणस्सतिकाइयअसंजमे जाव अजीवकायअसंजमे ।

दसविधे संवरे पन्नत्ता तं जहा- सोतिंदियसंवरे जाव फासिंदियसंवरे मणसंवरे वयसंवरे कायसंवरे उवकरणसंवरे सूचीकुसग्गसंवरे

दसविधे असंवरे पन्नत्ता तं जहा- सोतिंदियअसंवरे जाव सूचीकुसग्गअसंवरे ।

[८९५] दसहिं ठाणेहिं अहमंतीति थंभिज्जा तं जहा- जातिमएण वा कुलमएण वा जाव इस्सरियमएण वा, नागसुवण्णा वा मे अंतियं हव्वमागच्छंति, पुरिसधम्मत्तो वा मे उत्तरिए आहोधिए नाणंदसणे समुप्पण्णे ।

[८९६] दसविधा समाधी प० तं०- जहा- पाणातिवायवेरमणे मुसावायवेरमणे अदिन्नादाणवेरमणे मेहुणवेरमणे परिग्गहवेरमणे इरियासमिति भासासमिति एसणासमिति आयाणभंडमत्त निक्खेवणा समिती, उच्चार पासवण खेल सिंधाणग जल्ल पारिद्वावणिया समिती,
ठाणं-१०

दसविधा असमाधी पन्नत्ता तं जहा- पाणातिवाते जाव परिग्गहे, इरियासमिती जाव उच्चार-पासवण-खेलसिंधाणग-जल्ल-पारिद्वावणियासमिती ।

[८९७] दसविधा पव्वज्जा पन्नत्ता (तं जहा)-

[८९८] छंदा रोसा परिजुण्णा सुविणा पडिस्सुता चेव ।

सारणिया रोगिणिया अणाढिता देवसण्णत्ती वच्छाणुबंधिता

॥

[८९९] दसविधे समणधम्मे पन्नत्ता तं जहा- खंती मुत्ती अज्जवे भद्धवे लाघवे सच्चे संजमे तवे चियाए बंधचेरवासे

दसविधि वेयावच्चे प० तं० जहा- आयरियवेयावच्चे उवज्झायवेयावच्चे थेरवेयावच्चे तव-स्सिवेयावच्चे गिलाणवेयावच्चे सेहवेयावच्चे कुलवेयावच्चे गणवेयावच्चे संघवेयावच्चे साहम्मियवेयावच्चे ।

[९००] दसविधे जीवपरिणामे पन्नत्ता तं जहा- गतिपरिणामे इंदियपरिणामे कसायपरिणामे लेसापरिणामे जोगपरिणामे उवओगपरिणामे नाणपरिणामे दंसणपरिणामे चरित्तपरिणामे वेयपरिणामे,

दसविधे अजीवपरिणामे पन्नत्ता तं जहा- बंधणपरिणामे गतिपरिणामे संठाणपरिणामे भेदपरिणामे वण्णपरिणामे रसपरिणामे गंधपरिणामे फासपरिणामे अगुरुलहुपरिणामे सद्धपरिणामे ।

[९०१] दसविधे अंतलिक्खए असज्झाइए पन्नत्ता तं जहा- उक्कावाते दिसिदाधे गज्जिते विज्जुते निग्धाते जुवए जक्खालित्ते धूमिया महिया रयुग्धाते,

दसविधे ओरालिए असज्झाए पन्नत्ता तं जहा- अट्ठि मंसे सोणिते असुइसामंते सुसाणसामंते चंदोवराए सूरुवराए पडणे रायवुग्गहे उवस्सयस्स अंतो ओरालिए सरीरगे ।

[९०२] पंचिदिया णं जीवा असमारभमाणस्स दसविधे संजमे कज्जति तं जहा- सोतामयाओ सोक्खाओ अवरोवेत्ता भवति, सोतामएणं दुक्खेणं असंजोगेत्ता भवति जाव फासामएणं दुक्खेणं असंजोगेत्ता भवति ।

पंचिदिया णं जीवा समारभमाणस्स दसविधे असंजमे कज्जति तं जहा- सोतामयाओ सोक्खाओ वरोवेत्ता भवति सोतामएणं दुक्खेणं संजोगेत्ता भवति जाव फासामएणं दुक्खेणं संजोगेत्ता भवति ।

[९०३] दस सुहुमा पन्नत्ता तं जहा- पाणसुहुमे पणगसुहुमे जाव सिणेहसुहुमे गणियसुहुमे भंगसुहुमे ।

[९०४] जंबुद्धीवे दीवे मंदरस्स पव्वयस्स दाहिणेणं गंगा-सिंधु-महानदीओ दस महानदीओ सम्पपेति, तं जहा- जउणा सरऊ आवी कोसी मही सतद्द वितत्था विभासा एरावती चंदभागा ।

जंबुद्धीवे दीवे मंदरस्स पव्वयस्स उत्तरे णं रत्ता-रत्तवतीओ महानदीओ दस महानदीओ सम्पपेति तं जहा- किण्हा महाकिण्हा नीला महानीला महातीरा इंदा इंदसेणा सुसेणा वारिसेणा महाभोगा ।

[९०५] जंबुद्धीवे दीवे भरहे वासे दस रायहाणओ प० तं जहा- ।

[९०६] चंपा महरा वाणारसी य सावत्थि तह य साकेतं ।

हत्थिणउर कपिल्लं मिहिला कोसंबि रायगिहं ॥

[९०७] एयासु णं दससु रायहाणीसु दस रायाणो मुंडा भवेत्ता जाव पव्वइया तं जहा- भरहे सगरे मघवं सणंकुमारे संती कूथू अरे महापउमे हरिसेणे जयनामे ।

ठाणं-१०

[९०८] जंबुद्धीवे दीवे मंदरे पव्वए दस जोयणसयाइं उव्वेहेणं धरणितले दस जोयणसहस्साइं विक्खंभेणं उवरिं दसजोयणसयाइं विक्खंभेणं दसदसाइं जोयणसहस्साइं सव्वग्गेणं पन्नत्ता ।

[९०९] जंबुद्धीवे दीवे मंदरस्स पव्वयस्स बहुमज्झदेसभागे इमीसे रयणप्पभाए पुढवीए उवरिम-हेट्ठिल्लेसु खुड्डगपतरेसु एत्थ णं अट्ठपएसिए रूयगे पन्नत्ता जओ णं इमाओ दस दिसाओ पवहंति तं जहा- पुरत्थिमा पुरत्थिमदाहिणा दाहिणा दाहिणपच्चत्थिमा पच्चत्थिमा पच्चत्थिमुत्तरा उत्तरा उत्तरपुरत्थिमा उड्ढा अहा, एतासि णं दसण्हं दिसाणं दस नाम-धेज्जा पन्नत्ता (तं जहा-)

[९१०] इंदा अग्गेइ जम्मा य नेरती वारुणी य वायव्वा ।

सोमा ईसाणी य विमला य तमा य बोद्धव्वा ॥

[९११] लवणस्स णं समुद्धस्स दस जोयणसहस्साइं गोतित्थविहरिते खेत्ते पन्नत्ता, लवणस्स णं समुद्धस्स दस जोयणसहस्साइं उदगमाले पन्नत्ता, सव्वेवि णं महापाताला दसदसाइं जोयणसहस्साइं उव्वेहेणं पन्नत्ता, मूले दस जोयणसहस्साइं विक्खंभेणं पन्नत्ता, बहुमज्झदेसभागे एगपएसियाए सेढीए दसदसाइं जोयणसहस्साइं विक्खंभेणं पन्नत्ता, उवरिं मुहमूल दस जोयणसहस्साइं विक्खंभेणं पन्नत्ता ।

तेसि णं महापातालाणं कुड्डा सव्ववइरामया सव्वत्थ समा दस जोयणसयाइं बाहल्लेणं पन्नत्ता, सव्वेवि णं खुद्धा पाताला दस जोयणसयाइं उव्वेहेणं पन्नत्ता मूले दसदसाइं जोयणाइं विक्खंभेणं

पन्नत्ता बहुमज्झदेसभागे एगपएसियाए सेढीए दस जोयणसताइं विक्खंभेणं पन्नत्ता उवरिं मुहमूले दसदसाइं जोयणाइं विक्खंभेणं पन्नत्ता, तेसि णं खुड्डापातालाणं कुड्डा सव्ववइरामया सव्वत्थ समा दस जोयणाइं बाहल्लेणं पन्नत्ता ।

[९१२] घायइसंडगा णं मंदरा दसजोयणसयाइं उव्वेहेणं धरणीतले देसूणाइं दस जोयणसहस्साइं विक्खंभेणं उवरिं दस जोयणसयाइं विक्खंभेणं पन्नत्ता पुक्खरवरदीवड्डा णं मंदरा दस जोयणसयाइं उव्वेहेणं एवं चेव ।

[९१३] सव्वेवि णं वट्टवेयड्डपव्वता दस जोयणसयाइं उड्डं उच्चत्तेणं दस गाउयसयाइं उव्वेहेणं सव्वत्थ समा पल्लगसंठिता दस जोयणसयाइं विक्खंभेणं पन्नत्ता ।

[९१४] जंबुद्धीवे दीवे दस खेत्ता पन्नत्ता तं जहा- भरहे एरवते हेमवते हेरण्णवते हरिवस्से रम्मगवस्से पुव्वविदेहे अवरविदेहे देवकुरा उत्तरकुरा ।

[९१५] माणुसुत्तरे णं पव्वते मूले दस बावीसे जोयणसते विक्खंभेणं प० ।

[९१६] सव्वेविं णं अंजण-पव्वता दस जोयणसयाइं उव्वेहेणं मूल दस जोयणसहस्साइं विक्खंभेणं उवरिं दस जोयणसताइं विक्खंभेणं पन्नत्ता,

सव्वेवि णं दहिमुहपव्वता दस जोयणसताइं उव्वेहेणं सव्वत्थ समा पल्लगसंठिता दस जोयणसहस्साइं विक्खंभेणं पन्नत्ता ।

सव्वेवि णं रतिकरपव्वता दस जोयणसताइं उड्डं उच्चत्तेणं दसगाउयसताइं उव्वेहेणं सव्वत्थ समा झल्लरिसंठिता दस जोयणसहस्साइं विक्खंभेणं पन्नत्ता ।

[९१७] रुयगवरे णं पव्वते दस जोयणसयाइं उव्वेहेणं मूले दस जोयणसहस्साइं विक्खंभेणं उवरिं दस जोयणसताइं विक्खंभेणं पन्नत्ता, एवं कुंडलवरेवि ।

[९१८] दसविहे दवियाणुओगे पन्नत्ता तं जहा- दवियाणुओगे माउयाणुओगे एगट्ठियाणुओगे ठाणं-१०

करणाणुओगे अप्पितणप्पिते भाविताभाविते बाहिराबाहिरे सासतासासते तहनाणे अतहनाणे ।

[९१९] चमरस्स णं असुरिंदस्स असुरकुमाररण्णो तिगिंछिकूडे उप्पातपव्वते मूले दस बावीसे जोयणसते विक्खंभेणं पन्नत्ता ।

चमरस्स णं असुरिंदस्स असुरकुमाररण्णो सोमस्स महारण्णो सोमप्पभे उप्पातपव्वते दस जोयणसयाइं उड्डं उच्चत्तेणं दस गाउयसताइं उव्वेहेणं मूले दस जोयणसयाइं विक्खंभेणं पन्नत्ता ।

चमरस्स णं असुरिंदस्स असुरकुमाररण्णो जमस्स महारण्णो जमप्पभे उप्पातपव्वते एवं चेव, एवं वरुणस्सवि, एवं वेसमणस्सवि ।

बलिस्स णं वइरोयणिंदस्स वइरोयणरण्णो रुयगिंदे उप्पातपव्वते मूले दस बावीसे जोयणसते विक्खंभेणं पन्नत्ता ।

बलिस्स णं वइरोयणिंदस्स वइरोयणरण्णो सोमस्स एवं चेव जघा चमरस्स लोगपालाणं तं चेव बलिस्सवि ।

घरणस्स णं नागकुमारिंदस्स नागकुमाररण्णो धरणप्पभे उप्पातपव्वते दस जोयणसयाइं उड्डं उच्चत्तेणं दस गाउयसताइं उव्वेहेणं मूले दस जोयणसताइं विक्खंभेणं ।

घरणस्स णं नागकुमारिंदिस्स नागकुमाररण्णो कालवास्स महारण्णो महाकालप्पभे
उप्पातपव्वते जोयणसयाइं उड्ढं उच्चत्तेणं एवं चेव, एवं जाव संखवालस्स, एवं भूताणंदस्सवि, एवं
लोगपालणवि से जहा धरणस्स एवं जाव थणितकुमाराणं सलोगपालाणं भाणियव्वं, सव्वेसिं उप्पायपव्वया
भाणियव्वा सरिणामगा ।

सक्कस्स णं देविंदस्स देवरण्णो सक्कप्पभे उप्पातपव्वते दस जोयणसहस्साइं उड्ढं
उच्चत्तेणं दस गाउयसहस्साइं उव्वेहेणं मूले दस जोयणसहस्साइं विक्खंभेणं पन्नत्ता ।

सक्कस्स णं देविंदस्स देवरण्णो सोमस्स महरण्णो जघा सक्कस्स तघा सव्वेसिं
लोगपालाणं सव्वेसिं च इंदाणं जाव अच्चुयत्ति, सव्वेसिं पमाणमेगं ।

[९२०] बायरवणस्सइकाइयाणं उक्कोसेणं दस जोयणसयाइं सरीरोगाहणा पन्नत्ता,
जलचर-पंचिंदियतिरिक्खजोणियाणं उक्कोसेणं दस जोयणसताइं सरीरोगाहणा प०
उरपरिसप्प-थलचर-पंचिंदियतिरिक्खजोणियाणं उक्कोसेणं दस जोयणसताइं सरीरोगाहणा
पन्नत्ता ।

[९२१] संभवाओ णं अरहातो अभिनंदणे अरहा दसहिं सागरोवमकोडिसतहस्सेहिं
वीतिककंतेहिं समुप्पन्ने ।

[९२२] दसविहे अनंतए पन्नत्ता तं जहा- नामानंतए ठवणाणंतए दव्वाणंतए गणणाणंतए
पएसाणंतए एगतोणंतए दुहुतोणंतए देसवित्थाराणंतए सव्वित्थाराणंतए सासताणंतए ।

[९२३] उप्पायपुव्वस्स णं दस वत्थू पन्नत्ता अत्थिनत्थिप्पवायपुव्वस्स णं दस चूलवत्थू
पन्नत्ता ।

[९२४] दसविहा पडिसेवणा पन्नत्ता तं जहा- ।

[९२५] दप्प पमायऽणाभोगे आउरे आवतीसु य ।
संकिते सहसक्कारे भयप्पओसा य वीमंसा ॥

ठाणं-१०

[९२६] दस आलोयणादोसा पन्नत्ता तं जहा- ।

[९२७] आकंपइत्ता अणुमाणइत्ता जं दिट्ठं बायरं च सुहुमं वा ।
छण्णं सद्दाउलगं बहुजण उव्वत्तं तस्सेवी ॥

[९२८] दसहिं ठाणेहिं संपन्ने अणगारे अरिहति अत्तदोसमालोएत्तए तं जहा- जाइसंपण्णे
कुलसंपण्णे एवं जघा अट्ठट्ठाणे जाव खंते दंते अमायी अपच्छाणुतावी,
दसहिं ठाणेहिं संपण्णे अणगारे अरिहति आलोयणं पडिच्छित्तए तं जहा- आयारवं आहारवं
जाव अवायदंसी पियधम्मं दढधम्मं ।

दसविधे पायच्छित्ते पन्नत्ता तं जहा- आलोयणारिहे जाव अणवट्ठप्पारिहे पारंचियारिहे ।

[९२९] दसविधे मिच्छित्ते पन्नत्ता तं जहा- अधम्मं धम्मसण्णा, धम्मं अधम्मसण्णा,
अमग्गे मग्गसण्णा, मग्गे उम्मग्गसण्णा, अजीवेसु जीवसण्णा, जीवेसु अजीवसण्णा, असाहुसु साहुसण्णा,
साहुसु असाहुसण्णा, अमुत्तेसु मुत्तसण्णा, मुत्तेसु अमुत्तसण्णा ।

[९३०] चंदप्पभे णं अरहा दस पुव्वसतसहस्साइं सव्वाउयं पालइत्ता सिद्धे जाव
सव्वदुक्खप्पहीणे,

धम्मे णं अरहा दस वाससयसहस्साइं सव्वाउयं पालइत्ता सिद्धे जाव प्पहीणे
नमी णं अरहा दस वाससहस्साइं सव्वाउयं पालइत्ता सिद्धे जाव प्पहीणे ।
पुरिससीहे णं वासुदेवे दस वाससयसहस्साइं सव्वाउयं पालइत्ता छट्ठीए तमाए पुढवीए
नेरइयत्ताए उववण्णे,

नेमी णं अरहा दस धणूइ उड्डं उच्चत्तेणं दस य वाससयाइं सव्वाउयं पालइत्ता सिद्धे जाव
प्पहीणे ।

कण्हे णं वासुदेवे दस धणूइ उड्डं उच्चत्तेणं दस य वाससयाइं सव्वाउयं पालइत्ता तच्चाए
वालुयप्पभाए पुढवीए नेरइयत्ताए उववण्णे ।

[९३१] दसविहा भवणवासी देवा पन्नत्ता तं जहा- असुरकुमारा जाव थणियकुमारा एएसि
णं दसविधाणं भवणवासीणं देवाणं दस चेइयरुक्खा पन्नत्ता (तं जहा)- ।

[९३२] अस्सत्थ सत्तिवण्णे सामलि उंवर सिरीस दहिवण्णे ।
वंजुल-पलास-वग्घा तते य कणियाररुक्खे ॥

[९३३] दसविधे सोक्खे पन्नत्ता (तं जहा)-

[९३४] आरोग्ग दीहमाउं अड्ढेज्जं काम भोग संतोसे ।
अत्थि सुहभोग निक्खम्ममेव तत्तो अणावाहे ॥

[९३५] दसविधे उवघाते पन्नत्ता तं जहा- उग्गमोवघाते उप्पयणोवघाते एसणोवघाते
परिकम्मोवघाते परिहरणोवघाते नाणोवघाते दंसणोवघाते चरित्तोवघाते अचियत्तोवघाते सारक्खणोवघाते,
दसविधा विसोही पन्नत्ता तं जहा- उग्गमविसोही उप्पायणविसोही जाव सारक्खणविसोही ।

[९३६] दसविधे संकिलेसे पन्नत्ता तं जहा- उवहिसंकिलेसे उवस्सयसंकिलेसे कसायसंकिलेसे
भत्तपाणसंकिलेसे मणसंकिलेसे वइसंकिलेसे कायसंकिलेसे नाणसंकिलेसे दसणसंकिलेसे चरित्तसंकिलेसे ।
दसविहे असंकिलेसे पन्नत्ता तं जहा- उवहिअसंकिलेसे जाव चरित्तअसंकिलेसे ।

ठाणं-१०

[९३७] दसविधे बले पन्नत्ता तं जहा- सोतिंदियबले जाव फांसिदियबले नाणबले दंसणबले
चरित्तबले तवबले वीरियबले ।

[९३८] दसविहे सच्चे पन्नत्ता (तं जहा)-

[९३९] जणवय सम्मय ठवणा नामे रूवे पडुच्चसच्चे य ।
ववहार भाव जोगे दसमे ओवम्मसच्चे य ॥

[९४०] दसविधे मोसे पन्नत्ता (तं जहा)-

[९४१] कोधे माने माया लोभे पिज्जे तहेव दोसे य ।
हास मए अक्खाइय उवधात निस्सिते दसमे ॥

[९४२] दसविधे सच्चा मोसे पन्नत्ता तं जहा- उप्पन्नमीसए विगतमीसए
उप्पन्नविगतमीसए जीवमीसए अजीवमीसए जीवाजीवमीसए अनंतमीसए परित्तमीसए अद्धामीसए
अद्धामीसए ।

[९४३] दिट्ठिवायस्स णं दस नामधेज्जा पन्नत्ता तं जहा- दिट्ठिवाएति वा हेउवाएति वा भूयवाएति वा तच्चावाएति वा सम्मावाएति वा धम्मावाएति वा भासाविजएति वा पुव्वगतेति वा अनुजोगगतेति वा सव्वपाणभूतजीवसत्तसुहावहेति वा ।

[९४४] दसविधे सत्थे पन्नत्ता (तं जहा)-

[९४५] सत्थमग्गी विसं लोण सिणेहो खारमंबिलं ।

दुप्पउत्तो मणो वाया काओ भावो य अविरती ॥

[९४६] दसविहे दोसे पन्नत्ता (तं जहा)-

[९४७] तज्जातदोसे मतिभंगदोस पसत्थारदोसे परिहरणदोसे ।

सलक्खाण-क्कारण-हेउदोसे संकामणं निग्गह-वत्थुदोसे ॥

[९४८] दसविधे विसेसे पन्नत्ता (तं जहा)-

[९४९] वत्थु तज्जातदोसे य दोसे एगट्ठिएति य कारणे य पडुप्पण्णे ।

दोसे निच्चेहिय अट्ठमे अत्तणा उवणीते य विसेसेति य ते दस ॥

[९५०] दसविधे सुद्धवायाणुओगे पन्नत्ता तं जहा- चंकारे मंकारे पिंकारे सेयंकारे एगत्ते पुधत्ते संजूहे संकामित्ते भिन्न ।

[९५१] दसविहे दाणे पन्नत्ता (तं जहा)-

[९५२] अनुकंपा संगहे चेव भये कालुणिएति य लज्जाए गारवेणं च ।

अहम्मे उण सत्तमे धम्मे य अट्ठमे वुत्ते काहीति य कंतति य ॥

[९५३] दसविधा गती पन्नत्ता तं जहा- निरयगती निरयविग्गहगती तिरियगती तिरियविग्गहगती [मणुयगती मणुयविग्गहगती देवगती देवविग्गहगती] सिद्धिगती सिद्धिविग्गहगती ।

[९५४] दस मुंडा पन्नत्ता तं जहा- सोंतिंदियमुंडे [चक्खिंदियमुंडे धाणिंदियमुंडे जिब्भिंदियमुंडे] फासिंदियमुंडे कोहमुंडे [माणमुंडे मायामुंडे] लोभमुंडे सिरमुंडे ।

[९५५] दसविधे संखाणे पन्नत्ता (तं जहा)-

[९५६] परिकम्मं ववहारो रज्जू रासी कला-सवण्णे य ।

जावंतावति वग्गो धण्णो य तह वग्गवग्गोवि कप्पो य ॥

ठाणं-१०

[९५७] दसविधे पच्चक्खाणे पन्नत्ता (तं जहा)-

[९५८] अणागयमतिककंतं कोडीसहियं नियंटितं चेव सागारमणागारं ।

परिमाणकडं निरवसेसं संकेयगं चेव अट्ठाए पच्चक्खाणं दसविहं तु ॥

[९५९] दसविहा सामायारी पन्नत्ता (तं जहा)-

[९६०] इच्छा मिच्छा तहक्कारो आवस्सिया य निसीहिया आपुच्छणा य पडिपुच्छा ।

छंदणा य निमंतणा उवसंपया य काले सामायारी दसविहा उ ॥

[९६१] समणे भगवं महावीरे छउमत्थकालियाए अंतिमराइयंसी इमे दस महासुमिणे पासित्ता णं पडिबुद्धे तं जहा- एगं च णं महं घोररूवदित्तधरं तालपिसायं सुमिणे पराजित्तं पासित्ता णं पडिबुद्धे, एगं च णं महं सुक्किलपक्खगं पुंसकोइलगं सुमिणे पासित्ता णं पडिबुद्धे, एगं च णं महं

चित्तविचित्तपक्खं पुंसकोइलं सुविणे पासित्ता णं पडिबुद्धे, एगं च णं महं दामदुगं सव्वं रयणामयं सुमिणे पासित्ता णं पडिबुद्धे, एगं च णं महं सेतं गोवग्गं सुमिणे पासित्ता णं पडिबुद्धे,

एगं च णं महं पउमसरं सव्वओ समंता कुसुमितं सुमिणे पासित्ता णं पडिबुद्धे, एगं च णं महं दिणयरं तेयसा जलंतं सुमिणे पासित्ता णं पडिबुद्धे एगं च णं महं हरिवेरुलिय-वण्णाभेणं नियणमंतेणं माणुसुत्तरं पव्वत्तं सव्वतो समंता आवेढियं परिवेढियं सुमिणे पासित्ता णं पडिबुद्धे, एगं च णं महं मंदरे पव्वते मंदरचूलियाए उवरिं सीहासणवरगयमत्ताणं सुमिणे पासित्ता णं पडिबुद्धे ।

जण्णं समणे भगवं महावीरे एगं च णं महं घोररुवदित्तधरं तालपिसायं सुमिणे पराजितं पासित्ता णं पडिबुद्धे तण्णं समणेणं भगवता महावीरेणं मोहणिज्जे कम्मे मूलओ उग्घाइते, जण्णं समणे भगवं महावीरे एगं च णं महं सुक्किलपक्खं पुंसकोइलं सुमिणे पासित्ता णं पडिबुद्धे तण्णं समणे भगवं महावीरे सुक्कज्झाणोवगए विहरइ, जण्णं समणे भगवं महावीरे एगं च णं महं चित्तविचित्तपक्खं पुंसकोइलं सुविणे पासित्ता णं पडिबुद्धे तण्णं समणे भगवं महावीरे सुसमय-परसमयियं चित्तविचित्तं दुवालसंगं गणिपिडं आधवेति पण्णवेति परूवेति दंसेति निदंसेति उवदंसेति तं जहा- आयारं जाव दिट्ठिवायं, जण्णं समणे भगवं महावीरे एगं च णं महं दामदुगं सव्वरयणा मयं सुमिणे पासित्ता णं पडिबुद्धे तण्णं समणे भगवं महावीरे दुविहं धम्मं पण्णवेति तं जहा- अगारधम्मं च,

जण्णं समणे भगवं महावीरे एगं च णं महं सेतं गोवग्गं सुमिणे पासित्ता णं पडिबुद्धे तण्णं समणस्स भगवओ महावीरस्स चाउव्वण्णाइण्णे संघे तं जहा- समणा समणीओ सावगा सावियाओ, जण्णं समणे भगवं महावीरे एवं च णं महं पउमसरं सव्वओ समंता कुसुमितं सुमिणे पासित्ता णं पडिबुद्धे तण्णं समणे भगवं महावीरे चउव्विहे देवे पण्णवेति तं जहा- भवणवासी वाणमंतरे जोइसिए वेमाणिए, जण्णं समणे भगवं महावीरे एगं च णं महं सागरं उम्मी-वीची-जाव पडिबुद्धे तं णं समणेणं भगवता महावीरेणं अणादिए अणवदग्गे दीहमद्धे चाउरंते संसारकंतारे तिण्णे, जण्णं समणे भगवं महावीरे एगं च णं महं दिणयरं जाव पडिबुद्धे तण्णं समणस्स भगवओ महावीरस्स अनंते अनुत्तरे जाव समुप्पण्णे, जण्णं समणे भगवं महावीरे एगं च णं महं हरि-वेरुलिय जाव पडिबुद्धे तण्णं समणस्स भगवओ महावीरस्स सदेवमणु-यासुर लोके उराला कित्ति-वण्ण-सद्धिसिलोगा परिगुव्वंति-इति खलु समणे भगवं महावीरे इति० जण्णं समणे भगवं महावीरे एगं च णं महं मंदरे पव्वते मंदरचूलियाए उवरिं जाव पडिबुद्धे तण्णं समणे भगवं महावीरे सदेवमणुयासुराए परिसाए मज्झगते केवलपन्नत्तं धम्मं आधवेति पण्णवेत्ति जाव उवदंसेति ।

ठाणं-१०

[९६२] दसविधे सरागसम्मदंसणे पन्नत्ता (तं जहा)-

[९६३] निसग्गुवएसरुई आणारुई सुत्तबीयरुइ मेव ।
अभिगम वित्थारुई किरिया-संखेव-धम्मरुई ॥

[९६४] दस सण्णाओ पन्नत्ताओ तं जहा-आहारसण्णा जाव परिग्गहसण्णा, कोहसण्णा जाव लोभसण्णा लोगसण्णा ओहसण्णा ।

नेरइयाणं दस सण्णाओ एवं चेव, एवं निरंतरं जाव वेमाणियाणं ।

[९६५] नेरइया णं दसविधं वेयणं पच्चणुभवमाणा विहरंति तं जहा- सीतं उसिणं खुधं पिवासं कंडुं परज्झं भयं सोगं जरं वाहिं ।

[१६६] दस ठाणां छउमत्थे सव्वभावेणं न जाणति न पासति तं जहा- धम्मत्थिकायं जाव वातं, अयं जिणे भविस्सति वा न वा भविस्सति अयं सव्वदुक्खाणमंतं करेस्सति वा न वा करेस्सति, एताणि चेव उप्पन्ननाणदंसणधरे अरहा जाव अयं जिणे भविस्सति वा न वा भविस्सति अयं सव्वदुक्खाणमंतं करेस्सति वा न वा करेस्सति ।

[१६७] दस दसाओ पन्नत्ताओ तं जहा- कम्मविवागदसाओ उवासगदसाओ अंतगडदसाओ अनुत्तरोववाइयदसाओ आयारदसाओ पण्हावागरणदसाओ बंधदसाओ दोगिद्धि दसाओ दीहदसाओ संखेवियदसाओ,

कम्मविवागदसाणं दस अज्झयणा प०

[१६८] मियापुत्ते य गोत्तासे अंडे सगडेति यावरे माहणे नंदिसेणे ।

सोरिए य उदुंबरे सहसुद्धाहे आमलए कुमारे लेच्छई इति ॥

[१६९] उवासगदसाणं दस अज्झयणा पन्नत्ता (तं जहा)-

[१७०] आणंदे कामदेवे आ गाहावतिचूलणीपिता सुरादेवे चुल्लसतए ।

गाहावति कुंडकोलिए सद्दालपुत्ते महासतए नंदिनीपिया लेइयापिता

॥

[१७१] अंतगडदसाणं दस अज्झयणा पन्नत्ता (तं जहा)-

[१७२] नमि मातंगे सोमिले रामगुत्ते सुंदसणे चेव जमाली य मगाली

य।

किंसे चिल्लए ति य फाले अंबडपुत्ते य एमेते दस आहिता ॥

[१७३] अणुत्तरोववातियदसाणं दस अज्झयणा पन्नत्ता (तं जहा)-

[१७४] इसिदासे य घण्णे य सुणक्खत्ते कातिए ति य संठाणे सालिभद्दे

य।

आणंदे तेतली ति य दसण्णभद्दे अतिमुत्ते एमेते दस

आहिया॥

[१७५] आयारदसाणं दस अज्झयणा पण्णत्ता तं जहा- वीसं असमाहिट्टाणा, एगवीसं सबला, तेत्तीसं आसायणाओ, अट्ठविहा गणिसंपया, दस चित्तसमाहिट्टिणा, एगारस उवासगपडिमाओ, बारस भिक्खुपडिमाओ, पज्जोसवणाकप्पो, तीसं मोहणिज्जट्ठाणा, आजाइट्ठाणं,

पण्हावागरणदसाणं दस अज्झयणा पन्नत्ता तं जहा- उवमा, संखा, इसिभासियाइं, आयरिय- भासियाइं, महावीरभासिआइं, खोमगपसिणाइं, कोमलपसिणाइं, अद्दागपसिणाइं, अंगुट्ठपसिणाइं, बाहुपसिणाइं ।

बंधदसाणं दस अज्झयणा पन्नत्ता तं जहा- बंधे य, मोक्खे य, देवड्ढि, दसारमंडलेवि य, ठाणं-१०

आयरियविप्पडिवत्ती, उवज्झायविप्पडिवत्ती, भावणा, विमुत्ती, सातो, कम्मे,

दोगेद्धिदसाणं दस अज्झयणा पन्नत्ता तं जहा- वाए, विवाए, उववाते, सुखेत्ते, कसिणे, बायालीसं सुमिणा, तीसं महासुमिणा, बावत्तरिं सव्वसुमिणा, हारे, रामे गुत्ते य एमेते दस आहिता,

दीहदसाणं दस अज्झयणा पन्नत्ता तं जहा- चंदे, सूरे, य सुक्के, य सिरिदेवी, पभावती, दीवसमुदोववत्ती, बहूपुत्ती, मंदरेती, य थेरे संभूतिविजए, य थेरे पम्ह, ऊसासनीसासे,

संखेवियदसाणं दस अज्झयणा पन्नत्ता तं जहा- खुड्डिया विमाणपविभत्ती, महल्लिया विमाणपविभत्ती, अंगचूलिया, वग्गचूलिया, विवाहचूलिया, अरुणोववाते, वरुणोववाते, गरुलोववाते, वेलंध-रोववाते, वेसमणोववाते ।

[९७६] दस सागरोवमकोडाकोडीओ कालो ओसप्पिणीए,
दस सागरोवमकोडाकोडीओ कालो उस्सप्पिणीए ।

[९७७] दसविधा नेरइया पन्नत्ता तं जहा- अनंतरोववण्णा परंपरोववण्णा अणंतरावगाढा परंपरावगाढा अणंतराहारगा परंपराहारगा अणंतरपज्जत्ता परंपरपज्जत्ता चरिमा अवरिमा, एवं-निरंतरं जाव वेमाणिया ।

चउत्थीए णं पंकप्पमाए पुढवीए दस निरयावाससत-सहस्सा पन्नत्ता, रयणप्पभाए पुढवीए जहन्नेणं नेरइयाणं दसवाससहस्साइं ठिती पन्नत्ता, चउत्थीए णं पंकप्पभाए पुढवीए उक्कोसेणं नेरइयाणं दस सागरोवमाइं ठिती पण्णता, पंचमाए णं घूमप्पभाए पुढवीए जहन्नेणं नेरइयाणं दस सागरोवमाइं ठिती पन्नत्ता,

असुरकुमाराणं जहन्नेणं दस वाससहस्साइं ठिती पन्नत्ता, एवं जाव थणियकुमाराणं बायरवणस्सतिकाइयाणं उक्कोसेणं दसवास-सहस्साइं ठिती पन्नत्ता ।

वाणमंतराणं देवाणं जहन्नेणं दस वास-सहस्साइं ठिती पन्नत्ता ।

बंधलोगे कप्पे उक्कोसेणं देवाणं दस सागरोवमाइं ठिती पन्नत्ता, लंतए कप्पे देवाणं जहण्णेणं दस सागरोवमाइं ठिती पन्नत्ता ।

[९७८] दसहिं ठाणेहिं जीवा आगमेसिभद्दताए कम्मं पगरैति, तं जहा- अनिदाणताए, दिट्ठिसंपण्णताए, जोगवाहिताए, खंतिखमणताए, जित्तिंदियताए, अमाइल्लताए, अपासत्थताए, सुसामण्णताए, पवयणवच्छल्लताए, पवयणउब्भावणताए ।

[९७९] दसविहे आसंसप्पओगे पन्नत्ता तं जहा- इहलोगासंसप्पओगे, परलोगासंसप्पओगे, दुहओलोगासंसप्पओगे, जीवियासंसप्पओगे, मरणासंसप्पओगे, कामासंसप्पओगे, भोगासंसप्पओगे, लाभासंसप्पओगे, पूयासंसप्पओगे, सक्कारासंसप्पओगे ।

[९८०] दसविधे धम्मं पन्नत्ता तं जहा- गामधम्मं नगरधम्मं रट्ठधम्मं पासंडधम्मं कुलधम्मं गणधम्मं संघधम्मं सुयधम्मं चरित्तधम्मं अत्थिकायधम्मं ।

[९८१] दस थेरा पन्नत्ता तं जहा- गामथेरा नगरथेरा रट्ठथेरा पसत्थथेरा कुलथेरा गणथेरा संघथेरा जातिथेरा सुअथेरा परियायथेरा ।

[९८२] दस पुत्ता पन्नत्ता तं जहा- अत्तए खेत्तए दिण्णते विण्णए उरसे मोहरे सौंडीरे संवुड्ढे उवयाइते धम्मंतेवासी ।

ठाणं-१०

[९८३] केवलिस्स णं दस अणुत्तरा पन्नत्ता तं जहा- अनुत्तरे नाणे, अनुत्तरे दंसणे, अनुत्तरे चरित्ते, अनुत्तरे तवे, अनुत्तरे वीरिए, अनुत्तरा खंती, अनुत्तरा मुत्ती, अनुत्तरे अज्जवे, अनुत्तरे मद्दवे अनुत्तरे लाघवे ।

[९८४] समयखेत्ते णं दस कुराओ पन्नत्ताओ तं जहा- पंच देवकुराओ पंच उत्तरकुराओ, तत्थ णं दस महतिमहालया महादुमा पन्नत्ता तं जहा- जम्बू सुदंसणा, धायइरुक्खे, महाधायइरुक्खे, पउमरुक्खे, महापउमरुक्खे, पंच कूडसामलीओ तत्थ णं दस देवा महिइडिया जाव परिसंति, तं जहा- अणाढिते जंबुद्धीवाधिपती सुदंसणे पियंदसणे पौंडरीए महापौंडरीए पंच गरुला वेणुदेवा ।

[९८५] दसहिं ठाणेहिं ओगाढं दुस्समं जाणेज्जा, तं जहा- अकाले वरिसइ काले न वरिसइ असाहू पूइज्जंति साहू न पूइज्जंति गुरुसु जणो मिच्छं पडिवण्णो अमणुण्णा सद्दा जाव फासा ।

दसहिं ठाणेहिं ओगाढं सुसमं जाणेज्जा तं जहा- अकाले न वरिसति जाव मणुण्णा रसा मणुण्णा फासा ।

[९८६] सुसमसुसमाए णं समाए दसविहा रुक्खा उवभोगत्ताए हव्वमागच्छंति (तं जहा)- ।

[९८७] मतंगया य भिंगा तुडितंगा दीव जोति चित्तंगा ।

चित्तरसा मणियंगा गेहागारा अणियणा य ॥

[९८८] जंबुद्धीवे दीवे भारहे वासे तीताए उस्सप्पिणीए दस कुलगरा हुत्था । (तं जहा)-

[९८९] सयंजले सयाऊ य अनंतसेणे य अजितसेणे य ।

कक्कसेणे भीमसेणे महाभीमसेणे य सत्तमे दढरहे दसरहे सयरहे ॥

[९९०] जंबुद्धीवे दीवे भारहे वासे आगमीसाए उस्सप्पिणीए दस कुलगरा भविस्संति तं जहा- सीमंकरे सीमंधरे खेमंकरे खेमंधरे विमलवाहणे संमुती पडिसुते दढधणू दसधणू सतधणू ।

[९९१] जंबुद्धीवे दीवे मंदरस्स पव्वयस्स पुरत्थिमे णं सीताए महानईए उभओकूले दस वक्खारपव्वता पन्नत्ता तं जहा- मालवंते चित्तकूडे पम्हकूडे नलिणकूडे एगसेले तिकूडे वेसमणकूडे अंजणे मायंजणे सोमणसे ।

जंबुद्धीवे दीवे मंदरस्स पव्वयस्स पच्चत्थिमे णं सीओदाए महानईए उभओकूले दस वक्खारपव्वता पन्नत्ता तं जहा- विज्जुप्पभे अकावतो पम्हावती आसीविशे सुहावहे चंदपव्वते सूरपव्वते नागपव्वते देवपव्वते गंधमायणे एवं घायइसंडपुरत्थिमद्धेवि वक्खारा भाणियव्वा जाव पुक्खरवर- दीवड्डपच्चत्थिमद्धे ।

[९९२] दस कप्पा इंदहिडिया पन्नत्ता तं जहा- सोहम्मे जाव सहस्सारे, पाणते, अच्युते, एतेसु णं दससु कप्पेसु दस इंद पन्नत्ता तं जहा- सक्के ईसाणे जाव अच्युते ।

एतेसि णं दसण्हं इंदानं दस परिजाणिया विमाणा पन्नत्ता तं जहा- पालए पुप्फए जाव विमलवरे सव्वतोभदे ।

[९९३] दसदसमिया णं भिक्खुपडिमा एगेण रातिंदियसतेणं अद्धछट्ठेहि य भिक्खासतेहिं अहासुत्तं जाव आराहिया यावि भवति ।

[९९४] दसविधा संसारसमावण्णगा जीवा प० तं० पढमसमयएगिंदिया अपढमसमयएगिंदिया एवं जाव अपढमसमयपंचिंदिया ।

ठाणं-१०

दसविधा सव्वजीवा पन्नत्ता तं जहा- पुढविकाइया जाव वणस्सइकाइया बेइंदिया जाव पंचेदिया अणिंदिया, अहवा दसविधा सव्वजीवा पन्नत्ता तं जहा- पढमसमयनेरइया अपढमसमयनेरइया जाव अपढमसमयदेवा पढमसमयसिद्धा अपढमसमयसिद्धा ।

[९९५] वाससताउयस्स णं पुरिसस्स दस दसाओ पन्नत्ताओ (तं जहा)-

[९९६] बाला किड्डा मंदा बला पण्णा हायणी ।

पवंचा पब्भारा मुम्मुही सायणी तथा ॥

[९९७] दसविधा तणवणसतिकाइया प० तं० मूले कंदे जाव पुप्फे फले बीये ।

[९९८] सव्वाओवि णं विज्जाहरसेदीओ दस-दस जोयणाइं विक्खंभेणं पन्नत्ता सव्वाओवि
णं आभिओगसेदीओ दस-दस जोयणाइं विक्खंभेणं पन्नत्ता ।

[९९९] गेविज्जगविमाणा णं दस जोयणसयाइं उड्डं उच्चत्तेणं पन्नत्ता ।

[१०००] दसहिं ठाणेहिं सह तेयसा भासं कुज्जा, तं जहा- केइ तहारूवं समणं वा माहणं वा
अच्चासातेज्जा, से य अच्चासातिते समाणे परिकुविते, तस्स तेयं निसिरेज्जा, से तं परितावेति, से तं
परितावेत्ता तामेव सह तेयसा भासं कुज्जा ।

केइ तहारूवं समणं वा माहणं वा अच्चासातेज्जा से य अच्चासातिते समाणे देवे परिकुविए
तस्स तेयं निसिरेज्जा से तं परितावेति से तं परितावेत्ता तामेव सह तेयसा भासं कुज्जा ।

केइ तहारूवं समणं वा माहणं वा अच्चासातेज्जा, से य अच्चासातिते समाणे परिकुविते
देवे वि च परिकुविते ते दुहओ पडिण्णा तस्स तेयं निसिरेज्जा ते तं परितावेति ते तं परितावेत्ता तामेव
सह तेयसा भासं कुज्जा ।

केइ तहारूवं समणं वा माहणं वा अच्चासातेज्जा से य अच्चासातिते समाणे परिकुविए
तस्स तेयं निसिरेज्जा तत्थ फोडा संमुच्छंति ते फोडा भिज्जंति ते फोडा भिण्णा समाणा तामेव सह
तेयसा भासं कुज्जा ।

केइ तहारूवं समणं वा माहणं वा अच्चासातेज्जा से य अच्चासातिते समाणे देवे परिकुविए
तस्स तेयं निसिरेज्जा तत्थ फोडा संमुच्छंति ते फोडा भिज्जंति ते फोडा भिण्णा समाणा तामेव सह
तेयसा भासं कुज्जा ।

केइ तहारूवं समणं वा माहणं वा अच्चासातेज्जा से य अच्चासातिते समाणे परिकुविए
देवेवि य परिकुविए ते दुहओ पडिण्णा तस्स तेयं निसिरेज्जा तत्थ फोडा संमुच्छंति ते फोडा भिज्जंति ते
फोडा भिण्णा समाणा तामेव सह तेयसा भासं कुज्जा ।

केइ तहारूवं समणं वा माहणं वा अच्चासातेज्जा से य अच्चासातिते समाणे परिकुविए
तस्स तेयं निसिरेज्जा तत्थ फोडा संमुच्छंति सेसं तहेव जाव भासं कुज्जा ।

केइ तहारूवं समणं वा माहणं वा अच्चासातेज्जा से य अच्चासातिते समाणे देवे परिकुविए
तस्स तेयं निसिरेज्जा तत्थ फोडा संमुच्छंति ते फोडा भिज्जंति तत्थ पुला संमुच्छंति ते पुला भिज्जंति ते
पुला भिण्णा समाणा तामेव सह तेयसा भासं कुज्जा एते तिन्नि आलावगा भाणितव्वा ।

केइ तहारूवं समणं वा माहणं वा अच्चासातेमाणे तेयं निसिरेज्जा से य तत्थ नो कम्मति
नो पकम्मति अंचियं अंचियं करेति करेत्ता आयाहिणपयाहिणं करेति करेत्ता उड्डं वेहासं उप्पतति
उप्पतेत्ता

ठाणं-१०

से णं ततो पडिहते पडिणियत्तति पडिणियत्तिता तमेव सरीरगं अणुदह-माणे-अणुदहमाणे सह तेयसा भासं
कुज्जा-जहा वा गोसालस्स मंखलिपुत्तस्स तवेतेए ।

[१००१] दस अच्छेरगा पन्नत्ता (तं जहा)-

[१००२] उवसग्ग गब्भहरणं इत्थीतित्थं अभाविया परिसा ।
कणहस्स अवरकंका उत्तरणं चंदसूराणं ॥

[१००३] हरिवंसकुलुप्पत्ती चमरुप्पातो य अट्ठयसिद्धा ।
अस्संजतेसु पूआ दसवि अणंतेणं कालेण ॥

[१००४] इमीसे णं रयणप्पभाए पुढवीए रयणे कंडे दस जोयणसयाइं बाहल्लेणं पन्नत्ता ।

इमीसे णं रयणप्पभाए पुढवीए वड्ढे कंडे दस जोयणसयाइं बाहल्लेण पन्नत्ता एवं वेरुलिए लोहितक्खे मसारगल्ले हंसगब्भे पुलए सोगंधिए जोतिरसे अंजणे अंजणपुलए रतयं जातरूवे अंके फलिहे रिद्धे जहा रयणे तहा सोलसविधा भाणितत्त्वा ।

[१००५] सव्वेवि णं दीव-समुद्धा दस जोयणसयाइं उव्वेहेणं पन्नत्ता ।

सव्वेवि णं महादहा दस जोयणाइं उव्वेहेणं पन्नत्ता ।

सव्वेवि णं सलिलकुंडा दस जोयणाइं उव्वेहेणं पण्णत्ता ।

सीता-सीतोया णं महानईओ मुहमूले दस-दस जोयणाइं उव्वेहेणं पन्नत्ताओ ।

[१००६] कत्तियानकखत्ते सव्वबाहिराओ मंडलाओ दसमे मंडले चारं चरति ।

अणुराधानकखत्ते सव्वब्भंतराओ मंडलाओ दसमे मंडले चारं चरित ।

[१००७] दस नक्खत्ता नाणस्स विद्धिकरा पन्नत्ता (तं जहा)-

[१००८] मिगसिरमद्धा पुस्सो तिण्णि य पुव्वाइं मूलस्सेसा ।
हत्थो चित्ता य तहा दस विद्धिकराइं नाणस्स ॥

[१००९] चउप्पयथलयरपंचिंदियतिरिक्खजोणियाणं दस जाति-कुलकोडि-जोणियमुहसतसहस्सा पन्नत्ता, उरपरिसप्पथलयरपंचिंदियतिरिक्खजोणियाणं दस जाति-कुलकोडिजोणिपमुहसतसहस्सा पन्नत्ता ।

[१०१०] जीवा णं दसठाणविक्खत्तित्ते पोग्गले पावकम्मत्ताए चिणिंसु वा चिणंति वा चिणिस्संति वा तं जहा- पढमसमयएगिंदियनिक्खत्तिए जाव अपढमसमय पंचिंदियनिक्खत्तिए, एवं चिणं-उवचिणं-बंध-उदीर-वेय तह निज्जरा चेव ।

दसपएसिया खंधा अनंता पन्नत्ता दसपएसोगाढा पोग्गला अनंता पन्नत्ता दससमयठितीया पोग्गला अनंता पन्नत्ता दसगुणकालगा पोग्गला अनंता पन्नत्ता एवं वण्णेहिं गंधेहिं रसेहिं फासेहिं दसगुणलुक्खा पोग्गला अनंता पन्नत्ता ।

◦ दसमं ठाणं समत्तं ◦

मुनि दीपरत्नसागरेण संशोधितः सम्पादितश्च दसमं ठाणं समत्तं

३

तइयं अंगसुतं-ठाणं समत्तं